

انوار الحکما

برنجی جلدی

محرری

اوقاف مایون نظارت جلدی فیود قدیمه عربی مترجمی

امامیہ فی ندبہ زاده

عین صام الری

مترجم

برنجی طبعی — استانبول

[محرری محفوظ]

(حکمت) مطبعہ اسلامیہ

در سعادت

۱۳۳۸ — ۱۳۳۰

اسماء اوقاف ضد و ضد بنی محمد و اقتبایک بنی محمد

نایب

۳۵۳

حقیقه

نایب

۱۹۹

ایمانی مسعود بنی

۷۰

نایب

۲۰۵

عقباتی هاتون بنی

۷۲

نایب

۲۰۹

ایمانی محمد بنی

۷۴

نایب

۲۱۱

ایمانی محمد بنی

۷۶

نایب

۲۱۳

ایمانی محمد بنی

۷۸

نایب

۲۱۵

ایمانی محمد بنی

۹۱

نایب

۲۱۷

ایمانی محمد بنی

۱۰۱

نایب

۲۱۹

ایمانی محمد بنی

۱۰۲

نایب

۲۲۱

ایمانی محمد بنی

۱۰۴

نایب

۲۲۳

ایمانی محمد بنی

۱۰۶

نایب

۲۲۵

ایمانی محمد بنی

۱۰۸

نایب

۲۲۷

ایمانی محمد بنی

۱۰۹

نایب

۲۲۹

ایمانی محمد بنی

۱۱۹

نایب

۲۳۸

ایمانی محمد بنی

۱۲۸

نایب

۲۴۸

ایمانی محمد بنی

۱۴۴

نایب

۲۵۸

ایمانی محمد بنی

۱۴۵

نایب

۲۵۹

ایمانی محمد بنی

۱۴۷

نایب

۲۶۷

ایمانی محمد بنی

۱۴۸

نایب

۲۶۸

ایمانی محمد بنی

۱۴۹

نایب

۲۶۹

ایمانی محمد بنی

۱۵۰

نایب

۲۷۰

ایمانی محمد بنی

۱۵۱

نایب

۲۷۱

ایمانی محمد بنی

۱۵۲

نایب

۲۷۲

ایمانی محمد بنی

۱۵۳

نایب

۲۷۳

ایمانی محمد بنی

۱۵۴

نایب

۲۷۴

ایمانی محمد بنی

۱۵۵

نایب

۲۷۵

ایمانی محمد بنی

حقه ۷۱
۷۷ اوقیه (دقیقه)

عرب اوقیه

پتی (قرینه)

۷۱۶۷
۷۱۶۵

۷۰	حقه با اوقیه	۷۷۴	۷۱۸
۷۷	۷۷	۱۱۶۷	۹۴
۷۹	۷۹	۱۰۸۰	
۱۰۰	اوقیه حقه	۱۱۹	
۱۰۹	با اوقیه	۱۴۵۹	
۱۴۵	۱۴۵		
		مرکب زر	

۱۵۱	مرکب زر	۷۷۴	۹۹۹
۱۸۹	حقه	۷۱۸	
۱۹۶	۱۹۶	۷۱۸	
۱۹۷	حقه غایتی با اوقیه	۱۰۷۹	۱۱
۱۹۸	۱۹۸	۷۳۱	۱۰۵۷
		۱۳۴۱	
	۱۴۵۹		

۱۹۹ با اوقیه من الما حصور
۲۰۱
۲۰۵

۷۷۹
۷۱۸
۷۱۷

امانیه لی


برنجی جلدی

محوری

اوقاف هایون نظارت جلیله سی قیود قدینه عربی مترجمی.


اماسیه لی عبدی زاده

مسین مسام الدیه



برنجی طبعی — استانبول

[مرحق محفوظدر]



درسعادت

حکمت مطبعه سی

۱۳۲۷ — ۱۳۳۰



بسم الله الرحمن الرحيم

الحمد لله رب العالمين والصلاة والسلام على سيد المرسلين
محمد النبي الامين وعلى اله واصحابه المتقين واتباعه المجاهدين الى
يوم الدين

نوع بشرك اخباريني تصوير ، افكاريني تنوير ، آثاريني
تقدير ايدن (علم تاريخ) در . اشكال مختلفه ده حدوث و تكرار
ايدن وقايع تاريخيه تدقيق اوانورسه دنيا ايجون بر قدم ، زمان
ايجون بر بقا تصور اولنه مز .

شئون عالمدين هر بری حدوث و زوال اعتباريله برر تمثال
عبرتدر که حدوثنده بر حکمت ، زوالنده بيک نصيحت مند مجدر .
حکمت حدوثنده قدرت اليه نك بقاسی ، نكبت زوالنده ماسوانك
قناسی ثابت اولور اوبر حکمتدر که انسانه بصيرتي جلب ايدر
بوبر نصيحتدر که هر متفكری ديانتہ جذب ايدر .

ايشته (علم تاريخ) بو حکم حادثاتی کافل ، بونصايخ شئونی
شامل در . هر قومك دنيا ده اسباب کمالی ، عوارض اضمه جلالی
تصوير ايدن (علم تاريخ) در . بر قومك سعادت حالي اقدار ،

عظمت استقبالی احضار ایدن اسباب مهمه نك بری ده تاریخی،
حقیقه بیلمکدر . کائناتده جریان ایدن تبدلاته ، هر قوم ایچون
عارض اولان تحولاته عطف نظر عبرت ایتمین برملت ؛ حیات
سیاسیه سنی محافظه ده تأمین استقبال ایده من . تدریجاً صدمات
مهلکه زواله معروض اولور .

شواسباب مهمیه بناء اسلاف کرام ؛ علم تاریخه فوق العاده
اهتمام ایده رک پک چوق آثار محله تألیف ، عمومی وخصوصی
کتب نادره تصنیف ایتمشلدردر . بخارا ، بغداد ، حجاز ، حلب ،
سمرقند ، قدس ، مرو ، مصر ، یمن کی بلاد مشهوره نك احوال
خصوصیه سنه دائر تألیفه همت ایدیلن (کتب تواریخ)
فوق العاده قیمتمداردر .

بونلرک هر بری ؛ عائد اولدینی بلده دن ظهور ایدن ائمه
علمایی ، مشایخ فقهایی ، کبار امرایی ، اعیان رؤسائی ، ارباب
صناعاتی انساب و فروعیله ، تراجم احوالیه مکملاً ضبط و تفصیل
و او بلده یه عائد اولان شئونات حادثه یی ، وقوعات جاریه یی
علی وجه الصحه قید و تطویل ایده رک شایان عبرت اولان جهاتی
الظار کائناته عرض ایتمکده در .

مثلاً : (ابوبکر الخطیب البغدادی) نك (تاریخ بغداد) ی
(لسان الدین الخطیب التلمسانی) نك (الاحاطه) سی شوافادات
عاجزانه مک برر شاهد ذی حیاتی در . شوایکی خطیبک هم
مشکوره سی ؛ بو ایکی بلده معظمه یی ، طولایسیله عالم اسلامی

احيا ايده جك خدمات علميه دندر . كمال اهتمام ايله تاليف ايديلن
شو ايكي اثر قيمتدارك نظيري ، مع التأسف هنوز بزده
موجود دكلدر .

استانبول ، بروسه ، ادرنه بر درجه استنا ايديليرسه بلاد
مشهوره عثمانيه دن هيچ برينك مكمل خصوصي بر تاريخي
يوقدر . بونلرده يالكز علما ، مشايخ ، شعرا بر درجه ضبط
ايدلديكي حالده قلاع جسيمه ، بلاد مشهوره فتح ايدن وزرا ،
امرا كبي بهادران اسلامك مكمل تراجم احوالنه انساب وفروعنه ،
همم وخدماتنه دائر بر شي يوقدر . بر عشيرتدن جهانكيرانه
بر دولت چيقاران بر ملت معظمه ايچون شو غفلته نقدرتأسف
ايدلسه آزدر .

از جمله (اماسيه) ؛ صحائف توارينخده مقيد اولان شهرتي ،
حادثات ورجالتك كترتي اعتباريله بلاد مشهوره عثمانيه دن معدود
اولديني حالده تاريخنه دائر شمد يه قدر ، هر جهتي جامع ،
بر اثر نافع كوريله مدي .

شوعزيز وطنه ناچيزانه بر خدمت ، تاريخ اسلامك اماسيه يه
تعلق ايدن نقاط مجهوله سني كشف و تحقيقه غيرت ايتك اوزره
(اماسيه سنجاغی) نك وقوعاتنه دائر ، اومنبعدن ظهور ، ياخود
بوسنج قدده توطن ايدن رجال و علمايي ، اعيان و شعرايي ، مشايخ
و اعلامي ، مشاهير بنامي ، اصحاب خيراتي ، ارباب صنايعاتي ؛
ممکن مرتبه ده انساب وفروعيله برابر علاوه ايدرك بر اثر
تحريري تصميم ايلدم .

شو اثری جمع وتلفیق ایچون مقدمه نك نهایتده تفصیل
 ایدلدیکی اوزره یکر می بش سنه استانبول ، اماسیه ، بروسه ،
 حجاز ، سوریه وسائر بلاد وقصبات عثمانیه ده واقع کتبخانه لره
 بونلرده موجود اولان کتب توارینجه ، منشآت ومجامیع اسلافه ،
 محاکم شرعیه سجلاتنه مراجعت وشایان استفاده اولان قیود
 قدیمه ، اوراق وقفیه ، دفاتر خاقانیه ومحکوکات مخلده کبی وثائق
 عتیقه یی تحری ومطالعده بذل مقدرت ایدره ک ترقیم وبرمقدمه ،
 ایکی بابہ تقسیم ایدوب (اماسیه تاریخی) نامیلہ توسیم ایدم .
 بناءً علیه : برقول مشهوره ، یاخود هریازیلان تاریخهمغایر
 برقیده تصادف بیورولورسه مأخذلره بالمراجعہ تصحیح بیورولسنی
 ارباب تدقیق دن رجایه بروسيله اولق ایچون شوائری انظار کائناته
 عرض وتقدیمه جسارت ایدم . (فمن الله العناية والتوفيق)





مقدمه

اماسیه و ملحقاتنك اسامی و مواقع قدیمه و جدیده سنه ، محلات معروفه و نواحی مشهوره سنه ، معلوم اولان آثار قدیمه ، مؤسسات دینیه ، مبانی عالیه سنه دائر تفصیلاتدن باخشد .

(اماسیه سنجاغی) شرقاً و جنوباً (توقاد) و شمالاً (جانیك) و غرباً (چوروم) سنجاقلریله محدود اولوب اماسیه ، حاجیکویی حوضه ، کوپری ، لادیك ، مجید اوزی و مرزیفون قضالرینی حاوی در . شمدیکی حالدۀ سیواس ولایتته مربوطدر .

حال حاضرده یدی قضادن متشکل اولان بوسنجاق ؛ اعصار سالفهده مرکز سلطنت و اون سنجاغی حاوی مرکز ولایت ، بعده اون سکز قضایه حاکم برلوا مرکزی اوله رق تقسیمات سیاسیه اعتباریله پك چوق تحولاته معروض اولدیغی حالدۀ شهرت قدیمه سنی محافظه ایتشددر . الیوم نفوس عمومیه سی ایکی یوز سكسان بیك راده سنده در .

(اماسیه قضاسی) شرقاً (لادیك و اربعه) غرباً (مجید اوزی) و جنوباً (توقاد) و شمالاً (حوضه ، مرزیفون و حاجیکویی)

قضالریله محدود اولوب (اذینه بازار ، اقطاع ، حقله ، کلدکلان) ناحیه لرینی ، یوز التمش قدر قرایی حاویدر . نفوس مجموعه سی التمش سکنز بیک راده سنده اولوب قضا مرکزی (اماسیه بلده سی) در .

(اماسیه بلده سی) شمیدیکی حالداله الی اوچ محلاتی ، سکنز بیک قدر خانینی ، اوتوزیدی بیک قدر نفوسی حاوی در . مرکز سلطنت ومقر شهزادگان اولدینی زمانلرده یتمش قدر محلاتی ، التمش بیک قدر نفوسی اولدینی دفاتر عتیقه دن استدلال اولنور . مؤخرأ شهزادگانک مرکز سلطنت ده اقامتی واماسیه نک سیواس ولایتنه ربطی تنسیب بیورلدینی جهتله اسکی شرفی ضایع اولمش ومحلات ونفوسی تناقص ایتمشدر .

(اماسیه) کوچک آسیا دینیلن (اناطولی) ده کائن ، قره دکنز (صامسون) دن جنوبه طوغری یوز اوتوز اوچ کیلومتره کیری ده واقع ، (فرهاد - فون - پونت) طاغنک اتکنده بر بلده قدیمه در .

قدیمأ موقعی ، شمال شرقی دن جنوب غربی یه طوغرو اوزون بروادی اولوب اصلاتبدل ایتهمشدر . (ایریس ، یشیل) ایرماغل ایکی ساحلی اوزرنده منی در . اورتسی دوز ، جنوب وشمال طرفلری مائل ، منظره عمومیه سی غایت لطیفدر .

(اماسیه) شمال شرقی ده کائن (زمندو - سمندو - زیاره) محله سندن جنوب غربی ده واقع بوغازک منتها سنده (چالاک)

موقعه قدر تقریباً اون اوچ کیلومتره دن عبارت بر طولك مجموعیدر.
عرضی بیک متره دن اوچ کیلومتره قدر متفاوت برو سعتده در.
شرق و غرب طرفلری واسع برر صحرا و اطراف ثلاثه سی بتون
روضه دلارادر .

جنوب طرفلری (پونت) سلسله جبالی و شمال طرفلری
(جانیک و خرنه) سلسله جبالی و غرب طرفلری (شیخ
جوعی - کلکیس) و (قرامان) سلسله جبالی ایله مستور
ایسه ده جنوب غربی ، شرق شمالی ، شمالک بر قسمی طرفلری
آچیقدر . اچیق یره (اماسیه بوغازی) دینور .

شرق شمالی طرفی (صونسه - طاش اووا) یه شمال طرفی
(ارغوما - صولی اووا) یه و جنوب غربی طرفی (دربند ،
چالاک) ه ناظر ، دروازه جسم شکنده اوچ بوغازدر . جنوب
و شمال بوغازلری طار ایسه ده شرق شمالی بوغازی اولدجه
کنیشدر . اماسیه ؛ شو اوچ دروازه سیله جسم بر قصر عالی یه ،
مستحکم بر سرای دلربایه بکزر .

شمال بوغازی اون ، جنوب بوغازی درت کیلومتره قدر
اوزون در . شرق شمالی بوغازی ایرماق بویجه (طاش اووا) یه
قدر توسع ایدر . بوغازلرک هر اوچنده ده ایرماق آقار . بو
ایرماقلرک هر ایکی طرفلرنده باغلر ، باغجلر پک قیمتدار .
منظره لطیفه سی ؛ حسیاتی پک زیاده اوقشار . تماشای لطیفنده
ارواح بشر ذوقیاب اولور .

(آماسیه) نك هر طرفده ظاهرأ كوریلان ، بالتصادف
یر آلتندن ظهور ایدن آثار قدیمه خرابه لری ؛ اعصار سالفه ده
بك زیاده معموریت واحتمشامه ، بك بیوك رفاهیت وانتظامه
نائل اولدیغنی اثبات وارانہ ایتكده در . بو آثار قدیمه ایلروده
كشف وتدقیق اولندججه آماسیه نك قیمت تاریخیه سی بك زیاده
كسب اهمیت ایده جكددر . (قویم البلدان) ده سپاهی زاده محمد
افندی آماسیه بی شویله تعریف ایدیور

« آماسیه ؛ اقلیم سادسنددر . وروم ن بیوك بر شهر در .
سوری وقلعه سی وبستانلری و بیوك ایرماغی ودولابلری وارددر .
بوکا مدینه الحکما دیرلر وبونده کومش معدنی وارددر . سینوبك
شرق جنوبیسنده در ایکسینك مابینی التی کونلك در ضولی الی
یدی درجه اوتوز دقیقه در . عرضی قرق بش درجه در . »

شو تعریف ؛ مراصد الاطلاع ، عقدالجهان ، طریق الرشاد
لباب الانساب ، لب اللباب و اوضح المسالك کتابلرینك تعریفاته
موافق و جمله سی یکدیگرینه قریب اولدیغنی جهتله بونلرك قیود
وتعریفاتی نقل وترقیمدن صرف نظر ایدیله رك « دائرة المعارف »
نام اثرك تعریفی بالترجمه نقل ایدلدی .

(آماسیه) یاخود (آماسیا) یاخود (آماصیه) كوچك آسیاده
بر مدینه در . سیواس ولایتی داخلنده اسمیله مسمی ، مرکز
لوا بر قصبه در . جانیك طلاغلری اتكنده كوزل بر وادی ده
(ایریس) نامیله مسمی اولان یشیل ایرماغك ایکی ساحلنده در .

ضامسوندن جنوب غربی نك سمت جنوبیسنه طوغرو اللی میل اوزاقدر. سکانی یکر می بش، یاخود اوتوزبش بیک نفوسدر. شمالاً درت درجه اللی دقیقه عرضده وشرقاً اوتوز اوچ درجه درت دقیقه طولدهدر.

اطرافنی ؛ جانبلوی قائم ، یوکسك قیالر احاطه ایدر . بونلردن صولده کائن بر قیاده قلعه آثاری وایکی برج یونانی واردر . سلطان علاءالدین سلجوقی بوقلعهنی تعمیر ایتمشدر . بوشهرک بناسی کوزلدر. چوق باغلری واردر . ایرماقودولاب ایله اسقا اولنور . پك چوق آثار قدیمهنی حاویدر . انجق شمعی یه قدر کشف اوانه، مشدر . [۱]

(کوچك آسیا آثار قدیمهسی تاریخ وجغرافیاسی) نام اثرنده فرانسز مورخلرندن (شارل تکسیه) اماسیه دائر ویردیکی معلومات تاریخیه (برنجی باب) ده نقل اولنقله برابر (اماسیه) نی شویله توصیف ایدیور . «اماسیه ؛ اقلیمی لطیف وصحی ، موقعی غایت مستحکم اولوب قدیمأ واسطه مناقلات تجاریه اولدیغی مناسبته رفاه وانتظام قدیمنی محافظه ایتکدهدر . حالبوکه دیگر مواقع مستحکمه قدیمه ، متروک ومنسی برحاله قالمشدر . «
(نزهة القلوب) ده ابوبکر المستوفی شویله توصیف ایدیور «اماسیه ؛ بیوک شهردر. سلطان علاءالدین سلجوقی قلعهسنی تجدید ایتمشدر . حاصلاتی هر درلو شیدندر . صوینی ، هواسی

[۱] دیگر جهات تاریخیهسی (برنجی باب) ده نقل اولنه جقدر .

کوزلدر. [۱] ، (حمدالله المستوفی) تاریخ کزیده سنده اماسیه یی بوماله قریب الفاظ ایله توصیف ایتمکده در .

(شرق خاطراتی) نام اثرنده المانیا مارشال لرندن مشهور (مولتکه) ۱۲۵۴ ده اماسیه یی زیارت وشایان تماشای اولان یرلرینی تدقیق ایده رک « اماسیه ؛ اناطولی شهرلرینک اک کوزلر ننددر . دیمشدر .

شاعر مشهور (ابوالطیب المتنبی) ممدوحی اولان حلب حکمداری (سیف الدوله حمدانی) ایله ۳۴۲ ده اماسیه یی زیارت واطراف وریاضی سیر و تماشایا یتدیکی زمان ، فتحندن دولایي مشارالیه سیف الدوله یی مدح ایدرکن (اماسیه) یی شویله مدح وتعریف ایدیور .

« وبلدة جمعت من کل مبهجة فمیفوت لمرتاد بهاوטר »

« لکل مشترف من رابعها فاق وکل مشترف من افقه اقر »

شوايکی بیتک ترجمه سی شودر. « اماسیه ؛ انسانی تماشاسیله شاد و مسرور ایده جک هر حسن ولطافتی نفسنده جمع ایتش بربلده عظیمه درکه بوراده نائل مطلب اولمق ایچون ترددوتکاپو ایدن هر طالب ، هر درلومقصودینه نائل ، حاجته واصل اولور. مقصدینی فوت ایده رک مأیوس اولماز . »

« اماسیه ؛ اوکنده حوالی واسعه یی شامل بر خانیه مشابه اولوب بو خانه ک هر طرفی برر جبل عالیدرکه هر یوکسک

[۱] بواثر فارسی العبارة اولدینی جهتله ترجمه سی نقل ایداشندر .

طُرفك برافقى واردر . هرافكك يوكسك یری آی پارچه سی کبی
سیوری در . »

اماسیه لی تاجی بك زاده فاضل مشهور (سعدی چلبی)
اماسیه نك باغ و ازهارینی تعریف ، ذوق و مسارینی توصیف
حقنده (خیراحلام) آدلی عربی بر اثر ادبی تألیف ایتمشدرکه
شو قطعۀ بلیغه بوکتابدن نقل ایدلدی .

روضه نورت حائلها	وجرت بینها جداولها
قدخلا بالناعن البلبال	اذ تغنت بنا بلابلها
شابهت نزهة الجنات	بنسیم الصبا عنادلها
كقصور الجنان اشجارها	وازاهیرها قنادلها

بونك ترجمه سی شودر . « اماسیه ؛ صرمه لی قلیچ باغلری کبی
اوزون واکلی اولان موقعی ، چیچکلرله مزین بر حدیقۀ دلار
درکه اورته سندن جریان ایدن ایرماقدن آریلان خرقلری ، باغلرینك
اورته سندن آققده در . بلبلری آواز لطیف ایله تغنی ایتدیکی
زمان ، کوکلمزده غم و کدردن اثر قالمز . »

« اماسیه ؛ ا کدار و مکارهدن سالم ، شهرلره مخصوص
اولان قساوتدن بعید اوله رق جنات عالیاته ، بلبلری ده لطافت
هواده رقت اداده نسیم صبایه ، اشجار لطیفه سی ، انتظام
وارتفاعده قصور جنانه ، چیچکلری ده اشکال مختلفه ده قصور
جنانی تنویر ایدن قدیللره بکزه مکده در . »

دها بك چوق شعرا ، مورخین اماسیه بی نظاماً و نثراً مدح

وئنا ایتمشلردر . فقط ایجاز مقصوده مخالف کوردیکم جهتله
نقندن صرف نظر ایدرک شوائر ناچیزک فهرست اجمالی اونق
اوزره برقصیده مربعه تنظیم وهر مربعک ذیلنده حاوی اولدیغی
معانی تاریخیه بی شرح وایضاح ایلدم .

« ایتدکجه تجلی دله انوار اماسیه »

« شوقیله یاقار قلبی بر ناز اماسیه »

« چشممده دوز اشک شرربار اماسیه »

« قلبمده طور ورحسرت دیدار اماسیه »

شو تصویر اشتیاق آورک باشلیجه سببی (حب وطن) در .
بو حس مشترک بتون (ذی روح) ده موجود ایسهده (حس
انسانی) عمومندن بالاتر در . (وطن = یورد) دائماً محبتله تعالی ،
خدمتله تجلی ایدر . (حب الوطن من الایمان) بیورلمسی بو خصوصده
برهان جلی در . وطنه محبت ، اکا عرض خدمتله اثبات اولنور .
بو حب وطن سائقه سیله فیکرمی سنه لرحه اتعاب ایدرک وطنی
اعلایه وسیله اولان شو خدمتی انتخاب ایلدم .

« بوشهری یابان ، دورا وائلده امیس در »

« دیرلرکه اماسیه دنخی نامی انیس در »

« شاعر دیدی الماسیه دن حذفی سلیم در »

« الماسی چیقارمش کبی احجار اماسیه »

مورخین ؛ اماسیه نك بانیسی حقنده اختلاف ایلدکلرندن
شو مربع ، او اختلافاتی تاحیص ایدیور . اکثر اقوال

مورخیندن استدلال ایدلدیکنه نظراً (اماسیه) شهرینی بناییدن
(آماس) نامنده بر ذاتدرکه مؤخرأ (امیس) نامیلده ده اشتهار
ایتمشدر.

(مفصل قرون جدیده) ده احمد مدحت افندی ؛ «آماسیه»،
نام قدیمی (آماسه آ) اولوب اسکیدن (ایریس) والیوم
(یشیل ایرماق) دینیلان دره اوزرنده کائن دره دییور. (شارل
تکسیه) دخی (کوچک آسیا آثار قدیمه سی تاریخ و جغرافیاسی)
نام اثرنده «اماسیه» نام قدیمی (آمازیس) دره «دیور»
مارشال (مولتکه) ده (شرق خاطراتی) نام کتابنده آماسیه یی
(آمازوس و امیزوس) اولوق اوزره قید ایدیور.

(تاریخ الامم والملوک) ده محمد بن جعفر الطبری و (عقد الجمان) ده
بدرالدین محمود العینی، اناطولی ده فتوحات اسلامیه یی بیان ایدر کن
اماسیه یی (اماسه و امیسه) ناملریله قید و ضبط ایلدکاری کی
ابونصر ابن ما کولا دخی (کتاب الرواة) ده (ماسه) نامیله
ذکر ایدیور.

عجائب المخلوقات) ده زکریا بن محمود القزوی، اماسیه
نهرینی (نهر آماس) و (کنه الاخبار) ده عالی چلبی (نهر امیس)
و (نهر اریس) ناملریله قید ایتلری، اماسیه شهر یی قدیمأ
(آماس) بعده (امیس) ناملریله مشهور اولدیغنی تصحیح
ایدر.

(مرآت العبر) ده دیار بکرلی سعید پاشا دیورکه «پونت

قطعه سی ازمنه قدیمه ده تیار ، سالیب ، موزنیک دینیلان ترك
قیبله لریله مسكون ایدی . مؤخرأ طربزون وامیس (اماسیه)
شهرلرینه یونانیلر هجرت ایتدیلر .

شوعباره ؛ امیس نامشرك قدیمآ اسم مشهوری (اماسیه)
وتوركلكله مسكون ومهاجرت یونانیه دن مقدم موجود اولدیغنی
كوستر مكدده در . توركلرك بونت قطعه سنی استیلا وبوراده غالبانه
توطن واجرای حكومت ایتلمی هجرت نبویه دن تقریبآ
(۲۴۵۰) سنه قدر مقدملرینه تصادف ایدر . یونانیلرك
مهاجرتی ایسه هجرتدلر (۱۶۵۰) سنه قدر اوللرینه مصادف
اولوب (اماسیه) یونانیلرك مهاجرتندن اول بنا ایدلدیكى
اكلاشلمقده در .

شوقیود تاریخیه ده مذكور اولان (آماسه آ) و (آمازیس)
و (آمازونس) و (امیزوس) و (اماسه) و (امیسه) كله .
لرینك آخرلرنده بولنان (ه آ) و (ایس) و (اوس) و (ه)
ادات نسبتلری رفع اولنده (اماس) و (امیس) نامی قالیر .
شو نسبت ، اماسیه شهرینی بنایدن (آماس) نامدیكر (امیس)
اولدیغنی اثبات ایدر .

اماسیه شهرینك تاریخ بناسنه دائر تواریح عمومیه ده برقید
صریح یوق ایسه ده (قرون اولی) نك نصف اولندن اعتبارآ
(اماسیه) شهرى تواریح عمومیه ده مضبوط ومعلوم اولدیغنی
محققدر . بناء علیه (اماسیه) هجرت نبویه دن تقریبآ (۲۴۰۰)

سنه مقدم (آماس) طرفندن بنا ايدليكي ثابت اولور شو حالده
(اماسيه) درت بيك سنه قدر قديم بر شهر عظيم در .

(اماسيه) شهريني بنا ايدن (آماس) کيمدر ؟ . هانكي
قومه منسوبدر ؟ سواللرينه جواب ويرمك مشـكلدر . قرون
اولى تاريخي مضبوط اولمديني جهتله بوسؤاللرك جوابنده هر نه
دينورسه ظنون تاريخيه دن معدود اوله جنى شبهه سزدر . انجق
(آماس) لفظندن وقرون اولى ده پونت قطعه سنده مسـكون
اولان اقوامدن استدلال اولنديغنه كوره (تورك) قوم عظيمنه
منسوب اولديني ظن اولتور .

چونكه (آماس) لفظى ، (آماق [۱]) مصدرندن مشتق
براسم اولديني ، ديكر مشتقاتي اولان (آماج [۲]) و (آمارات)
و (آماق) و (آمان [۳]) و (آمود [۴]) و (آمور [۵])

(۱) برنسنه يي كمال دقتله كورمك ، كوزله مك ، قورومق ، ابراز
حيت ايتك معناسنده در .

(۲) كوزله مك ايون نشان قونيلان و كوزله نيلن يره دينور . بو
معناده (آماق) دخى قوللانيلور . (كتاب الادراك للسان الاتراك) ده
(أُمج : الغرض المتقارب) ديه مذكوردر .

(۳) محافظ و حامى معناسنده در . سمرقند حواليسنده توركلرك
خاقاننه مخصوص بر شهرك اسمى اولديني و تعريب اولته رق (عمان) ناميله
مشهور بولنديني (مروج الذهب) ده مسطوردر .

(۴) لاندون ، طليقه ، يايلى آرايه لريني چكـمك ايچون آتلك
بويونلرينه كچيردكلرى محافظه لى حلقه دركه (هامود) دخى دينور .

(۵) (بهايه الارب) ده مذكور اولديني اوزره توركلرك جدا علاسى در .
و مقدم ، غيور معناسنده (آمارات) معناسنه مساوى اولور و توركستانده
مشهور بر ايرماق اسميدر .

الفاظندن استدلال اولنور . قرون اولی ده (هیت - خطای)
تورکلرینک بونت قطعه سنده مسکون اولدقلری ومدت مدیده
اجرای حکومت ایتدکلری ملاحظه اولنورسه (آماس) نام
ذاتک بوتورکلردن وبونلرک خانلردن بری اولدینی ظنی تقویه
ایدر .

شو ظنون تاریخیه ، حقایق قطعه دن معدود اولمدینی کبی
تعصب ملی دن نشئت ایدن اوهام و افسانه قیلمدن ده دکلدر .
(کوچک آسیاده منسی بر حکومت) نام اثر فرانسوی ده کی هیت
حکمدارلرینک قصاویر محکوکه سی ومعلومات تاریخیه سی مطالعه
وتدقیق اولندینی صورتده شو استدلالک درجه صحتی تقدیر
اولنه بیلور .

بعضلرینک ادعاسنه کوره (اماسیه) مصر حکمدارلرلردن
(آماسیس) نامیله مشهور برذات طرفدن بناوتسمیه ایدلمشدر .
(دائرة المعارف) ده اماسیه نک ترجمه سی بوذاتک ترجمه سندن
صکره تحریر ایدلمسی بوادعای تولید ایتمشدر . حالبوکه بوادعا
تواریخ عمومییه موافق دکلدر .

چونکه : (آماسیس) هجرت نبویه دن (۱۱۹۱) سنه
مقدم مصر تختنه جلوس ایده رک (۴۴) سنه حکومت ایتدیکی
حالده بونت قطعه منی استیلا واشغال ایتدیکنه دائر قید تاریخی
یوقدر . اولسه بیله قبل الهجره (۱۶۵۰) سنه لرنده
موجود اولان اماسیه شهری ونامی قبل الهجره (۱۱۹۱)

سنه لرنده بنا وتسميه ايدلمسى ، حاصلى تحصيل قيانندن اولور .
 (جامع الدول) ده درویش احمد افندى ، ارمنيلردن نقللا
 • اماسيه شهرى هيكانيه قرالارندن اماسيوس بن ارمايوس بن
 ارميناق بن هائيك ابن توجرم بن جومر بن يافت بن نوح
 (عليه السلام) طرفندن بنا وتسميه ايدلديكنى يازييور ايسه ده
 (مرآت العبر) بوكا افسانه دييور .

چونكه : (اماسيوس) جبل ارارات جوارنده (هايكا
 عمار) بلده سنده حكومت وقبل الهجره (۲۵۰۲) سنه سنده وفات
 ايتديكى تحرير ايدلديكى كې بو تاريخلرده پونت قطعه سنده
 (هيت) نام تورك حكومتى موجود اولدينى اثبات اولنيور .
 طوفان ، هجرتدن (۳۹۷۰) سنه مقدم اولدينى واماسيوس التنجى
 بطنده يافت بن نوحه ايرشديكى تدقيق اولنورسه هر بطنك
 (۲۴۱) سنه ده برطوغدينى افسانه سنى ديككه مك لازمكلور .

ذاتاً بو قرالرك ، بوتاريخلرده موجود اولدينى اثبات
 ايدهك دلائل تاريخيه اولمدينى جهتله عموم اوروپا مورخلىرى
 بوكې قرون اولى اقوالنه (خرافات قديمه) نامنى ويرمكده در .
 بناء عليه اماسيه نك بناسى مصر حكمدارى اماسيسيه يا خودارمنى
 قرالارندن اماسيوسه نسبت ايدلمسى برمناسبت اسميه دن عبارتدر
 ايكنجى مصر اعك قافيه سى اولان (انيس در) تعبيرى بو مناسبت
 اسميه اشارتدر .

شومناسبت ، ديكر قول عوامى توليد ايتمشدر . كويا وقتيله

اماسیه‌ده الماس طاشلری چیقدیغی مناسبتله (الماسیه) دینمش
وبعدہ کترت استعمالنه بناءً لامی حذف اولنه‌رق السنه عامه‌ده
اماسیه قالمشدر . « شاعر مشهور (فردوسی رومی) شهنامه
عثمانی ده شوبیتلریله ؛ (۱) بوتسمیه و تحفیه ایما ایتمکده در .

بگفت ای فرستاده پادشا (۲)
ازین جایگاهم نباشم جدا
اماسیه که الماس باشد بسنک
مرانیست دروی مجال درنک

دیگر بر روایت عامه‌ده «اماسیه نك ايلك فاتحی ملک دانشمند
احمد غازی حلیله‌سی (ام آسیه) اماسیه‌ده اقامت ایلدیگی مناسبتله
شهره (ام آسیه) بعدہ تخفیف اولنه‌رق (اماسیه) دینمشدر . نام
قدیمی خرشنه در « دینلمکده در .

(تاریخ آل دانشمند) ده فاتح مشارالیهک حلیله‌سی
(کانش بانو) اماسیه‌ده اقامت ایلدیگی مذکور ایه‌ده (ام
اسیه) یه دائر برصراحت یوقدر اولسه بیله بونلر، وجه تسمیه
اوله‌ماز چونکه : اماسیه نامی قرون اولی دن اعتباراً مشهور
ومعلومدر صکره دن تسمیه ایدلمش دکلدر .

(۱) ۹۶۵ ده کوتاهی‌ده دن اماسیه والیه‌کنه تعیین بیورلدیغنه اعتراض
ایدن (شهزاده سلطان بایزید) ك اعتذارینی حاکی اولتی اوزره
تنظیم ایتمشدر .
(۲) پرتو پاشادر .

بوکی اسامی قدیمه نک تلفظی متکلم لک لهجه سنه و تصرفات لغویه سنه تابع و متغیر اولدینی تاریخاً مشهوردر . حافظ ابوبکر البرزالی تاریخنده و عبدالقادر القرشی (الغرف العلیه) سنده (شمس الدین محمد الاماصی) و (شریف الدین العماصی) ترجمه لرنده اماسیه بی اماصیه و عماصیه نام لرله قید و ضبط ای دیورلر .

(اماسیه) کتب تواریخ و سائر وثائق شرعیه و اجازات علمییه و صوفیه ده مدینه الحکماء ، بغداد الروم ، رومیة صغری ، ارمنیه کبری ، حصن المرأت ، قبة العلماء ، تربة الاولیاء ، دارالنصر ، دارالعز ، دارالفتوح و قصر السلاطین کی اوصاف ممتازه ایله توصیف و تسمیه ایدلیدیکی کمال اشهارینه دلالت ایدر .

(مدینه الحکماء) ارباب عقل و حکمت شهری دیمکدر . بورادن قرون اولی ده جغرافیا کی مهم برفنک مخترع مشهوری (استرابون) و بعده (قومن خاندانی) کی بر ایمپراطور سلاله سی ظهور ایدلیدیکی مناسبتله تسمیه ایدلمشدر . طریق الرشاد ، لباب الانساب ، اوضح المسالك و تقویم البلدان نام اثر لرده بوصفله مذکوردر .

X (بغداد الروم) بلاد روم کی یعنی انا طولی بلادینک بغدادی دیمکدر . بوکا اوچ وجهله مناسبتی وارددر . (۱) خطه عراقیه ده (بغداد) مرکز علمای اسلام اولدینی کی انا طولی قطعه سنده (اماسیه) دخی مرکز علمای بنام اولمشدر . (۲) عراقده (بغداد) دجله نهرینک ایکی ساحلی اوزرنده بنا ایدلمش اولدینی

کبی اناطولی ده (اماسیه) دخی یشیل ایرماغک ایکی ساحلی
اوزرنده انشایدلمشدر. (۳) بغداد شهری مرکز جلیل خلافت
اولدینی کبی اماسیه شهری دخی اوزمان، مرکز عالی حکومت
اولمشدر. بزم ورزم و عجائب المقدور نام اثر لرده بوصفته مذکوردر.
(رومیۀ صغری) کوچک روما دیمکدر. اوروپاده روما
شهری خرسیتیانلق عالمنده حکومت وعیسویت مرکزی اولدینی
کبی اناطولی ده (اماسیه) پونت وقباد وقیا قطعه لرندن متشکل
برایالت ومسیحیت مرکزی اولمشدر. (الخمیس)، (جامع
الدول)، (بهجة التواریخ) کتابلرنده بویله مذکوردر.

(ارمنیۀ کبری) بیوک آرمیاق شهری دیمکدر. قرون
اولی ده پونت حکومتی مرکزی، اماسیه ایدی. رومالیر
قباد وقیا پونت قطعه لرینی استیلا ایتدکری زمان، بو ایکی
دائرہ بی برلشدیروب برایالت اعتبار واماسیه بی مرکز ایالت
انخاز ایتدکلرندن بوایالنه عموماً (آرمیاق) نامی ویرمشلرایدی
دور اسلام ده فتح اولدینی زمان، بوایالت اسمی (اماسیه) یه
نسبتله کسب اشتهار ایتمش وبوجهتله (ارمنیۀ کبری) دینمشدر.
بالاده مذکور اولان اثر لرده بوصفته ده مذکوردر.

(حصن المرأة) ایننه قلعه سی، ایننه لی حصار دیمکدر.
بوصفت، اماسیه قلعه سنه علم اولدینی حالده توسعه (اماسیه)
نامی اوللق اوزره استعمال ایدلمشدر. اماسیه نک شائده کاشن
قلعه بالابدندنده دوز ویالجین مغاره لر، بوتسمیه یه باعث اولدینی

ظن اولنور بومغارلردن برينه اليوم (آينه لي مغاره) ديمسي
بوطني تقويه ايدر . (هشت بهشت) و (الكامل) نام تاريخلرده
بويله مذكوردور .

(قبة العلماء) علمانك مركزي و (ربة الاوليا) اوليانك
جمع ومدفني ديمكدور . اماسيه ، بك چوق فحول علمايه مقرر
و كبار اوليانك فيوضاتنه مظهر اولديغي بو وصفلرله توصيف
اولمسيني انتاج ايتمكدور . اجازات علميه وصوفيه ده بو اوصاف
ايلاه محرردور .

(دارالنصر) نصرت وظفر ك خانه سي ، مركزي ديمكدور .
بونصر وظفر ، اردوي اسلامك الكيوك قومانداني ، سالاري
اولان سلاطين عظامك همت و شجاعتلريله حاصل اولديغي
مناسبتله ، سلاطين اسلامك مركز سلطنتلرينه (دارالنصر)
دينور . اماسيه ؛ آل سلجوق ، آل عثمان سلاطين عظامندن
(سلطان مسعود اول) و (سلطان محمد خان اول) حضراتنك
مركز سلطنتلري اولديغي زمانلرده و نائق شرعيه و ديوانيه ده
صفتله مذكور اولمكدور .

(دارالعز) عزت وسعادتك خانه سي ، مركزي ديمكدور .
بو عنوان ، شهزادكان كرامتك مركز امارتلري اولان بلاده
اطلاق اولنور . اماسيه ، آل سلجوق ، آل عثمان شهزادكان
كرامندن بك چوق ذواتك مقرر اقامتي ، مركز امارتي اولديغي
مناسبتله توصيف ايدلمكدور .

(دارالفتوح) فتوحاتك مصدری، یاخود مظهری دیمکدر.
 اماسیه امارتی، سلطنت جلیله عثمانیه نك شرقی اناتولی ده
 فتوحات عظیمه سنه باعث، یاخود علما و مشایخ کرامك علم و عملده
 فتوحات و فیوضات الهیهیه مظهریتلرینه بادی اولدینی مناسبتله
 بو عنوانه کسب استحقاق ایتمشدر.

(فصر السلاطین) پادشاهلرك کوشکی، مقری دیمکدر.
 اماسیه، ۴۶۷ تاریخندن ۹۸۰ تاریخلرینه قدر بشیوز سنه یی
 متجاوز بر مدت ظرفده سلاطین ساجوقیه و خواقین عثمانیه دن
 بك چوق ذوات عظامك قصور عالیه سیله محشم اولدینی مناسبتله
 بو عنوانی قز ایتمشدر.

مشاهیر فضالان عیدی زاده (عاکف مصطفی افندی)
 اکثر مدشانتنده اماسیه یی (سلیمیه) نامی ایله تسمیه و اظهار
 مجدد ایلدیکی حالدده اشتهار ایده مه مشدر صاحب قران زمان
 (سلطان سلیم خان اول) حضرتلری کبی جهانگیر بر پادشاهك
 اماسیه ده شرف بحش مهد وجود اولدینی بو تجددده باعث اولمشدر.

جنت کیدر سوی جنوبده چقاللر
 گویا که بشیکدر ید قدرت آنی صالار
 مشاطه ایام بهار وجهنی آلالر
 بر لعله دوزر ناظره رخسار اماسیه

بومربع، اماسیه نك اطراف اربعه سندن بر طرفنی یعنی قبله

طرفی ارانه ایدر . اما سیه نك یوقاری بازار طرفنده جنوب
(قبله) طرفی (چقاللر) دیمکله مشهور برکشن لطافتدرکه
سطح زمیندن تقریباً ایکیوزمتره قدر مرتفع ، ذروه سی مستوی
برجبلدر بوجبل ، مشهور فون (بونت) سلسله جبالنك
اتکننده واقعدر . هیئت عمومی سی شمالدن جنوب شرقی یه
طوغرو اوزون ، ایکی طرفی یوکسك ، اورتسی دوز ، شکلاً
مستطیل اولدینی مناسبتله عادتاً اوزون بر بشیکه بکزر . دوز
یرینه (حمزه دوزی) دینور . هواسی غایت صاغلام هر طرفی
باغ لطیف در .

چقاللر ؛ صنع خدا کی غیر مرتب ، فقط نظربا ، تقسیمات
داخلیه سی غیر مساوی ، فقط منظره سی دلفریب ، هر باغنك
ایچنده بر قصر عالی ، برویا ایکی یرنده غایت کور ، ماء جاری
هر صویك کنارنده بر چمنزار لطیف ، هر قصر ك اوکنده بر
کستان شریف اولدینی مناسبتله «جنات تحیری من تحتها الانهار»
وصف جلیله لایق بر حقیقه دلارادر .

چقاللر ؛ ایام بهار ك لطافت فوق العاده سیله تجلی ، قرمزی
کلری ، سیاه بکلی لاله لری عادتاً رخسار خوبائی تنظیر ایدر .
کلرینك منظره ابتسامی ، لاله لرینك مبهجه انتظامی تماشا ایدن
ارباب صفانك نظرنده چقاللر ، لعل کلفامه بورونمش بر عروس
نوبهاره بکزر . چقاللر ك وجه تسمیه سی قریباً ذکر
اولنه جقدر .

صاغنده بونك قاره قيا جنت ديكر
برخوب فريدك ايكي رخسارينه بکزر
ييلدیز کی ازهار ايله مستور سراسر
بونلردن آيره ب صويي کلزار اماسيه

چقاللرک صاغ، یعنی غرب طرفنده کائن (قره قيا) ديمکله
مشهور، بردها روضه بهجت واردرکه اماسيه نك (يوقاری
بازاری - سمره) قسمنده تماميله قبله طرفی احاطه ایدن
يکپاره طاغک برپارچه سی وچقاللرک برتمه سی در . بوجبلده
(فرهاد - فون - پونت) طاغک اتکمنده اولوب (کومدرسه
محلہ سی) اوستندن زنجیرلی قياقربنده واقع (سونکو تلی قيا)
یه قدر غربدن شرق جنوبی یه طوغرو تقریباً درت کیلومتره
طولنده در .

بوبکپاره طاغ؛ ایکی یه منقسم اولدینی مناسبتله (دارالسلام محلہ سی)
اوستنده واقع (خواجه سلطان) اوکنده کی یولک حذا سندن
اعتباراً شرق طرفلرینه تصادف ایدن قسمنه (چقاللر) وغرب
طرفلرینه کلن قسمنه (قره قيا) نامی ویریلیر . (کوشک قیاسی)
التنده واقع (ایپلیک چوزن) مسیر مشهوره سی (چقاللر)
قسمندن (قورد اینی) التنده واقع (چناقلر) وکوبجکزر
محلہ سی اوستنده واقع (قاشیق پیکاری) مسیر لری ده (قره قيا)
قسمندن صاییلیر .

(پیرسنان) نام ديكر (شهره کوسدی) محلہ سنک

اوستنده واقع شهره طوغرو چيقمش اولان سیاہ قیایه (قره قیا) دینورکه بونام ، مذکور سیاہ قیانک اوستنده بولنان باغلره علم مخصوص اولمشدر . شو چیقندی قیایه (بورون) دینور. بونک ایکی طرفلری ده (قره قیا) دن معدود اولدیغی حالده لطافت و طراوتده ایکی وجه تابداره بکزر .

قره قیاده چقاللرکی لطافت هوایی، نظارت دلربایی حازدر. بنفشه سی، چیکدی، صویی مبذول، کرازی مقبولدر. بورانک منظره سی چقاللرک دوزیرلرینه فائق، هرباغی بهجت و نزاہت اعتباریله جنت دیمکه لائقدر. قیا پاشا و اوچلر صویی بوباغلری زیارت ایتدکدنصکره اماسیه خانه لرینی سیراب ایدر .

ایلر ایکی منبع بورانک ذوقی اکال
کویا که بری آب زلال و بری سلسال
بر منبعی یایمش قیا پاشا کی مفضل
دیگر عجم آغا کی معمار اماسیه

بوجیلدن جریان ایدن صولرک مشهوری اوچ منبعدرکه صاحب لرینک نامیله مشهور و خفت و حلاوتجه بربرندن متفاوتدر . بونلره قیا پاشا صویی ، اوچلر صویی، عجم علی صویی دینور. شو ازچ صویک منبعی چقاللر سمتمنده در برده (چیر چیر صویی) اولوب بونک منبعی قره قیا سمتمنده در . اماسیه ده اک زیاده اشتهار ایدن صو ، قیا پاشا و عجم علی صولریدر اوچلر صویی ، عجم علی صوینه ملحق و چیرچیر دخی مقداری ونفی

آذر بونلردن ماعدا پك چوق منابع مخصوصه وار ايسه ده
منافع عموميه ي اك چوق شوايكي منبع ، تأمين ايدر . ديكر
منابعك بونلر قدر شهرتي ، عمومه منفعتي يوقدر .

(قيا پاشا صوي) چقاللرك اوچ كيلو متره قدر ايلروسنده
واقع (ايرمش كوي) يايلاسنندن نبعان ايدرك چقاللره جريان
ايدر . بوسو قديمآ جاري اولوب اماسيه امراسندن طورمطاي
زاده (قيا پاشا) ۸۰۵ ده منبعني تطهير و مجاريسي تعمير ايلديكي
مناسبتله (قيا پاشا صوي) ديمشدر . بوندن اول بوسويه
(طورمطاي صوي) دينورايدى . امير مشاراليه (طورمطاي) دن
بطريق الوراثه حفيدى (قيا پاشا) يه انتقال ايدرك اسكى نامنى
محافظه ايتمكده ايدى .

(قيا پاشا) اماسيه ده حمامنى ، مكتبني بنا ايدوب اون بش
موقعده چشمه لر اعمار ايدرك صوي ۸۰۵ ده وقف و بوچشمه لره
وسائر پك چوق خانه لره اساله وايتار و اوقافنى تعيين ، منافع
عموميه ي بوسورتله تأمين ايلديكندن (قيا پاشا صوي) ديمشدر .
بووقف صويك آقدينى هر خانه دن سنوى اون بش درم عثمانى
يعنى رايح حاضر اوزره اوتوز اوچ غروش قدر برمبلغ اخذ
وجمع و اولادندن برمتولى معرفتيله صويولى و منبعي تطهير و صو
يوجيسى وظيفه سى اعطا اولندقدنصكره فضله وقفى قازانجى
محله سنده واقع مكتبنه صرف اولنسى مشروطدر .

بو مكتب جوارنده كائن حمامى وارداتى كاملاً مكتبه

مشروط اولوب قيا پاشا اولادی زماننده كرك حمای ، كرك مكتهی معمور ایكن تولیت ، پاشای مشارالیهك ذوی الارحامندن رختوان محمد پاشا اولادینه انتقال ایلدكده حمام ومكتب محو ونابود اولمش ، یالكیز وقف صویك واردات سنویه سی جبات اولمقده بولمشدرد .

(عجم علی صوی) چقالرك شرقنده كاشن زنجیرلی قیا جوارنده مشهور درهك اوسئنده (سونكوتلی قیا) دیمكه مشهور قیانك التدن نبعان ایدرك بوده چقالرك جریان ایدر . بوصوده قدیمآ جاری اولوب امامیه خواجهكانندن یعنی تجارندن نیسابورلی (خواجه الحاج عجم علی اغا) ۸۷۳ ده مجراسنی انشا وامامیه ده اون اوج موقعده چشمه لر احیا ایدرك وقف وپك چوق خانه لره ساله ایتدیكى مناسبتله (عجم علی صوی) دیمشدرد . بوصو ، مقدماً اوچلرك تصرفده اولوب مؤخرآ (الحاج محمود چلی) دن عجم علی اغایه شراء انتقال ایتمش وبوده عجم علی محله سئنده بنا ایلدیكى مكتبنه ومنافع عامیه وقف ایله مشدر . كندی محله سیله برابر دیگر جوار محلاته جاری اولان اوچلر صوینه (عجم علی صوی) دیمش ایسه ده اوچلر محله سنه آقان صو ، اسکی نامنی محافظه ایده بیلمشدر . حالبوكه بو اوچلر صوی ده عجم علی اغانك وقفیدر بومكتبك تاریخچه سی محله سی بختنده و اوچلرك کیملر اولدیغی ده اوچلر محله سی بختنده ذکر اولنور انشاالله

بوؤوق صویه عجم علی زاده (بالی بك) وبعده بونك اولادی
متولی اولدقلری زمان ، مومی الیهك مکتبی و سائر خیراتی
حسن اداره ایدلمش ایکن بعده ذوی الارحام اولدقلرینی ادعا
ایدرك ایفای تولیت ایدنلر ، رسوم وقفیه بی جبات ایتدکلری
حاله خیراته باقمدقلرندن ارباب خیرك اعاناته محتاج قالمشلدردر .
(چیر چیر صوی) فرهاد طاعی انکندن نبعان وقره قیایه
جریان ایدر . بوده قدیم الجریان اولوب (امیر علاءالدین
علیشیرالترکائی) طرفندن ۶۲۵ حدودنده مجراسی انشا و کومدرسه
محلله سیله جوار محلاته اجرا ایدلمشدر . ابتدالرنده علیشیر
صوی دیندیکی مضبوط ایسهده مؤخرأ (چیر چیر صوی)
دینسنه باعث نه اولدینی اکلایشیله مدی . (چیر چیر) تعبیری
(علیشیر) تعبیرندن غلط اولمسی اغلب احتمالدر . بو صو
طعم و حلاوتجه امامیه صولرینك عمومته فائق عد اولمقدهدر .
چایه غایت الویرشلی اولدیغندن تریا کیلرك چوغی بو صوی قوللانور
خیلی زماندنبری مجراسی تطهیر ایدلمدیکی جهتله غایت آز
امقدهدر .

جنات جهانك بوراسی صانكه اجلی
شهزاده لره اولمشیدی صید محلی
انظاره اولور کوشکلی قیادن بوده باللی
بر مرکز سلطان ایکن اقطار امامیه

بوقره قیا ؛ لطافت منظره ، کثرت میاه ، صفوت هوا ایله
 مشهور بر مکان عالی اولدیغندن جهت شرقیه سی (سلطنت
 جلیله عثمانیه خاندانی) نه مخصوص املاک همایون عدادینه
 داخل اولمشیدی . بوسبيله عثمانلی شهزادگان کرامی اماسیه ده اقامت
 بیوردقلری ائنده بوجت شرقیه شهزادگانه (صیدگاه) اولمشدر .
 انجق قره قیاجه تنده اعیان وامرآنک املاکی بولندیغنه باقلیرسه
 (صیدگاه) اولان جهت یالکز چقالر اولدینی ا کلاشیلیر .
 (چلی سلطان محمد خان) حضرتلری اماسیه ده اجرای
 حکومت بیوردینی ائنده الیوم (کوشک قیاسی) دیمکه مشهور
 اولان (کوشکلی قیا) ده یوجه بر کوشک انشایتدیرمش وشهزاده
 (سلطان احمد) دورنده بو (کوشکلی قیا) ا کلهجه لری
 شعرای عصرک ورد زبانی بتون عوامک داستانی اولدینی پک
 چوق محررات خصوصیه مطالعه سندن استنتاج ایدلمشدر .
 بو کوشکک بقیه آناری ، خرابه قدیمه سی الیوم مشاهده
 اولنمقده در . (شهزاده سلطان مصطفی) دورنده معموریت سابقه سنی
 محافظه ایلدیکی حالده مشارالیهک وفات نا کهانیسندن تقسیماته
 معروض اوله رق اسمی دخی تبدل ایتمشدر .

اک صوکره چقال زاده لره قسمت اوفر
 اولدی بورادن حین تفرقه ده میسر
 شمدی اوراسی ، بونلرک آدی ایله اشهر
 ایتدی بونی تحقیق ، پرستار آماسیه

بو عالی جبلك جهت شرقیه سی بالتوارث (سلطان سلیمان خان اول) حضرتلرینه انتقال ایلدکده شهزاده هایونلری (سلطان مصطفی) اما سییه والیسی اوله رق کلش و بوراده (صیفیه) انشا ایتدیروب اقامت ایلدیکی ائنده مشاهیر علمادان (سیرک محی الدین افندی) و بعده مرزیفونی (خیرالدین حضر افندی) و بعده مشهور (سروری افندی) خدمت تعلیمده و مشاهیر ادبادن (حمدی، زمانی، ادایی) کبی شعرا ورستم بك زاده (غنجه کیوان) و لالابك زاده (بنفشه احمد) وغازی بك زاده (چیکدم علی) بکدر ایله چقال زاده (کل سنان چلبی) کبی نورسیدکان ندبلك خدمتلرنده بولمشلرایدی. بونلردن غنجه، چیکدم بکدره و چقال زاده (لاله علی چلبی) ایله (کل چلبی) یه و لالاسی حمزه بکه شهزاده مشارالیه برر قطعه باغ احسان و تمليك ایتمشد. الیوم (حمزه دوزی) دیزیلن یر لالا حمزه بکه (غنجهلق) نامیله معروف اولان حمزه دوزینك جهت شرقیه سی غنجه بکه اصابت ایتدیکی ا کلاشمقده در. کل و لاله چلیبک موقعی، حمزه دوزینك جهت غربیه و جنوبیه سی اولدیغی ظن اولنور. بوزمانلرده شهزاده مشارالیه انتساب ایتمەنك یولی بنفشه، غنجه، کل و لاله ردیفلی قصائد تنظیم و تقدیم اولدیغی بیلن شعرا دن چوققلری بویولده قصیده لر، غزللر تنظیم و تقدیم ایتمشلردر. بوزلرك بر قسمی (منتخبات اشعار) مجموعه لرنده مندرجدر.

۹۶۷ ده اماسیه والیسی ایکن قره مصطفی پاشانک مکربینه
اوغرایوب عازم دارنعم اولان شهزاده (سلطان بایزید) کغیبوت
ابدیه سی اوزربینه (صیدکاه شهزادگان) اولان بورانک مجموعی
امرا وارکان واعیانیه فروخت ایدلدیکی ائنده (چقال (۱) زاده کل
سنان ولاله علی) چلبیلره بیوک بر قسمی اصابت وبعده (لاله
علی چلبی) حصه سی مخدومی لاله زاده (محمد چلبی) یه وبعده
بو حصه ده (سنان چلبی) یه انتقال ایتمشیدی .

مؤخر ا مشارالیه چقال زاده (سنان پاشا) سیواس والیکندن
معزولاً ۱۰۰۵ سالنده ارتحال ایتکله بوراسی مخدوملری
(محمود ، یوسف ، محمد) پاشالره وقیزلربینه انتقال ایتمش
(محمود پاشا) بلاولد وفاتیه حصه سی فروخت ایدلدیکی کبی
(محمد پاشا) دخی وفاتیه مخدومی (احمد بک) ویوسف پاشا
زاده (احمد پاشا ، محمد بک) حصه لربینه صاحب اولدقلری
حالده (احمد پاشا) ۱۰۷۶ ده وفاتیه قیزلری (منوره ، فاطمه)
خاملره و محمد بک زاده (احمد بک) دخی ۱۰۹۱ ده بلا ولد
وفاتیه اولاد اناثه وسائرلره انتقال ایلش اولدینگی اماسیه تاریخنه
خدمتکار فیخری اولان محرر عاجز طرفندن تحقیق ومحکمه
شرعیه سجالاندن استخراج ایدلمشدر .

[۱] چقال قاضی دیمکله مشهور اولان (بدرالدین محمود چلبی)
اولادینیه چقال زاده لر دینور . بونلر ایجری شهرده (حاجی محمود
چلبی زاویه سی) اوقافنه متولی ایدیلر .

مقدمارنده بورالرہ تغلیباً (چقال اوغللری باغلری)
 دینورایدی . بعدہ تخفیف اولنہرق (چقاللر باغلری) دینمشدر .
 (چقاللر) تورکجه مزده (چقال اوغللری) تعییندن مختصر
 اولدینی امثال عدیده سیله اثبات اولنور . طوپال اوغللرینه
 (طوپاللر) اورتاق اوغللرینه (اورتاقلر) صال اوغللرینه
 (صاللر) دیندیکی مشهوردر .

غربنده بونک کوه جلی شهره فرهاد
 کویا اثر عشق ایله ویرمش اکا بنیاد
 رومیلر آنک دامنه (ونک) دیمش آد
 لکن بودر اعجوبه اخبار آماسیه

قره قپانک غرب جنوبیسنه تصادف ایدن یوکسک ویالچین
 قیایه (فرهاد قیاسی) وبوقیانک شرقه طوغری اوزانان سلسله سنه ده
 (فرهاد طاعی) دینور بوطاغ ، (پونت) سلسله جبالنک
 غرباً مبدائی عد اوانسوب ارضرومه کیدر وبورادن ایرانه
 کیروب کیلان جوارنده (کوه بیستون) ه اتصال ایدر وبوراده
 نهایت بولور . پونت طاعلرینک مبدائی فرهاد ، متعاسی
 (کوه بیستون) اولدینی مناسبتله بوطاغله عموماً (کوه بیستون)
 دیندیکی بعض جغرافیای عربی کتابلرنده کورلمشدر .
 (فرهاد قیاسی) آماسیه نک جنوب غربی بوغازی اوزرنده

اولدیغندن قیآنك تصادف ایتدیکی یرلره (فرهاد اراسی) دینور .
 قیآنك سطح زمیندن تقریباً اوچویز متره قدر ارتفاعی واردر .
 جهة غربیه سی یالچین اولوب اوستی دوز ، شمالی اتکی باغ
 بوستان اولدینی حالد جنوب غربی اتکی سیاه طاشدن عبارتدر .
 دوزیرلرینك شرق طرفلری لطیف یایلارله ، صولاق وهوادار
 کویله کیدر . تمامیه غربیه ناظر اولان قیآنك انکسند زمیندن
 تقریباً اوچ متره قدر یوکسك یرنده قوس شکنده بر اویوق
 مشاهده اولمقدهدر .

بو اویوق تقریباً آلتی قدم عرضنده وایکی بچق متره
 قدر عمقنده اولوب کویا دونکی کون اویولمش کی مجدد برحالد
 بولندینی ازباب تماشایی حیران ایتمکدهدر . قیآنك اسمندن وشو
 اویوقدن و مجرانك اخور اوکنه قدر امتداددن استدلال
 اولنه رق بعض خرافات احداث ایدلمش والسنه عوامی شو
 روایت عجیبه اشغال ایتشددر .

کویا « معهود (شیرین) ه عاشق اولان (فرهاد) ،
 معشوقه سنه وصلت اوغورینه اوتوز طقوز کونده ! او بیوک
 واوزون صو یولنی یاپارکن اوکنه تصادف ایدن بو قیایی عشقله
 دلمش ! اولدیغندن (فرهاد قیاسی) دینمشدر ! » بومصالحه قوت
 ویرمك ایچین (فرهاد قیاسی) نك اوستنده الیوم مشهود
 اولان بش متره اوزونلغنده وایکی بچق متره قدر کنیشلمکده کی
 مزار ، (عاشق فرهاد) ه نسبت ایدلمش واسکی زمان آدملرینك
 یونی اوزون اولدینی کوسترلمشدر .

اماسیه مورخی قره مفتی زاده (مصطفی واضح افندی) تاریخ‌نحده بو (فرهاد قیاسی) مسئله‌سنی تدقیق و حل ایتدیکی ائشاده «الجواب : شیرینه عاشق اولان فرهاد دلمشدر، دیه افتا ایدیور ایسه ده غالباً شو اجتهادنده خطا ایدیور چونکه : بوفرهاد آراسنده واقع (اویوق) هرایکی طرفدن تعقیب و تدقیق اولئورسه ؛ اماسیه یه تقریباً اون بش کیلو متره قدر بعد مسافه ده جهت جنوبیه ده بولنان (شاهین قیاسی) اوکندن ابتدا و بر متره قدر عرضنده وایکی متره قدر عمقنده اولدینی حالده فرهاد آراسندن، می دده اوکندن مرور ایدرک کو مکرسه ، شامیجه ، رجب ، چریباشی ، عجم علی ، اوزون مصطفی ، کشلی زاده . محمد پاشا ، سوادیه محله لرینی دولاشوب بایزید محله سنده واقع کبریخانه نك جنوبنده برقا اوزرنده درت متره قدر قطرنده مربع بر شکله اویولمش اولان دلیکه منتهی برصو یولی اولدینی ا کلاشیلور .

بو صو یولی ، و قتیله غایت منتظم ، کارگیر اوله رق یاییلمش اولوب مجموع طولی شو حساب اوزرینه اون سکز کیلو متره قدر امتداد ایدر . بو صو یولی (شاهین قیاسی) اتکلرنده واقع دره لرك صولرینی جمع ایدرک اماسیه شهرینه یوزلرجه سینه لر آقدینی ، صو یوللرینک ایچنده مشاهده ایدیلان اون سانتیمتره قدر قالین سونکو تلردن، قوری یوصونلردن استدلال اولنمقده دره . بو صو یوللری ، شاهین قیاسی اوکندن شهره قدر بر سیاق

اوزره یاپیلمش اولوب شهره کیردکجه جسمات پیدا ایتدیکی
اکلاشیلور . مثلاً شاملیجه محله سنه تصادف ایدن قسمی، جسم
اولدینی کبی محمد پاشا محله سنه تصادف ایدن قسمنده صولرک
حالا موجود و جاری بولندی، بهار کونلرنده تزاید و ایام حارده
تناقص ایتدیکی مشاهده اولنور . صولرک جریانیله برابر تزاید
و تناقصی و شهره کیررکن یوللرک خراب و قورو اولسی تدقیق
اولنورسه شهره کیردکدنصکره بو صو یوللرینه دیگر منابعدن
صو قاریشدینی ثابت اولور .

شمدی شو قدر آثار عظیمه نك قدر مصرفله، قاج سنه ده
وجوده کله جکی تأمل اولنورسه بر فرهادك تك باشنه ، اوتوز
طقوز کونده دکل، اوتوز طقوز سنه ده بیله یاپه میه جغنده شبهه
ایدیله مز . اوج ساعتك بر بعد اوزرنده یاپیلان جسم صو
یوللرینه صرف ایدیلن کیرچ بیله اوتوز طقوز کونده یاقیله مز .
هله درت ، بش یرده تونل شکلنده اویولمق شرطیله قیالرده اجرا
ایدیلان عملیات جسمیه یی بر آدمه نسبت ایتك قدر صفوت
درون اوله مز . هر حالده بو جسم صو یوللرینی یاپدیرانلرک
پك بیوك اقتدار ملکی و مالی یه مالک اولدینی ، اولسی لازم
کالیدیکی شبهه سز کورلمکده در .

(قاموس الاعلام) ده اماسیه ده اجرای حکومت ایدن
(پونت) حکمدارلرلرندن (مهرداد) ك زیله ده یاپدیردینی بیان
اولونان مجاری عظیمه ، مبنی جسمیه ایله اماسیه ده کرک قلعه ده ،

كرك شهرك درون و بیروننده کوریان بوکی آثار قدیمه مقایسه
اولنورسه بوصو یوللرینی یاپدیران دخی حکمدار مومی الیه
(مهرداد) یاخود اسلافی اولدینی تخمین اولنه ییلور. اماسیه یی
زیارت ایدن آلمان ، فراسر ، انکلز سیاحلری شو آثار قدیمه یی
تدقیق ایدهرک (پونت) حکمدارلرینه نسبت ایتمکده درلر .

بالاده نقل ایدیلان مصالک احداثه باعث اولان سببک
رنجیسی بوقیانک (فرهاد قیاسی) و طاغکده (فرهاد طاغی)
اسملریله مشهور اولمسیدر (فرهاد ، شیرین) مصالی ذاتاً خیالی
برروماندر . بوزومانک موضوعی اولان (کسری ، شیرین)
معاشقه سی تحریف ایدیلهرک (فرهاد ، شیرین) دینلمشدر .
(نظامی کنجوی) طرفندن (کسری ، شیرین) معاشقه سنی
مصور اولهرق تنظیم ایدیلن اثر ادبی ، غایت مشهور و مقبول در .
(کسری) ایران شاهی (خسرو پرویز) اولوب (شیرین) ده
بیزانس ایمپراطوری (موریس) ک قیزی (ماریه) در . بونلرک
صورتلری ایرانده (کوه بیستون) ده محکوکدر .

(اخبار العباد) و (طریق الرشاد) کتابلرنده محرر
اولان عبارۀ عربیه نک ترجمه سی شودر . « بیستون طاغی :
عراق عجمده کیلان بلادنده مشهوردر . اوطاغک تپه سینه -
قدر چیقماق ممتنع در . بر یوزی یوقاریدن اشاغی یه قدر
دوزدر . ارقه سنده بر مغاره ایچنده صو کوزی و اوزرنده
کسری و شیرین صورتلری واردر ،

(بیستون) تعبیری (پونتوس) تعبیرندن غلط محرف اولسی واما سیه (پونتوس) سلسلهٔ جبالنک اتکننده بولمنسی کبی ملاحظات ، شو روایت عجیبه‌یی تولید ایتسه کرک . بو روایتک صحتی فرض ایدلسه بیله بو صو یوللرینی ، معهود فرهادک یاپمسی تاریخاً پک اوزاق ، پک واهی در . چونکه (کسری ، شیرین) قصه‌سی هجرت نبویه‌دن اوتوز سنه مقدم اولدینی حالده بو صو یوللری ، هجرتدن یدییوزسنه اول موجود ایدی . شو حالده بو قیایه (فرهاد قیاسی) دینمنک سببی نه در ؟ مؤلفی ، تاریخ تألیفی معلوم اوله میان بر مجموعهٔ تاریخیه ده [۱] مذکور اولدینی اوزره « ایران شاهی (خسرو پرویز) کوچک آسیایی استیلا واما سیه‌یی اشغال ایتدیکی زمان ، امراسندن (فرهاد بن افروخته) بی اما سیه وحوالیسی والیلکنه نصب ایتمش و مذکور صو یوللرینی ، اما سیه والیسی (فرهاد) اعمار ایله مش اولدینی مناسبته (فرهاد قیاسی) دیندیکی روایت ایدلمکده در »

(مرآت العبر) ده بیان اولدینی اوزره (خسرو پرویز بن هرمز تاجدار بن نوشیروان عادل) هجرت نبویه‌دن اوتوز بر

[۱] بوجوهٔ تاریخیه اسبق چوروم مفتیسی مشاهیر نوابدن (الحاج احمد افندی) یدنده اولدینی وچورومده بنا ایلدیکی کتبخانه‌سنه وضع ایلدیکی محرر عاجزه بوجوهٔک مندرجاتیله برابر مجالس عدیده ده بیان ایتشدور .

سنه مقدم تخت ایرانه جالس اولوب هجرتك یدنجی سنه سنده
مقتول اولمش وقاین پدری بولان بیزانس ایمپراطوری (موریس) ی
روملرك خلع واعدام ایتملرینه حدت ایدرهك ایران اردوسیه
استانبوله قدر هجوم و کوچك آسیانی اشغال ایتمش ویدی سکز
سنه قدر پونت ایالتی ایران حکومتی اداره سنده قالمشدر .

شو استیلانك صحتی ، ادعا ایدیلن تعمیر و تسمیه نك معقول
اولسنی ایجاب ایدرسده فرهاد بن افروخته نك اماسیه والیسی
اولدینی و بونكده مذکور صو یوللرینی تعمیر ایلدیکی تاریخاً
مشكوك در صحیح اولسه بیله بو استیلادن صكره اماسیه روملرك
تكرار اداره سنه رجوع ایدرهك در تیوزیتش سنه قدر بونلرك
اداره سنده بولدینی زمان ، روملرك خصم جانی اولان ایرانلی
بر قوماندانك اسمی فتح جلیل اسلامه قدر نصل محافظه و نقل
و ایصال ایلدیکی شایان تدقیق در .

(تاریخ آل دانشمند) ده مذکور اولدینی اوزره (ملك
احمد دانشمند غازی) ۴۶۷ حدودنده خرجه (اماسیه) بی
محاصره ایلدیکی ائنده امرادن (فرهاد غازی) حلواجی پیکاری
اوکندن حرکتله فون (پونت) طاغنی آشوب قبله طرفندن
اماسیه اوزرینه اینمسی تنسید ایدلمش اولدیغدن امیر مومی الیه
(فرهاد غازی) دلاوران اسلام ایله فون طاغنه چیقیدیسه ده
بالمحاربه شهید اوله رق اورایه دفن ایدلمشدر .

شو قیده نظراً بوطاغك اوزرنده کوریلن مزار عجیب ،

امرای دانشمندیه دن اولان بو (فرهاد غازی) بکک مزاری اولدینی و مؤخرآ امیر مشارالیهک نامی بو طاعه علم مخصوص اوله رق قالدینی ا کلاشیلیر . یالکز مزاری صکره دن بیسوک یابدقوری وعاشق فرهاده نسبت ایتدکلی تخمین اوته بیلیر . هر حالده بوصویوللری ، ایکی بیک سنه مقدم انشا ایدلدیکی ویک چوق سنه لر جریان ایتدیکی شبهه سزدر . بو (فرهاد قیاسی) نک جنوب اتکلی (حلواجی پیکاری) و شمال اتکلی (ونک) دیمکله مشهور اولوب هرایکیسی ده شوسه یولی اوزرنده کا ئندر .

(حلواجی پیکاری) بوغازک منتهای شرقیسنده در . ۱۰۶۴ ده وفات ایدن اسبق امامیه متسلمی (حلواجی محمد اغا) طرفندن اورایه بر چشمه بنایدلش اولدینی مناسبتله (حلواجی پیکاری) دیمشدر . بعده امامیه اعیانندن (الحاج ابراهیم اغا) ۱۲۱۰ ده بو پیکاری تعمیر و مجراسنی تطهیر ایده رک صوینی اجرا و برقاج دکان وقف و احیا ایتمشدر . بو چشمه ایله فرهاد اراسنده (بک پیکاری) نامیله دیگر بر چشمه ارلوب ۱۱۶۴ ده اسبق میرلوی مصر (الحاج عثمان بک) انشا وصوینی اجرا و اواقفی تنظیم ایتمشدر . الیوم هرایکیسی ده خرابدر .

(ونک) دنک و زننده اسم علمدر . توقاده کیدن شوسه یولنک صول طرفده (می دده اوکی مزارانی) نک صوکنده (حاجیلر میدانی) اوستنده کا ئن بر صرتک اسمیدر . ایکی طرفی ده روم وارمنی خرسیتانلرینک قبرستانیدر . اوراده ایکی چاتی و آغدرمه

اولوب ايکيسنک آراسی آچیق بریولدر . بویولک منتهاسنده
کیس طوپراقلردن متشکل قیا شکنده برکتله ترابیه واردرکه
منفدلردن بلانقطاع صولر داملار . اطرافی چوراقدر .

داملهلرک جمعنه مخصوص اولهرق قیانک التنده سیاه طاشدن
معمول اوفاق بر حوض واردر داملایان صولر بو حوضده
طوپلانیر . صوینی غایت پارلاق ایسهده طاتمز و آغیردر .
بوراسی بتون خرسیانلر اراسنده محترم بر موقعدر . هرپازار
کونلری خرسیانلر بوراده اجتماع وعیش وعشرت ایدهرک عودت
ایدرلر ایکن چوراغنی (جوهر) دیه یوزلرینه ، آللرینه
سوررلر .

بوراسی قدیم آخرستیان قبرستانی اولدیغی حالده ۱۳۰۰ تاریخلرینه
قدر روملرک ، ارمنیلرک بورایه انجق قبرستانی زیارت قصدیه
نادرا کیتدکلری کورلمیکده اولوب متروک ، معطل بر حالده خراب
ایکن بو تاریخدن صکره ابتدا ارمنیلرک ، بعدده روملرک پلزار
کونلرنده محل اجتماعی اولمش وبو تاریخدن صکره ایکی ملت
اراسنده بعض روایات عجیبه ظهور ایدهرک بورایه دواملری ،
حسیات دینه دن نشئت ایلدیکنی کلا تمق ایسته مشلردر .

روملر دیورکه : « حواریوندن (پیه ر) نامیه مشهور
اولان (بطرس) تلامذه سندن (یوانیس) امامیه سکاتی دینه
دعوت ایتمک اوزره مأمورا کلوب اوراده اطورمش و خرسیانیه
تلغک حق اولدیغنه دلیل اولمق اوزره طاشدن صو آقتمش

اولديغندن بورالر (يوانيس) ناميله مشهور اولدينى حالدە
مؤخرأ تخفيف اولنهرق (ونك) ديمشدر . »

ارمنيلر ديوركه : « حواريوندن (اوهانيس) روان
داخلنده (اچيازين) شهرنده اقامت وارمنيلرى دينه دعوت
ايدوب حسب الاحباب قيصريه عزميت ايدركن اماسيه كلدكه
اعدانك تعقيبندن كندى تخلص ايچون اورايه كيزلنمش و برقاق
كون صكره صوصامش ، وارقه سنده طاياندينى طاشه امرايدرك
صولرى آقتمش اولديغندن بورالره (اوهانيس) نامى ويرلش ،
صكره دن تخفيف اولنوب (ونك) ديمشدر . »

شوايى روايت تدقيق اولنورسه ايكي سى ده برمنبعدن ظهور
ايلديكى اكلاشيلير (ونك) اسمنده و تخفيفنده اتحاد ومنشأ
اصل سنده اختلاف ايدلديكى كوريلير . روماليلر و خريستيانلق
تاريخلى مطالعه اولنورسه شو ونكل كرك (يوانيس) ، كرك
(اوهانيس) ايله لفظ ومعنا ده بر مناسبتى اولمدينى كورولور .
روما امپراطورى ظالم مشهور (نرون) ك روماده نشر عيسويت
ايدن (بطرس) ايله تلامذه سنى هجرتدن (۵۶۲) سنه مقدم
يعنى ميلادك ايكنجى عصرنده قتل و خريستيانلىرى پك فثاعذيب
ايتديكى مشهوردر .

اماسيه ده خريستيانلق ، انجق ميلادك دردنجى عصرى
اوانلنده ظاهر اولدينى وارمنيلرك اراسنده خريستيانلق ، ميلادك
اوچنجى عصرنده ظهور ايتديكى و هجرتدن (۳۰۰) سنه اولنه

قدر خرستیانلرک روما دولتی رجانندن کورمدکلی عذاب و شدت قالمدیغی ملاحظه اولنورسه میلادک برنجی و ایکنجی عصرنده یوانیس و اوغانیس نام راهبیرک اماسیهده نشر دین واختفا ایتمسه وهم دینور .

طرمطای جامعی وتربهسی وخلفت غازی مدرسهسی وتربهسی طاشلرینک بعضلری اوزرنده محکوک اولهرق کوریلن عبارات رومیهدن اکلایشیلدیغنه کوره ونک تسمیه ایدیلان موقعک شرق طرفنده قدیمآ بر کلیسا و بطریقخانه اولدیغی موقعنده کوریلن خرابه لر اثبات ایتمکده در . فتح جلیل اسلامدن صکره خراب اولوب انقاضدن مدرسه وجامع شریف وتربه بنا ایدلمشدر .

(تاریخ آل دانشمند) ده مذ کور اولدیغی اوزره ۴۶۷ تاریخنه قدر اماسیه بطریقی اولان (هرقلوس) انشای محاصرهده وفات ایتدیکنندن (ونکیوس) اماسیه بطریقی اولوب (ملک احمد دانشمند غازی) فاتحانه اماسیه کیردکه بطریق مومی الیه (ونکیوس) نائل مساعده اولهرق مذ کور کلیسا و بطریقخانهده مدت مدیده اقامت ایتمشدر .

۶۲۲ ده اماسیه قاضی القضاتی (تقی الدین عثمان بن علی) اضاسیهله مصدق اولان خلعت غازی وقفیه سننده وبعض حدودنامهده اورالره (ونکیوس) نامی ویرلدیکی کورلمکده در . شو وئائق عتیقهیه نظراً بطریق مومی الیه ونکیوسک اوراده بر مدت اقامتی، باعث تسمیه اولوب ابتدا لامی حذف اولهرق

(ونکیوس) بعده (یوس) لفظی ده ترك اولنه رق (ونك) دینمش اولدینی بك صریحدر .

(مصطفى واضح افندی) تاریخنده دیورکه : « ونك ده جسم بر کلیسا وار ایدی . رومیة صغری (اماسیه) ده بو کلیسا عموم اناطولی کلیسالرینك مرجعی ایدی . اماسیه بطریق (ضغائر) بو کلیساده اقامت ایلدیکی ائئاده سفیرنبوی (دحیه بن خلیفة الصحابی . رضی الله عنه) حضر تلری مکتوب عالی . رسالتپناهیی روم ایمپراطوری (هرقل) ه تسلیم ایلدکده مضمون شریفنی تحقیق ایچون بو (ضغائر) ه ارسال و صحابی . مشارالیه اماسیه کلوب تبلیغ کیفیت ایلدکده (ضغائر) روملری بو کلیساده جمع و قرائت و کنديسی تصدیق وشهادت ایتمکله روملر اوزرینه هجوم وضغائر شہید ایتمشد . »

نقل وتأيیددن عاری اولان بوروایت ، (الخمیس فی احوال النفس النفیس) ده منقول ومذکور ایسه ده عندالمحدثین مقبول دکلدر . [۱] حضرت (دحیه) نك اماسیه یی تشریفی ، حضرت (صهیب رومی) نك چورومده دفنی کبی غریب وغیر موثوقدر . (الاصابه فی تمیز الصحابه) ده مسطور اولدینی اوزره مشارالیه (دحیه صحابی) حضر تلری یدنجی سنه هجریه اوائلنده ایمپراطور هرقلك نزدینه سفارته اعزام بیورلمش و ایمپراطوره (حمص) ده

[۱] بدرالدین محمودالعینی ، صحیح بخاری شرحنك برنجی جلدنده حضرت دحیه نك سفارته دائر بك موثوق ایضاحات ویرمکده در .

ملاقاتی اوله رق ا کال امر سفارتله عودت و (۴۳) حدودنده دار نعیمه رحلت ایتمشدر .

مشرق طرفی بر جبل شاهق مسمور
زنجیرلی قیا نامی ایله عالمه مشهور
زنجیری انک اوز سنه اول ایدی منظور
حیرتله باقاردی ا کا ابصار اما سیه

اماسیه نك (یوقاری بازار) قسمه نسبتله مشرق طرفی (زنجیرلی قیا) دیمکله مشهور ضایت بیوک ، اوجی سیوری بر قیادر . یوقیا ، پونت سلسله جبالندن آیرلمش اولوب جنوبدن شماله ، یعنی اماسیه نك ایچریسنه طوغری اوزانمشدر . کمشلی زاده محله سی جنوبنده واقع (چقور باغچه) موقعنه قدر کیرمشدر . غربه ناظر اولان جبهه سی دوز ویالچین اولوب تقریباً اوچیوز متره قدر مرتفعدر . یالچین یرنده (مشقکاه) حذاسنده زمیندن تقریباً التمش متره یوقاریسنده قیایه مربوط ، برارشون طوانده اوتوز سانت متره قدر قطرنده بر زنجیر اولدینی مناسبته (زنجیرلی قیا) دینمشدر .

بوزنجیرک نه زماندنبری اوراده مربوط اوله رق بولندینی معلوم دکلدر . خرافات قدیمه دن اولمق اوزره اما سیه ده دوران ایدن روایت عجیبه دن استدلال ایدمک ممکن اولورسه اما سیه ده

اجرای حکومت ایدن (پونت) قرالری زمانندن قلمه برزنجیر
اولدینی اگلاشیلیر . ۱۳۱۱ تاریخنه قدر بو زنجیر ، موجود
اولدینی حالدہ برکیجه دوشمش وتما محله سنده ساکن اولان
ارمنیلر ارسنده غائب اولمشدر .

بوقیانک ذروه سنه قریب ، شمال طرفنده کوریلن آرالغه
(کدیکلی قیا) دینور بوراسی دوز چنزار لطیف اولوب ایام
بهارده شایان تنزه برمسیره در . یان طرفنده صوکوزی ، اوکنده
لطیف باغچه لری والتنده (تمنا محله سی) وارددر . بو محله نیک
اوستنده بولونان دوزیره (مشقه کاه) والیوم قافک حذیفه
تحقیفاً (مشقه کاه) دینور .

بو موقعده شیخ الخطاطین ، مشهور (حمده افندی)
شاگردانه تعلیم خط ، اعطای مشق ایتدیکی مناسبتله (مشقه کاه)
دینمشدر . بوموقعک جنوبنده صوکوزه سی اولوب درین اولدینی
جهتله غربدن شرقه اینر قویو شکلنده یاییلمش وطاش مردیون
ایله اینلمکده بولنمشدر . بورای ۸۷۸ ده خضر پاشانک کتخداسی
(حسام الدین اغا) بنا ایتمشدر .

کدیکلی قیانک اشاغی یرنده ، شمال شرقی طرفندن (چقور
باغچه) یه ناظر دیگر برقیا وارددر که اوستی دوز اولدینی مناسبتله
(یاصی قیا) دینور . بوقیانک (صغیرپازاری) نه ناظر اولان
غرب شمالی جبهه سنده ازمنه قدیمده تر به اولمق اوزره اویولمش
ایکی مغاره وارددر . بو مغاره لره عائد تفصیلات تاریخیه قریباً
ذکر اولنه جقدر . انشاء

بالوس قیاسی شرقه اوزانمش بوقیادن
بولمش اتکی فیض و شرف صنع خدادن
عالیدر آنک منقبه سی مدح و ثنادن
زیرا بوراده مستتر ابرار امامیه

بوزنجیری قیآنک ارقه سندن شرق طرفه طوغرو اوزانوب
کیدن قیایه (بالوس قیاسی) دینور. وجه تسمیه سی معلوم
اوله میان شو قیا (لقمان طاعی) نه التصاق و بورادن (پونت)
سلسله جباله التحاق و لقمان طاغنده اولان نقطه التصاقی بر
دره تشکیل ایدر.

بو قیآنک شمال اتکی غایت لطیف، منظره سی دلفریب،
بر موقع عالی اولوب قدرت فیاضه خدا بورایه هر درلو حسن
ولطافتی، فیض و شرافتی احسان بیورمشدر. دوزیرینه (بکتر
سرای) دینور. اوراده خلافت معظمه عثمانیه نك محتشم بر
سرای، حضرت (پیرالیاس خلوتی) نك عالی بر تربه سی اولوب
(پادشاهان آل عثمان ادام الله خلافة نسلهم الی آخرالدوران)
حضر اتندن برقاج صاصبقران ذیشانك مولدی و پك چوق فضلا
واولیانك مدنی در.

بالوس قیاسی مقابلنده بولونان طاغه (لقمان طاعی) دینور که
(صواقچه محله سی) ارقه سندن (کبریخانه) اوکنه قدر اینر. بو
قیآنك منتهاسنده یول اوزرنده قدیما تربه اولمق اوزره اویولمش
اولان بره غاره واردر. بو طاغك جنوب طرفلری غایت یوکسك،

هوادر ، بر یایلا اولوب اماسیه ده دارالشفا طیبی (رشیدالدین لقمان بن حسن الخوارزمی) [۱] نام حکیمک ملکی اولدیغی . مناسبتله یایلایه ، طاغه ، صویه عموماً (لقمان یایلاسی) ، (لقمان طاغی) و (لقمان صویی) دینشددر .

حکیم مومی الیه یایلاده دوزبر موقعده مدفون اولوب مزارلی غایت بیوک یاپیلمشدر . فرهادک مزارینه مشابه اولوب نبوت وولایتده اختلاف اولونان مشهور (لقمان حکیم) اولمق اوزره کوسترلنمکده در . فقط بولقمان ، فرهادکی بر شخص موهوم اولیوب (۷۲۷) سنه هجریه سی رجالندن اولان (رشیدالدین الخوارزمی) در . حکیم مومی الیهک اسمی ، او روایت معهوده یی تولید ایتمشدر .

بالوس قیاسی الیه لقمان طاغی اراسنده لطیف ، واسع بر دره اولوب هراییکی طرفی باغ و بستان ، باغچه وکلستان در . بودره (بکرسرای) اوزرنده ایکی قوله منقسم اولوب برقولی صوفیلر محله سنه یعنی غرب طرفه ، دیگر قولی ده بایزید پاشا محله سنه یعنی شمال طرفه اینر .

اوستنده سرای شرف آباد قدیم در ،
ایشته بوراسی مولد سلطان سلیم در
بر قیشله و مکتب الیه عمرانی عظیم در
بونلرله تجدد ایدر ادوار اماسیه

[۱] ترجمه سی (باب ثانی) ده ذکر اولنه جقددر .

السنة عامهده (بکسر سرای) ، (سرای دوزی) ، و (پیر-الیاس) دیمکله مشهور اولان بو موقع مستثنی ، فتح جلیل اسلامه قدر کیملره مقرر ومسکن اولدینی معلوم اولهمدی . فقط حکومت دانشمندیه نك فتحندن اعتباراً اماسیه یه حاکم اولان سلاطین وامرای اسلامک مرکز اقامتی اولمقله بر موقع تاریخی اوله رق طانمشدر . اطرافنده و اوستنده جابجا کورولن خرابه لر؛ بومقام عالی ده پک چواق ذواتک استراحت واجرای حکومت ایتدکلرینی اثباته مدار اولور .

بوراسی ۶۱۴ تاریخی اوله رق بولونان بروثیقہ شرعیـهده (ملک غیاث الدین شاه) دیه معروف ومقید بولمنسی (سلطان مسعود سلجوقی) دورندن اعتباراً مقرر شهزادکان اولدیغنه دلیل اوله بیلور . مؤخرأ ۶۶۵ تاریخـلرندہ وزرای سلجوقیه دن مشهور (معین الدین پروانه) بکک انشته سی اولان امیر کمشلی (امین الدین یونس المستوفی) تصرفنه کچوب امیر مشارالیهک ارتحائنده اولادینه انتقال ایدہ رک طول مدت بونلرک تصرفلرنده قالمشدر .

کمشلی زاده (تاج الدین محمود چلبی) اماسیهده اجرای امارت ایتدیکی زمان ، بورایه بر قصر عالی بنا ایدوب شرق طرفی (کمشلی زاده کوشکی) غرب طرفی (کمشلی زاده باغچه سی) دیمکله مشهور اولمشدر . امیر مشارالیه ، باغچه سی باشنده بنا ایلدیکی محتشم ، سنکین ، فقط اوافق تربه سنده حلیـه نه سی

(دوندی خاتون) و کریمه سی (عایشه خاتون) ایله مدفوندر .
 ۸۰۰ سنه سی اوائلنده اماسیه یی والیکله تشریف بیوران
 (چلبی سلطان محمد خان) حضرتلری (کمشلی زاده کوشکی)
 یرینی کمشلی زاده (خواجه جلال چلبی) دن اشترا وبعده بر
 سرای عالی انشایتدیرمش و (کمشلی زاده باغچه سی) تمامیه کمشلی
 زاده سلاله سی یدنده قالدیفندن کمشلی زاده (پیرالیاس الخلوتی)
 و دامادی کمشلی زاده بیوک (عبدالرحن چلبی) و دیگر کمشلی زاده
 (خیرالدین حضر الخلوتی) قدس الله اسرارهم حضراتی (محمود چلبی)
 تربه سی جوارنده دیگر بر تربیه دفن ایدلمش و بوضو رتله (کمشلی
 زاده باغچه سی) تدریحاً قبرستان اولمشدر .

لکن شرق طرفی اولان موقع عالی ، (خاندان آل عثمان)
 ایچون اماسیه ده سرای عالی اولمق اوزره اوچینوز اللی سنه قدر
 قالمش و (سلطان مراد خان ثانی) ایله (سلطان سلیم خان اول)
 حضراتی کبی ایکی پادشاه عالیشانک مولد سعادتلری اولمشدر .
 (چلبی سلطان محمد خان) حضرتلری بوراده اون الی سنه
 و (سلطان مراد خان ثانی) حضرتلری یکر می سنه و (سلطان
 بایزید خان ثانی) یکر می الی سنه اقامت بیورمشلردر . بعده (شهزاده
 سلطان احمد) و (علاء الدین) و دیگر (شهزاده سلطان احمد) و (مصطفی)
 و (بایزید) چلبیلرده بوراده اجرای امارت ایتمشلردر .

بو سرای عالی ، خرابه قدیمه سنه نظراً و قتیله بیوک بر
 حرمسرای ، سلامنی ، قپو اوکنده اغالره مخصوص اوچ

دائرة جسميهي ، ايكي حمای ، ايكي مطبخی ، جسمي ايكي باغچهي واورته لرنده مرمردن مصنوع برر حوضی و غرب جنوبي طرفنده ديكر برقصري مشتمل وكافه شتملاتي محيط اولق اوزره جسمي ، كاركير ديوار ايله محاط اولديغي اكلاشلمقه در .

۱۱۴۷ تاريخنه قدر بو سراي عالی ، مكرراً زلزله كي حادثات كونييه معروض اوله رق مكرراً تعمير ايدلمش اولديغي حالده بو تاريخده واقع اولان زلزله دن مصاب اولمش ويران محارباتي توالي ايتديكي مناسبته تعمير ايديله مه مش اولديغدن بردها خراب اوله رق قالمشدر . ۱۲۴۱ زلزله سنده تماماً منهدم اولوب عرصه خاليه شكلنه كيرمش و بك چوق قيمتدار طاشلر ير آلتده قالمشدر .

۱۳۰۰ تاريخدن اعتباراً اطرافدن تجاوزاته معروض اولديغي كورولمكله ۱۳۱۱ حريقنده اماسيه (مكتب اعداديسي) ده محترق اولديغدن بر مكان مناسب تحري ايدلديكي ائنده استانبولي عارف بك زاده (محمدكامل بك افندي) اماسيه متصرفي اوله رق كلش و مشاراليهك تنسيبي اوزرينه بو سراي عالی باغچه سنك سمت غربي سنه (مكتب عالی اعدادي انشا وانظار عموميه بوسرايك يرني اولسون حسن محافظه ايتمه جلب ايدلمشدر .

ارمني لوك اختلال حريته وروانه لري ، اختلاجات مليه شكلنده

جلوه نما اولديغنه بناءً اماسيه سنجاغی آلاي مرکزی اتخاذ
وبرطابور نظاميه عسکری اقامه ايدليکندن ۱۳۱۶ ده اسکی
سرایک اورتہ یرنده محشم برقیشلہ بناسنی الزم کورن متصرف
مشاراليہ وردیف ضابطانی کمال غیرتله انشاو ۱۳۱۸ ده ا کمال
ایتملردر .

ضابطان مومی الیهم طرفلرندن صرف ایدیلن مساعی
مشکوره سایه سنده اسکی حمام ومطبخ تجدید و باغچه سی اعمار
ایدیش وبر (تعلیم میدانی) تسویه اولنه رق جوارنده بولونان
(مکتب اعدادی) ایله بوقیشله ، اماسیه ده افکار جدیدہ
عثمانیہ نک تنویرینه پک بیوک همت ایتمش وبوصورتله تجاوزات
ناروانک اوکی انہ بیلمشدر .

یاننده صغوق چشمه که بر باغ ارم در
خوش منظره در لطف هوا ، دافع غم در
تسnim کبی آبی دخی بر فضل نعم در
ویرمش بورایه بهجتی دادار اماسیه

بو سرايک جنوب شرقی سنده کائن دره نک ایکی طرفنده
بولونان باغلره ، باغچه لره و او دره یه (صغوق پیکار) دینور .
بو دره دن جاری اولان صویه دخی (صغوق پیکار صوینی)
دینمکده در . بودره نک یوقاریسی ، پک لطیف اورمان اولوب

فندق اغاجلری و سائر اشجار مشمره مبدولاً بولونور اورتہ۔
سندن جریان ایدن صو ، غایت کور و صغوق اولوب دردنک
ایکی طرفندہ موجود اولان دکر منلری اداره و باغلری اسقا ایدرک
التندہ بولونان محلاتی احیا ایتکده در .

بو صغوق پیکار صوبی لقمان طاغندہ حکیم مومی الیهک
مزاری جوارندن نبعان ایدرک بولطیف دردیہ جریان ایدر .
کشملی زاده (تاج الدین محمود چلبی) کندی محله سنده بنسا
ایلدیکی متعدد چشمه لره بوصودن اسالہ و ایثار ایتمشدر . دادار
حقیقی اولان جناب حقک شودردیہ احسان بیوردینی لطافتی ،
بوصو فوق العاده تزئید ایدرک منظره طبعیہ سنہ حسن و رونق
ویرمش و هواسنک غایت صاغلام اولسی مراتب عالیہ اربابی
کندینہ جلب ایله مشدر .

بر قلعه مستحکمه در سمت شمالی
آثار کرامتیه اسلاف ایله مالی
شمدی ایسه عمران و سکوندن ایچی خالی
کویا سپر دافع پیکار اماسیه

اماسیہ نک شمال طرفلری یوکسک قیالر ایله محاط اولوب
بو قیالردن تام اماسیہ نک اورتہ سنہ ناظر اولان برقیانک اوستندہ
غایت مستحکم و صعب المرور برقلعه موجود اولوب آثار قدیمه سی

محیر عقول اوله رق مشهور در . قرون سالفه ده پک چوق اقوام
مختلفه وحکمدارانک محل سکون ونحصی اولدیغی مناسبته هر
برندن پک چوق اثار قدیمه قیمتمدار قالمشدر .

اماسیه نك اطراف مختلفه سنده اسملری مضبوط و اثار
قدیمه سی مشهور اولدیغی اوزره یدی قلعه اولدیغی استدلال
اولنور . بونلرده حروف هجا ترتیبی اوزره (ارغوما ، اندرون ،
بالوس ، خرشنه ، زمندو ، فون ، کاسکیس) قلعه لریدر بونلردن
ماعددا قلعه خرابه سی اولدیغی ظن ایدیلن بعض اثار قدیمه یه
تصادف اولنمقده ایسه ده بونلری اسملریله برابر ایضاح ایده جک
بر قید بولنه مه مشدر .

(۱) (ارغوما قلعه سی) صولی اووایه ناظر اولان شمال
بوغازینک منتهاسنه قریب بر موقعنده بوغازک ایکی طرفنده قارشیلقلی
اوله رق بنا ایدلمش اولدیغی خرابه خفیفه سندن ا کلاشلمقده
اولوب کرک بوغاز و قلعه ، کرک اوکنده بولونان جسیم اووا
(ارغوما) نامیله مشهور و قیود عتیقه ده محرردر .

فقط بواسمک صورتی (ارغوما ، ارغوماس ، ارغوناما ،
ارغوناماس) کبی اشکال مختلفه ده مقید اولدیغنه باقیلیرسه
(ارغون آماس) شکندن مخفف اولدیغی ظاهر اولور . شو
تحفیف ظاهری ، بوقلعه نك (ارغون آماس) طرفندن بنا
ایدلیکنی اخطار واسکی تورکلرک اثار قدیمه سندن اولدیغی
اشعار ایتمکده در .

(۲) (اندرون قلعه‌سی) نامیله مقید اولان (ایچ قلعه)
 محررات عتیقه‌ده (باطن امامیه) نامیله ده مسطوردر . بوقلعه ،
 امامیه محیطک ایچنده اولوب شرقاً (هلیکس محله‌سی) و غرباً
 (سابق‌الدین محله‌سی) و جنوباً (یشیل ایرماق) و شمالاً (خرشنه
 قلعه‌سی) ایله محدود و طولی بیک ایکوز متره قدر ممتد اولوب
 (اشاغی قلعه) دخی دینور . درت قپوسی ، ایکی برچی اولوب
 غرب طرفی غایت متین در .

ایرماق ساحلنده برسور عظیم تملی مشاهده اولنوب بوسورک
 ارتفاعی (ماغدینوس قپوسی) سوریه مقایسه اولندیغی صورتده
 ایرماغک یتاغندن اعتباراً اون ایکی متره قدر اولدیغی اکلاشیلیر .
 زلازل متوالیه تأثیراتیه بوسور عظیم خراب اولدیغندن تسویه
 اولنمشدر .

قبولرک بری (هلیکس) طرفده ، دیکری (الحاق کوپری)
 اوکنده اولوب ایکسی ده بی لزوم اولدیغندن هدم ایدلمشدر .
 الحاق کوپری اوکنده کی قبویه (سرای قپوسی) دینوب
 ۱۲۸۱ ده امامیه متصرفی (ضیا پاشا) طرفندن هدم ایدلدیکی
 واولدجیه مکمل ، سیاه مرمردن مصنوع ، طاقی پک ظریف
 اولدیغی بیان ایدلمکده در .

(ماغدینوس قپوسی) سلطان بایزید جامع شریفی اوکنده
 اولوب اوفاق اولدیغندن مرور وعبوری تسهیل ایچون ۱۳۲۶
 سنه لرنده توسیع ایدلمشدر . محررات عتیقه‌ده (ماغدنوس ،

مغدینوس ، معده نواز) کبی اشکال مختلفه ده مسطور اولوب
 الیوم (ماده نوس) دینکده در . بوقویه (ماده نوس قپوسی)
 دیندیک کبی اوکنده کی کوپویه دخی (ماده نوس کوپرسی)
 دینور .

(میدان قپوسی) غرب طرفده میدان کیدن یول اوزرنده
 (سابق الدین محله سی) اوکنده واقعدر . بو قپو واوستی
 وبتون محیطی غایت صاعلام اولوب هدمی ، بناسندن مشکل
 برحالده متین اولدیغندن دها پک چوق سنه لر حادثات کونیه
 مقاومت ایده یلمسی مأمول در .

بو ایچ قلعه نك ارقه سنده کائن مغاره لرك حداسنده برسر ای
 قدیم خرابه سی کورلمکده اولوب السنه عامه ده (قیزلر سرائی)
 دینکده در . بوسرایک خرابه سندن استدلال اولندیغنه کوره
 ایکی قپوسی ، داخلیه سی ، خارجیه سی ، باغچه سی ، ایکی حمامی
 ومطبخی واردر . بونلر عموماً طوپراق آلتنده قلوب داخلیه
 قسمی یوکسک ، هوادار بر موقعه در . خارجیه دیواری وقپوسی
 طور ییور .

جنوب طرفده اولان قپوسی غایت جسیم اولوب غربه
 ناظر واوکی بایردر . اطرافی محکم ایسه ده اوستی منهدم اولمشدر .
 دیگر قپوسی شرقه ناظر اولوب (هلیکیس محله سی) اوکنده در .
 یوقپو اوافق اولوب تونل شکلنده یولی واردر .

بو سرایک (اسفندیار سرائی) نامیله مذکور اولدیغنی

(جهاننا) ده کاتب چلبی تصریح ایدهرک « قسـطـمونی حاکمی
کتوروم بایزید اوغلی اسفندیار ، بوسرای ده اقامت ایلدیکندن
(اسفندیارسرائی) دیشدر . « دیورایسه ده اصابت ایدمدیکی
اکلاشیلور .

(باب اول) ده کوریله چکی اوزره حاکم مومی الیه (بایزیدک)
طرفدن مخدومی (اسفندیاربک) سفارتله اماسیه حاکمی شادکلدی پاشا
زاده دواتدار (احمدبک) نزدینه کلوب برماه قدر اقامت ایلدیکی
(بزم ورزم) ده محررایسه ده بوندن صوکره یوزاللی سنه دن زیاده عثمانلی
شهزادکانه ، خاتونلرینه ، سلطانلرینه مقر اولان بوسرای ده
بو قدر جق اقامت ایدن اسفندیار بکه نسبت ایدلمسی برازمه تبعه درر .
بک چوق و ثائق شرعیه و سجلات عتیقه ده مقید اولدیفی
اوزره ۹۹۰ تاریخلرندن اعتباراً بوش قالان بوسرای علومه
اماسیه اعیانندن سیدی علی زاده (اسفندیار چلبی) بن اسکندر
چلبی بن خضر چلبی طول مدت مأموراً اقامت و ایضای
نظارت ایتدیکی مناسبتله (اسفندیار سرائی) دینمی اغلب
احتمال در .

بو ایچ قلعه یی و سرائی بنا ایدن کیمر ؟ سوالنه جواباً
(شارل تکسیه) دیورکه « بو ایچ قلعه یی پونت حکمدارلرندن
اوچنجی (مهرداد) تاریخ میلادی دن ایکی یچق عصر اول بنـا
ایدوب روما جنراللرندن مشهور (پومپه یوس) تاریخ میلادی دن
یارم عصر اول اماسیه یی ضبط و اشغال ایلدیکی اثناده هدم
و تخریب و بعده (روما حکومتی) تعمیر ایتدرمشدر . »

بهجة التواريخ ، العليم و جامع الدول تاريخلرينك ويرديكي
معلوماته نظراً (سلطان مسعود ساجوق) اماسيه يي مركز سلطنت
اتخاذ ايلدكده (۵۴۰) حدودنده بواج قلعه يي تعمير و جامع
و مدرسه و حمام و سراي بنا و ارتحانه قدر بو سراينده اقامت
ايتمشدر . x

سلطان مشاراليهك سراي اليوم (قورشونلي محله سي) ايله
(اخى سعدالدين محله سي) نك بر قسمندن عبارت اولان ايرماق
كناري اولديغي قيداً اكلاشامقده در . يوقاري حمامك اوست
طرفنده يشار محمد افنديك خانه سندن اعتباراً غربه طوغرو
ايرماق كنارنده بولونان ريختيم بو سرايك تمي اولديغي قديماً
متواتر در . بوسراي عالي دور ساجوق ده معمور ايكن ۷۱۸
زلزله سنده مصاب اولمش وبعده قضاتدن (ضياءالدين مسعود بن
احمد) واحفادي تصرفنده بولتمشدر .

۸۵۳ ده بر قسيمي (علاءالدين على المسعودي) طرفندن مسجد
شريف اتخاذ ووقف ايديلوب ديكر اقسامى تماماً بر محله نك
جبهه جنوبيه سني تشكيل ايتمشدر . اليوم سراجزاده (يشار محمد
افندي) نك ورثه سي تصرفنده بولونان خانه ، بو سرايك
خارجيه سندن معدود اولديغي و خارجيه قبوسى غايت
مكلف ، طاقى مصنع بر حالده ۱۲۷۱ تاريخنه قدر موجود ايكن
خانه لرينك تجديداً تعميرنده پدري نك هدم ايلديكني مرحوم
(يشار افندي) بيان ايتمكده ايدى .

(۳) (بالوس قلعه‌سی) بکسر سراینک شرق جنوبی‌سندہ الیوم
 قیشلہ نك شرقندہ واقع بر محلدہ اولدینی خرابہ‌سندن ا کلاشیلیر.
 بوقلعه نك یری (کمشلی زاده کوشی) دیمکله ده مشهور اولدیغندن
 اوراده کوریلان خرابه قلعه نك، یاخود کوشکک انقاضی اولدینی
 پکده معلوم دکلدیر. هر حالده قیداً ثابت اولان (بالوس قلعه‌سی)
 بو موقعده ایدی. بوقلعه شمال بوغازینه ناظر اولدیغندن بوغاز
 محافظی اولمق اوزره تلقی ایدلمکده در. قلعه نك موقعی یوکسک،
 جرمی اوافق در.

(۴) (خرشنه قلعه‌سی) قریباً ایضاح ایدیلہ جکدر. (۵)
 (زمندو قلعه‌سی) اماسیه نك جهت شرقیه‌سندہ کائن (زیاره
 محله‌سی) نك نام قدیمی اولوب قریباً محلات بخشده ذکر اولنه.
 جقدر. (۶) (فون قلعه‌سی) (چقالار) ک جهت غربیه‌سندہ
 اولدینی (تاریخ آل دانشمند) ک تعریفندن ا کلاشیلیر.
 ابتدای فتحده (عبدالله غازی) طرفندن ۴۶۸ ده تخریب
 ایدلمشدر. (۷) (کاکیس قلعه‌سی) اماسیه نك جنوب بوغازنده
 واقع اولوب ایکی کچہ‌لی اولدینی خرابه لرندن ا کلاشیلیر. (کاکیس)
 بخشده ذکر اولنه جقدر.

انواع صنایع ایله انظارده ممتاز
 عنقاکی کرمش قانادین ایتمه ده پرواز
 شاهین کی سمت فلسکه طوغر و سرافراز
 اولمش بو وقاریلہ نکهدار اماسیه

اماسیه‌نك آثار قدیمه‌سندن بر نمونه محتشم اولان بوقلعه‌نك خرابه‌سنی تدقیق ایدن انظار تماشا کران ؛ هر طرفده برمه‌ارت ، هر گوشه‌سنده بر صنعت ، هر طاشنك وضعنده بر دقت کورمه‌مك قابل دکلدر .

اماسیه‌نك قسماً شمال طرفنی محیط وقلعه‌نی حاوی اولان بوقیانك جبهه‌سی دوز اولوب ارقه‌سی (قرقلر) طاغنه استناد ایتمیشدر . تملی ؛ عرضاً اکللی اولوب ذروه‌سنه طوغرو طار- المقده‌در . طولی ؛ هلیکس باغچه‌سنك اورتیه‌رندن ابتدا ایدر ك (قمرالدین محله‌سی) نهایتته قدر تقریباً ایکی بچق کیلومتره امتداد ایدر . ایکی طرفلری ده یوکسلدکجه طارالیر . مخروطی بر شکل آلیر ذروه‌سی دوز اولوب شرق طرفی انکین ، غرب طرفی یوکسلدکدر . یان طرفلری مخروطا اچیلیمش قاناد کبی قاباریق ، اوکی غربیه طوغرو مائل‌در . شوو وضعیتی ، غربیه طوغرو وهوایه اوچان شاهینه بکزر بوقلعه ، اماسیه‌نی اعصار قدیمه دنبری تعرض اعدادن محافظه ایدن برنکمه‌بان اولدیغنی تاریخ عمومی سویله مکده‌در .

دیرلرکه بونی خرشنه‌در ایلین انشا

ایتمش اکا کندی آدینی صکره‌دن اعطا

یایمش بورایی کندیسنه مسکن زیبا

بوقلعه یوزنده کورولور غار اماسیه

اليوم (قلعهٔ بالا) و (یوقاری قلعه) دیمکله مشهور اولان

بوقلعه توارنج عربیه ده (خرشنه) نامیه مشهور اولوب حاکم
اولدینی بلاده عموماً (خرشنون) دینور. بوقلعه ابتدا
(خرشنه) نام ذات ظرفدن بنا ایدیلوب بانیسی نامیه مذکور
اولشدر.

(معجم البلدان) ده یاقوت حموی دیورکه: «خرشنه؛
اولک فتیح و ثانیک سکونی و نقطه لی شین و نون ایله ملاطیه
قربنده بر بلده در. اورایه (سیف الدوله حمدانی) غزا
و متنبی شعرنده ذکر و ثنا ایتشدر» «خرشنه بن روم ابن الیقن
بن سام بن نوح (علیه السلام) بنا ایلدیکندن بانیسی اسمیه
موسوم اولدینی منقول در. حقنده (ابو نواس) شونی
دیمشدر.

ان زرت خرشنه اسیرا فلکم حلت بها امیرا

(خرشنون) بر قطعه نک اسمیدر که خرشنه بوقطعه نک
مرکزیدر.

انساب السمعانی، مرصداً لاطلاع، لب اللباب کتابلرنده
عین حرکات ایله ضبط ایدیان «خرشنه بلادرومدن ملاطیه
قربنده بر بلده در. خرشنون دخی بر قطعه نک اسمیدر که خرشنه
بلده سی بوقطعه یه حاکم در. بوراده کومش معدنی واردر»
دیه مسطور در.

(بزم و رزم) عذیر بن اردشیر الاسـترابادی دیورکه

اماسیه قلعه‌سی ، خرشنه نامیه مسمی بر موقعدر که قبّه فلیکه
ناظر ، غایت مرتفع در . اینمسی چیقمسندن مشکل ، چیقمسده
عادتا محتنع در .

(عجائب المقدور فی نوائب تیمور) ده شهاب الدین احمد بن
عربشاه رومی دیورکه : « سلطان یازید خان اول شهزادگانندن
(سلطان محمد و موسی) چلبیلر خرشنه نامیه موسوم اولان
اماسیه قلعه‌سندن ایدیلر که او قلعه غایت ارتفاع ایله مشهور
ومتانتله مذکور در »

(ترجمه قاموس) ده عاصم افندی دیورکه خرشنه ، شین
معجمه ایله خردله وزننده روم دیارنده بر بلده در . طراز المذهب
نام کتاب تعریب ده حالا اناطولیده بلده اماسیه اولق اوزره
مرسوم در . بانیسی اولان خرشنه بن روم بن سام بن نوح
(علیه السلام) ایله مسمی در واکا سلفده (سیف الدوله حمدانی)
غزای ایتمکه متنبی بر قصیده ایله وصف ایله مشدر . بو بیت
انددر .

حتی اقام علی ارباض خرشنه
تشقی بهار روم والصلبان والبیع

(العیلم الزاخر) ده مصطفی جنبی افندی و (جامع الدول) ده
درویش احمد افندی و (تمییح الفصون) دیباجه‌سندن الحاج
خضر افندی « خرشنه ، اماسیه و قلعه‌سنگ نام قدیمی » اولدیغی

تصریح ایدیورلر . (تاریخ آل دانشمند) ده (خرنه) یرنده
 (خرنه) مذکور اولوب اماسیه نك نام قدیمی اولدینی مسطوردر .
 شو دلائل تاریخیه دن حاصل اولان نتیجه یه کوره (خرنه)
 اماسیه قلعه سنی بنا ایدن ذاتک اسمی اولوب قلعه یه علم مخصوص
 اولمشدر . بوقلعه نك بندرتجارتی ، مدارسعداتی اولان شهردهخی
 (آماسیه) دینوب بوشهرک مرکزی ، محافظی ده (خرنه)
 اولدیغندن یکدیگریله تسمیه ایدلمشدر . بوشهر و قلعه یکدیگری نك
 متممی ، لازم غیر مفارقی در . تاریخ الامم ، عقدالجهان کتابلرنده
 اماسیه و خرنه ناملری مسطور اولوب قلعه یه (خرنه) شهره
 دخی ، (اماسیه) دیندیکی وقوعاتک تعقیدندن ا کلاشیلیر .

بوقلعه نك بانیسی اولمق اوزره کوستریلن (خرنه) تعبیر
 دیگر خرنه (آماس) کبی بلانسبت اولیوب آبا واجدادی
 ذکر ایدلمکده در . فقط بونلرک ضبطنده ارباب تاریخ اراسنده
 تخالف وارددر . بو (خرنه) معجم البلدان ده روم بن الیقن بن
 سام بن نوح (علیه السلام) والکامل ده روم ابن اسود بن سام
 والقاموس ده روم بن سام اوغلی اولمق اوزره ضبط اولمشدر .
 خرنه نك پدرنده اتفاق وجدنده اختلاف اولمقله برابر بوسلاله
 ارباب نسب نژدنده معلولدر .

چونکه ارباب تاریخک ضبطنه نظراً اولاد نوحک یریوزنده
 انتشاری طوفاندن تقریباً (۶۷۰) سنه صوکرده در عقیب انتشارده
 (خرنه) نك کلوب بوقلعه یی بنا ایتدیکی فرض ایدلسه بیله

یدی عصر ظرفنده بطناً اوج ، یاخود ایکی واسطه ایله حضرت
نوحه اتصالی ممکن اوله ماز . سام بن نوحك اليقن ، اسود ،
روم آدلی اوغللری اولدیغنی بتون نسابه لرك ذکر ایلدکارینه
بناءً (خرنه) نك اسامی آيا واجدادنده تعریف ، تحریف
وحذف اولدیغنی شبهه سزدر .

خرشنه ، روم ، اليقن ، اسود اسملری معرب ، محرف
اولقله برابرهانکی قومه منسوب اولدقلری پکده معلوم دکلدرد .
فقط تدقیق وتحلیل اولندیغنی تقدیرده (آماس) کی تورکلردن
اولدقلری ظنی پک زیاده قوت بولور .

چونکه : لغت عربیه ده جریان ایدن اصول تعریف ، کلمات
معربیه نك اساسلرینی تبدیل ایتمکسزین حروفنی وصورتلغظنی
تحویل ایدرهك کلمات عربیه اشکالنه وضع ولهجه عربیه یه تطبیق
ایتمکدن عبارتدر . بواسطه شواصول اوزره تحلیل واساسلری
تدقیق اولنورسه تورک اسملرندن عبارت اولدقلری منظم اولور .
اصول تعریفده صاغر کافلر ، قاف وجیم وسینلر ، شین وشینلر ،
سین وقافلر ، خا وپالر ، فاحرقلرینه تبدیل ایدلیدیکی مشهوردر .
خجنند ، جرجان ، جوجان ، قاشان ، قومس ، خرننج ،
فرغانه اسملرینك اصللری اولان قوکنند ، کورکان ، کوچان ،
کاسان ، کومش ، قرتنک وپارقانچ اسملری تاریخاً مضبوطدر .
بواصله بناءً (خرنه نك) اصلی دخی (قراسانج) و (قراسان)
اولدیغنی اکلاشیلیر .

(تکسیه) نك خرشنه یرنده (قریسنی) ضبط ایتمی
بواصلی تأیید ایدر .

آثار عتیقه علماسندن (تئودور ریناق) پون حکومتی نام
اثرنده مؤرخین قدیمه دن (هرودوت) و (کیسنه فون)
طریقلمندن یازیلان آثار دن نقل ایدرهك دییوركه : « پون
قطعه سنده (مهرداد ، میترا) حکومتی تشکل ایتزدن مقدم
(خالیب ، نسالیب) و (تیار) و (موسنیک ، بوزوق)
و (ماقرون) و (سان ، چان) اقوامی مسکون ایدی . » [۱]
شواقوامك تورك اولدقلىرى بالاده (مرأت العبر) دن
نقلاً تحریر ایدلمش ایدی . سانلر ؛ تاریخا زانلر ، چانلردیمکله
مشهور اولان توركلر اولوب (زانیت [۲] جانیک) شهرى
بونلرك آثار دن اولدیغی معلوم واماسیه قلعه سنی بنا ایدن
(قراسان) بونلرك جدی اولمسی اغلب احتمال در . (خرجنه)
روایتی (قراچان) اولمسی دها زیاده تقویه ایدر .

شواساس اوزرینه بو «خرشنه» نك پدری کوستریان (روم)
اسمی بونك پدری کوستریلن (الیقن) اسمنه باقیلیرسه اسمی
رومیه دن اولیوب تورك اسمی اولدیغی ظن ایدیلیر . شو حالده

[۱] پون قطعه سنده قدیمآ مسکون اولان اقوامك تفصیلاتی
(باب اول) ده درج ایدیله جکدر . انشاء

[۲] بوکا (چانیت و سانیت) ده دینور آخرنده بولنان (ت)
حر فی اادات نسبت اولدیغی عائله تورانیه السنه سنی تدقیق ایدنلره معلوم در .

بر اسم منحوت اولوب (باروم [۱]) اسمندن اولی تحت ایدلمش و (ایقن) معرب اوله رق (ایلی خان [۲]) و (اسود) (اوسوت [۳]) اولدینی تخمین اولور. تورکلرک جیدی (یافت بن توح) اولدیغنه کوره (سام) اسمی محرف اولوب (سولی [۴]) یاخود (سولیم [۵]) اولدینی محتمل در. شوا احتمالاً بناءً (سام) عدایدیلن (سولیم) ایله حضرت نوح آراسنده خیلی بطون حذف ایدلمش اولور.

تواریخ عربیه ده ضبط و ترتیب ایدیلن شونسبک تمامیه یالان اولمیوب یا کاش اولدینی وپون قطعه سنده (قرون اولی) ده مسکون اولان اقوامک ماهیت ملیه سنی بر درجه تعیین ایده جکی تسلیم اولورسه شوانسابک قیمت تاریخیه سی تقدیر ایدلمش اولور.

بوقلعه نك بانیسی حقه نده شرق و غرب آراسنده تباینه قریب برتخالف واردر. مورخین عرب؛ بوقلعه نك بانیسی (خرشنه)

[۱] باروم اسکی تورکجه مزده واریم، وصلت معناسنه در. .
تورکلردن برقیبله نك اسمی اولوب بونلره باروملر، برمیلر دینور.
[۲] ایلی خان؛ اسکی تورک خاقانلردن براقاچ ذانک اسمیدر.
[۳] اوسوت؛ عاقل معناسنه اولوب عقل وادب معناسنه اولان (اوص) کله سندن مشتقد.

[۴] سولی؛ سولمک مصدردن مأخوذ اولوب یوجه، رفیع معناسنه در.

[۵] سولیم؛ رفعت معناسنه اولوب کوچک آسیاده قدیم تورک قبیله لرندن برقیبله پدوینک اسمی اولدینی (مرأت العبر) ده مسطوردد.

اولدیغنی بیان ایتمکده متحد اللسان اولدقلری بلاده نقل ایدیلن قیود تاریخیه دن ا کلاشلمشدر. اوروپا مورخلری ده (قرون اولی) نك نصف اولنی ادوار مجهوله دن اعتبار و بودوره عائد هر درلو معلومات تاریخیه یی اساطیر اولین اولمق اوزره تلقی ایدرهك بعضلری بوقطعه ده بولنان آثار قدیمه یی پون قرالرینه عطف واسناد وبر قسم مدققى تردد ایدوب دها اوله طوغرو ارجاع نظر ایتدکلری کورلمکده در.

ارباب تدقیق دن (تکسیه) کوچك آسیایه عائد اثرنده دییورکه « بوقله یی بوراده اجرای حکومت ایدن (مهرداد) میلاد عیسی دن ایکی یحق عصر اول بنا ایتمشدر. (ویتال کونیه) دخی آسیاده ترکیا آدی اثرنده بوقولی نقل و تأیید ایتمکده اولوب شرق و غربك بو خصوصده نقطه نظری تخالف ایدیور . بو تخالفی ؛ اليوم کوچك آسیاده (هتیت ، خطای) حکومت قدیمه سی حقنده بذل ایدیلن مساعی جدیده نتیجه سننده کشف ایدیله جك آثار قدیمه نك حل ایده جکی شبهه سزدر.

بوقله شرق دن غربه اوزون، شمال طرفلری دوز، جنوب طرفلری انکین، واطراقی، تقریباً اون بش متره قدر مرتفع طاش دیوارایله محاطدر. شرق طرفی غربه نسبتله اشاغی ، غرب طرفی دها یوکسك ، اوستی عموماً دوز و مربع در. غرب طرفلری نك ارتفاعی شرقه نسبتله یکرمی متره قدر زیاده در . قله ؛ برمحله اعتبارنده اولوب ایکی برجی، ایکی قپوسی،

برسرانی، برجامی، برمدرسه‌سی، برزاویه‌سی، برعمارتی، برقویوسی وایکی حامی وارد. برجك بری شرقه، دیگری شماله ناظر اولوب موقعلری بوكسك در. قولردن بری شاملیلر محله‌سنه یعنی شمال شرقیه، دیگری ده خضر پاشا محله‌سنه یعنی غربیه ناظر اولوب بونلر الیوم موجوددر. شماله ناظر اولان قپوسی غایت بیوك، طاشدن معمول و مصنع اولوب بوكسك طاقده عبارات محكوكه وار ایسه ده لاتین حروفی اولدیغندن اكلایه جق برکیمسه بولنه مدی.

قلعه‌نك شرق طرفنده قپو جوارنده دوز بر موقعده جامع شریف خرابه‌سی اولوب نصف محرابی، مناره‌سك برمرتہ قدر تملى مشاهده اولتمقدہ در. بوجامع شریفك یری قبل الفتح اندره کلدیسی اولدیغی قیود عتیقه‌ده کورلمشدر. بوكلیسا (پونت) والیسی (اندرونق قومن) طرفندن بنا ایدیلوب زمان فتحده قلعه‌ده ساکن اولان خرسیانلر اماسیه‌ده اسکان ایدلیکی مناسبته جامع شریفه تحویل ایدلمش و مکرراً زلزله‌دن مصاب اوله رق امیر الحاج (شمس الدین شاد کلدی پاشا -) طرفندن ۷۷۴ حدودنده مجدداً کارگیر بر جامع شریف وجوار غربی‌سندہ برحام انشا ایدلمشدر.

بوجامك جوارنده (الشیخ بهاء الدین محمد خلوتی) ۸۴۷هـ برزاویه خلوتیه و سلطان ارتسا بك زاده (علاء الدین علی پاشا) بردار الضیافه و قلعه دزداری (قره احمد اغا) ۸۹۰هـ جامع

شریف جوارنده (دزداریه) نامیه بر مدرسه بنا و مخدومی
(مصطفی پاشا) ۹۱۷ ده بر مکتب علاوه ایدرک اوقافی تنظیم
ایلدکاری سجلات عتیقه دن ا کلاشلمشدر.

غریه ناظر اولان قیونک حذا سندن اعتباراً غرب طرفی
بر سرای عالی اولوب (سلطان قلیچ ارسلان رابع) بوراده
اقامت ایتمشدر. تشکیلاتی منتظم اولدینی خرابه سندن ا کلاشلمقه در
جسیم بر خرنی، لطیف بر حامی اولوب قبه سی حذا سنه قدر
طوپراغه کومولمشدر. قلعه نک زندانلری عموماً شرق طرفنده
اولوب اک نخوفی، اورته یرنده اشاغی سرایه اینه جک دره نک
حذا سنده چقور یرده در.

بو قلعه نک شمال طرفی دها یوکسک بر طاغه استناد ایتکده
اولوب بو طاغه (قرقلر طاغی) دینور. ۶۸۲ تاریخلرنده
یازلمش اولوب اله کچن وثائق عتیقه ده بو طاغ (جبل اربعین)
نامیه مقید اولدینی کورولمشدر. شوقیده نظراً (قرقلر طاغی)
نامی پک قدیم اولوب السنه عامه ده متواتر اولان بر روایت،
بو تسمیه یی انتاج ایلدیکی ظن اولنور. روایب متواتره شودر:
«دانشمند غازی امامیه قلعه سنی محاصره ایلدیکی انشاده مدافع لر
پک زیاده اصرار و مقاومت ایلدکلرندن بهادران اسلام دن قرق
کشی بو طاغده طوپلادقلری بر فاج سوری قیونک بوینوزلرینه
موملر دیکوب کیجه صباحه قارشو طاغدن اشاغی قلعه یه
طوغری عسکر نظامی اوزره سوردکارینی کورن مدافع لر

عظیم بر قوه امدادیه کلدیکنه ذاهب اوله رق قاعه قیوسنی آچشلر
وقرق بهادر بلافاثه زمان قلعه یه کیروب مدافع لری تسلیم نفسه
اجبار ایدرک قلعه یی بوصورتله فتح ایتشلر در .

وسطاده جیلانبولی دخی حیرتی جالب
هر بر طرفنده کورولور درلو غرائب
حجرا و مصیبه نه معلوم و نه غائب
آبی صاییلیر افضل آبار آماسیه

بو قلعه نك اورتہ یرنده بیوك قیونك حذا سنده كاشن یوكسك
موقعده الیوم (جیلانبولی) نامیله مشهور بر صوقویوسی واردر .
جنوبدن شماله طوغری کیدر . یوز اللی قدر باصامقله اشاغی
اینر . درین ، غایت قورقونج بر قویودر . قیوسی سکنر متره قدر
قطرنده واسع واوستی مدور بردلیك اولوب عین وسعت صویك
بولندیغی یره قدر دوام ایدر .

قبو طرفی طور اقدن اولوب کارگیر ایله اورولمش ایسه ده
اینده که یکپاره قیادن او یولمش اولدیغی مشاهده اولمقده در .
اولدیغی یر ؛ طاشدن او یولمش بر حجره مدوره شکنده اولوب
صویك یتاغی طور اراق و محیطی طاشدر . صوبی غایت پارلاق
و مبذول اولوب خفیف و طعمی لطیفدر . کورونیشده را کد ،
غایت طور غون بر حالده ایسه ده تدقیق نظر ایدلده که حرکت
دوریه سی غایت بطی اوله رق حس اولنور .

جنوب طرفی، نہایت بر آرشون درینلکنده ایسده شمال طرفی، یعنی قیانک دبی غایت دریندر. نہ طرفدن چیقار، نرہ یہ آقار پکده معلوم دکلسده غرب طرفدن نیعان و شرق طرفہ طوغری جریان ایلدیکنی احساس ایدر. درینلکنی ا کلامق خصوصندہ ارباب مراقی پک چوق تجریہ مہلکدہ س-وق ایتمشدہ.

(مصطفی واضح افندی) اماسیہ تاریخندہ [۱] دیورک: « بو صویک درینلکنی ا کلامق ایچون اماسیہ متصرفی جانیکلای زاده (مقداد احمد پاشا) [۲] بر آدمی استیجار و آریجہ دیت شرعیہ سنی اعطا ایدرک اورایہ ایندیرر. غواص مذکور، صویہ کیرر. قیانک دیندہ غائب اولور. حالا کیدر. »

« (شارل تکسیہ) کوچک آسیا اثرندہ دیورک: « انکلیر مدققلرندن سیاح مشہور (ہامیلتون) اماسیہ کلوب شایان تدقیق اولان یرلری زیارت و اجرای تدقیقات ایلدیکی ائنادہ بوقویوبی ا کلامق ایچون آدملر طوتوب مشعلہلر ایلہ اشاغیہ اینمش وقلعہ یولی اولوب بعدہ صومنبغہ تصادفلہ قویواولدیغنی ا کلامشدہ. »

[۱] بلابل الراسیہ نامیلہ معروف بر تاریخ اولوب مقدمہ نک نہایتندہ عرض اولنہ جقدہر.

[۲] مقداد احمد پاشا (۱۱۹۰ - ۱۲۰۰) تاریخندہ قدر برقاق دفعہ متصرف اولمش وزرادن اولوب تفصیل احوالی (باب اول) ده ذکر ایدیلہ جکدہر.

فقط شور و ایشلره باقیلیرسه السنه عامده دوران ایدن روایت قدیمه یی قبول ایتک ایجاب ایدر. دینیورکه : « بوراسی قدیماً قلعه یه مخصوص صو قویوسی اولق اوزره انشا ایدلمش و (قرمان طاغی) طرفدن آقان صو ، بورایه اجرا و مجراسی دخی شرق طرفدن ایرماغه قدر ایندیرلمش اولدینی حالده صنعتله غائب ایدلمشدر . قوش کوپرینک اوستنده بولونان (لیکن قیا) بوجرانک منتهاسی اولدینی سویلنمکده در .

چونکه : واضح اقدینک روایتیه نظراً غواصک بوغولد- قدنصکره جسدی مطلقاً صویک یوزینه چیقمسسی لازم ایکن چیقمه مش و شمدی یه قدر اورایه آتیلان جسیم قیالر ، طاشلر صویک ایچنده غائب اولوب کیتمشدر اکر بونلر جمع ایدلسه قویویی آغزینه قدر طولدیرردی . بو قدر طاشلر نره کیتدی ؟ نه طرفدن چیقدی ؟ معلوم دکادر . فقط صو ، قدیماً اولدینی کبی طور ییور .

اماسیه متصرفی (محمدکمال بک) بوصویی دیکر لرینه ترجیح ایدرک استعمال ایتدیکندن اوزمان عموم مأمورین و اماسیه اشرافی بوصودن ایچمکه دوام ایتشلردر . بوصویه (جیلانبولی صویی) وقویویوده (جیلانبولی) دینور .

بو (جیلانبولی) نامنه وقویونک بونام ایله نصل مسمی اولدیغنه دائر معلومات صحیحه بولنه مدی . فقط جیلانبولی اسمندن استدلال ایدلایکنه کوره مقدماً (جیلان) نام بر

کیمسه قلعہ بی تعمیر ایدہ رک (جیلانبولیس ، جیلان شہری)
تسمیہ ایتش ایسہ دہ اشتہار ایدہ میوب انجق قویوبہ علم مخصوص
اولہ رق قالمش اولدینی ظن اولنور .

بو . (جیلانبولی) نک جنوباً حداسندہ اشاغی سرایک
اوستندہ کائن درہ نک یوقاریسندہ صول طرفندہ درین بر قویو
دہا وارد بر قویو شرقدن غربہ طوغرو یکپارہ طاشدن اویولمش
اولوب طقسان مردیون ایله اشاغی اینیلیر دیی جنوبدن شمال
طوغری سکنز قدم عرضندہ اون بش قدم درینلکندہ صو
یولی شکندہ اویولمش بر یول اولوب جیلانبولی یه طوغرو
کیتمکدہ در . جنوب طرفی ، یکدیگریسہ متصل ایکی بویوک
مقارہ طرفہ کیتمکدہ اولوب ہر ایک طرفی دہ طاشلر ایله طولمش
اولدینندن نہ اولدینی تمامیلہ ا کلاشیلہ مہمشدر . فقط شمال
طرفندہ کوریلن ترشحاتہ باقیلیرسہ جیلانبولی قویوسندن اشاغی
سرایہ جاری اولان صویولی اولسی محتملدر . یوقاری قویونک
طاش باصامقلری طوپراق ایله طولوب غائب اولمش ایسہ دہ
بو قونک باصامقلری ، برسنہ اول یاپیلمش کبی طور مقصدہ در .
بونک وضعی ، وسعتی دہ جیلانبولی یه مشاہددر .

بر مرکز محفوظ قرالی ایدی اول
بون شاہلری قاعد تحت اولدی مسلسل
رومالیرہ ایتدی یدی حرب مکمل
بونلر ایله معلوم اولور اطوار امانیہ

قبادوقیا و پونت قطعہ لرینک مرکز حاکمی اولان بوقطعہ نیک
ازمنہ عتیقہ دہ کوردیکی دور اقبالی وازمنہ اخیرہ دہ اوغرا دینی
مصائب ادباری، انظارہ حیرت ویرن آثار قدیمہ سی کمال بلاغتہ
اخطار ایدیور . پونت قرالارینک مرکز حکومتی اولان بوقلعہ دہ
اجرای سلطنت ایتدکلری مشهور اولوب اکثر آثار باقیہ سی
بو حکومتک براق دینی مائر عمران در .

پونت حکمدار لرینک منشائی ، اماسیہ دہ حکومتلری
ورومالیلرایلہ مناسباتی ، یدنجی مہردادک رومالیلرایلہ یدی دفعہ
حربی ، بونلرک انقراضی (باب اول) دہ ذکر ایدیہ جکدر .
اماسیہ نیک تاریخ عمومی دہ شہرتی بونلرک زمان حکومتیدن
اعتبار ایدلدیکی مناسبتلہ احوال تاریخچہ سی ضبط اولمشدر .

بوشاہلرک دخمہ سی اولمشدی مغارات
اجسادینی ہپ صوکرہ دہور ایلدی تارات
بر وقت رہاینہ اولوب جای ریاضات
شمدی ایسہ بوش ، مخزن اکدار اماسیہ

بوقلعہ نیک بدنندہ یعنی جنوب طرفندہ کوریلن مغارہ لر ، بو
حکمدارانک مزارلری، اولمق اوزرہ کوستریلیور . اماسیہ وادیسندہ بو
مغارہ لر اون ایکی عدد اولوب بشی (قیزلر سرانی) اوستندہ ایکسی (سرای
محلہ سی) اوستندہ وبریسی (میدان کوپری) حذا سندہ وایکیسی

(یاصعی قیا) نك جبهه شمالیه سنده وبریسی اخور او كنده وبریسی ده زیاره یولنده (آینه لی مغاره) دیمكله مشهوردر .
(مفصل قرون جدیده) ده احمد مدحت افندی دیوركه :
« حالا شهر جوارنده قیالار دروننه اویولمش صنعی مغاره لر پون قرالارینك مزارلری اولق اوزره یاپیلدق لری توارینخده مندر جدر »

(شرق خاطرانی) نام اثرنده اماسیه یی زیارت وبورالری تماشا وتدقیق ایدن مارشال (مولتكه) دیوركه : « فقط اك جالب حیرت منظره طاش اوطه لر در . قرقر قدم طول وعرضنده التمش قدم درینلكننده براوطه تصور ایدیكز . بو اوطه نك ایچنده بر او تشکیل ایدیور .

بوطاشك ایچنده ده اوزبش قدم مربغنده بر بوشلق ، برده پنجره ویاقبو تخیل ایدیكز . ایشته بوغرانیتن او مطلقا بر مزار اولق اوزره انشا ایدلش اوله جق . بو اوطه لر دن بش دانه سی یکدیگرینه متصل بولنیور . آرالرنده دهلیزلر ومردیونلر موجود اولوب پارمقلق لرینه وارنجیه قدر هپسی یکپاره طاش اوزرینه اویولمشدر . هیچ شبهه سز بونلر ؛ قره دكز (پونت) قرالارینك مقبره لری ایدی .

ایکی بیک سنه دن فضله بر زمان اول انشا ایدلدکلری محتمل اولان بو قبرلرک زینت لری ، ده ا دون حك ایدلش کبی عیان بولنیور رسملره برابر هیئت مجموعه سنك طرزی مصرکاریدر .

بوطاش اوطه لر ظن ایدر سه م و قیله اورتو آلتنده بولنیورلردی
فقط بالا خرم ییقلمش و مزارلرکده قالدیرلمش اولدینی مظلوندر.
طاش اوطه لره کلنجه آنلر دهور واعصاره دها چوق زمان
میدان اوقویه جق بر حالده در . »

(کوچک آسیا آثار قدیمه سی تاریخ و جغرافیای) نام اثرنده
(تکسیه) دیورکه : « اماسیه موقعنک تاریخلرندن اک مکملی
استرابونک تاریخیدر ایوم مضبوط و موجود خرابه لر حقنده
تفصیلات بو تاریخ ایله الده ایدیه بیلیر فقط بو خرابه لر ؛
آثار عتیقه علماسیچون صامتدر . بو مغاره لره هانکی
دورلره عائد اولدینی مجهولدر (استرابون) ایله برابر بزدہ
قرالر مزاری دیرز . فقط هانکی قراللرک مزارلر بدر ؟

قبل المیلاد (۳۰۶ - ۶۴) تاریخنه قدر دوام ایدن پون
قرالرینک مزارلریمدر ؟ اک قدیمی هانکیسی در ؟ هانکی ذاته
مخصصدر ؟ برینک قبوسی اوزرنده بولسان برکتابه ، بیوک
برکاهنک ، قرالر قدر اقتداره مالک اولان بیوک کاهنلردن
برینک تره سی اولدیغنی کوستریور . [۱] بوکیمدر ؟ بو آثار

[۱] بومغاره ایوم (آینه لی مغاره) دیمکله مشهوردر . بونک
قیوسندن ماعدا اوزرنده یازی اولان بیوک مغاره یوقدر . بومغاره ده
(آستریس) نامیله مشهور متره پولیدک مدفون اولدینی روملر آره سندہ
شایع ایهده اساسی یوقدر .

قدیمه؛ اسکندر دورندن اول میدر؛ صوکره میدر؛ بونلره تاریخاً
چواب ویرمک ممکن دکلدن [۱]،

بواون ایکی مغاره لردن ماعدا اماسیه وادیسی خارجنده
ایری، اوفاق مغاره لر موجود اولوب اماسیه دروننده بولونان
مغاره لر، پون قراللری عددندن فضله اولدینی مناسبتله
بومغاره لرك بر قسمی؛ پون قراللردن مقدم او یولمش اولدینی ظن
اولنور. فتح جلیل اسلام دن اول بونلرك جسدلری مغاره لردن
قالدیریلوب خرستیان پاپاسلرینک ریاضتکاهی اولدینی متواتردر.
دور جلیل اسلام ده بومغاره لر بوش اوله رق بوانوب قلمش
و ۸۳۳ ده اماسیه وانا طولی ولایتلرنده اجرای شقاوت ایدن
(قزل قوجه اوغللری) اماسیه والیسی (یورکچ پاشا) طرفندن
اخذ و گرفت اولندقدن بومغاره لردن حبس و صمان بوغیله اتلاف
ایتدیکی کبی ۱۰۰۸ ده خروج وعصیان ایدن اورفلی (قره
یازیحی عبدالحلیم) اتباعی ۱۰۱۱ ده اماسیه یی احراق ایتدکلری
زمان، پک چوق اشراف واعیان بومغاره لردن تحصن و ثروتلرینی
محافظه ایتمشلردر.

ایتدی امرا قلعه نی کرات ایله تجدد
سلجوق نسب شاه قباد ایلدی تشید
لکن بونی ده کر زمان ایلدی تبید
ایتمشدی وطن برجی دزدار اماسیه

[۱] بو کتابی ترجمه ایدوب محرری مستفید ایدن تاریخ انجمنی
اعضای کرامندن احمد توحید بک افندی حضرتلردر.

روما جنرالی مشهور پومپهيك تخریبندن صكره روما
حکومتی طرفدن تجدیداً تعمیر ایدیلدیکی کبی بیزانس ایمپراطورلغی
دورنده (ماردوس فوقاس) وقایعی اثناسنده تخریب وبعده
اعمار ایدلمشدر . دور جلیل اسلامده ابتدا (ملك دانشمند احمد
غازی) و ۵۴۰ حدودنده (سلطان مسعود سلجوقی) و ۶۱۸
حدودنده (سلطان علاءالدین کيقباد) طرفلرندن مکرراً تعمیر
اولمیشدر .

۷۱۸ زلزلهسنده فنا حالدده مصاب اولدیغندن کمشلی زاده
(تاج الدین محمود چلی) و ۷۶۸ حدودنده (شمس الدین شاد
کلدی پاشا) و ۸۱۸ زلزلهسندن صكره (سلطان مراد خان ثانی)
و ۹۱۸ ده شهزاده سلطان احمد امراسندن (مصطفی بك) طرفلرندن
تعمیر ایدلمش و ۱۰۷۹ ده تکرار زلزلهدن مصاب اولدیغندن
خواجه احمد پاشا زاده (علی بك) و حقهلی سلاحدار زاده
(یوسف اغا) معرفتلیله اعمار اولمیشدر .

بوقلعه نك شهره ناظر اولان اشاغی برجی (دزدار - قلعه
محافظی) بكارك ، اغالرك اقامتنه مخصوص اوله رق بونلرك
اداره سی ، زعامتی ۱۲۵۵ تاریخنه قدر دوام ایتمشدر . ابتدای
فتحنده دانشمندیه امراسندن (مبارك غازی) بوقلعه نك دزداری
ومركز ولايتك محافظی اولوب (امیر جلال الدین قرطای) کبی
بك چوق امرا دزدار اولمیشدر .

ابتدای دور عثمانی ده (حسن بك) قلعه دزداری اولوب

زعامتلى مورا مول ويغمور كويلرينك اعشارندن المق اوزره
 (۱۳۰۰۰ - ۳۳۰۰۰) اچيه ترفع ايدرك ايجلرندن احمد پاشا،
 عثمان پاشا، رجب پاشا، محمى بك كبي اميرميران وامرا ظهور
 ايتمشدر. دزدار اغالرينك معيتده (قلعه كتمدارى) و (قلعه
 يماغى) و (قلعه قوجيلرى) و نفرات مستحفظه اولوب بونلر،
 زمان سفرده شهر محافظى ايديلر. قلعهده متعدد طوپلر موجود
 اولوب ۱۲۴۸ ده برى برايله رك ديكرلرى قالديرلش و ۱۲۸۱ ده
 اماسيه متصرفى مشهور (ضيا پاشا) اسكى طوپى قالدوروب يرينه
 اوكدن طولمه برطوب اقامه ايتمشدر. بوطوب، دزداراغالرينك
 او طه سنده برايله مش اولوب او كي آچيلمش و يالكز ايام رسميه
 و شرعيه ده آتيلمقده بولمشدر. يري يوكسك اولدينى مناسبته
 طوپك صداسى ايكي ساعتمك كويلره قدر كيتمكده در. رمضان
 تطوعندن بيرام نهايته قدر طوپلر آتيلير. طاووللر چالينير.
 طوپچيلرى، طاوولچيلرى اماسيه بلديه سندن موظف اولوب
 تخصيصات سنويه لرى واردر.

صاغنمه بونك تربه شروانى كامل
 قنديل هدى، فيض خدا، نور فضائل
 ياننده ياتار حضرت عيسى كبي فاضل
 اطرافى بتون كمل و اخيار اماسيه

بو قلعه نك صاغ طرفنده، يعنى شرق شالي سنده بولونان

(شروانی تربه‌سی) دینور. شروانی اسماعیل سراج الدین
اقدینک اورایه دقتدن اول شاملیلر اوستی دینمکده ایدی.
۱۲۸۴ ده مخدومی صدر اسبق (محمد رشیدی پاشا) تربه‌بی
انشا ایتدکده بونام ایله اشتهار ایتمشدر. تربه‌نک اتصالنده
برجامع شریف اولوب حولیسی واسع، دائره‌سی لطیف‌در.
تربه‌نک حولیسی‌سندده مکمل برقوناق واوکنده برشادروان
اولوب باغچه‌سی، منظره‌سی پک کوزلددر.

شاملیلر محله‌سی چشمه‌سینه جاری اولان صویندن برمقدار
آلندینی حالده مؤخرأ تمامی بو تربه‌یه اجرا و چشمه‌دن قطع
ایدلمشدر. تربه دروننده شیخ مشارالیهک مخدومی صدوردن
(احمد خلوصی انندی) و مشاهیر فضالان دامادی (الحاج
عیسی اقدی) دفن ایدلمشدر. بو تربه‌نک جنوب و شرق
طرفلری عموماً قبرستان اولوب پک چوق علمای اخیار،
فضلاى ابرار بوراده مدفونلردر.

فقط قبرستانک شمال طرفلری (تاتار محله‌سی) اولوب
بو محله‌نک و قبرستانک اوستی و تربه‌نک غرب و شمال طرفلری
باغلردر. بوباغلر ۱۳۰۰ تاریختدن صکره تحث ایدوب
هواسی صاغ-لام، موقعی لطیف ایسه‌ده صوبی اولمدیغندن
(احق باغلری) دینمشدر. بعض طرفا (احق) لفظه اوج
نقطه علاوه‌سیله (اوچاق باغلری) دییه‌رك (جنت باغلری)
دیمک ایسته‌مشدر.

صولنده دخی مقبره حضرت جوعی
فیضك بورادر مبدأ پرذوق طلوعی
بولش بورالر تام کریمله شیوعی
حقاً بورادر جمع اسمار اماسیه

قلعه بالانك صول طرفی ، یعنی غربی (شیخ جوعی)
دیمکه مشهور باغلردر . السنه عامه ده (جیغ جینی) دینور .
بو باغلرك اوست طرفنده طریقت مولویه مشایخ بنامندن
(جمال الدین محمد جوعی چلبی) نك تربه سی و ۸۱۷ ده بنسا
ایلدیکی مولویخانسی و نامیله مشهور قریه سی واردر . شیخ
مشارالیهك قریه سنه اجرا ایلدیکی صویندن اشاغی طرفنده
بولونان باغلر اسقا اولمقده در . صوی ، قریه سی ، مزرعه سی
وقفدر .

ایام بهارك ایلک دورء مسعوده سنده بو باغلرك لطافتی پك
مشهور اولدیغی جهته اماسیه اعیانی وارباب یساری نیسانك
یکرمیسندن اعتباراً بورایه کوچرلر هواسی لطیف ، کرازی
مشهور ، کوشکلری غایت ظریف در . اوراسی اذواق روحانیه
منجی ، مصاحبات ذوقیه نك مجمعی در .

اما سیه ده ارباب تنزه ایچون متعدد مسیره لر ، متزه لر
موجود اولوب ایلک بهارین اعتباراً باشلار . مایس نهایتنه قدر
دوام ایدر . بومسیره لر دن یرنجیسی وابتداسی بو (شیخ جوعی

باغلی (در بعدہ (زیارہ) و (کرازی درہ) و (دربند)
 باغلی دہ متزہات مشہورہ دن اولوب جمعہ کونلرینہ وقادینلرہ
 مخصوص اولان مسیرہ لر دخی (شروانی) بعدہ (سرای دوزی)
 بعدہ (چناقلر) بعدہ (قاشیق پیکاری) نام موقعلر در .

کلکیس ایدی اول بورانک نام قدیمی
 تزیین ایدیور باغچہ سنی باد نسیمی
 ارباب تنزہ آلیور فیض عمیمی
 اذواقی بورادہ بولور افکار اماسیہ

بو باغلی (شیخ جوئی) مرحومک دورینہ قدر قدیمآ
 (کلکیس) دیمکلہ مشہور اولدینی شیخ جوئی وقفیہ سندنہ
 مسطوردر . توار یخ عربیہ دہ (قالس) نامیلہ مذکور اولان
 بوموقعده شیخ مشارالیہ طول مدت اقامت و جامع ، مولویخانہ ،
 مکتب و تربہ کبی خیراتی انشا و عمارت ایلدیکی مناسبتلہ بورالر
 عمومآ (شیخ جوئی) نامیلہ اشہار ایتمش واسکی نامی
 اونودلشد .

اماسیہ نک شمال و غرب طاغلرینک تلاقی ایتدیکی موقع ،
 قوسہ مشابہ بر دائرہ تشکیل ایلدیکندن بو قوسک مجموع
 دورہ سی (کلکیس) نام قدیمیہ مشہور ایکن اورتہ سی
 (شیخ جوئی) نامیلہ کسب شہرت ایلہ مشدر . ملوک امویہ دن
 (ولید بن عبدالملک) و (هشام بن عبدالملک) زمانلرندہ

و (سيف الدولة حمدانی) دورنده دلاوران اسلام بو طرفدن
هجوم ایلدیکی مناسبتله توار یخ عربیه ده نامی (قالس) وباغلو
(بطن قالس) نامیله قید ایدلشدور . بو باغلرک ایچنده ظهور
ایدن اجساد ؛ زمان حربک یادکاری اولدیغنی اخطار ایتیمکده در .

مغرب طرفی کوه رفیع قرمانی
اولش اتکی اق بیلکه جای امانی
تفسیر ایله تقواده علم ، پیر زمانی
قدسی شیم ومفخر اطهار اماسیه

اماسیه نك مغرب طرفی (قرمان طاعی) دیمکله مشهور ،
خفیف اورمان اولان بر طاغ ایله محاط اولوب شمالدن جنوبه
طوغرو اوزانمشدور . بو طاغده کلکیس نامیله مشهور اولان
جبلک بر قسمی ایکن ۷۲۷ ده کمشلی زاده (تاج الدین محمود
چلبی) نك مصر ترکمنلری طرفدن اخذ واعزامنه مأمور اولان
قرمان زاده (یحشی بك) اماسیه یه بو طاغدن آشوب کیردیکی
ومحمود چلبی بی طوتوب مصره اعزام ایلدیکی مناسبتله یو طاغه
(قرمان طاعی) دیندیکی ظن اولتور .

بو (قرمان طاعی) جنوب بوغازینک منتهاسنده کائن
(چالاک کوپری) باشنه قدر امتداد ایدر غرب طرفلری
(کلد کلان) صحراسنه ناظر اولدیغی کبی شرق طرفلری ده
عموماً اماسیه شهرینه ناظر در . بو طاغک شرق اتکلرندن

(شیخ جوعی) موقعنك جنوب طرفلرینه تصادف ایدن یرلره
(اقبیلک) دینور . سادات علمای حنفیه دن و کبار مفسریندن
(اقبیلک) دیمکله مشهور (منلا بحشی خلیفه) حضر تلی
باغلرک جنوبنده یوکسک بر موقعده مدفون اولدینی مناسبتله
۹۳۱ تاریخندن اعتباراً بورالر (اقبیلک) نامیله اشهار
ایتمشدر .

اقبیلک باغلری شیخ جوعی باغلرینک جنوباً اشاعی
طرفلرنده اولوب شمالدن جنوبه طوغرو اوزانمش بر مستطیل
شکلنده در . اطرافی دیوار محاط اولوب جسم بر باغ ایکن
مؤخرآ تقسیماته اوغرا دینی ظن اولنور . بواقبیلک سمتنک
اوست طرفنده قرامان طاغنک شرق انککنده کائن باغلره
وبایلرله عموماً ایلبکتین دینور .

(ایلتکین غازی) امرای دانشمندی دن و خوارزم
ترکمنلردن اولدینی (تاریخ آل دانشمند) ده مسطوردر .
امیر مشارالیه ؛ ابتدای فتحده اماسیه بو طرفدن جبراً دخول
ایددرک کلکیس قلعه سنی تخریب ایلدیکی ومؤخرا بورایه دفن
ایلدیکی مناسبتله بورالره (ایلتکین) دینمشدر . ۵۶۷ تاریخندن
شمدریه قدر قیودر . حمیه و خاقانی ده (التکین) نامیله مقید
ویاننده (قدم پاشا) دیمکله مشهور (جهان خاتون) مدفون
اولدینی مشهور ایکن واضح افندی نك بورایه دائر ویردیکی
معلومات بر خرافه صرفه اولور .

اليوم (ايلتکين ترهسى) ناميله مشهور اولان موقعك
کيريسنده طاش ييغينلري وديوار قديم خرابهلري (کليکيس
قلعهسى) نك خرابهسى اولق اوزره کوس-تريليور . بوقلعه ،
قارشيلقلى اولوب (فرهادقياسى) نك شمانده کائن دره نك
يوقاريسنده جسيم بر طاش اويونى مشاهده اولنمقده در بوطاش
اويونك ايچ طرفى يکپاره طاشدن اويولش بريول شکلنده در .
تقريباً اون متره قطرنده اولان بودليك طاش ايچنده اشاغى يه
طوغرو اينمکده در .

دوران ايدن روايته نظراً بو طاش يول ، فرهاد اراسنده
بولونان ايرماغك التندن کچه رك کليکيس قلعه سینه منتهى در .
فى الحقيقه بوطاش اويوقدن ايچرى کيدن بر آدم صول طرفنده
اشاغى يه طوغرو کيدن بريول مشاهده ايدر . وقيله موم ياقوب
برجوق ذوات ايله بويول تعقيب ايدليسه ده تقريباً اوتوز متره
قدر ايلريسنده کهرچله نك تأثيرى نزايد ايلديکندن عودت
ايدلمشدر .

بو (ايلتکين غازى) ترهسى درت طاش ستون اوزرنده
بر قبه عتيقه دن عبارت اولوب نذرنده (قدم پاشا خاتون)
مدفوندر . اوراده بردها مزار قديم وارايسه ده کيم اولدينى
اکلاشيله مدى بوخاتونك اوراده دفنى قيود قديمه ايله مثبتدر
کرك غازى مشاراليهك وکرك بو قدم پاشانك وقفلرى واردر .
يازى باغلرى وقره سکر محلهسى عموماً غازى مشاراليهك

وقتی اولوب ۱۱۶۰ تاریخه قدر اولادی تولیت طریقله تصرف ایتمکده لر ایدی .

بوتر به نك اطرافى وقتيله بویدن بویه بر محله اولوب (سمره) ناميله مشهور اولان قصبه جدیده نك مرکزی اولدانی ۱۰۵۲ ده محرر قیود خاقانیله ایله مثبتدر . الیوم بو محله یوقدر . جامی ، ایکی مسجدی ، بر مکتبی مندرس اولدیغندن اوقافی ده مضبوط خزینه اولمشدر . اوکنده بولونان باغلیرى مشهور اولوب اسکیدن بری باغجیلرک بو ایلتکین غازی یه بیوک حرمت مخصوصه لری واردر قدیمآ اما سیه لیلر غازی مشارالیهک قبرینی هر سنه شعبان اوائلنده [۱] جم غفیر ایله زیارت ایتکی اعتیاد ایتشلر ایکن ۱۲۴۲ دن صوکره پک چوق عادات حسنه ملیه یهوده ترك ایدلدیکی کبی بوده مؤخرآ ترك ایدلمشدر .

بویدن بویه بر منظره حورلقادر
مستغرق انوار فیوضات خدادر
هر بر طرفی باغ ارم ذوق فزادر
هپ بونلری سیراب ایدر انهاراماسیه

[۱] ایلتکین غازی اماسیه یه شعبانک ایکنجی کونی فاتحانه کیردیکی متواتر اولدیغندن مشارالیهک قبرینی زیارت ایتک اماسیه لیلره مخصوص بر عادت قدیمه اولدیغنی شیخ زاده (حاجی علی افندی) پدرندن نقلآ وبالمشاهده فعلنی بیانآ سویلر ایدی .

اماسیه نك طوپراغنده جناب خالق فیاضك احسان بیوردینی
 قوه انباتیه فوق العاده در هر باغنده انسانی اغنا ایده جك برر
 دینه تجارت ، هر ترلاسنده مملکتی احیا ایده جك برر خزینه
 ثروت مکنوزدر .

باغلیر ، یشیل ایرماغك هر ایکی طرفی احاطه ایده رك
 طولانی ، غایت مزین بر قامت انسان شکننده در . یوکسکدن
 تماشا ایدن بر ناظر ، یشیل ردایه بورونمش بر حوره ، یاخود
 اشعه خضرادن متشکل بر نوره تشبیه ایدر .

اماسیه نك باغلیری ایرماغك طولی اعتباریله بر طرفدن
 دیگر طرفه اون سکنز ساعتك بر مسافه بی اشغال ایدر .
 بو مسافه طویله نك اورته یری (اماسیه شهری) در . بوباغلیرك
 آدلری ، موقعلرینه وصاحبلرینه نسبتله یاد اولمقده در .
 ایرماغك ساحل جنوبیسنده (سلطان بایزید خان ثانی) جامع
 شریفدن اعتباراً غربه طوغرو محله (حاجی الیاس محله سی)
 اوکنده (اینه خان) بعده (یورکچ پاشا) بعده (حاجیلر میدانی)
 بعده (فرهاداراسی) بعده (چالاک کوپری) باغلیری بو ناملر
 ایله مشهوردر .

(بایزیدپاشا) جامع شریفدن اعتباراً شرقه طوغرو
 (آخوراویکی) بعده (ایاواصل) باغلیری (زیاره محله سی)
 حداسنه قدر ممتد اولوب ایاواصلك جنوب طرفلری عموماً
 (کرازیلی دره باغلیری) دیمکله مشهور اولدینی کبی (قوش

کوپری باشندن اعتباراً ایرماغک ساحل شمالیسنه (باغچهلرایچی)
وبعدہ (فلینکیر ، فرینکیر ، فرنکیر) وبعدہ (زیاره)
باغلری دها زیاده مشهوردر . (باغچهلرایچی) مقدماً سرائک
تتماندن ایکن بیکحدودنده اعیان وافراده فروخت ایدلمشدر .
(میدان کوپری) نک ساحل شمالیسنندن اعتباراً (اوق
میدانی) بعدہ (ایلتکین) باغلری مشهور اولوب (چالاک
کوپری) باشنه قدر ممتداولور . بو طرفده ایرماغک ایکی طرفده
بولونان باغلرک ارقه لرندہ ایکی میدان جسیم اولوب شمال طرفده
کاثن میدانہ (اوق میدان) وجنوب طرفده کاثن میدانہ
(حاجیلر میدان) دینور اوق میداننده قدیمأ اوق آتمق تعلیم
وحاجیلر میداننده حجازہ عزیمت وعودت ایدن حجاجہ دعا ایدلدیکی
مناسبتله بونا ملرله مشهور اولمشلردر .

اماسیه نک شو جسیم ولطیف باغلرینی ، اماسیه دن جریان
ایدن ایرماقلر اسقا ایتمکده در . اماسیه نک ایرماقلری ، بری
بیوک ، دیکرلری اوافق اوله رق اوچدر . هر ایکی ایرماقده
بیوک ایرماغه قاریشدیغندن (اماسیه ایرماغی) ناميله اشهارایدن
اصل بیوک ایرماق کسب جسامت ایدر .

(۱) (یشیل ایرماق) درکه ازمئه قدیمده (ایریس)

و (نهر آماس) دیملکه مشهوردر . اماسیه نک غرب جنوبیسنده
(طوروس ، بوغا) طاغلرندن نبعان ایدہ رک سیواس وتوقاد
سجاقلرینی طولاشوب جنوب طرفدن قره دکزه دوکولور .

بو (ایرماق) اماسیه نك اورتەسندن آقار . مارت اوائلندن اعتباراً چوغالیر . بعضاً طاوایی ، یعنی کنارینی آشار . اطرافه طاشار . شهری وباغلری باصار . لکن قبارسه لطافتدر . طاشارسه برکتدر . آقسی بر فیض رحمتدر . اماسیه نی ازمئه - قدیمه دن بری کوچك آسیاده حاکم بلاد ایدن بو ایرماق در . اماسیه نك بو ایرماغه احتیاجی ؛ هر فردك یمكه ، ایچمه كه احتیاجی قدر مهم در . خلاصه اماسیه نك حیاتی بو ایرماق در .

بو ایرماغك اسم قدیمی اولان (ایریس) کله سی تحایل اولنورسه تورك لغتی اولدیغی تظاهرایدر . او یغور دیلنده جسم آبیوك اولان شیئه (ایری) دینوب اسکی توركلر بومغایه (ایریس) و (ایریک) لفظلرینی قوللانیرلر . قبیله بیوکی ، اصل ونحیب مغناسنده دخی استعمالی شایع اولوب مؤخرأ لسان عربیه انتقل ایلدیکندن اصل ونحیب مغناسی محافظه و تعریب ایدیلهرك صدیق وزننده (ایریس) دینمشددر . بو ایرماغك اوزرنده یوزلرجه دولابلر موجود اولوب بونلرك واسطه سیله عموم باغلر اسقا اولنور .

اماسیه وادیسنده الئی عدد کوپری اولوب دردی کارگیر ، ایکسی اخشابدر . بونلرك هیچ بری ده ازمئه قدیمه دن قالمه اولیوب جمله سی ده فتح جلیل اسلام دن صوکره بنا ایدلمشددر . (۱) (چالاک کوپری) اولوب جنوب بوغازینك ، یعنی فرهاداراسنك منتهاسنده کائندر . تملی واوززی ویانلری طاشدن وکمرلری و آیقلری قیرمنی طوغله دن یاپیلشمشددر جنوب طرفنك

اورته سنده اوفاق و مربع بر او طه شـكـنـده چيقتي اولديغدن
چاللق معناينه اولان چالاك ديمشـدر . بو كوپري ، وئائق
عتيقده (التكين كوپريسي) ناميله مقيددر .

شوقيده بناءً بو كوپرينك ، اشاغى طرفده مدفون اولان
امراي دانشمنديه دن (ايلتكين غازي) طرفدن انشا ايدليكي
اكلاشياير . لكن تمل طاشنه باقيليرسه مقدماً اوراده بر كوپري
اولوب خراب اولدقدنصـكره حكومت دانشمنديه زماننده بنا
ايدليكي تخمين اولنه بيلير . قيرمزي طوغله ايله انشا ايديلان
آثار قديمك اكثريسي بودوره عائد اولديغي امثـلـدن استدلال
اولنمقدهدر .

(۲) (ميدان كوپريسي) اولوب سلطان بايزيد جامع شريفنك
غرب طرفده كائن حاجي الياس محله سنك منتهاسندهدر . ميدان
قيوسي ديمكـله مشهور قلعه قيوسـنك اوكنده بولونان اخي
سابق الدين محله سي حذاسـندهدر . هر طرفي ، رنكي صاري يه
مائل طاشدن ياپيلمش غايت متين و مجدداولوب ديكر كوپريلره
نسبتله قوسي براز طار اولديغدن اورته سي ديكجهدر .

بو كوپرينك يوز متره قدر اشاغيسنده اليوم ايجري شهرده
كمرينك جزئي بر قسمي مشاهده و ۵۴۰ حدودنده (سلطان
مسعود سلجوقي) طرفدن انشا ايديلن (سلطان كوپريسي)
۷۱۸ زلزله مدهشه سنده منهدم اولديغدن در حال بو كوپري
ابتدا اخشاب اوله رق بنا و ۷۷۶ حدودنده اماسيه اميري

(شاد کلدی پاشا) طرفندن کارکیراوله رق انشا ایدلمش وبعده بوده زلازل متوالیه دن دفعات ایله مصاب اولدینی حالدده ۱۲۴۱ ده ایرماغک جوش و خروشنه تحمل ایده مدیکندن ۱۲۴۴ ده اماسیه اعیانی اوزلو (الحاج یوسف اغا) معرفتیه تجدید اولمشدر .

(۳) (ماغدینوس کوپریسی) اولوب سلطان بایزید مدرسه سی اوکنده در . بو کوپری قدیمأ اخشاب اولوب السنه عامه ده (ماده نوس کوپریسی) دینور . بو اخشاب کوپرینک اوائل بناسنه دائر معلومات الده ایدیه مدی . انجق سلطان بایزید جامع شریفی بنا اولندقدده ۸۹۰ ده اعمار ایدلمش و مؤخرأ ۱۰۳۱ ده موالیدن (سعدی چلبی) و ۱۰۶۳ ده (حلواجی محمد اغا) و ۱۱۳۰ ده (امیر حاجی عبداللطیف چلبی) و ۱۲۴۱ ده رختوان پاشازاده (الحاج علی بك) و ۱۲۸۱ ده اماسیه متصرفی (ضیا پاشا) ربوندن صوکره مکرراً بلدیة طرفلرندن تعمیر ایدلمشدر .

(۴) (آچاق کوپری) اولوب قیزلر سراینک حذاسنده در . بو کوپرینک الیوم تملی اولان دیگر کوپری اوافق کوزلی اوله رق غرایت دن یاپیلمش اولدینی شکلندن اکلاشلمقدده در پک قدیم برزمانده بنا ایدیلرک اصلاً محتاج تعمیر اولدینی حالدده ایرماغک طولمه سیله یتاغنده کوزلری غائب اولوب کهرلری اوزرینه قالین ، مربع الشكل ، کارکیر آیاقلر وضع ایدلمشدر .

بو کوپری ؛ پون حکومتی آئارندن اوله رق زمان کچدجه
 آلچالیدیغندن السنه عامه ده (آلچا کوپری) دینوب ۱۲۸۱
 تاریخته قدر اوزرندن مرور و عبور ایدلیدیکی حالدده ایرماغلک زمان
 طغیاننده مخاطره نظر دوقته آلنه رق اسبق امامیه متصرفی مشهور
 (ضیاپاشا) آلچا کوپری بی تملا اتخاذ ایدهرک اوزرینه اخشابدن
 دیگر کوپری قوردرمش و ۱۲۹۸ طغیاننده جریانده تحمل
 ایدمه یهرک کندینی قابدرمش اولدیغندن ارباب خیر و یسارک
 اعانایله ۱۲۹۹ ده ایاقلری کارگیر و اوستی اخشاب اوله رق
 یادیرلمشدر .

(۵) (هلاکیس کوپریسی) اولوب دائره حکومت جوارنده
 ساعتخانه اوکنددر . السنه عامه ده (حکومت کوپریسی) دینور .
 اساساً هلاکیس محله سی سکنه سی عموماً بو کوپریدن کچدیکی
 مناسبتله (هلاکیس کوپریسی) دینمشدر . قدیمآ تعمیر و تجدید
 اولنه رق ادامه ایدیلوب ۶۹۰ حدودنده (خواجه محب الدین
 مودود الزیاری) و ۸۰۰ ده کشلی زاده (شمس الدین احمد چلبی)
 و ۸۸۰ ده (احمد بک) و ۱۰۱۴ ده چاوشان درگاه عالیدن
 (مصطفی اغا) و ۱۰۵۴ ده حاجی افندی زاده (صاری محمد اغا)
 و بعده پک چوق اعیان طرفلرندن مجدداً اعمار ایدلمشدر .

بو کوپرینک یکر می بش متره قدر اشاغیسنده تام حکومت
 دائرده سی قپوسنک اوکنده غایت ظریف بر صورتده اخشابدن
 و (ضیاپاشا) طرفندن ۱۲۸۱ ده دیگر بر کوپری انشا ایدلمش

ایسه ده (۱۲۹۴) طغیانده منهدم اوله رق انا طولی مفتش عموم یسی جبارزاده مشیر (احمدشا کرپاشا) کارگیر اولمق اوزره ۱۳۱۸ ده تجدیدینه قیام و تحصیل اعاناته اقدام ایتش و اوچ ایاقلری ده یایلمش اولدینی حالده بر مناسبتسزلك اكالنه مانع اولوب اعانات عظیمه هدر وایاقلرده ایرماغك مکرراً طغیانیه منهدم اولمشدر .

(۶) (قوش کوپری) اولوب شاملیلر محله سنك اوکنده وقومه جق حمامك قارشوسنده در تورك آثارندن اولوب قوسی غایت واسع اولدیغندن اوزری دوز کبی در . قدیمآ طاشدن انشا ایدلمش اولوب غایت متین در سلاطین سلجوقیه نك صوکی اولان سلطان مسعودك والده محترمه سی (خوندی خاتون) طرفندن بنا ایدلیکی قیود عتیقه ده محرردر .

فقط (عقدالجهان) تاریخنده ضبط ایدلیکی اوزره سلطان مسعودك والده سی (اوربای خاتون بنت برکه خان) اولدیغنه نظراً (خوندی خانون) سلطان مشارالیهك والده سی دکل ، کریمه سی اولدینی اکلایشیلیر . السنه عامه ده قیزی اولمق اوزره اشهار ایدلیکی بوقولی تأبید ایتمکده در .

۷۶۸ تاریخنده محرر قیود عتیقه ده (خوندی کوپری سی) وبعده (قوندی کوپری سی) دیمکله مشهور و مضبوط اولان بو کوپرینك اسمی مؤخرآ تحریف ایدیلهرك (قوش کوپری) دیمشدر . یورکچ پاشا طرفندن بنا ایدیلهرك (یورکچ کوپری سی)

وبعدہ تحریفاً (قوش کوپری) دیندیکی واضح افندی طرفندن
یازیلیور ایسده تاریخه مستند دکلدر .

(۲) (چکەرک ایرماغی) درکه ازمئه قدیمده (اسکیلایس)

دیمکله مضبوط و مشهور اولوب اوروپا سیاحلری بو نهری
تدقیق ایدرکن (چکەرک) اسمنی یا کلش اخذایدهرک (چوترک)
صورتنده قید ایتمشلردر . زیله طرفندن کلوب اماسیهنک غرب
جنوبیسنده کائن (قیا باشی) نام محلنهک غرب طرفنی احاطه
ایدهرک (سرچوبان تپهسی) اوکنده یشیل ایرماغه قاریشیر
بو ایرماق چای کبی اوفاقدر بهار موسملرنده جوشار . بعضاده
تمامیله کسپیلیر . فقط : آقارسه منفعتی چوقدر . جوشارسه مضرتی
یوقدر . بو ایرماغک خفت جریانه ، بعضاً انقطاعنه باقیلیرسه
(اسکیلایس) نام قدیمی (سنکیلیک) تورکجه سنک محرفی اولدیغی
ظن اولنور .

(۳) (ترس آقان ایرماغی) در . شمالدن جنوبه طوغرو

آقدیغی ایچون ترس آقان دینمشدر . (اخبارالعباد) ده بو
ایرماغک (النهرالمقلوب) نامیله مقید اولدیغنه نظراً بو نام
تورکلر اراسنده ابتدای فتحندن بری اشتهار ایلدیگی اکلایشیلیر
دهاقدیم اسمی و ثائق عتیقهده (استیفونوس) و (ایستیتوس)
اولمق اوزره مقیددر . صوک اسم (ستیت) تورکجه سنک
صورت محرفهسی ظن اولنور .

بو ایرماق ؛ لادیک قضا سنک شمالندن جریان ایدهرک حوضهک

شرقتدن و (صولی اووا) نك اورتەسەندەن مرور و بورادە
اماسیەنك شمال بوغازینە دخول ایدوب (باغچەلر ایچی) اوستندە
یشیل ایرماغە انصباب ایدر . جریانى دائم اولوب یاز کونلرندە
آزالیرسەدە بہار موسەملرندە چوغالیر . جوشەدینی وقت ،
اطرافە طاشوب ایراث خسار ایتدیکی جەتەلە (دلی چای)
دخی دینور . ایکی ساحلندە بولونان پك چوق فابریقەلر ،
دکرمئلر ، باغلر و باغچەلر بوچایدن مستفید اولور . اوزرندە
مشہور وقیم ایکی کوپری واردر .

(۱) (زیارە کوپریسی) اولوب چایک ایرماغە قاریشدینی
یرە قریب بر موقعە زیارە یولی اوزرندە کائندر . بو کوپری
(سلطان مسعود ساجوقی) طرفندە بنا ایدلیدی
(مسعود کوپریسی) نام عتیقندن و طرز معماریسندن استدلال
اولمقندەدر . غایت متین اولوب (اثار سلاجوقیہ) دن اولدینی
هر طرفی اثبات ایدر . طرزی ، وسعت قوسی (قوش کوپری) یە
مشابہ ايسەدە شکلی دها لطیف ، دها مصنع در .

(۲) (چلتک کوپریسی) اولوب (صولی اووا) نك
منہاسندە اماسیہ یولی ایلہ مزریفون یولتک آرلیدینی نقطەدە
واقع در . بو کوپری برکوز اولوب قوسی طار اولدینی مناسبتلہ
کمری غایت یوکسک ، اوستی صوکرجه دیک ایدی ۱۳۰۰
تاریخندن بری مکرراً تجدید و تعمیر ایدیلن شوسە یولی ایکی
طرفی دہ تمامیلہ طول دیروب تسویہ ایلدیکندن کمر اشاغی یە اینمش

واوستی دوزلنشد . ۸۱۲ ده موجود اولدینی ا کلاشیلان .
 بو کوپرینک بانسی کیم اولدینی ا کلاشیلهمدی کوپرینک طور
 ارتفاعه ، طرز معماریسنه باقیلیرسه سکننجی عصر عجری .
 آتاردن اولدینی تخمین اولنور .

هر وقته کوره میوه لری کامل ومبذول
 هر میوه سنک طعمی بتون دهرده مقبول
 الماسی هدایا اوله رق هریره مرسول
 هر بلده ده مشهوردر امار اماسیه

شواوچ ایرماغک ایکی ساحلی اوزرنده بولونان وهربری .
 نعم مخصوصه ربانیه نك بر مخزن دائمیسی اولان باغلرک طوبراقلری ؛
 ایلک بهارک اوائل حلوانده نشئه یاب طراوت اولدینی زمان ؛
 اماسیه خاکنک قابلیت فطریه سنه بناء احسان بیوریلان فیوضات
 سبحانیه انظار کائناته عرض ابتسام ایدر .

قدرت فاطمه نك انعامات خاصه سی تزايد ایتدکجه دروننده
 اعمالی مندرج بردوتر معرفت کبی ارباب فیکرتی حیران ایدن ،
 غایت لطیف یاپراقلر ، صوک درجه ظریف بر صورتده یشیل .
 رنک ایله عرض اندام ایدر .

یشیل ایرماغک ایکی ساحلی بویدن بویه یشیلاره غرق
 اوله رق روزکار اسدکجه یشیل دریاده حصوله کلن تموجات .

لطیفه کی یشیل یاپراقلرک هر ایکی طرفه التفاتندن حاصل اولان حرکات خفیفه ارباب سعیك قلوبنی تهزیز ، ثروت و سعادت رایحه سنی تبشیر ایدر . انظار دقت ، تجلیات قدرتك امامیه طور پرانغه احسان بیوردینی بدایع طبیعتی تماشا ایتدکجه حیران اولور .

شوبدایع فطرتدرکه امامیه نك هر باغنی جنت ، هر اغاجنی پر بهجت ، هریرینی بر منبع لطافت ، هر میوه سنی مبذول ؛ هر نوعنی مقبول ایتمشدر . امامیه نك منابع تجارتی ، خزائن سعادتیی بوباغلردرکه هر درلو محصولاتک برنجیلرینی یتشدیرمکله مشهور اولمشدر .

امامیه نك الماسی ، بامیه سی ، آیوه سی ، جوزی ، قارپوزی ، قاوونی ، اریکی ، کرازی و بغدادی جهـ انک هر طرفنده برنجی موقعی احراز و هر درلو میوه سی اقطار عالمده کسب امتیاز ایدهرک امامیه هی السنه انامده بنام ایتمشدر امامیه نك اخراجاتی محصولات ارضیه دن پک مهم اولوب بوجکخانه لری ، توتلری ، قوزه سی پک مشهوردر . سنین اخیرده سنوی قوزه سی بر میلیون کیلویه بالغ اولمقددر بونلردن ماعدا بغدای ، ارپه ، مصر ، یولاف ، کندیر و پرنج کی محصولاتیی مبذول ، تجارتی واسع معادنی مشهوردر . آلتون ، کومش ، باقر ، غاز ، کومور ، طوز کی معدنلری موجود ایهده بونلردن هنوز استفاده جهتی مفقوددر . صنایع و تجارت امامیه یهده ترقی ایتدکجه معادنی ،

محصولاتی مأمولك فوقنده تأمین سعادت ایده جکی محقق در .

هر موسمنك برشرف وعزتی واردر
 هر باغچه سنك بر طرب و بهجتی واردر
 هر غنچه سنك خنده علوتی واردر
 بلبلاری کریان ایدر ازهار اماسیه

هر یرده اولدینی کبی اماسیه ده دخی مواسم اربعه حکمنی
 اجرا و هر موسم بر عالم ذوق وصفایی احتوا ایدر . ابتدا کراز
 موسمنده کوریان جریان عمومی مواسم دیکرک اذواقی استقبال
 و هر موسمنك حلولی کویا بتون خلقه تأمین آمال ایلر .

کرازی ؛ قوزه موسمی تعقیب ایده رك برچوق اکلنجه لره
 زمین سماحت اولور بعده میوه موسمی حلول ایلدکده خلق
 بتون باغچه لره قوشار . ایرماغك لطافتی ، میوه لرك مبدولیتی
 عمومی ذوقیاب حضور ایدر . بعده بستان ، دها صکره اوزوم
 موسملری ذوق و تجارتی ابدال و ذخیره معاملاتی بتون خاکی
 اشغال ایدر .

شواحوال مخصوصه حاده تدقیقدن امرار ایدیایر سه اماسیه .
 ایلر ؛ تنبل ، محکوم عطالت اولمیوب بالعکس تجارت عالمنده
 سعی وغیرتی طبعاً ذوق و مسرت اتخاذ ایتمش واسباب تجارتی
 کندیلرینه بر ذوق مخصوص بیلمش اولدقلمی اکللاشیلیر .

علماء افکار اجتماعیه لری تنورایتدکجه اماسیه نك شهرت قدیمه سنی
احیا وساعات حاضره سنی اعلا ایده جکلری قابلیت فطریه لرندن
انتظار اولمه بیلیر .

یوزلرجه ملوک وامرا همتی کورمش
پک چوق اثر لطف ورفاهیتی کورمش
شایان اوله جق قدرینه بر حرمتی کورمش
تقدیر قیلنمش یینه مقدار اماسیه

اماسیه ؛ موقعنک لطافتی ، قلعه سنک رصانی ، اطراف
اربعه سنده قدرت فاطره نك چکدیکي سور طبعی حسبله ادوار
قدیمه دن بری پک چوق اهمیت ، ملوک سالفه طرفلرندن پک
عالی همت کورمش و بیکلرجه سنه دن بری اسکی نامنی ، اسکی
شرفی محافظه ایدره ک پک بیوک آثار عمران ورفاهیته نائل
اولمشدر .

ادوار قدیمه ده اماسیه نك کوردیکی زینت و احتشامی ،
تاریخ صحیفه لرندن زیاده الیوم اماسیه موقعنده یرالتنده بولونان
طبقه لرده آرامق لزومنی ، بالتصادف یرالتنده ظهور ایدن
مرمرستونلر ، مصنع قبلر اخطار ایتمکده در . یرالتنده کوریلن
شو آثار عتیقه اثبات ایدیورکه شمدیکی اماسیه نك زمین حاضری
اسکی اماسیه نك زمین غائبه نسبتله پک یوکسک اولوب مرور

سین و اعصار ، اسکی زمینی طاشار و طوپراقلر ایله طولدرمش و کویا اسکی شرف و احتشام آثارینی حسن محافظه ایچون چکوب دروننه آلمشدر .

یونت حکومتی دورنده اما سیه نك زمینی شم دیکی زمینه نسبتله لاقل الی متره قدر اشاغی ایندیکی ، چیقان آثار قدیمه دن ا کلاشیلیمقدده در . قیو حفریاتنده ظهور ایدن آثاره نظراً ایچری شهر ؛ کاملاً مرمر دوشمه ایله مزین و ایرماق طرفی بر سور محکم ایله محاط اولدینی و اکثر ابنیه سی قیرمزی طوغله دن و قسماً مرمر دن مصنوع بولندینی مشاهد اولنمقدده در . ایرماغك جنوب طرفلری یعنی یوقاری و اشاغی بازار بویدن بویه ایچری شهره محاذی اوله رق دوشمه سی مکمل ، ابنیه سی غایت کوزل اولدینی رجب ، شاملیجه ، صوفی زاده محله لری التنده بولونان آثار قدیمه اثبات ایدیور . الحاق کوپرینك طرز معماریسی و ایرماغك الته قدر اینسی ویرالتنده ظهور ایدن ابنیه یه محاذی بولنسی مقایسه ایدیلیرسه بو کوپری ، اودورك مصنوعات عجیبه سندن اولدینی ا کلاشیلیر .

آخور اوکی غایه سنده کرازی دره باغلرینك یولی اوزرنده بولونان ترلانك ایچنده ظهور ایدن مستطیل برقه وسائر آثار قدیمه بنعنات محلیه یی اثبات ایده جك وثائق تاریخیه دن معدود اوله بیایر . بو حواره قدیمأ (قرال سرایی) اولدینی و بعض وثائق شرعیده (۶۴۷) سنلرنده بورالره عموماً (فوقه) نامی

ویرلدیکی مشهور و مقیددر. جامع الدول دن نقلاً (باب اول) ده
 مذکور اولدینی اوزره اماسیه ده اولاد ملوکدن اولان (اولاد
 فوقا) نك مشهور اولدیغنه باقیلیرسه بورالر بیزانس ایمپراطوری
 (فوقا) نك سرایی و اولادینك محله سی اولدینی ظن اولنور .
 (بیزانس حکومتی) دورنده اماسیه نك زمینی بر درجه
 یوکسلوب اسکی اسامی تبدل ایدهرک اماسیه ده ونکیوس ،
 اندرونیق ، کرتوس ، مغدینوس ، قومنوس ، اغریتوس ، واسیلوس
 کبی کلیسا اسملری و اتا کیوس ، فوقاس ، کیراغوس ، الکسیوس ،
 قومنوس ، یانوس ، تکفور و هلکیس کبی محله اسملری بولنه رق
 فوقاس ، هلکیس ، قومنوس ، ونکیوس و مغدینوس محلاتی
 معلوم اوله بیللمش ایسه ده دیکر لرینك اماسیه ده واقعی تعیین
 اولنه مشدر .

(سلجوق حکومتی) دورنده اماسیه نك زمینی بر درجه
 دها یوکسلدیکی جهتله اثار رومیه دن اولان کلیسا کبی برطاقم
 مبائی دینه یاریه قدریرالتنده قالمش و سلطان مسعود سلجوقی
 اماسیه ده سمره یی انشا و اماسیه یی مجدداً تعمیر ایلدیکی زمان
 اثار قدیمه بتون غائب اولوب اوزر لرینه خانه لر ، خانلر ، جامعلر
 انشا ایدلمش و بعضی یرلرده اسکی زمینی محافظه ایده بیللمشدر .
 طاغ انکلری عموماً موقعلرینی محافظه ایدوب اماسیه نك اورتیه سی
 پک زیاده طولمش و شوقدر تبدلاته بناءً اسامی رومیه دخی
 تبدل ایدهرک تورک اسملری ، تورک تشکیلاتی قائم اولمشدر .

دور اسلامده اماسیه ایکی قسم اعتبار ایدیلوب اشاغی قلعه
 یعنی عموماً ایچری شهره (باطن اماسیه) یعنی ایچ اماسیه
 و اشاغی قلعه نك خارجی اولان ایرماغك عموماً جنوب و قلعه نك شرق
 و غرب طرفلرینه (ظاهر اماسیه) یعنی طیش اماسیه دینمشدر.
 دور سلجوقی ده باطن اماسیه میدان قپوسنك ایچ طرفندن اعتباراً
 (سو باشی) بعده (مسعودیه) بعده (یاغبصانیه) بعده
 (میراخور) بعده (قرا طای) محله لرندن عبارت ایدی .
 (ظاهر اماسیه) دخی شمدیکی کوك مدرسه دن اعتباراً
 (کودول) و بعده (خاقه-اه) و بونلرک شمال طرفلری
 (تکورسنان) و بعده (علیشیر) و بونك جنوب طرفلری
 (فتح خان) و بعده (ملک شهنشاه) و بعده (ملک غیاث الدین
 شاه) یاخود (غیاثیه) و بعده (دانشمندیه) یاخود (اسماعیل
 غازی ملکی) نامیله معروف محلاتک بولندیغی وثائق عتیقه ده
 مذکوردر . بومحلات اراسنده کوریلن حمامات عتیقه وجوامع
 ایله جیم و سنکین تربهلر بودورک آثار باقیه سندنذر .
 شومحلات ؛ اواسط دور سلجوقیه طوغرو تکرار تبدلاته
 اوغرایوب یکی اسملر تحدث ایدهرک دور جلیل عثمانی ده دیگر
 تشکلات حصوله کلش واسامی قديمه سلجوقیه دن بعضلری
 حالی اوزره قالب بعضلری ده تمامیله اونودلش ویرلرینه اسامی
 رجال عثمانیه قائم اولمشدر . بومحلات اراسنده الیوم شهود اولان
 آثار دینیه ، مبانی علیه اکثریتله شودورک آثار مهمه سندنذر .

برنجی دوره دن اعتباراً (اماسیه) جنوب غربی ده واقع
 (چالاک) موقعندن شرق شمالی ده واقع (زیاره) یه و طرف
 شمالی ده (ارغوما) یه قدر اطراف ثلاثه دن اوچ ساعته لک بر
 طول اوزرنده اولدینی حالدہ مؤخرآ ظهور ایدن محاربات
 داخلہ وصلیبہ ده صوک درجه خساراته معروض ومکرراً بویدن
 بویہ احراق ایدلمش اولدیغندن دور اسلام اوائلده اماسیہ نك
 بناسی تجدید ایدیلهرک اسکی مدنیت یرینه مدنیت اسلامیہ قائم
 اولمش واماسیہ مدنیت اسلامیہ اساسی اوزرینه انشا ایدلمشدر .
 بناءً علیہ اسامیٰ قدیمہ رومیہ سیاست اسلامیہ جملہ سندن
 اولمق اولمق اوزره قالدلمش اولیوب اماسیہ نك یکیدن بناسی
 اسامیٰ جدیدہ نك اشتہارینی واسامیٰ قدیمہ نك نسیانی موجب
 اولمشدر . بونکله برابر هلسکیس، ونک، مغدینوس وایاواسیل
 کبی اسامیٰ رومیہ قالمشدر. طقوز یوز سنہ لک براسلام مملکتندہ
 بیك سنہ لک اسامیٰ رومیہ نك قالدینی دوشونولورسه دیکرلرینک
 رفعی سیاست استقبال دکل، طبیعت حال مقتضاسی اولدینی
 تبیین ایدر .

هر ذره سی آلوده الطاف اکابر
 اظهار ایدیور عالمه بیك درلومفاخر
 اولمشدی محلاتی بتون خیره مظاهر
 هب شاهد عادل بوکا آثار اماسیه

شمیدی یہ قدر سلاطین ، وزرا ، امرا کی اکابر اسلامیہ نیک بذل نقود و ابراز سماحت ایدہ رک امامیہ ده انشا ایتدر دکری آثار جلیله امامیہ ایچون برز مفخرت و بانیلری ایچونده برز منقبت تشکیل ایتمکده در . امامیہ نیک حاوی اولدینی محلاتی ، بو آثار فاخره نیک مظاهر حسناتی اولدینی جهتله ابتدا اسمی محلات حروف حجا ترتیبی اوزره تفصیل و بعده بو محلات ایچنده بولونان جوامع و مساجد شریفه و حمامات و سائرہ ایضاح و مدارس ، مکاتب ، زوابع ، عمارات و تربله لر خاصه موقعلرنده ذکر اولنور .

۱ (اسلام محله سی) امامیہ نیک شرق طرفنده کدی کلی قیا اتکننده واقع اولوب شرقاً کدی کلی قیا اتکننده کی باغلی و غرباً دره و جنوباً تمنا محله سی و شمالاً یاصی قیا ایله محدود در . ۸۱۳ ده امامیہ قاضیسی اولوب (صارو قاضی) دیمکله مشهور اولان (بدرالدین محمود بخاری) کریمه سی و خطاط مشهور (حمدالله) افندینک عمه سی (اسلم خاتون) نامنه منسوب در . قیود عتیقه ده (اسلم محله سی) نامیله مقید اولدینی حالده السنه عامه ده (اسلام محله سی) دیه مشهور اولمشدر .

بو محله ده فاضله مومی البها (اسلم خاتون) بر مسجده شریف ویاننده بر مکتب و چشمه بنا ایدہ رک (۸۴۸) ده اوقافی تنظیم اینمشدر . زوجی جمالی محمد چلبی اولادی اولان (کمال چلبی) و بونک اولادنن شیخ الاسلام جمالی زاده (علی چلبی) و

دیگر اولادی متولی اولوب بعده منقرض اولدقلری ظن اولتور
بومحله دن مشارالیه زنیلی (علی افندی) کبی شیخ الاسلام
و (پیری محمد پاشا) کبی صدراعظم ظهور ایتمشدر .

۲ (اسکی کتخدا محله سی) سلطان بایزید خان جامع شریفنک
شرق طرفنده واقع اولوب شرقاً کوپری باشی و غرباً سلطان
بایزید تابخانه صره سی و جنوباً بوزه خاه و شمالاً یشیل ایرماق
ایله محدوددر . ۸۳۵ تاریخنه قدر اماسیه والیسی یورکچ پاشانک
کتخداسی اوله رق ضابطه بلدیه وعدلیه و ظائفنده پک زیاده
عدل و شهرته مالک اولان (الحاج محمد اغا) نک ارتحالنده یکی
کلن کتخدا دخی (محمد اغا) نامنده برذات اولدیغندن اولکی
(محمد اغایه) یه (اسکی کتخدا) دینمش واقامت ایلدیکی بومحله
(اسکی کتخدا) نامیله شهرت بولمش اولدیفنی تبعات تاریخیه دن
اکلاشلمشدر .

بومحله ده مومی الیه اسکی کتخدا (الحاج محمد اغا) بر
مسجد شریف بنا و بدستان ایچنده سکز قدر دکان
وقف ایدرک (قپوسی قبله مسجدی) نامیله مشهور اولمشدر .
حقیقه قپوسی قبله طرفنه تصادف ایتمشدر ۱۰۱۱ حریقنده
محررق اوله رق (حاجی افندی) دیمکله مشهور قضاندن چاوش
زاده (الحاج محمد افندی) ۱۰۱۸ ده مجدداً انشا و بدستان
ایچنده اوچ دکان وقف ایتمش و بعده مخدومی (صاری محمد اغا)
۱۰۵۷ ده ینه بدستانده کائن ایکی دکانی وقف ایدرک پدرینک
وقفنی توسیع ایتمشدر .

درگاه عالی قیوچی باشیلرندن حاجی افندی زاده (الحاج احمد اغا) بومسجد شریفک اوکنده و خانه سی اتصالنده ۱۱۸۰ ده و اعیانندن یکن زاده (حسین بک) ۱۲۱۸ ده خانه سی اوکنده بر چشمه بنا ایتدکلری کبی قلایحچی زاده (الحاج عمر اغا) دخی کاشفیه مدرسه سی اوکنده ۱۱۷۹ ده دیگر بر چشمه انشا ایله مشدر بومحله دن حاجی افندی زاده (عمر پاشا) و یکن زاده (عمر پاشا) کبی وزرا و بک چوق اعیان ظهور ایتمشدر بومحله قدیمآ (اعیان محله سی) اوله رق شرفی محافظه ایتمکده در . ۳ (اوچلر محله سی) سلطان بایزید جامع شریفنک قبله طرفنده (علیشیر محله سی) یرنده واقع اولوب شرقاً دوه خانه وغرباً رجب محله لری وجنوباً بر قسمی مزارلق و بر قسمی ده کوبجکیز محله سی و شمالاً شوسه یولی ایله محدود و (سمزه) بلده قدیمه سندن معدوددر . (چلبی سلطان محمد خان) حضر تلرینک دور همایونلرنده فوق العاده نفوذ و اقبالی حائر اولان معلم سلطانی نیکده لی زاده (صوفی بایزید) وعموجه سی (فیض الله) و (یعقوب) چلبیلره السنه عامه ده (اوچلر) دینوب بونلر بومحله ده اقامت ایدهرک بوراده بر خانه دروننده مدفون اولدقلری مناسبته (اوچلر محله سی) دینمشدر .

بونلرک اوراده اقامتی ۸۱۵ تاریخلرینه قدر دوام ایدوب تصادفات غریبه دن اولمق اوزره ۹۲۱ تاریخه قدر بومحله ده اقامت و (شهرزاده سلطان احمد) ه حلول ایدهرک فوق العاده

حائز نفوذ و اعتبار اولان (قطب الدين احمد) ، (قطب الدين عيسى) و (قطب الدين محمود) نام اوچ مفسد ايرانی يه ده (قطبلر) و (اوچلر) ديمش اولديغندن اوچلر نامی اشتار ايتمشدر. برنجی اوچلر ۸۵۰ ده تنظيم ايدیلان (قاضی عبدالرحمن مصاحی) و قفیه سنده و ایکنجی اوچلر فریدون بك منشآتنده محرردر .

بومحله ده اوچلردن (فیض الله چلبی) نك اخشاب اوله رق بنا ایلدیکی جامع شریفی ۱۰۱۱ حریقده یانديغندن ۱۰۱۸ ده موایلدن (سعدی چای) اطراف اربعمه سی کارگیر واوزری و مناره سی اخشاب اوله رق مجدداً بنا ویاننده بر مکتب و چشمه و درس خانه انشا ایده رك اوچلر محله سنده ایکی خانه سنی و عباد الله چارشو سنده بش و اشاعی بازارده ایکی و بقالار ایچنده اوچ دکاتی و قورشونلو محله سنده اوچ خانه سنی بوجامع و خیراتنك تعمیر و مرتزفه سنه ۱۰۳۹ ده وقف ایتمشدر .

بومحله ده اوچلر ویدیلر کی رجال مدفون اولوب اکثرینك تربه سی اولدیغی مناسبتله آتی ده تربلر بچنده ذکرایديله جکدر . خواجه سلطانی (عمرافندی) و دیار بکر بکلبکیسی (احمد پاشا) کی پك چوق اکبر بومحله دن ظهور ایتمشدر . بومحله نك منتهای شرقی سنده بولونان (سقا سوقاغی) مشهور یکيچری سرداری سقا اوغلی (ابراهیم اظا) ۱۱۴۰ نارینه قدر بوراده اقامت ایتدیکی منا - بته مشهور اولمشدر . بومحله ده شعبان زاده (الحاج

محمد اغا) نك وكاتب زاده (السيد الحاج عثمان اغا) نك بر
چشمه سی وارد .

۴ (اوزون مصطفى محله سی) بورمه مناره جامع شريفك
شالنده وشهنشاه ملكي يرنده واقع اولوب شرقاً دره وغرباً
خواجه سايمان وجنوباً قيديجی وشمالاً قزانجی محله لريله
محدود در اعيان تجار دن اولوب سلطان محمد خان ثانی وساطان بايزيد
خان ثانی طرف هايونلر دن مکرراً مصره سفارتله اعزام بيوريلان
(خواجه الحاج مصطفى چلبی) بو محله ده ۹۰۵ تاريخه قدر
اقامت ايتديکی مناسبته تسميه ايدلمشدر .

خواجه مومی اليهك بو محله ده بر مسجيد شريفی ومکتبی
وچشمه سی اولوب بونلری اداره ايدده جك املاکني ۹۰۰ ده
وقف وتوليتی مخدومی علمادن (الحاج محي الدين محمد چلبی) يه
واولادينه تخصيص ايتمشدر. بومسجيد شريف مکرراً يانديسه ده
احفادينك همتلريله اعمار ايديلهرك اليوم معمور بولمشدر .
چشمه سی موجود ايسه ده مکتبی يوقدر .

۵ (بايزيد پاشا محله سی) قوش کوپرينك جنوبنده قديماً
فوقه محله سی يرنده اولوب شرقاً باغلي ، غرباً دره ، جنوباً
صواچقه محله سی وشمالاً يشيل ايرماق ايله محدوددر . ۸۱۶
تاريخه قدر بو محله ده اقامت ايدن وزراي عظام عثمانيه دن يخشی
بك زاده (بايزيد پاشا) ناميله تسميه ايدلمشدر .

وزير مشار اليهك بو محله ده ايرماق کنارنده مصنع بر جامع

شریفی و شرق طرفندہ برمسافر خانہ ایلہ بردہ عمارتخانہ سی
وارد بونلری ۸۱۷ دە ۱ کمال ایدوب ۸۲۰ دە وقفہ سنی
تنظیم ایتشدرد .

جامع شریف ؛ اوکی ایرماق و اطراف ثلاثہ سی دیوار ایلہ
محاط اولوب بود اثره نك اورته یرنده واقع در . جبهه سی مرمردن
و اطرافی طاشدن یا پیلمش اولوب اوکنده ایکی مقصودہ سی
وہر برندہ مرمر اوزرینہ چیچکلکی ، اوفاق بررحوض ویانندہ
لطیف برنارہ سی واردرد . درونندہ ایکی طرفی بر حجره واسعہ
اولوب بو ایکی اوطه نك اراسی جامع شریف در . فقط زمینی
عموماً دوز اولوب نصف اعلاسی ، نصف اسفلدن برارشون
یوکسکدر . ہر برنصفی برر مربع تشکیل ایدر .

محراب و منبری غایت ظریف اولوب اوفاقدر . قپوسی
جسیم ، غایت مصنع اولوب اوزری ویانلری مرمر اوزرینہ
قبارتمہ لی چیچکلرایلہ مزین و منقوش در وقفہ سی جامع شریفک
طیشندہ قبه نك مستند اولدینی مربع کمرده قوشاغہ مشابہ
قیرمزی مرمر اوزرندہ محکوک اولدینی کبی قپوسی اوزرندہ
شو عبارہ عربیہ محکوکدر .

« انشأ هذه العمارة المباركة في أيام دولة السلطان الاعظم
الشاھنشاه المعظم السلطان محمد بن السلطان المرحوم بايزيد خان
خلد الله سلطانه الامير الكبير الوزير الخطير المفخيم بايزيد پاشا
عظم الله جلال قدره في تاريخ محرم سنة سبع عشرة وثمان مائة »

بوجامع شریفی، معمار مشهور (شمس الدین احمد شامی) نام براستاد ماهر یایوب اسمنی قونک صول طرفه حک ایتشدر بوجامع شریفک دروننده کائن ایکی حجره؛ درسخانه اولوب برمدرسه اعتباریله علمادن خیلی ذواته و ۱۲۱۰ ده ویسی بک زاده (السیدالحاج محمد افندی) یه و بعده اولادینه توجیه ایدلمشدر. تولیتی اولادینه مشروط ایکن منقرض اولملریله ۱۱۰۰ تاریخلرندن اعتباراً اندرون هایوندن محرج امکدارانه توجیه و ۱۲۵۱ ده اوقاف هایون نظارتنه الحاق بیورلمشدر. عمارتخانه نك شرقنده قوش کوپری حذاسنده (قومه جق حمای) نامیله برحام مشهور اولوب کوچک قپو اغاسی (ایاس اغا) قوجه جق خواجه احمد چلبی زاده خواجه محمد چلبی دن اشترا ایلدیکی عرصه اوزرینه ۹۰۰ ده بوجامی انشا واکال ایتشدر. قوجه جق عرصه سی اوزرینه یاپیلدیغی مناسبته (قوجه جق حمای) و بعده غلط اوله رق (قومه جق حمای) دینمشدر.

مومی الیه ایاس اغا بوجامی؛ شرق طرفنده یاپذردیغی سیکز خانه وبایزید پاشا دائره سنک قپوسی اوکنده واقع دکرمن ویاننده برباغچه ایله برابر ۹۰۰ ده وقف و حاصلاتی شاملر محله سنده کائن جامع ومدرسه ومکتبته تخصیص ایتشدر.

بایزید پاشا جامع شریفک قبله طرفنده کرازی دریه کیده جک یولک جوارنده امرادن (غازی بک) ۹۳۷ ده بر

مسجد شریف واوکنده بر چشمه واتصانده بر مکتب بناسیله
املاکنی وقف ایلدیکی مقیددر .

بوغازی بکک چشمه سی غربنده دره کنارنده کائن بردارء .
جسیمه ایچنده (قرا باغی الشیخ الحاج حمزه نکاری افندی)
حضرتلرینک نامنه انشا ایدلمش بر جامع شریف واتصالنده
مشارالیه مخصوص برتربه عالیه وغرب طرفنده اخشابدن بر
مدرسه واوکنده شادروان و شمالنده بر درسخانه یی حاوی دائره
مخصوصه واردر .

بوجامع شریف و مشتملاتنک اساسی ۱۳۰۴ ده وضع
اولنه رق شروان ایالتنده مقیم اولان خلفادن ویسی افندی زاده
(الشیخ الحاج محمود افندی) طرفندن جمع وارسال ایدیلن
اغانات نقدیه واماسیه ده (میرحسن افندی) طرفندن ایفاییدیلن
نظارت وعموم مریدان طرفلرندن بذل ایدیلن مساعی جده
سایه سنده هر طرفی طاشدن اوله رق ۱۳۱۰ ده قسماً اکمال وتدریجاً
مشتملات سائرده سی ده اتمام ایدلمشدر .

بوجامع شریف وتربه نک بناسی لطیف و مناره سیله مرمردن
مصنوع منبر و محرابی غایت ظریفدر . میرحسن افندینک
ارتحاله بناء ختام بولان تولیت ونظارتی شیخ محمود افندی
زاده ویسی ومحمد افندیلره انتقال ایده رک ۱۳۲۶ ده بونلرک
معرفتیله جبهه سی ده ختام بولمش وبوخیراتک اداره سنه کافی اوقافی
بونلر طرفندن تنظیم ایدلمشدر .

بوجامع شریف ایله قومه جق حامی اراسنده کائن بر موقعده
فرانسز ژریت هیئت روحانیه سی ۱۳۰۰ ده بر کلیسا و مکتب
وجسیم بر دائره مخصوصه انشا ایدره ک میسیونر لکه مخصوص
اولان تعلیماته توفیقاً اجرای حرکت ایتمکده درلر . صدر اسبق
(قره ابراهیم پاشا) بومحلهده تولد ایتمشدر .

۶ (بوزه خانه محله سی) عبادالله چارشوسنک ایکی طرفنده
و (امیر سیف الدین سنقر ملکی) یرنده واقع اولوب شرقاً
خواجه سلیمان وغرباً دوه خانه وجنوباً چریباشی و شمالاً آسی
کتخدا محله لر یله محدوددر . شهزاده (سلطان احمد) دورنده
بوزه نك تعمم ایلدیکی ائنده بومحلهده وجسیم بر بوزه خانه انشا
ایدلدیکی مناسبتله ۹۰۰ تاریخندن اعتباراً (بوزه خانه محله سی)
دینمکه باشلامشدر .

بومحلهده ۸۷۳ ده عجم علی اغا بر چشمه بنا ایدوب ۹۳۱ ده
موالیدن مشهور (عیدالله افندی) بر مسجد شریف انشا و بر
خان ایله اون دکان و ایکی خانه وقف ایتمشدر . جامع شریفه
واوکنده بولونان چارشویه (عیدالله) نامی ویرلمش وبعده غلط
اوله رق (عبادالله) دینمشدر . بوجامع شریف ۱۰۱۱ حریقنده
یائمش اولدیغندن منلای مومی الیهک حفیدی قائممقام تقیب الاشرف
(السید شکرالله افندی) بن یحیی چلبی ابن محمد چلبی بن
عیدالله افندی تجدیداً اعمار ایتمشدر .

۱۱۴۳ حریقنده تکرار محترق اوله رک بالکلیه اوقافی ضایع

اولدیغندن اعیانندن سراج زاده (الحاج محمد اغا) ۱۱۴۷ ده مجدداً انشا و اوکنده بولونان بش دکان ایله یوقاریسنده کی درت دکان وارقه سنده کی خانه سنی وقف و ۱۲۷۱ حریقنده ینه محترق و اوقافی ده ضایع اولمشدر .

۱۲۷۳ ده ارباب خیرات اغانه سیله جامع شریف و دکانلری مجددا انشا ایدلمش اولدینی حالده ۱۳۰۴ حریقنده دخی، یامش اولدیغندن مفتی مملکت کورجی (الحاج عثمان حلمی افندی) دلالت ایدرک دکانلریله برابر مجدداً اعمار ایدلمشدر انجق درت دکانیله برخانه سی و مقدماً اون دکان و برخانای ملکه تحویل ایتمشدر . بوجامع شریفک شرق طرفنده کاتب زاده (محمد رفعت افندی) بن لطف الله افندی پدرینک وصیتنی انفاذ ایدرک ۱۲۵۰ ده قار سیدی انشا و بر دکان وقف و حزیران ، تموز و اغستوس ایلرنده اورایه قار قومنی شرط ایتمشدر . سیدملک اوزرنده کتابه سی واردر .

۷ (پرنجی محله سی) صواخه دره سنک غرب طرفنده و سرای التمه واقع اولوب شرقاً صواخه دره سی غرباً محمد پاشا جنوباً یعقوب پاشا محله لری و شمالاً یشیل ایرماق ایله محدوددر . سلطان بایزید خان ثانی امراسندن (پرنجی سنان بك) بوراده اقامت و برمسجد شریف و مکب انشا و املاکنی بونلره وقف و تخصیص ایتدیکی منابته ۹۱۲ تاریخندن اعتباراً پرنجی محله سی دینمشدر . بو محله ده بردار الحدیث و برزایه اولوب قریباً

ایضاح اولنور. و زرادن کسخانه لی (علی شفیق پاشا) بو محله ده
اقامت ایتدیکی مناسبته شوسه یولنک جنوب طرفلرینه (شفیق
پاشا باغچه سی) دینور ایدی .

۸ (پروانه بك محله سی) بورمه مناره دیمکله مشهور جامع
شریفک طرف غربیسنده واقع اولوب شرقاً اوزون مصطفی
غرباً عجم علی جنوباً چراغچی شمالاً خواجه سلیمان محله لرله
محدوددر . بیوک پروانه بکک برادر زاده سی (عزالدین محمد
پروانه بك) ۷۰۰ تاریخچه قدر بو محله ده اقامت ایتدیکی مناسبته
پروانه بك محله سی دیمشدر .

بو محله ده کائن بورمه مناره جامع شریفی امرای سلجوقیه دن
(نجم الدین فرخ [۱]) ك بنا ایلدیکی قبوسی بالاسنده محكوك
و دامادی بولونان مشارالیه پروانه نك ۶۹۹ ده اوقافی تنظیم
ایتدیکی وقفیه سندن مستبان در .

بو جامع شریفک اطراف اربعه سی کارگیر اولوب اوسه تی
اخشاب در . شكلاً جنوبه طوغرو مستطیل اولوب درونی
طولاً اوج قسمه منقسمدر . جناجرنده طاشدن ، مربع الشكل
اوچرستون اولوب بناسی غایت متیندر . جبهه سنده دور سلجوقییه
عائد احتشام وزینت یوقدر . ایکی تربه سی ، برکتبخانه سی ،
برمناره سی واردر .

[۱] عقدالجمان ده بوذاتك نامی (فروج) و (فروخ) اولوق اوزره
مستور ایه ده جامع شریفک قبوسی بالاسنده (فرخ) نامی محكوكدر

قبوسی کارگیر اولوب بالاسنده طاشه حك ایدلدیکی حالده
گیرچ اوزرینه یازلمش کچی طوران برکتابه سی واردر . بوکتابه
یاش گیرچ اوزرنده پارمقله یازلدقندنصره طولدیرلمش اولدیغنی
اخطار ایده حك بر شکل گرفت اوزره حك ایدلدیکندن کمال
مشکلات ایله اوقونه بیلمشدر قوس شکندمه یازلمش اولان
عباره شودر .

« عمر هذه العمارة المباركة في أيام الدولة السلطان الاعظم
غياث الدنيا والدين ابو الفتح كيخسرو بن كي قباد بن كيخسرو
ادام الله سلطانه » بویازینك التند دوز اوله رق شو یازلمشدر .
« عامر هذه البقعة المباركة العبد الضعيف امير الصيد فرخ
بن سلجوق بن يوسف الخازن غفر الله له في اواخر بيع المبارك
سنة تسعين وستمائة »

شو جامع شریفك كرك شكندمه ، كرك طرز انشاسنده
كلیسیاه مشابه برجهتی اولمدیغنی حالده (ویتال کوینه) آسیای
عثمانی نام اثرنده بیزانس ایمپراطور لغنده بولمش اولان (قومن
خاندانی) طرفندن بنا ایدلمش بر کلیسا اولدیغنی یازیورسه ده
شکل حاضری بونی تصدیقه مساعد دکلدر . بلکه یری (قومن
کلیسای) اوله بیلیر .

تولیتی پروانه بك زاده لرده ایکن منقرض اولوب مؤید
زاده لره ارناتقال ایلدیکی انزاده (۹۹۹) ده بوجامع شریف ،
زلزله دن مصاب و ۱۰۱۱ ده بیوك یانغینده محترق اولدیغندن

متولی مؤید زاده (پیری چلبی) اعشار او کننده اخشابدن بر مناره انشا و ۱۱۴۳ حریقنده تنکراز محرق اولقله متولی واسم چلبی زاده (السید الحاج احمد افندی) تعمیر و مناره سنی طاشدن بورمه اولق اوزره بنا ایتدرمشدر.

بوجامع شریفک زمان بناسنده جامع اولق اوزره یاپیلدیغی وقفه سندن مستبان ایکن سلطان یازید خان ثانی حضر تلرینک جامعی ختام بولدقده جماعت مسلمینک برجامعه اجتماعی مقصدیله یوقاری بازار قسمنده اولان بالجه جوامعدن منبر قالدردیغی اشاده بوجامعدن دخی قالدزمش ایدی مؤخرآ جامع ساطانی ده جماعتک ازدحامی دیگر جوامعه منبرک وضعی ایجاب ایلدیکندن ۱۱۴۶ ده بوجامع شریفده دخی منبر وضع و (حافظ حسین افندی) خطیب نصب اولمشدر.

۱۱۴۷ ده کبار محدثیندن حفطی زاده (الحاج عثمان فائق افندی) جامع شریفک اوکنده بولونان تربه نك اوزرنده موجود اوطه بی کتبخانه اتحاد وبالجه کتابلرینی اورایه وضع ووقف ایتمشدر. مؤخرآ حافظ کتبلرک وظیفه لرینی بیامدکاری جهته بتون کتابلر امانته ویرلمش وبعده ویرلیدیکی یردن استرداد ایدلمه مش اولمشی ضیاعته سبب اولمشدر. شمعی کتبخانه وار. کتابلری یوقدر. تربیه دائر ایضاحات تاریخیه قریبآذ کرایدیله جکدر. بوجامع شریفک غرب طرفنده یول اوکنده بولونان درت کوز ابدستخانه اعیاندن اسبق قائم مقام نقیب الاشراف موجبی

زاده (السید مصطفی اغا) ۱۰۹۸ ده یاپدیرمش وهربرینه صو
اقتمشدر وبعده تعمیر و احتیاجنه صرف اولمق اوزره بقالار
ایچنده درت دکاتی وقف ایلدیکی وقفیه سندن مستبان ایسه ده
دکاتلر ملک و ابدستخانه لرده خراب اولمشدر .

بو محله ده کاشن (سنقورلی مدرسه سی) و (ضربخانه جی
تکیه سی) قریباً ایضاح اولتور چارشو باشنده کوریلن مسجدی
۱۱۰۰ ده اعیانندن الی کوزل (الحاج محمد اغا) بنا ایدوب مقدار
کافی عقار وقف و اوکنده برچشمه انشا ایتمشدر بو مسجد مکرراً
یانوب احفادی یاپدیرمش وبعده ینه خراب اولدیغندن ۱۳۱۰ ده
صندیق امینی زاده (مصطفی رشید افندی) مجدداً احیا
ایده رک بانی ثانی اولمشدر .

بو محله ده ییجه لی زاده (حسن پاشا) نك و موالیدن (حفطی
عبدالرحمن افندی) نك و اعیانندن (عجم علی اغا) نك برر
چشمه لری وارددر عجم علی اغا نك چشمه سی معلوم و معین ایسه ده
بر قاچ ده ا چشمه اولدیغندن دیکر لری تعیین اولنه مدی یالکیز
ضربخانه تکیه سنك اوکنده بولونان چشمه حسن پاشانك ظن
اولتور .

۹ (تاتار محله سی) شاملر مزارلنی شمانده (کولوس)
نامیله مشهور اولان موقعده اولوب شرقاً شوسه یولی غرباً حق
باغلری جنوباً مزارلق و شمالاً کولوس ایله محدوددر . ۱۲۹۵
تاریخندن بری اوراده اسکان ایدیلن تاتارلرک ورودیله تشکل

ایتمشدر . دفاتر میریهدده (احسانیه محله سی) نامیه تسمیه وقید
ایدلمش ایسهده السنه عامهده (تاتار محله سی) نامی غلبه ایتمشدر .
بو محلهده ساکن اولان تاتار لر غایت چالیشقان ، متدین
اولدقلری مناسبته اورته سنده بر مسجد شریف بنا ایتمشدر .
۱۳۱۶ده اماسیه اغیاسندن زیله لی حاجی ولی زاده (الحاج
حسن اقدی) بو مسجد شریفک یاننده بر مکتب لطیف انشا
ایده رک محله نك شرفی تزید و انتشار معارفه همت ایتمشدر .
بو محله نك قسم شمالیسی اشغال ایده رک دیگر قسملری
چایرلق اولان موقع لطیف اوتدن بری (کولوس) نامیه
مشهور و متعارف در . بونام یوقاری یه طوغرو نقدر اراشدیر -
یلیرسه مثلا ۷۲۷ و ۶۳۵ و ۵۷۳ تاریخلرینه قدر تحری
ایدیلیرسه عیناً موجود اولدینی کورولور . شو حلاله بواسم اماسیه
فتحندن مقدم اولدینی ا کلاشیلیر . بو کولوسک شمال شرقیسنده
کائن باغله طراپوت باغلی دیندیکی ده اماسیه فتحندن مقدم
اولدینی ا کلاشیلیر .

بو اسملرک ظاهری (پونت حکومتی) دورندن بری
بوراده علم اوله رق قالدیغنی اشعار ایدر . چونکه : (کولوس)
نامی ، یا (آرکیلوس) یاخود (لوکولوس) اسملرندن محقق
اوله رق قالمه برشیته بکزر . تاریخاً مضبوط اولدینی اوزره
(آرکیلوس) یاخود (آرکیلاؤس) پونت قرالی یدنجی

مهردادك مشهور بر قوماندانی اسمیدر که بوراده اقامت ایلدیکی
مناسبتله تسمیه ایلدیکی ظن اولتور.

(لوکولوس) دخی روما قوماندانلردن مشهور بر جترالك
اسمیدر که مهرداد ایله محاربه ایدرک غالبانه امانسیه کیردیکی
تاریخاً معلوم اولوب بوراده بر مدت خیمه نشین اقامت اولدیغی
مناسبتله تسمیه ایلدیکی ده مظلوندر. فقط : (طراپوت) لفظنه
دائر بروثقه تاریخیه بوانه مدی. (تورا پوت، پونت قانونی)
تعمیرندن مخفف اولدیغی ظن ایتدیرر ایسه ده بونی تقویه
ایده جک بر شیئه تصادف ایدیله مدی.

۱۰ (تمنا محله سی) زنجیرلی قیانک شبال اتکنده وامرای
دانشمندیه دن فتح غازی باغچه سی یرنده اولوب شرقاً زنجیرلی قیا
غرباً وجنوباً دره و شمالاً اسلام محله سی ایله محدوددر.
اماسیه ده شهزادگان مداحلرندن و ایران شعراسندن (تمنای
نیسابوری) بو فتحیه باغچه سنده اقامت ایتدیکی مناسبتله ۸۲۰
تاریخندن بری تسمیه وقید ایدلمشدر.

خضر پاشانک کیشخدا سی (حسام الدین اغا) بو محله ده
اقامتله ۸۷۴ ده کارگیر بر مکتب و بر چشمه وجوارنده صو
کوزینی انشا و اوقافی ۸۷۸ ده تنظیم ایتمشدر. وقفیه سنده
(حسام الدین تمنای) محرردر و امرای عثمانیه دن طر مطای
اولادندن ایکنجی (قیا پاشا) ۹۷۵ ده کارگیر بر جامع لطیف
سنا و املا کنی بورایه وقف ایتمشدر.

۱۱ (جامع اندرون محله سی) ایچری شهرده خانویه محله سنک جوارنده اولوب قراطای محله سندن تفریق ایدلمشدر. شرقاً سرای غرباً قراطای جنوباً یشیل ایرماق شمالاً قلعه بالا ایله محدود اولوب اورته سنده اندرون جامعی نامیه مشهور جامع شریف بولندیغندن بوجامعه نسبت ایدلمشدر.

بوجامع شریف ؛ ۶۱۲ تاریخندن بری اله کچن اکثر و نائق عتیقه ده (جامع اندرون) نامیه مسطور و بعضلرنده (جامع غازی بك) عنوانی مذکور اولدیغنه باقیلیزسه دانشمنده حکمداری (ملك شمس الدين اسماعيل غازی بك) یا خود (ملك عز الدين محمد غازی بك) طرفندن ۶۳۵ تاریخندن اول بنا و ایچ قلعه ده بولدیغنی مناسبتله بعده (جامع اندرون) تسمیه ایدلدیکی ظن اولتور.

بوطنی تقویه ایدن سبب ؛ جامع شریفک طرز انشاسیدر. بوجامع شریف ؛ شکلاً مربع و هر طرفی قیرمزی طوغله دن مصنوع اولوب دیواری یوکسک، ایچی کنیش و اوستی اخشاب در شرق طرفنده تقریباً اون اوچ متره قدر قطرنده غایت قالین بر مناره سی اولوب بو قدر قطره کوره ارتفاعی انجق اون بش متره قدر در. عادتاً بیوک لوغ طاشنه مشابه اولدیغندن السنه عامه ده (لوغ مناره) دیمکله مشهور در. بوده قیرمزی طوغله دن عیالیمشدر.

حکومت دانشمنده رجالی طرفندن بنا ایدیلن جامع لر ،

تربه‌لرا کثرتاً بوشکل اوزره طوغله‌دن یاپیلدینی تدقیق اوتورسه
 بوجامع شریفک بانیسی مشارالیه‌مادن بری اولدینی ظنی کسب‌قوت
 ایدر . شاملیلر مزارلغک کنارنده بولونان تربه ایله بوجامع
 شریفک وچالاک کوپرینک بنالری اراسنده کورولن مشابہت
 و دانشمندیه حکامندن (یاغیصان قازی) بکک نیکسار قلعه -
 سنده کی جامعی و مدرسه‌سی بنالری مقایسه ایدیلیرسه بوجامع
 شریفک بناسی اودوره عائد اولدینی تسلیم اوتور بوجامعک ده
 کلیدادن دوئمہ اولدینی روایت ایدلمکده ایسه‌ده بی اساس اولدینی
 شبه‌سزدر چونکه جامع مزبورک طرز انشاسی و شکلی بوروایتی
 تکذیبه کافی در مناره‌سی صوکره‌دن علاوه ایدلمش اولیوب
 جامعله برابر یاپیلدینی میداندہ در .

بوجامع شریفک تملی ، طاشدن یاپیلمش برقاج قبه وستون
 وارالقلر اوزرنده اولدینی بالمشاهده ثابت در بناء علیه : ازمنه
 قدیمه‌ده بوراده برکلیسا اولوب اطرافی طولہ‌رق یرہ کومولمش
 و بونک اوزرینه جامع شریف یاپیلمش بولندینی شوروایتی
 تولید ایسه کرک :

بوجامع شریف ؛ قدیمآ ارباب خیرک وقف ایلدیکی عقارات
 ایله اداره اولمقده ایکن ۸۷۹ده سلطان بایزید خان ثانی‌حضر -
 تلرینک والدہ محترمه‌لری (کلہار خانون) بوجامع شریفک
 مصارف شرعیه‌سی اداره ایتمک اوزره قرا و مزارع وقف
 ایلدیکی کبی امام‌سیه والیسی شہزاده (سلطان احمد) حلیله‌سی

(کل جیچک خاتون) دخی جوارنده اولان تره سنده جز خوانلغه و بوجامع شریفده دور خوانلغه مشروط اولمق اوزره ۹۱۱ ده عقارات و مزارع وقف ایتشد.

۱۲ (چراغی محله سی) پروانه بك محله سندن ایکن موخرآ تفریق اولنه رق ایریجه بر محله اولمشدر. شرقاً قلیجی، غرباً عجم علی، جنوباً دارالسلام، شمالاً پروانه بك محله لرله محدوددر. امامیه والیسی شهزاده (سلطان مصطفی) قرناسندن چراغی زاده (الحاج خلیل چلبی) بن احمد چلبی بو محله ده اقامت و ۹۵۷ ده بر مسجد شریف انشا و اوقافی تنظیم ایتدیکی مناسبتله چراغی تسمیه ایدلمشدر.

۱۳ (چریباشی محله سی) قره قبانك شمال ایتکنده و قدیمآ (سنقر ملکی) یرنده واقع در. شرقاً عجم علی و غرباً دوه خانه و شمالاً بوزه خانه و جنوباً شهره کوسدی محله لری و قره قبا ایله محدوددر امامیه امیری (شاد کلدی پاشا) و بعده (دواتدار احمد پاشا) دورنده امرای بنامدن اولان (چریباشی امین الدین محمد چلبی) بو محله ده اقامت و بر مسجد شریف انشا ایتدیکی مناسبتله (چریباشی محله سی) دینمشدر.

بو جامع شریفك تاریخ طاشی سو کولمش و وقفیه سی ده بولنه مه مش اولدیغندن تاریخ بناسی اکلاشیله مه مش ایسه ده امیر مومی الیهك ۷۹۳ سنه سنده بر حیات اولدینی بو زمان تنظیم ایدیلن وقفیه شهودندن استخراج ایدلمش اولدیغنه کوره بو

تاریخ کرده بنا ایدلیدی کلاشیلیر . اولادی درتیوز سنه قدر متولی اوله رق بوجامی حسن اداره ایدوب یکچیری چاوشلرندن متولی زاده (الحاج خلیل اغا) ۱۱۹۷ ده جامع شریفک شرق طرفه بر مناره بیضا علاوه ایتشدیر .

بو جامع شریفک بناسی ، طرز انشایی سراجخانه جامعی بناسنه مشابه اولدینی وهر ایکسینکده تاریخ طاشلری سوکولمش بولدینی شایان تدقیقدر . اولادندن اماسیه مقیاسی متولی زاده (الحاج احمد افندی) ۱۱۱۸ ده منبر وضع ایدوب اوقافی توسیع ایلدیسده مؤخرآ جمله سی ده ضایع اولوب نقود موقوفه دن ماعدا وقفی یوق کبی در . ۱۲۸۱ ده اماسیه متصرفی (ضیایاشا) بو جامعی تعمیر ایتدیرمش و بعده ینه قبه سی اقدیغندن محررک پدری عبدی زاده (الحاج محمد اغا) ۱۳۰۹ ده اوزرینه بر آغدیرمه بناسیله قبه یی محافظه الته آلدیرمشدر .

جامع شریفک قارشوسنده کوشه باشنده بولونان خانه امامته مشروطه وقفی اولدینی کبی بووقف خانه نک ایکی خانه اوستنده کوریلن عرصه خایله دخی جز خوانلغه مشروطه وقفی اولدینی متواتردر بومحله نک اشاغی قسمنده (قیا پاشا) ۸۰۳ حدودنده ویوقاری دره قسمنده متولی زاده (الحاج حسن اغا) ۱۱۴۵ حدودنده بررچشمه یایدقلری کبی (عجم علی اغا) دخی ۸۷۳ ده جامع شریف اتصالده بر چشمه انشا ایتشدیر .

۱۴ (چیقرق محله سی) قیود رسمیده (شیخ قریق مع خانقاه

محلہ سی (نامیلہ مقید اولان بو محلہ قدیمآ خانقاہ مسعودی محلہ سی
 یرنده اولوب شرقاً اوچلر و غرباً شامیجه و جنوباً کوبجکز و شمالاً
 رجب محلہ لر یله محدوددر. (شیخ قریق) دیمکله مشهور
 (محمد چلی) بوراده اقامت و تکیه جوارنده حجره مخصوصه سنده
 اجرای ریاضت ایتدیکی مناسبتله ۸۴۱ تاریخندن بری محلہ
 (شیخ قریق) نامیلہ مشهور اولمشدر. السنه عامه ده (چیقریق
 محلہ سی) دینور. بعض اصطلاح بردارلر (قریق) لفظی
 غریق یازوب (شیخ غریق) دیمشدر.

بو محلہ سلطان مسعودك بننا ایلدیکی خانقاہ ایله مشهور
 اولدیغندن ۵۶۰ تاریخندن ۸۴۰ تاریخنه قدر خانقاہ محلہ سی
 دیمشدر. بوراده جامع شریف و مکتب و چشمه لر قدیمآ موجود
 اولوب بعض ارباب خیرات بونلرک اوقافی تنظیم ایتمشلردر.
 مشاهیر علمادن (الشیخ عثمان اقدی) بوجامعك امامی اولدیقی
 زمان، پك زیاده کسپ عمران ایتشدی.

۱۵ (حاجی الیاس محلہ سی) سلطان بایزید خان ثانی جامع
 شریفنك غربنده واقع اولوب شرقاً سلطان بایزید جامعی و غرباً
 یورکچ پاشا جامعی و جنوباً شوسه یولی و شمالاً یشیل ایرماق ایله
 محدوددر. (عمارت ارقه سی) ده دینور. امرادن حاجی نوروز
 بك زاده (حاجی الیاس بك) بو محلہ ده اقامت و مسجد شریف
 و مکتب انشا ایتدیکی مناسبتله بونامی آلمشدر.

بو محلہ نك غرب شمالی طرفلری (اینه خان اوکی) دیمکله

مشهور اولوب السنه عامهده (اينه هان اوکی) دینور. اوراده سلطان ارتنا بك احفادندن (اينه خان) بك ۷۹۰ تاریخندن بری اقامت ایلدیکی مناسبتله تسمیه ایدلمشدر. بوذاتک ایرماق کنارنده بنا ایتدیکی قصرینک تملی الیوم موجوددر.

شرق طرفلری حاجی بك زاده حمزه والیاس و خضر بکلك باغچهسی ایکن ۸۸۶ده سلطان بایزید خان ثانی حضر تلیری تخت هایونه جلوسنی متعاقب بونلردن اشترا ویرینه برجامع شریف و مدرسه و عمارتخانه و تابخانه و شادروان بناسنی فرمان بیورمش اولدبغندن شهزاده لری امامیه والیسی (سلطان احمد) در حال انفاذ امرعالییه مبادرت ایتمشدر.

شهزاده مشار الیه؛ جامع شریفک اساسنه ۸۸۶ رجبنده شروع ایدهرك كافه مشتملاتیه برابر جامع شریفی ۸۹۱ رجبنده اکمال ایتمش و بوخیراتک اطرافی سور شگلنده مربع و کارگیر بر دیوار ایله احاطه ایتمشدر. بوسورك ایکیسی جنوبده ایکیسی شمالده برده شرق و غربده اولمق اوزره آلتی قپوسی اولوب شمال طرفی تمامیه ایرماغه ناظردر. غایت کنیش اولان دائرهسی بتون خیراتی محیط اولوب جامع شریفک درت طرفیده غایت لطیف، اشجار شمره و غیر شمره نی حاوی بر باغچهدر.

بودائرتهك اورتی یرنده جامع شریف بنا ایدلمشدر. طول و عرضی یوز سکساز قدم اولوب داخلأ اورتیسنده ایکی و یانلرنده اوچر قبهسی و شرق و غرب و شمال طرفلرنده بر

قبوسی واورته ده بولنان ایکی قبه نك استادکاهی اولمق اوزره
لطیف، متین برکری واردر. خارجاً جهه سی بش قبه ایله
مستور اولوب بوقه لرك دیرکری یشیل و سیاه ایله ملون یکپاره
مرمردر.

شالنده کائن اورتی قبوسی جسیم وبال رنگنده مرمردن
مصنوع اولوب قونک اوزرنده کوریلن قبارتمه لی چیچکلر
شایان تماشادر. ایکی طرفنده سوکلون کبی غایت موزون ایکی
مناره سی؛ کونا عرش اعلا دن اماسیه اوستنه اینمش ایکی نور
فواره سی کبی عرض اندام اینمکده در.

صدور سلیمیه دن مولانا ادریس بدایسی (هشت بهشت)
نام اثرنده شوخیرات شریفه سلطانییه بی شویله مدح و ثنا ایدیور.
جامع شریف حقنده :

حبذا بقعه مبارک جای که رسد راحتش بخلق خدای
قائم انجا شعائر اسلام دائم انجا مواهب انعام

قندیللری حقنده :

فکانه والشمس تصنیع سمکها خیل تمرغ فی مذاب العسجد
کالروح لطفاً وهولولم بودع طرف الاناء لکان غیر مجسد
مناره لری حقنده :

دونخل مشمر از مرغان خوشخوان

بذکر حق چو بابل درکستان

عمار تخانه و تابخانه سی حقنده:

آن بقعه چو گلشن بهاریست خرم چو عمارت عمارت
 دروی همه نعمتی مهیاست و از منم و بانش مهناست
 هر کس که بدیدنش شتابد از منزل آن عنان نتابد

جامع شریفك صاغ طرفنده یعنی غربنده تفصیلاتی آتیا
 ذکر ایدیله جك بر مدرسه عالیہ سی وصول طرفنده یعنی شرقنده
 بر عمارت و طعماخانه (اعشار عینہ انباری) و عمارتک اتصال
 شمالیسنده تابخانه یعنی مسافر خانه (اسلحه عسکر یہ دیوبی)
 و بونک اوکنده غربہ ناظر و خطاطینہ مخصوص بردارالتعلیم
 (اصلاح مدارس قومیسینی اوطہ سی) و عمارتک جنوبنده
 بر مکتب (سلطانیه مکتب ابتدائی سی) و جامع شریفك اورتہ
 قبوسی اوکنده لطیف برشادروانی واردر .

هشت بهشت و مرأت کائنات و کتہ الاخبارده و السنہ عامه ده
 تواترا مذکور اولدینی اوزره (فاتح سلطان محمد خان ثانی)
 حضر تلمینک شهزاده لری (سلطان بایزید) امامیه و (سلطان جم)
 قر امان و الیلک لرنده بولندقلری ائنادہ سلطان جمک تحصیل
 سلطنتہ تشبث ایلدیکی سلطان بایزیدہ منعکس اولدقده بی حضور
 اولدینی کورن امامیه مشایخ خلوتیه سندن کمشلی زاده (پیر
 خیرالدین خضر چلبی) و (جمالی زاده پیر جمال الدین محمد چلبی
 خلیفه) حضراتی سلطان مشارالیهی تسلیه و سلطنتک کندیسنه

میسر اوله چغنی تبشیر و تأمین ایدرک اماسیه ده جامع و مدرسه و عمارتخانه انشاسنی رجا ایتملرینه محظوظ اولمش و عقیب جلوسنده خیرات مذکورہ نك انشاسنی وعد بیورمشیدی .

۸۸۶ ربیع الاولنده سلطنتی مقدر و جلوسی میسر اولدقده وعد سابقی انجاز و شهزاده سی اماسیه والیسی (سلطان احمد) ه موعودینك احیاسنه دائر بر امر عالی اصدار بیوردینی جهتله ۸۸۶ رجبنده بنای خیراته مباشرت و ۸۹۱ رجبنده اكمال و انحق بش سنه طرفنده آتام ایدلمشدر .

(مصطفی واضح افندی) اماسیه تاریخنده دیورکه :
بو جامع شریفك بناسنه فیض (۸۹۰) تاریخنده مباشرت و فیاض (۸۹۱) تاریخنده اكمال ایدلدیکی قپوسی بالاسنده محكوك در !

اورته قپونك صاغ طرفنده مرمر طاش اوزرنده محكوك اولان خط جلی شودر

« وقع هذا البناء عماداً لقلوب الفقراء والاهالی بالامر عالی لازال نافذا مدى الايام والیالی من السلطان الاعدل الاعظم مستعبد ارباب السیف والقلم بمحاسن الاخلاق ومكارم الشیم »
قپونك تام اوستتمده کی مرمر طاش اوزرنده

« اسوة سادات الغزاة والمجاهدين قدوة صنادید اساطین السلاطین سلطان البرین و خاقان البحرین السلطان بن السلطان ابو الفتح السلطان بایزید ابن السلطان محمد بن مراد خان خلد الله ملكه »

قیونک صول طرفنده مرمر طاش اوزرنده

« وسلطانہ وافاض علی الغلین برہ واحسانہ واتفق الفراغ
یعون الله و توفيقه فی رجب الشهر المبارك سنة احدى وتسعين
و ثمانمائة و لکون البناء عام الفيض کان الاتمام عام فياض کتبه
اضعف العید علی بن مزید »

شو خط جلی ؛ تواریخک نقلنی تأیید ایلدیکی حالده
(واضح اقدی) مرحومی (و لکون البناء عام الفيض کان الاتمام
عام فياض) عبارة واضحة سی تغلیط ایتدیکی آ کلاشیلیر .
مرحوم ؛ (عام الفيض) ایله (عام فياض) لفظ مرکب لیرنی
تدقیق و (الفيض) ایله (فياض) کلمه معرفه و منکره لیرنی
تفریق ایتمه مشدر .

بو جامع شریف مکرراً زلزله یه معروض اوله رق ابراز
متانت ایتیش ایسه ده ۹۹۹ مجرمنده حادث اولان زلزله عظیمه ده
اولک قبه و کمرلری و عمارتک قبه لری رخنه دار اولدقده در حال
اعمار ایدلمشدی .

فقط : ۱۰۷۹ زلزله مدهشه سنده ایچ کمری چوکمش
وقبه لری منهدم اولوب صاغ طرف مناره سی اشاغی قوشاغندن
قبله یه طوغرو دوریلش وصول مناره سی دخی شرقه طوغرو
اکریلش و عمارت و تابخانه قبه لری یاریلش اولدیغندن متولی
مرزیفونی (ابراهیم اغا) ناظر و احمد پاشا زاده (علی بک)
مباشراوله رق بو قدر خسارات عظیمه و مناره لر بر سنه طرفنده

تجیداً اعمار ایدلمشدر. بوندن صوکره مکرراً زلزله حدوشنده
عارض اولان خسار خفیف، درحال تعمیر ایدیلهرک عمارتی
شمدی یه قدر حسن محافظه ایدیله کلمشدر. جامع شریفک شمال
شرقی طرفنده ایرماق کنارنده توریدی زاده (الحاج علی اغا)
۱۱۹۷ ده ایام شتاده جماعتک صیجاق صو ایله آبدست المرینه
مخصوص موصلقلر وارقه سنده صوی ایصمغه مخصوص براوطه
انشا واورمانده کائن بر باغنی بورایه وقف ایتمشدر. بورایه
(صیجاق صو) دینور شمال غربی سنده کائن دائره قپوسنک
اوکنده کککلک زاده (الحاج علی اغا) اولادندن (عایشه خاتون)
۱۲۲۷ ده اوفاق بر شادروان بنا وبر دکاتی وقف ایتمشدر
فقط او باغ ایله بو دکان بعده ضایع و ملک اولدیغندن حجره
و شادروان ده مشرف خراب اولمشدر.

جامع شریفک غرب طرفنده تبر داران خاصه دن کاتب زاده
(السید الحاج عثمان اغا) ۱۲۳۶ ده قار سبیلی انشا والتی دکان
وقف واورایه تخصیص ایتمشدر. بونک اوکنده یعنی شمالنده
خواجکان دیوان هایوندن قپانچی زاده (الحاج حسین زکی
افندی) ۱۲۵۸ ده لطیف بر موقتخانه و دروننده بر کتبخانه
واوکنده یعنی شرقنده اوفاق بر شادروان بنا و املاکنی وقف
ایتمشدر.

۱۳۲۳ ده وفات ایدن یموق عثمان زاده (احمد نجیب افندی) نک
متروکات مهمه سی مخدومه قالوب بوده ۱۳۲۵ ده وفات ایتمه دن

ثلث مالی خیراته وصیت ایتمکله وارثی بولونان عموجه سی (محمد حمدی افندی) انفاذ وصیته قیام و سلطان بایزید جامع شریفی حولیسندده طاغ صوبی بولمادیغنی و ایرماق صوینک کونلرجه بولانیق آقمسندن جماعتک بولکالیدیغنی نظر دقته الهرق (سلطان بایزید مکتب ابتدائیمی) غربنده کاش دیوارک اوکنده مکمل برکتبخانه و بونک اوکنده چقاللردن صورت مخصوصه ده کتیردیکی صو ایچون برشادروان بناسنه ۱۳۲۷ ده مباشرت و ۱۳۲۹ ده اکال ایتمشدر .

بومحله ده (قطب) دیمکله مشهور (الشیخ احمد افندی) ۱۰۲۸ ده مسجد شریف واتصالنده برزاویه خلوتیه و (چلبی محمد افندی) دخی ۱۰۱۸ ده برمکتب بنا ایدهرک (قطب احمد افندی) عقارات مهمه وقف و اولادی حسن اداره ایتمشدر ایسه ده مؤخرأ اولادی منقرض و عقاراتی ضایع اولهرق مسجد و مکتب وزاویه دخی مشرف خراب اولمشدر. وزرادن کورجی زاده (حافظ علی پاشا) بومحله دن ظهور ایتمشدر .

۱۶ (حاجی حمزه محله سی) قبانک التنده و فتحیه محله سندن آیرلمش بر موقعده کائشدر. شرقاً دره و غرباً دارالسلام و جنوباً قبا و شمالاً فتحیه محله لرله محدود اولوب (سلطان بایزیدخان ثانی) حضر تلرینک امامیه و الیلکننده لالاسی و مستشار اموری اولان عیسی بک زاده (حاجی حمزه بک) ۸۷۳ تاریخته قدر بوراده اقامت ایتمدیکی مناسبه له تسمیه ایدلمشدر .

میر مومی الیه بو محله ده کارگیر بر مسجد کبیر و یاننده بر مکتب و چشمه بنا ایدوب اوقافی اوغلاری (احمد ، محمود ، قاسم) بکلی تنظیم و خیراتی اکیال ایتشدر . بو مسجد شریف ۱۰۵۷ زلزله سنده مصاب اولدیغندن اناسیه متسلمی (سفر آغا) تعمیر ایتدیردیکی مناسبتله (سفر آغا مسجدی) دینشدر بو محله ده مومی الیه (سفر آغا) بر چشمه ده انشا ایله مشدر . بوکاده (سفر آغا چشمه سی) دینور .

۱۷ (حکیم چلبی محله سی) خضر پاشا محله سنک شرق طرفنده اولوب الیوم عمراندن خالی بر موقعدر . شرقاً قرالدین و غرباً خضر پاشا محله لری و جنوباً طریق عام و شمالاً قرقلر طاغنگ اتکی ایله محدوددر . بوراده اطبادن ۸۹۰ تاریخنده مشهور اولان (حکیم بدرالدین محمود چلبی) اقامت ایتدیکی مناسبتله تسمیه ایدلمشدر .

بو محله ده حکیم مومی الیهک بر مسجدی و قائم مقام نقیب - الاشراف منصور زاده (السید محمد چلبی) نک بر چشمه سی و سانجی زاده (الحاج حسن آغا) نک بر مکتبی اولدینی قیداً معلوم اولوب غرب طرفنده ، ۱۲۱۲ ده مللی زاده الحاج سلیمان بکک تبرع ایلدیکی عرصه واسعه اوزرینه (اثر جدید قوناغی) بنا ایدلمش ایسه ده ۱۲۹۳ حربنده بو محله اولدینی کبی خراب اولمش و سکنه سی اولان ایتام وارامل دیکر محلاتده بارینمشدر . الیوم مذکور قوناغک خرابه سنندن ماعدا محله اولدیغنه دلالت ایدن بر اثر قالمه مشدر .

۱۸ (خاتونیه محله سی) ایجری شهرده و ایرماق کنارنده اولوب شرقاً جامع اندرون و غرباً قورشونلو و شمالاً قرطای و جنوباً یشیل ایرماق ایله محدود در. سلطان بایزید خان ثانی حضرتلرینک حلیله لری و شهزاده سلطان احمدک والدۀ محترمه لری (بلبل خاتون) بو محله ده بر جامع شریف و عمارتخانه و شرق طرفده بر مکتب لطیف بنا و ۹۱۵ ده وقفیه سنی تنظیم ایتدیرمشددر. جامع شریف؛ مستطیل بر دائرة جسیمه ایچنده اولوب کاکیردر. یاننده بر مناره سی اولوب شرق و شمال طرفلری باغچه و غرب طرفی عمارتخانه در قپوسی بالاسندن کتابۀ محکوکه سنی حاوی تاریخ طاشی سوکولمش اولوب تاریخ بناسی و نائق عتیقه دن اکلاشلمشددر.

بو جامع شریفک غرب طرفده (چقور حمام) نامیله مشهور بر حمام اولوب سلطان مسعود سلجوقی امراسندن رضوان بکک یابدیردینی و نائق عتیقه دن مستبان در.

اماسیه امیری (شادکلدی پاشا) نک ملکی اولوب بعده خاتون مشارالیه انک املاکی عدادینه داخل اوله رق ۹۱۵ ده وقف ایدلمشددر. تاریخ بناسی ۵۵۰ اولدینی تخمین اولنه بیلیر. بو محله نک منتهای غریبسندن یوقاری حمامک قارشوسنده امرادن یخشی بکک کریمه سی و صدر اسبق (بایزید پاشا) نک همشیره سی (پاشا خاتون) طرفندن ۸۲۱ ده بر مسجد شریف بنا و اوقافی تنظیم ایدلمشددر بو محله ده عیدی زاده (عاکیف

مصطفی افندی) نك بر چشمه‌سی جاری اولوب دیگر ذواتك دخی چشمه‌لری وار ایسه ده صولری منقطع اولمشدو .

۱۹ (خضر پاشا محله‌سی) اماسیه نك غرب شمالیسنده اوق میدانی اوستنده قدیمآ (قومئوس سرائی) بعده (قواق) دیمکله مشهور و یوکسك بر موقعده اولوب شرقاً حکیم چلبی محله‌سی غرباً شیخ جوئی باغلری و جنوباً اوق میدانی و شمالاً قرقلر طاغی ایله محدوددر . میرمیران اتا بك زاده (خیرالدین خضرپاشا) بوراده ارتحاله قدر اقامت و جامع شریف و مدرسه و مکتب و زاویه وایکی حمام و متعدد چشمه بنا ایتدیکی مناسبته تسمیه ایدلمشدر .

پاشای مشارالیه ۸۷۰ ده بو خیراتی اکمال و اوقافی تنظیم ایدوب خیراتك جمله‌سی ده کارکیردر . جامع شریف ؛ اوقاق و شکلی ظریف بر مناره‌سی لطیف اولوب مدرسه‌سی شرق طرفندهدر . اوکنده بر شادروانی اولوب جمله‌سی بر دائرة ایچندهدر . جامع شریفك غرب طرفنده چفته حامی غایت ظریف اولوب هر سنه قادینلر سنبل موسمنده بورایی زیارت و اجرایی تنزه ایتدکلری مناسبته (سنبل حامی) دینمشدر . بو محله نك آشاغی طرفنده اسبق اماسیه متسلمی (الحاج خضر اغا) ۱۰۶۱ ده بر مکتب و زاویه و چشمه بنا ایتمشدر .

۲۰ (خواجه سلیمان محله‌سی) عجم علی محله نك شمالنده و قدیمآ (شهنشاه ملکی) یرنده اولوب شرقاً اوزون مصطفی

وغرباً بوزەخانە و جنوباً عجم علی و پروانہ بک و شمالاً قرانجی
محله لریله محدوددر . ۸۷۸ تاریخہ قدر بورادہ اقامت ایدن
اعیان تجاردن شیخ حمید اوغلی (خواجہ الحاج سلیمان چلبی)
بو محله دہ اقامت ایتدیکی مناسیتله تسمیہ ایدلمشدر .

خواجہ مومی الیہ بو محله دہ بر مسجد شریف بنا و اوقافی
۸۷۸ دہ تنظیم ایتمشدر . الیوم (صمان پازاری جامی) دیمکله
مشهوردر . مخدومی (پیر محمد چلبی) دخی شرق طرفندہ
درہ کنارندہ صغیر پازارینک آلتندہ بر منارہ لی بر مسجد
شریف بنا و ۹۱۳ دہ اوقافی تنظیم ایتدیکی کبی حلیله سی
(قر خاتون) بنت ابو بکر بک دخی بو جامعہ اجزا وقف
ایتمشدر .

بو محله دہ بقالار چارشو سنده سلطان بایزید خان ثانی حضرتلرینک
ابریقدراری (علی اغا) دہ ۸۹۰ دہ کارگیر بر مسجد شریف
بنا و اوقافی تنظیم ایدوب بو مسجدک شرقندہ بکر بک زاده
(الحاج عثمان بک) جسیم بر خان بنا و ۱۱۶۱ دہ بنا ایلدیکی
مدرسیہ وقف ایتدیکی کبی بو خانک شرق شمالیسندہ اسبق
اماسیہ متصرفی (رختوان محمد پاشا) ۱۱۱۱ دہ طاشدن بر
خان عظیم انشا و اولادینہ وقف و بو خانک اورتہ سندہ مخدومی
(الحاج احمد بک) ۱۱۸۰ دہ بر مسجد شریف بنا و آلتندہ بر
شادروان انشا ایتمشدر .

۲۱ (دارالسلام محله سی) اوزون یول منارلغنک شرق طرفندہ

وتقسیمك التندہ اولوب شرقاً حاجی حمزہ و شمالاً جراحچی و عجم علی محلہ لری و غرباً اوزون یول مزارلنی و جنوباً تقسیم اوکنده کائن یول ایله محدوددر . بوراده وزرای سلجوقیہ دن (معین الدین سلیمان پروانه) بکک سرایی و دائرہ مخصوصہ سی اولوب عصرنده (دارالسلام) دیمکله . ۶۶ تاریخندن بری بو محلہ یه علم اولمشدر .

بو دارالسلام سرایی مؤخرآ امامیہ امیری بانو قشاهک تصرفه کچوب بوتک حفیدی (علی پاشا) ابن اسن بک ۷۸۵ حدودنده برمسجد شریف و چشمه بنا و اوقافی تنظیم و موالیدن مظلوم ملک زاده (السید احمد افندی) ۹۸۶ ده بو مسجدی مجدداً تعمیر ویاننده بر مکتب علاوہ ایشدر . خواجه سلطان زاویہ سی بو محله ده اولوب قریباً ایضاح اولنور .

۲۲ (دره محلہ سی) قبانک التندہ اولوب شرقاً چقاللر دره سی و غرباً فتحیه و جنوباً قبا و شمالاً قیلیجچی محلہ لریله محدوددر . دره نك کنارنده بولمه سی بونام ایله یاد ایدلمسنه باعث اولمشدر . بو محله ده چیماز سوقاق ایچنده شیخ الاسلام جمالی زاده علی افندینک همشیره سی (معصومه خاتون) ۹۲۲ ده برزاویہ و اوکنده برمسجد شریف و بر چشمه و بوسوقاغک اغزنده دره کنارنده محرم افندی زاده (فاطمه خاتون) ۹۵۱ ده دیگر بر مسجد شریف و اوکنده بر چشمه بنا ایتمشلردر . بونلردن زاویہ مفقود و ایکی مسجد خراب و ایکی چشمه ده منقطع اولمشدر . معصومه خاتونک وقفی وارددر .

۲۳ (دوه خانه محله سی) قاکلی بازارینک اطرافنده اولوب شرقاً بوزه خانه وغرباً اوچلر وجنوباً چریباشی و شمالاً اسکی کتبخدا محله لری و سلطان بایزید جامی ایله محدوددر . اسفار قدیمه عثمانیه ده ذخائر ومهمات عسکر بهنک نقلی ایچون احضار ایدیلن بکملک دوه لرك (مناخه سی ، طوراعی) اولمق حسیله دوه خانه دینمشددر .

مشهور (قاکلی بازار ی بو محله نك اورتہ سنده اولوب اسبق امامیه متسلمی ایدین بك زده قاکلی علی اغا) بوراده خیلی عقاروقف و بازار تشکیل ایتدیکی مناسبتله (قاکلی بازار) دینمشددر . بو بازارك اوکنده عجم علی پیکاری واردر بو محله ده حاجی علی افانك جد اعلاسی (ایدین بك) ۶۲۰ حدودنده بر حمام ومسجد شریف بنا ایده رك ایدین حامی نامیله قیداً معروف ایکن ۹۹۹ زلزله سنده خراب اولدیغندن مومی ایله (الحاج علی اغا) حامی ومسجدی مجدداً اعمار ویاننده برده زاویه بنسا ایدوب ۱۰۱۸ ده جسیم بر خان واطرافنده خیلی دکان وقف ایتمش و حمام ایله مسجد و زاویه قاکلی حامی ، قاکلی مسجدی و قاکلی تکیه سی نامیله مشهور اولمشدر .

۱۱۴۳ حریقنده حمله سی محو اولوب یری ده ملك اولدیغی حالده ۱۲۲۸ ده مشاهیر علمادن طاشکوپریلی (الشیخ الحاج عبدالله اقدی) مسجد و زاویه یی مجدداً احیا و اوکنده برده چشمه انشا ایتمشددر . فقط : اسکی مسجد و زاویه نك یری

شمیدیکی مسجد وزاویه نك یری اولدینی معلوم اوله مدی و حمامك یری ده بوانه مدی . بو محله ده کائن فقیر خانه ایله پیاسلی زاده حلمی افندی نك خانه سی اراسنده بولونان خانه یری ایکی دكان بو مسجده موقوفدر .

بو محله نك منتهای شالیسنده سلطان بایزید مکتبی قارشوسنده خواجه زاده امیر امام (الحاج عبداللطیف افندی) ۱۱۵۹ ده کارگیر غایت منتظم بر کتبخانه و قبله طرفنده کائن باغچه سنده اسبق امامیه متسلمی اق حسن زاده (الحاج حسن اغا) ۱۲۴۸ ده بر زاویه بنا و شمال طرفنده کائن باغچه سی اوکنده حسین پاشا کریمه سی (فاطمه خانم) ۱۲۵۹ ده (تللی پیکار) نامیله مشهور اولان چشمه یی انشا و مکتب مذکورك قبله طرفنده یول اوزنده قبانچی زاده (الحاج حسین زکی افندی) بر مدرسه بنا ایتمشلدردر

۲۴ (رجب محله سی) سلطان مسعود سلجوقی تربه سنك شرقنده و سمره بلده قدیمه سی یرنده اولوب شرقاً اوچلر و غرباً شامیجه و جنوباً شیخ قریق و شمالاً شوسه یولی ایله محدوددر . ۸۷۹ ده ارتحال ایدن معلم سلطانی (صدرالدین رجب چلبی) بوراده اقامت و مسجد شریف بنا ایتمدیکی مناسبتله بونامی آلمشدر بو جامع شریف ؛ ۱۰۱۱ حریقنده یاندینی جهته له معلم مشار الیهك احفادندن اسبق روم ایلی قاضی عسکری امامیه یلی (حسن افندی) ۱۰۲۹ ده مجدداً بنا ویاننده بر مکتب و چشمه

انشا ایدہ رک اوقافی توسیع ایتشدہ . ۱۱۴۳ حریقندہ تکرار
یانوب امامی ومتولینسی ساعتچی زادہ (الحاج محمد افندی)
تجدیداً اعمار ایتمش وبعده مکرراً تعمیر اولنشدہ . بو محله ده
میرمیران (خضر باشا) بر زاویه بنا ایلدیکی قیداً معلوم ایسه ده
الیوم یری بولنه مه مشدر .

۲۵ (زیاره محله سی) امامسیه نك منتهای شرق شمالیسنده
(اقطاع) دن ایریلوب یشیل ایرماغه طوغرو اینن اوافق بر
طاغك اتكندہ در اوکندہ بولونان دره نك کنار شرقیسنده
واقع در . اطرافی قدیمآ دیوار ایله محاط اولدیغی باغلیرنك
کنار بزنده و طاغ اتكندہ کوریلن قمل طاشلرندن ، دیوار
خرابه لرندن استدلال اولنقه ده در .

بوزیاره قدیمآ بر قلعه حصینه وبلده لطیفه نك اسمی اولوب
دها قدیم اولان اسمی (زمندو) یاخود (سمندو) در الیوم
السنة عامه ده (خیره) وزنده (زیره) دینور . (عقداجمان)
ده بدرالدین محمودالین دیورکه : « زمندو ؛ زاومیمك فتیحی
ونونك و آخرنده واوك سكونی ودال مهمه نك ضعی ایله بر بلده
لطیفه و حصینه درکه زانك کسریله (زیاره) دینور . » (تاریخ
آل سلجوق) ده ابن بیی دیورکه « امیر سیواس قیرخان
خوارزمی ؛ زمندو قلعه سنه نفی ایدلمشدر » [۵]

[*] خوارزم امراسندن برکه خان امامسیه والیسی ایکن اقرباسندن
بولونان بو قیر خانك زمند وقلعه سنه نفی اولنهرق ازمدت ظرفنده بوراده
وفات ایتسی برکه خانه تأثیر وعصیاننی استاج ایتشدہ .

(قاموس) ده مجدالدین فیروز آبادی دیورکه « سمندو ؛
 دالك ضم واشباعيله روم اولكه سنده برقله آدیدر » [۱] . (تاریخ
 دول الاسلام) ده امام ذهبی دیورکه : « ۹۴ سنه هجریه سنده
 مسلمة بن عبدالمک روم طوبراغندن سمندوه شهرنی فتح ایتشدر . » [۲]
 شاعر مشهور (ابوالطیب المتنبی) ده سیف الدوله حمدانی ایله
 اماسیه کلوب سمندوبی زیارت وشوبیتی انشا ایتشدر .

رضینا والد مستق غیراض بما حکم القوا ضب والوشیج
 فان یقدم فقد زرنا سمندو وان یحجم فمد عدنا الخلیج

اماسیه ده بولونان وثائق عتیقه ده عموماً بو محله نك نامی
 (زیاره) اولق اوزره مقید و مشهور اولوب الیوم (زیره)
 دینسی (زیاره) دن مخفف اولدیغنی کوسترمکده در . بو محله دن

[۱] بوعباره نك شرحنده شارح قاموس السید مرتضی افندیك عباره سنی
 عاصم افندی ترجمه ایدهرک دیورکه « حالا بلغراد دیدکلریدر . لکن
 بلغراد قربنده سمندر دیدکلری اولق غالبدر » فقط : دقت بیورولورسه
 شارح و مترجم افندیلرک اصابت ایتدکلری محقق در چونکه مسلمه ،
 سیف الدوله وقیرخان نه روم ایلی قطعه سنده بولونان بلغرا ده ، نه ده جوارنده
 بولونان سمندر ده کیتمدکلری تاریخاً محقق در .

[۲] تاریخ الامم والملوک ده امام طبری دیورکه (۹۳ سنه سنده مسلمة بن
 عبدالمک روم اولكه سنه غزا ایدوب ملطیه نواحی سندن ماسه (اماسیه)
 و حصن الحدید و غزاله (زیله) و برجه بی فتح ایتشدر و ۹۴ ده غزاله
 (زیله) به قدر غزا ایتشدر . عقدالجمان ده ۹۴ وقوعانده مسلمه نك
 اماسیه و سمندوه به کلدیکی ذکر ایدلکده در بناء علیه سمندو شهری
 اماسیه قربنده اولدیغنه شبهه ایدیله من .

ظهور ایدن (خواجه محب الدین مودود الزیاری) ۶۹۰ تاریخنده مشهور مستوفی روم اولوب حفیدی (سعید الدین موهوب بن الزیاری) ۷۸۷ ده وفات ایدمرك شاد كلدی پاشا تره سی اوکنده مدفون و نام و شهرتی قبر طاشنده محكوك در.

بوراسی قدیمآ پك مشهور اولوب صوبی غایت صغوق ، هواسی غایت صاغلام در . فقط قلعه قدیمه سی شهرك شمالنده اولوب کورفز بر موقعده اولدیغندن اورانك هواسی آغیردر . خرابه سی پك خفیف بر صورتده کورلمكده در . قیر خان خوارزمی بوراده وفات ایتشددر . شهرك منظره عمومیه سی آجیق اولوب اماسیه شهرینه ناظر ، یشیل ایرماغه مائلدر . شرقتدن ماعدا یرلری عمومآ باغ و بستان ، باغچه و كلستاندر . المانك برنجیلری بورادن چیقار . محصولاتی پك مبذول اولوب هر نوعی غایت مقبولدر . صوینك كترتی ، مقبولیتی وباغلربنك وسعتی ، لطافتی زیاره خالقنك تشبثات شخیصه لرینی تریید ایتمكده در .

بوزیاره ؛ ابتدا کیمك طرفندن یاپیلدیغنه وقدیما (زمندو) یاخود (سمندو) نامیله ونه صورتله تنسمیه ایدلایکنه دائر تاریخآ بر قید صریح بولنه مدینی کبی زیاره نامی دخی کیمك طرفندن ویرلدیکی اكلاشیله مدی . انجق (واضح افندی) تاریخنده « زیره ؛ بر مناسترك آدی اولوب صوكره محله یه علم » اولدیغنی یازیور ایسه ده بونكده تاریخه مستند برشی اولدیغنی

معلوم اوله مدی. چونکه : مرحومك؛ كندیسنه معلوم اوله میان
اسامی قدیمه یی برر مناسـترك آدی اولق اوزره کوسـترمی
عادی اولدیغندن اعتماد ایدله مدی. لکن اماسیه ده مسـکون
اولان (سانیت، سانلی) تورکارینك بورایه (سانیت) دیملری
بعده تحریف اولنه رق (سمندو) دینسی ملحوظدر.

(بیزانس حکومتی) دورنده بوبلدۀ لطیفه؛ اماسیهـنك
شایان تماشا و تنزه مواقع مهمه سندن معدود اولدیغنی (دوراموی)
دن بری اماسیهـه کلن فاتحان اسلامك بورای زیارت ایتلری
و اماسیه امیری (ملك اسماعیل غازی دانشمندی) بورایه التجا
ایدوب اهل صلیب فرقه سی اماسیهـه کیردکده ۴۹۳ ده ملك
مشار الیهی بوراده تضیق و شهری عموماً محو و احراق ایتسی
اثبات ایدوبیلیر.

(سلطان مسعود سلجوقی) اماسیه یی مرکز سلطنت اتخاذا
ایلدیکی زمان، بوشهری تجدید و عمارتی تزئید واسکی انتظامی
اعاده و بر قصر لطیف انشا ایدرهك آب و هوا سندن استفاده
و بهار کونلرنده بورای صیق، صیق زیارت و کوشکنده
اقامت ایتدیکی حسیله (زمندو) لفظی (زیاره) نامیه یاد
ایدلدیکی، یاخود زیاره؛ زمندو لفظـندن غلط اولدیغنی ظن
اولتور.

امرای سلجوقیه دن (خواجه محب الدین مودود زیاری)
۶۸۰ حدودنده بوراده تملی طاشدن و دیواری و مناره سی

قیرمزی طوغلهدن و اوستی اخشا بدن بر جامع شریف انشا و ایکی حمام و دره نك غرب شمالیسندده جسم دیوار ایچنده کول بنا ایتشددر. کول دیواری یوکسك اولوب ایچنده بولونان صوبی ، سیلدن محافظه ایچون کارگیر و متین دیوار ایچنه آلمشدر. سلطان بایزید خان ثانی حضرتلری اماسیه والیسی ایکن ۸۷۰ حدودنده اشاغی کولی انشا و آلتنده کی باغلری عموماً خاص باغچه اتخاذا ایتش و ۱۱۴۳ تاریخنه قدر بستانچیلر کیتخداسی ادارهسندده بولنمشدر .

بعده خواجه مودود جامی زلازل و عوارضدن مصاب اولوب ۹۷۰ حدودنده کچی اوغلی (الحاج علی چلبی) تجدید و اعمار و اوقافی تنظیم ایدرهك السنه عامه ده و قیود رسمیه ده (کچی اوغلی جامی) دینمکله مشهور و مقید اولمشدر . یاننده عتیق برهامی و زاویه سی و مکتبی واردر ..

زیاره ، اشاغی محله و یوقاری محله ناملریله ایکی محله اعتبارنده اولوب بوجامع شریف و حمام و سائر مشتملاتی اشاغی محله ده در. یوقاری محله ده اماسیه کیتخداسی (الحاج محمد چلبی) ۱۰۸۰ حدودنده برجامع شریف بنا ایدوب اشراف محلیه دن چلینگیر اوغلی (الحاج علی ۱) ده توسیعاً کارگیر اوله رق انشا و یاننده بر مناره علاوه ایتش و ۱۲۴۳ ده مجدداً بردها تعمیر اولنمشدر . بونك ده یاننده برهامی و مکتبی واردر. ۱۰۷۵ ده زیاره لی (الحاج ابراهیم چلبی) دخی اشاغی محله نك جهت

شالیه‌سندہ برمسجد شریف واوکنده چشمہ یامیش و اوقافی تنظیم ایتشدرد .

۲۶ (سابق الدین محله‌سی) میدان کوپریسنک اوکنده اولوب شرقاً قلعه قیوسی و غرباً قر الدین محله‌سی و جنوباً یشیل ایرماق و شمالاً خرشنه طاعی ایله محدود و طیش اماسیہ دن معدوددر. السنه عامه ده (سبق الدین محله‌سی) و قیود رسمیه ده (اخی سابق الدین محله‌سی) دینور .

امرای قدیمه دن (سابق الدین ابوبکر) ۷۸۰ سالنه قدر بوراده اقامت ایتدیکی مناسبتله تسمیه ایدلمشدر . بوراسی قدیم (سولی ملکی) نامیله معروف اولوب کوپرینک باشنده بابازاده (نورالدین قتلوبک) ۷۴۰ ده برمسجد شریف واوکنده بر چشمه بنا و اوقافی تنظیم ایتشدرد بومسجد شریفک غربنده (اهلی خاتون) ۸۷۱ ده بر زاویه بنا ایدرک اوقافی تنظیم ایتدیکی کی ۱۲۱۶ ده جانیکلی زاده (محمود طیار پاشا) بر مدرسه و ۱۲۴۸ ده اماسیه مفتیلرندن صاچلی (الحاج محمود افندی) بر کتبخانه انشا ایتشلردر بونلرک اوقافی ضایع اولمشدر .

۲۷ (سراجخانه محله‌سی) آچاق کوپرینک جنوب شرقی طرفنده اولوب شرقاً سیل اغزی و غرباً کوپری باشی و جنوباً قزانجی وقوجه جق محله‌لری و شمالاً یشیل ایرماق ایله محدوددر . قدیم (شهنشاه باغچه‌سی) نامیله مشهور اولان بوموقعده دباغلر و سراجلر اقامت ایدرک (چلبی سلطان محمد خان) حضر تلرینک

اماسیه‌ده اجرای سلطنت بیوردینی ائنده بوراده برسراجخانه انشا ایتدرمش اولسی بونام ایله اشتهارینی موجب اولمشدر .

بو محله‌نک باشنده کوریلن حمام ؛ (سلطان شهنشاه) بن سلطان مسعودسلجوقی اثری اولدینی قیداً کورلمشدر . بوجامک شرق طرفنده اماسیه امیری (شادکلدی پاشا) ۷۷۳ حدودنده تملی طاشدن و دیواری و قبه‌سی طاش و طوغله‌دن برجامع شریف و یاننده برمناره انشا ایتمشدر . جامع شریفک درونی شرقدن غربه طوغرو اوزون و اورتہ‌سندہ برکمر اولوب ایکی قبه ایله مستورددر .

بوجامع شریف ؛ مؤخرآ (سراجخانه جامعی) و (سراجلر جامعی) نامیله مشهور اولمشدر تاریخ طاشی سوکولمش اولدینی مناسبتیله بانیسی اونودلش ایسه‌ده قید عمیقده (جامع شادکلدی پاشا) عنوانیله کورلمشدر . و ققیه‌سی بولنه‌مدینی جهتله تاریخی تخمین صورتیله کوسرتیله بیلمشدر . اسبق قول کتخداسی زورلی زاده (الحاج محمد اغا) و اعیاندن (الحاج عثمان اغا) ۱۱۷۱ تاریخلرنده دکانلروقف ایدوب کرسی مشیختی احداث ایتمشدر . ۱۱۴۷ ده اماسیه قاضیسی چتن زاده (الحاج احمد افندی اوکنه برشادروان بنا وصو اساله ایتمشدر .

بو محله‌نک منهای شرقیسنده سیل اغرنده غریبلر اغاسی محمد اغا) ۹۲۳ ده برمسجد شریف بنا و اوقافی تنظیم ایدوب (غریبلر مسجدی) دیمکله مشهور اولمشدر . زمان بناسندن ۱۲۸۱ تاریخنه قدر تعمیر و تجدید اولنه‌رق محافظه ایدلدیکی

حالدہ اسبق امامیہ متصرفی ضیا پاشا حکومت قوناغنی انشا
و کوپرینک اوکنی تسویہ و بورادہ بولونان مزارلنی رفع ایلدیکی
اشنادہ بومسجدی ده هدم و تسویہ ویرینی صاتوب حکومت
قوناغنه صرف ایتمشدر . الیوم مزارلغک و مسجداک یری
بدستان اولمشدر سراجخانه جامعشرینک شرق طرفنده (الاجہ
یحی بک مدرسه سی) و غرب طرفنده (حاجی محمود افندی
مدرسه سی) وایلریسنده (مولونخانه) اولوب بونلرک تفصیلاتی
مدارس وزوایا مبحثلرنده ذکر اولنه جقدر .

۲۸ (سرای محله سی) قیزلر سراینک التنده اولوب شرقاً
سادہ هلیکیس و غرباً جامع اندرون محله لری و جنوباً یشیل
ایرماق و شمالاً قیزلر سرایی ایله محدوددر . قیزلر اغاسی (فیروز
اغا) ۹۰۰ ده بومحله ده بر مسجد شریف بنا و اوقافی تنظیم
ایتمشدر . مشهور (قرق بدل) بورادہ اولوب سرای مذکور
و قتیله معمور ایکن خدمه و اوشاقلر مسکون ایدی موقعی بایر
اولوب اوکنده بولنسی باعث تسمیه اولمشدر .

۲۹ (سعدالدین محله سی) ایچری شهرده میدان قپوسنک
ایچ طرفنده اولوب شرقاً قورشونلی محله سی و غرباً میدان
قپوسی و جنوباً یشیل ایرماق و شمالاً قلعه بالا ایله محدوددر .
قدیماً سوباشی موسی ملکی یرنده اولوب ۷۷۰ تاریخنه قدر
علمادن (سعدالدین چلبی) بورادہ اقامت ایتدیکی مناسبتله تسمیه
ایدلمشدر (اخی سعدالدین محله سی) نامیله مقید اولان بورایه
السنة عامه ده (اخ سادالدین محله سی) دینور .

مومی الیهک اولادندن کاتب دیوان سلطانی (سعدی افندی)
 ۸۷۸ ده بوراده برمسجد شریف وزاویه بنا و اوقافی تنظیم
 ایتدیکی کبی اماسیه مفتیسی مؤید زاده (علی چلبی) دخی
 جوارنده ۸۸۳ ده بر مکتب انشا و اجزا وقف ایتمش و بونلر خیراتی
 جوارنده مدفن مخصوصلرنده مدفون اولمشلردر. سعدی افندی
 زاویه سنده طعامیه سی وار ایدی .

۳۰ (شاملیلر محله سی) قوش کوپرینک طرف شالنده
 اولوب شرقاً یشیل ایرماق و غرباً مزارلق و جنوباً قلعه بالا
 اتکی و شمالاً باغچه لراچی باغلیله محدوددر قدیم (ملک اسماعیل
 دانشمندی) اقامت ایتدیکی مناسبتله (دانشمندی ملکی) دیه
 مشهور ایکن ۷۹۱ تاریخده تورکلردن مصر حکمداری (ملک
 اشرف شعبان) ایله چرکسلردن (ملک ظاهر برقوق)
 اراسنده ظهور ایدن منازعات داخلیهده ملک اشرفه مظاهر
 اولان شاملیلر اطرافه هجرت ایتمکه مجبور اولدقلری ائنده بر
 قسمی ده اماسیه یه التجا ایتمش و بو محله یه اسکان ایدلمش اولدینی
 مناسبتله شاملیلر محله سی دینمشدر .

قیود عتیقه ده (شاملولر محله سی) مقید و السنه عامه ده
 (شاملر محله سی) نامیله مشهوردر . شو منازعه و مهاجرت
 تواریخ عربیه ده مفصل و مذکور اولدینی حالد و واضح افندی
 ملک بنی امیه دورنده اماسیه کان شاملولر بوراده اوطوردینی مناسبتله
 شاملولر محله سی نامیله مشهور اولمشدر، دیمسی غرائب و اضحه دندر .

بومحله ده (ملك غازى) بكاك جامعى و تربىسى اولدينى قىدا
مئيت اولوب عوارض كونه دن خراب اولدينى جهته كوچك
قبو اغاسى (اياس اغا) ۹۰۰ ده كار كير بر جامع شريف وياننده
برمناره واو كنده بر مدرسه و برده مكتب انشا و اوقافنى تنظيم
ايتمشدر . بيوك قبو اغاسى (حسين اغا) دخى بر مدرسه بناسيله
بومحله نى احيا ايتمشدر .

۳۱ (شاميجه محله سى) كوك مدرسه جوارنده و قديماً
(كودول ماكى) يرنده اولوب شرقاً رجب و غرباً كوك مدرسه
و جنوباً چيقرق محله لرى و شمالاً شوسه يولى ايله محدوددر . كوچك
شامى ديمك اولان معمار مشهور (شمس الدين احمد شاميجه)
[۱] ۸۵۶ سالنه قدر بوراده اقامت ايتديكى مناسبتله (شاميجه
محله سى) ديتمشدر .

معمار مومى اليه ۸۴۷ ده بوراده بر مسجد شريف واو كنده
بر چشمه وياننده بر مكتب بنا و اوقافنى تنظيم ايتمشدر . مكرراً
يانديغدن ۱۱۹۸ ده توريدى زاده (الحاج على اغا) مجدداً مسجدى
اعمار و مدرسه بنا و اوقافنى ترتيب ايتمشدر . بومحله ده خلفت
غازى ايله قاضى عسكر ابراهيم افندي نك برر مدرسه سى و بك چوق

[۱] اما سيه ده يكدى كرينه معاصر ايكي معمار مشهور اولوب هر
ايكيسى ده (شمس الدين احمد شامى) ناميله معروف اولديغدن ارالربنى
تفريق انجون برينه (شامى چلبى) ديكرينه كوچك معناسنى اشعارايدن
(شاميجه چلبى) ديتمشدر .

امرا وقضات وعلمانك تربلری ومدفعلری واردر . جمله سی
 قریباً ذکر اولنور .

۳۲ (شهره کوسدی محله سی) اوزون یول مزاراغئک
 اوستنده اولوب شرق و شمال طرفلری مزارلق و غرب و جنوب
 طرفلری ده قره قیا اتکلریدر شهرک خارجنده بر محله کبی اولوب
 بوراده (شهره کوسدی) دیمکله مشهور اولان (پیر سنان
 خلوتی) حضرتلری ۹۵۷ سـالنه قدر اقامت ایتدیکی مناسبته
 قیود عتیقه ده (شهره کوسدی نام دیگر پیر سنان محله سی) مقید
 والسنة عامه ده (شارا کوسدی محله سی) دیمکله مشهور اولمشدر
 پیر مشارالیه ؛ اثنای وعظنده اماسیه والیسی شهزاده (سلطان
 مصطفی) حقنده بعض تعریضات وموا خذاته جسارت ایلدیکنه
 حدت ایدن شهزاده مشارالیه ، بونی وعظ ونصیحتدن و خلقی
 مجلس و عظنه دوامدن منع ایتمش اولدیغندن پیر حضرتلری
 کوسوب عهده سـنده بولونان وظائفی ترک ایده رک بومحله ده
 اقامت وانزوا ایتمشدر . پیر مشارالیه ک احبابی بومحله ده برزاویه
 ویاننده بر مسجد شریف و چشمه بنا و اطرافنده عقارات انشاسیله
 بورایه وقف ایله مشلردر . الیوم بونلرک موقعی بیله غائب اولوب
 تربه سی ۱۳۰۴ ده بولمشدر یالکز چشمه سی موجوددر .

۳۳ (صاواچه محله سی) صغوق پیکارک التنده اماسیه نـک
 منهای شرقی سنده کائن و شرقاً لثمان طاعی و غرباً دره و جنوباً صغوق
 پیکار و شمالاً اخور اوکی ایله محدوددر . خلفای صفویه دن

ارزنجانى (عبدالرحمن خلوتى) حضرتلىرى بوراده اقامتله
 زاويهسى اوکنده چشمه والنده اغاجدن اوراق اوله رق (صاواق ،
 هاوود) [۱] ياپدر دینی مناسبتله اوهاووده (صاواقچه) دینش
 ومؤخرأ محلهیه علم مخصوص اولمشدر . اليوم السنه عامده
 (صاواحه محلهسى) دینکده در . (شیخ قریق ، شیخ غریق)
 قضیهسى کبی بعض ذوات بو (صاواقچه) بی ده (سوادیه) شککنده
 یازمش و قیود رسمیهیه بوصورتله کچمشدر فقط بویازیش ۹۸۰ دن
 صوکره حادث اولمشدر قیود عتیقهده (صاواقچه محلهسى) مقیددر .
 لسان عربی ده سرچه معناسنه اولان (سوادیه) وقراتی وبرشهرک
 کوی کندى معناسنه اولان (سواد) کلهلرینک بومحله ايله
 مناسبتى اکلایشیله مز . بومحلهده (مراد اغا مسـجدى)
 و (عبدالرحمن مدرسهسى) و (صاواقچه چشمهسى) اولوب
 مسجدشریف ۱۰۲۹ حدودنده درگاه عالی چاوشاندن (مراد
 اغا) بنا ایتمشدر . مدرسه قریباً ذکر اولنه جقدر . اليوم
 بونلردن اثر یوقدر . چشمه موجودایسهده نامى تبدل ایتمشدر .
 ۲۴ (صوفی زاده محلهسى) کمشلى زاده محلهسنک آلتنده
 اولوب شرقاً یاقوتیه وغرباً جنوباً کمشلى زاده محلهلری و شمالاً
 یشیل ایرماق ايله محدوددر . قدیمأ (غیاث الدین شاه باغچهسى)

[۱] چشمه نك التنه وضع ایدیلان صوتکنه لرینه ؛ اغاجدن اولورسه
 (صاواق) و طاشدن اولورسه (هاوود ، هافد) دینور بعضاً یکدیگرى
 مقامنده استعمال اولنور .

یرنده در . چلبی سلطان محمدخان حضر تارینک معلم و مستشاری
صوفی بازید چلبی زاده (محمود چلبی) بو محله ده اقامت ایتدیکی
مناسبتله (صوفی زاده محله سی) دینمشد .

۸۳۵ ده مومی الیه (محمود چلبی) بو محله ده بر مسجد شریف
و ۸۴۳ ده یورکیج پاشانک حلیله سی (شاهبولا خاتون) بنت
مصطفی بک بو مسجدک یاننده بر مکتب و چشمه بنا و هرا یکی ده
اوقافی تنظیم ایتمشلردر . بو محله ده بر قادری تکیه سی اولوب
قریباً ایضاح اولنور . سلطان سلیمان خان قانونی و زراسندن
(صوفی محمد پاشا) بو محله ده تولد ایتمشد .

۲۵ (صوفیلر محله سی) کدی کلی قیانک شرق شمالی اتکنده
اولوب شرقاً پیر الیاس مزارلنی و غرباً کموشلی زاده و شمالاً
یا قوتیه و محمد پاشا محله لری و جنوباً بالوس قیاسی اتکلری ایله
محدوددر . بو محله قدیمآ (بهرام شاه مدکی) دیمکله مشهور اولوب
حضرت پیر الیاس و عبدالرحمن چلبیلر دورنده مشهور طقوز
قدر صوفیلرک اقامتگاه ی اولدینی مناسبتله (صوفیلر محله سی) دینمشد .
بو محله ده (امیر مبارزالدین بهرام شاه) بر مسجد شریف
و چشمه بنا ایتمشد . بوکا (بهرام شاه مسجدی) دینور .
بعده کموشلی زاده (خواجه جلال چلبی) بو محله نک باشنده
یوکسک بر موقعده حضرت پیر ایچون بر زاویه عالیه بناسیله
(پیر عبدالرحمن چلبی) دورنده (قصر صوفیان) تسمیه
ایدلمشد .

بعده سلطان بایزید خان ثانی دورنده بکلیردن حاجی
سنان بك زاده (عبدالله پاشا) ۸۹۰ ده کارگیر و غایت متین
بر جامع شریف و شرق طرفنده بر مناره و اوکنده بر مدرسه
و دارالقرابنا ایلدیکنی متعاقب ارتحال ایلدیکندن مخدومی
دفتردار (عبدی، عبدالکریم بك) ۹۰۷ ده اوقافی تنظیم
ایتمشدر.

بو جامع شریف صوفیلر جادهسی اوزرنده اولوب یوکسک
اولدینی مناسبتله طاش مردیون ایله چیقیلیر. مردیونك اوکنده
بولونان قیونك ایچ طرفی جامع شریفك اوک حویلیسی اولوب
اوستی قبه ایله مستوردر. جناحلرنده ایکیشر اوطه اولوب
مدرسهسی بو اوطه لردر. بو حویلی اوکنده ینه طاش مردیون
اولوب جسم قپوسندن جامع شریفه کیریلیر. جبههسی سیاه
طاشدن مصنوع اولوب قپوسی اوزرنده شو کتابه واردر.

«عمر دارالحديث عبدالله پاشا بن الحاج سنان عفی الله
عنهما فی ایام سلطان بایزید عز نصره فی سنة تسعين و ثمانمائة»
شو کتابه نك دلالتی اوزره بو جامع شریف و مدرسه دارالحديث
اولمق اوزره بنا ایدلمش و ۹۰۷ تاریخنی و ققیه سنده دخی بو
جهت مصرح بولنمشدر.

۳۶ (عجم علی محلهسی) اوزون یول منتهاسنده اولوب
شرقاً چراچقی و پروانه بك و غرباً چریباشی و جنوباً دارالسلام
و شمالاً خواجه سلیمان محله لرله محدوددر. مشاهیر اعیانندن

(خواجه الحاج عجم علی اغا) ۸۸۰ تاریخچه قدر بوراده اقامت
ایتدیکي مناسبته تسمیه ایدلمشدر .

خواجه مومی الیه بو محله ده خانسی او کنده بر چشمه ویاننده
بر مکتب و احفادندن (بالی بك) بن مصطفی چلبی بن خواجه
عجم علی اغا ۹۱۷ ده کارگیر بر جامع شریف و شرق طرفنده بر
مناره بنا و اوقافی تنظیم ایتشدر بوجامعی یاپان معمار (محمود
چلبی) اولدینی یان پنجره سی اوزرنده ویایدیران (بالی بك)
اولدینی قپوسی اوزرنده محکوک در .

کتابه شودر « عمر هذا المسجد المبارك بالی بك فی سنه سبع
عشر وتسعمائة » شو کتابه نك آخر طرفی بر مقدار قیرلمش اولدینی
جهتله (بالی) نك نصف اعلاسی قیریق در . ۹۱۷ ده تسجیل
ایدیلان وقفیه سنده اسمی محرردر . بوجامع شریف مکرراً
تعمیر ایدلمش و ۱۲۷۱ ده یانمش اولوب مناره سی هدم ایدلدیکندن
(یانیق مناره) نامیله مشهور اولمشدر .

۳۷ (فتحیه محله سی) قبانک آلتنده اولوب شرقاً دره
و غرباً حاجی حمزه و جنوباً قبا و شمالاً قیلیجی محله لریله
محدوددر . بوراسی قدیمآ (فتح غازی ملکی) نامیله مقید
اولوب بعده فتحیه دیندیکنه کوره امامسیه محافظلرندن (فتح
غازی) بوراده اقامت ایتدیکي آ کلاشلمقده در واضح افندی
« رأس المنابر [۱] طرفندن ابتدا بو محله فتح ایدلدیکي جهتله

(۱) امامسیه یی صوگ دفعه اوله رق قطعاً فتح ایدن (دانشمند احمد غازی)
اولدینی تاریخاً محقق در . واضح افندینک رأس المنابر دیدیکي بو ذات اولنی در .

تسمیه ایدلمش « اولدیغنی یازیور .

بو محلهده (فتحیه جامعی) نامیله مشهور بر جامع شریف
اولوب هیئت حاضره سی کایسادن محول اولدیغنی کوسترمکده در .
۵۱۰ حدودنده (فتح غازی) طرفندن جامع شریفه تحویل
ایدلمش اولدیغنه اسمی دلالت ایدر . ۱۰۵۷ زلزله سنده مصاب
اولدیغدن فتحیه لی (مصطفی صدقی پاشا) تعمیر و همشیره سی
اولوب (جان میرزا پاشا) نك حلیله سی اولان (عایشه خانم)
ایله اوقافی ملکاً و نقداً تنظیم ایشملردر . ۱۰۴۸ ده کرسی
شیخی (الحاج حسن افندی) املاک و نقودینی بوجامعه وقف
و تعمیر ایلدیکی کبی ۱۱۹۱ ده متولی (الحاج علی اغا) دخی
تعمیر ایتدیرمش و ۱۳۰۰ ده متولی اینجه زاده (الحاج محمد
عارف افندی) دخی تعمیر و غرب طرفنه کارگیر برمناره علاوه
ایلدیکی ائشاده ظهور ایدن بر مرمرک اوزرنده کتابة محکوکه
کورلمش و یدنجی قرن میلادی اوائلنده ییزانس ایمپراطور لرندن
فوقاسک قیزی، پرنسس (الینا) طرفندن یاپدیرلمش اولدیغنی خبر
ویرلمشدر .

اماسیه قاضیسی منلا بکک دیمکله مشهور مصاحی زاده
(عبدالرحمن چلبی) بو محلهده بر حمام انشا ایدوب مخدومی
قاضی عسکر منلا ولدان (محمد چابی) دخی حمامک اوستنده
بر مدرسه بنا ایده رک بونک مخدومی قضاندن (عبدالرحمن چابی)
۹۱۲ ده حامی وقف ایتمشدر حمام و مدرسه (قاضی حامی)

و (قاضی مدرسه‌سی) نامیده معروف اولوب مدرسه تماماً
مدرس ویری ده غائب اولمشدر .

۳۸ (قبا محله‌سی) قافك ضمیله كوشك قیاسی آلتنده
یوكسك بر موقعه‌ده در . شرقاً دره و غرباً یول و جنوباً
كوشك قیاسی و شمالاً فتحیه محله‌سی ایله محدوددر . بورانك
قدیمآ اسمی (قبالو محله‌سی) اولوب سادات حسینیه دن و فرغانه
ایالتی داخنده كائن (قبا) قصبه‌سی اهالیسندن اماسیه‌ده (قبالوشیخ)
دیكله مشهور (جمال الاین حسین بن محمد الفرغانی القباوی)
۸۱۰ تاریخنه قدر بوراده ساكن اولدینی مناسبتله (قبالو محله‌سی)
بعده (قبا محله‌سی) دینمشدر .

سید مشار الیهك حقیدی (الشیخ حسام‌الدین حسین الحلوتی)
۸۵۷ ده بو محله‌ده بر مدرسه ویاننده برجامع شریف و چشمه
و کندیسنه بر تربه بنا و اوقافی تنظیم ایتمشدر . ۱۰۷۹ ده
جامع و مدرسه خراب اولدیغدن اماسیه متسامی قبالی (عبدی
بك) ۱۰۸۰ ده مجدداً جامع شریفی و اوغلی (محمد پاشا)
دخی ۱۱۰۵ ده مدرسه‌بی اعمار و مكتب علاوه ایتمشدر .

۳۹ (قراطای محله‌سی) ایچری شهرده اولوب شرقاً جامع
اندرون و غرباً قورشونلی و جنوباً خاتونیه محله‌لری و شمالاً طاغ
ایله محدود و قلعه دزداری و اماسیه محافظی اولان امرای
سلاجوقیه دن (جلال‌الدین قراطای) نامه منسوبدر بو
محله‌نك جهت غربیه‌سی (یا غیبصانیه) دیكله مشهور اولوب

بوراده عماد زاده (محمود چای) ۸۰۷ ده بر زاویه و دارالضیافه
و ۹۴۱ ده (الشیخ خیرالدین خضر افندی) بر مسجد شریف
و یاننده فحول علمادان عینتابی (قره عثمان افندی) ۱۱۴۸ ده
بر درسخانه بنا و هربری اوقافی تنظیم ایتشدر . مسجد مذکور
(شیخ مسجدی) نامیله مشهور اولوب احفادندن ایکنجی (الشیخ
خضر افندی) ۱۰۵۸ ده تجدید و اوقافی توسیع ایتشدر .

۴۰ (قرانجی محله سی) قیود عتیقه ده (قرانجی طوغان
محله سی) نامیله مقید اولوب سراجخانه محله سی اوستده کائن
و شرقاً قوجه جق و غرباً بوزه خانه و جنوباً خواجه سلیمان
و شمالاً سراجخانه محله لریله محدوددر قدیمآ شهنشاہ باغچه سی
یری اولوب ۸۵۶ ده سکبان باشیلیقدن معزولاً اماسیه یه
کوندرلش و بوراده اقامت ایتش اولدینی مناسبتله نام و شهرتیه
تسمیه ایدلمشدر . نام قدیمی (قیا پاشا محله سی) در .

بو محله ده قیا پاشانک ۸۰۵ ده بنا المدبکی بر حامی و مکتبی
اولوب ۸۹۰ ده بویوک قپو اغاسی (حسین اغا) کبیر بر بدستان
ویاننده قیزلر اغاسی (فیروز اغا) دخی دیگر بدستان و بونک
جنوبنده کیلاری (سلیم اغا) دخی ینه ۸۹۰ ده کار کیر بر
جامع شریف و یاننده بر مناره بنا و هربری اوقافی تنظیم
ایتشدر در . جامع شریفک قپوسی بالاسنده شو بیتلر محکوکدر .

بارک الله ایها المسجد عجز العقل عن مناقبک

بناک حضرة سلیم اغا صاحب المنه لواهبک

و افاض الرحمن تاريخنا رفع الاله شان صاحبك
 شو و تاريخ تامك دلالت ايلديكي ۸۹۰ ده جامع شريفك
 بناسنى اتمام ايدوب ۹۰۰ تاريخده و فقيه سنى تنظيم ايتديكي
 سجلات شرعيه دن مستبان در فقط السنه عامه ده و اكثر قيود
 مسجله ده (كيلارى سليمان اغا جاسى) ناميله مشهور و مقيد
 اولديغنه باقيليرسه قيد محكوك ده كوريلن (سليم اغا) تمبيرى ؛
 (سايمان اغا) لفظنك وزن مصراعه صيغمدىنى جهتله اختيار
 ايدلمش اولدينى احتمالى وارد خاطر اولور . قيا پاشا خراب
 همانك اوستنده خراب اوله رق كورولن مسجد شريف
 فضالادن (منايا بخشى خليفه) حضر تلمرينك بنا كرده سى اولوب
 ۸۲۳ ده و فقيه سنى تنظيم ايتمشدر .

۴۱ (قرالدين محله سى) ميدان كوپرينك شمالنده اولوب
 شرقا اخى سابق الدين و غربا حكيم چلبى محله لرى و جنوبا
 يشيل ايرماق و شمالاً طاغ ايله محدود در اما سيه واليسى
 (مبارزالدين خليفه آلپ) خدمتندن نشئت ايدرك امرادن
 اولان (قرالدين الحادام) ۶۴۱ حدودينه قدر بوراده اقامت
 ايتديكى مناسبتله (قرالدين محله سى) ديتمشدر .

بوراده امير عماد الدين سولى بكك بر مسجدى و حامى
 اولوب ۱۰۷۹ ده خراب اولديغندن اما سيه متسلمى (الحاج
 على اغا) تجديد و ۱۱۴۳ ده محترق اولديغندن اعيانندن سانجى
 زاده (الحاج حسن اغا) تعمير ايتديرمشدر ايرماق كنارنده

امرادن ابوبکر بکک کریمه‌سی (فخرالنساء خاتون) ۹۱۴ ده
بر مسجد شریف و یاننده بر مکتب بنا و اوقافی تنظیم
یتشدر .

۴۲ (قوجه‌جق محله‌سی) اوزون مصطفی محله‌سی آلتنده
اولوب شرقاً سیل آغزی و غرباً قزانجی و جنوباً اوزون
مصطفی و شمالاً سراج‌خانه محله‌لریله محدوددر . بوراده
(قوجه‌جق) دیمکه مشهور (خواجه الحاج احمد چلبی)
اقامت و ۸۷۱ ده بر مسجد شریف و مکتب و چشمه بنا
ایتدیکی مناسبتله تسمیه ایدلمشدر .

بو مسجد شریف مکرراً تجدید ایدلمش و حاجی بک زاده
(محمد بک) ۱۰۷۱ ده بو جامعی اعمار و وقف عمار ایدوب
ینه یانمش اولدیغندن ۱۲۳۰ ده تجماردن بندرلی (الحاج
فیض‌الله اغا) مجدداً بنا و احیا ایدرک قبله طرفنده بر مدرسه
و یاننده بر مکتب انشا و اوقافی تنظیم ایله مشدر مشاهیر
اولیادن ایکینه‌جی زاده (الشیخ صفی الدین محمود الخلوتی)
حضر تلیزینک تربه‌سی بو محله‌دهدر .

۴۳ (قورشونلو محله‌سی) ایجری شهرده یوقاری حمامک
جوار غریب‌سنده اولوب شرقاً قراطای و غرباً اخی سعدالدین
محله‌لری و جنوباً یشیل ایرماق و شمالاً طاغ ایله محدوددر . بو محله
(یاغیبصانیه) اولوب ملوک دانش‌مندیهدن (یاغیبصان غازی)
بوراده بر خان جسیم بنا ایدرک (خان یاغیبصان) دیه ۵۶۰

تاریخندن بری مشهور اولمش و مؤخرأ احفادنندن (جمال غازی بك) تعمیر واوزرینی قورشون ایله ستر ایلدیکندن (قورشونلو خان دینمش وبعده خان لفظی حذف اولنهرق) (قورشونلو) نامی بو محلهیه علم اولهرق قالمش اولدینی قیود عتیقه تتبعاتندن آ کلاشمشدر .

سلطان مسعود سلجوقی سرایی بو محلهده اولوب مؤخرأ قضاندن آل مسعوده انتقال ایتمکله بولردن (علاء الدین علی چایی) بن ابی القاسم احمد بن مسعود ایرماق کنارنده ۸۴۰ ده برمسجد شریف و اوکنده بر چشمه بنا و اوقاقی تنظیم ایتمشدر . اشقیا وقعہ سنده یاندیغندن ۱۰۴۷ ده اماسیه کلن صدر اسبق (بیرام پاشا) مجدداً احیا و اوقاقی توسیع ایتمشدر . یوقاری حمام دیمکله مشهور حمام بو محله نك باشنده اولوب سلطان مسعود سلجوقی آثارینك اماسیه ده بولنان بقایاسندن معدوددر . بودخی اوقاف خاتونیه دندر

۴۴ (قلیججی محله سی) بورمه مناره جامع شریفنك قبله طرفنده اولوب شرقاً دره و غرباً پروانه و چراجخی و جنوباً فتحیه و شمالاً اوزون مصطفی محله لريله محدوددر . قدیمآ (قلیج محله سی) وبعده (جمودار محله سی) دیمکله مشهور و مقید ایکن سلطان سلیم خان اول امراسندن (قلیججی بوسف بك) بو محله دن ظهور و اشتهار و ۹۱۷ ده دره کنارنده برمسجد شریف انشا و اوقاقی تنظیم ایتدیکی مناسبتله (قلیججی محله سی) دینمشدر .

۴۵ (کوبجکز محله سی) قره قیانک اتکنده اولوب شرقاً اوزون یول مزارانی وغرباً چیقرق محله سی وجنوباً طاع و شمالاً رجب و اوچلر محله لرله محدوددر. بواسم، قیود عتیقه ده (کوکجکز ولد سوروق) و محله ده (کوکجکز محله سی) نامیله مقید اولدیغنه بناءً کوبجکز، کوکجکز اسمندن غلط اولدینی محققدر. بو کوبجکز دیدیکمز ذات، سالور قبیله سندن و سلطان مسعود سلجوقی امراسندن (بهاء الدین کوکجکز) اولوب ۵۷۵ تاریخلرینه قدر بو موقعه اقامت ایتدیکی مناسبتله تسمیه ایدلمشدر.

بو محله ده امرای سلجوقیه دن صاحب اعظم (مذهب الدین علی) دامادی (حسام الدین کپوک سلغوری [۱]) ۶۶۰ حدودنده بو محله ده مختصر بر مسجد شریف بنا ایدوب (کپوک مسجدی) دیمشدر. بعده بو مسجدی ۸۰۰ حدودنده (داود بک) تجدید و اوقافی تنظیم و یاننده بر مکتب علاوهً انشا ایدوب ۹۵۷ ده (علی چلبی) بن منصور چلبی و ۱۱۰۸ ده متولیس (الحاج عبدالقادر اغا) و بعده بونک حفیدی (حافظ الحاج محمد اغا) مجدداً یاپدیرمشلردر.

۴۷ (کوک مدرسه محله سی) اماسیه نک منتهای جنوبیسنده.

(۱) عقدالجمان ده پروانه معین الدین سلیمانک همشیره سی زوجی حسام الدین کباوک الرومی دیه مسطور اولان ذات بودر.

۴۶ (کوپری باشی محله سی) الحاق کوپرینک جهت جنوب
 بیه‌سندده اولوب شرقاً سراجخانه و غرباً اسکی کتبخدا و جنوباً
 قزانچی محله‌ری و شمالاً یشیل ایرماق ایله محدوددر . مذکور
 کوپرینک باشنده اولدینی مناسبتله تسیمیه ایدلمشدر . کوپرینک
 باش طرفنده اسبق اناتولی والیسی عمرپاشا زاده (الحاج عثمان
 بك) ۱۱۶۱ ده بر مسجده شریف بنا و اوقافی تنظیم ایدوب
 اولادی حسن اداره ایلدیسدهده مؤخرأ باقلمدیغندن خراب
 اولمش و ۱۳۰۰ ده اماسیه ناخی و دینی زاده (الحاج محمد امین
 افندی) بومسجدی بك مكمل ولطیف بر صورتده تجدیداً
 احیا ایتمشدر .

مومی الیه (الحاج عثمان بك) بومحلهده بردار الحدیث
 و کتبخانه و چشمه بنا ایدرك نامنی ابقا ایتمشدر . مومی الیهك
 خانه‌سی اتصاننده یان یانه ایکی حمام اولوب (آلاجه حمامی)
 دیمکله مشهور اولمش و ۸۷۵ تاریخنه قدر (آلاجه یحیی بك)
 بن یعقوبشاه چلبی تصرفنده قالمشدر . کوپرینک رأس شمایلسنده
 بولونان حمام اماسیه حکمداری (شه‌ن‌شاه سلجوقی) آثارندن
 اولدینی مقیدایسدهده بوایکی حمامه دائر برصراحت کوریلهمدی .
 بوایکی حمامك وضعیتلرینه و آلحاق کوپری حمامی سویه‌سندده
 بولندقلرینه باقیابرسه آثار سلجوقیه‌دن اولدقلری اکلایشیلیر .
 میر مومی الیه (یحیی بك) اماسیه امیری (شاد کلدی پاشا)
 احفادنن اولدینی و حماملركده بونك تصرفنده ارثاً بولندینی

ملاحظه اولنورسه بونلرکده پاشای مشارالیهک آثارندن اولمسی لازم کلیرسهده بوا یکی حمامک اماسیهده موجودیتی شاد کلدی پاشانک تولدندن مقدم اولدیغی ؛ مشارالیهک آثارندن اولدیغی ا کلاتیر. بوحاملر الحاج عثمان بکک اوقاقدن در.

(کوک مدرسه محلهسی) قیلیج ارسلان تربهسی دیمکله مشهور (طورمطای تربهسی) شرقنده اولوب شرقاً شامیجه وجنوباً شیخ قریق محلهلری وطاغ و شمالاً یشیل ایرماق وغرباً یول ومزارلق ایله محدوددر قدیماً (کودول ملکی) اولوب (کودول محلهسی) دینور ایدی . ۶۶۵ ده اماسیه والیسی بکلر بکی (امیر سیف الدین طورمطای) بو محلهده جامع ومدرسه بنایدهرک مدرسهسی (کوک مدرسه) نامیله مشهور اولدیغندن محلهیه علم مخصوص اولمشدر .

مدرسه بی حاوی اولان جامع شریفک جبههسی غایت مصنع اولوب طاش اوزرنده قبارتمهلی چیچکلر شایان تماشادر . اوک ظرفی یوکسک اولدیغی مناسبتله ایکی طرفلی طاش مردیونی وقپوسی اوکنده صفهسی وسیاه مرمردن یاپیلمش کبی غایت متین برصورتده پایدار اولان بدیع ومصنع تحته قپوسی واردر قپونک اورتیه ستوننده محکوک اولان (عمل ابو مسلم کالنجار) عبارهسندن معمار مشهور (ابو مسلم کالنجار) طرفدن یایلدیغی اکلاسلمهدهدر .

قیودن ایچری کیرلکده اوزری قبهلی واسع بر بوشلق اولوب

قبونك ايكي طرفنده برر اوطة وصول جتاختده عظيم بر تر به
وبو تر به نك آلتده طاش مردیون ايله اينيلير درين بر اوطة
مشاهده اولتمقده در . بوتله دائر ايضاحات مدارس و تربله
بختده ذكر اولتور .

شكلاً مربع اولان بوشاغك اوكنده ديكر بر قپودن
جامع شريفه كيريلير . بو جامع شريف جسيم طاشلردن بنا
ايديلوب قپوسی اوزرنده كتابه سی سو كولمش اولديغندن ۱۳۱۶ ده
متولي كورجی زاده (محمد نجيب بك) طرفندن تعمير ايدلديكنه
دائر بر كتابه قونمشدر قارشوسنده (طورمطای) مرحومك
تر به سی واردر . تولیتی ، واقف مشاراليهك حیاتنده حفيدی
(امير جلال الدين محمد پروانه بك بن امير مبارزالدين موسی) يه
واولادينه تخصيص ايدلمشدر .

بومحله نك شمالنده باغچه ايچنده امرای عثمانیه دن بيرام بك
زاده (ملك غازي بك) ديمكله مشهور ملك الامرا (اسمعيل بك)
۸۱۹ ده بر زاويه بنا و اوقافی تنظيم ايدهرك تولیتی اولادی
طرفندن اداره ايدلمش و تكيه شيخی و متوليسي اولان (سنبل
محمد افندی) ۱۲۴۵ ده بر مسجد شريف علاوه ايتمشدر .

بوزاويه نك اتصال غربيسنده وزرای عثمانیه دن اتا بك زاده
(يوركج پاشا) بر دائرة مخصوصه ايچنده غایت مصنع ، جبهه سی
مردن و اطراف قزله طاشدن اوقاق و دلنشين ، صوكدرجه
متين بر جامع شريف و شرق طرفنده بر مناره و قپونك يان

طرفنده کندیسه واولادیتته مخصوص بر تر به وقارشوسنده بر
عمار تخته وجامع شریفک ایکی طرفنده حجرات اربعه یی مشتمل
بر مدرسه بنا و بونلری ۸۳۴ ده اکمال ایتمشدر . قپوسی بالاسنده
قزل مرمر اوزرنده ویشیل چیچک ایله مزین ، غایت مصنع
اوله رق شو عبارۀ عربیه محکوکدر .

« انشأ هذه العمارة المباركة المنسوبة الى الفقراء والمساكين
في ايام الدولة السلطان الاعظم والحقان المعظم غياث الدين والدنيا
ابن الفتح سلطان مراد بن المرحوم السلطان محمد المشتهر بابن عثمان
خلد الله سلطانه الامير الكبير والوزير الحظير جلال الدولة والدين
يوركج پاشا بن عبدالله الاتا بكی في غرة سنة اربع وثلثين وثمانمائة »
شو خيراتك وقفیه سی ۸۴۰ تاریخنده تنظیم ایدلمش اولوب
جامع شریفک طرف غرب جنوبیسنده شوسه یولنه قریب بر
موقعده غایت لطف ووافق بر حامی اولوب (چارداقلی حمام)
دیمکله مشهوردر بوده موقوف اولوب ۱۲۹۶ تاریخنه قدر
معمور اولدیفی حالدۀ بوسنه ایرماغک طغیانندن کلخاننی ویا نلری
رخنه دار اولدیغندن جزئی برهمته اعمار ی قابل ایکن اوهمت
جزئی یی دریغ ایدن حکومت مطلقه زماننده معطل بر حالدۀ
قالوب بشفع وقفیه هدر اولمقدۀدر .

۴۸ (کومشلی رادۀ محله سی) سیل اغزینک جهت شرقیه -
سندۀ اولوب شرقاً یاصی قیا وصوفیلر محله سی و غرباً وجنوباً
سیل اغزی ودره و شمالاً صوفی زاده محله سی ایله محدوددر سلطان

مسعود سلجوقی شهزاده سی (سلطان غیاث الدین محمد شاه)
 بومحله ده اقامتله (غیاث الدین شاه ملیکی) دینمش و ۹۲۷ تاریخنه -
 قدر امامیه امیری اولان کومشلی زاده (تاج الدین محمود چلبی) به
 نسبتله قیود رسمیه ده (کمشلی زاده محله سی) نامیله قید ایدلمشدر
 بومحله نك یوکسك بر موقمندہ مشارالیه کومشلی زاده
 (تاج الدین محمود چلبی) ۷۲۵ ده برجامع شریف بنا ایدرهك
 ۷۲۷ ده اوقافی تنظیم ایتمش و حفیدی (شمس الدین احمد چلبی)
 ۸۱۳ ده هلكیس باغچه سنی وقف ایلدیکی صروده بوجامع شریفه
 تاجیه جامعی) دیندیکی ۸۰۵ ده تنظیم ایدیلن حفیدی (شمس الدین
 احمد چلبی) وقفیه سنده کورلمشدر .

۸۱۸ ده زلزله دن مصاب اولدیغدن کومشلی زاده (احمد
 پاشا) تعمیر ایدوب بعده یاندیغدن احمد پاشا زاده دفتر دار (احمد
 بك) ابن عبدالله بك ۸۹۰ ده مجدداً کارگیر اوله رق احیا و غرب
 طرفده برمناره بنا و اوقافی تنظیم ایتمشدر . قیوسی بالاسنده
 مرمر اوزرنده شوکتابه فارسیه محکوک در .

شد تمام این مسجد جامع بتوفیق خدا
 در زمان پادشاه عادل داتش پدیز
 ابتدای این بنا باخیر احمد بك بخوان
 لیک تاریخش بود قدتم جامع کبیر

اشقیا و قعه سنده ۹۰۱۱ ده یاتمش اولدینی جهته بواحمد بکک

احفادنندن میریران (شمس الدین پاشا) تجدید وبعده ۱۰۹۹ده
کومشلی زاده (ابراهیم پاشا) تعمیر وواقفی توسیع وبعده بر
قاج دفعه زلزله و ۱۸۳۳ ده حریق وقوعيله محترق اولديغندن
متولی (الحاج مصطفى اغا) ۱۸۳۴ ده تجدد بنا ايتمشد .

۱۲۳۸ ده اعیانندن رختوان پاشا زاده (الحاج علی بك)
وعیظه احداث و دكانلرینی یو جامعك كرسی شیخلكنه وقف
ایتشد . بودكانلر واضح افندیك احقادی الفده وقف اولمق
اوزره تصرف ایدلمكده در . یو جامع شریفك قبله طرفده
(فاطمه خانون) بر مدرسه بنا ایدوب ۱۱۵۸ ده اوقافی تنظیم
ایتشد .

چقور باغچه ده دفتر دار (شمس الدین پاشا) بر مسجد شریف
بنا و ۱۰۲۳ ده عقاراتی وقف و سیل اغزننده (علی پاشا)
۹۱۶ ده بر مکتب انشا و اوقافی تنظیم و ۱۱۰۰ ده کومشلی
زاده (ابراهیم پاشا) دخی سیل اغزننده کومشلی زاده (محی الدین
محمد الخلوئی تربیسی) اوکنده بر چشمه و چارشوا یچنده طوبیجی
زاده (الحاج عبدالرحمن ، عبدی اغا) ۱۳۱۸ ده بر جامع شریف
واوکنده بنا و دكانلرینی وقف ایتشد بر جامع شریفه (ا کری
جامع) دینور .

۴۹ (محمد پاشا محله سی) تیمارخانهك شرق طرفده اولوب
شرقاً بر نیجی و یاقوتیه و جنوباً یعقوب پاشا محله لری و شمالاً یشیل
ایرماق ایله محدود در . قدیم (دغراقیه محله سی) نامیله مشهور اولوب

۸۹۰ تاریخندن اعتباراً (محمدپاشا محله‌سی) دینمکه باش-لامش و (دغراقیه) نامی یالکیز مدرسه‌یه علم ارله‌رق قالمشدر .
بو محله‌ده امام‌سیه والیسی (نورالدین طغرق) ۶۳۱ ده ایرماق کهنارنده بر مسجد شریف واتصال جنوبیسنده کندیسنه مخصوص ، غایت متین بر تربه بنا ایتمشدر . قپوسی بالاسنده شو عبارة عربیه محکوکدر .

« امر بعمارة هذا المسجد المبارك في أيام الدولة السلطان المعظم شاهنشاه الاعظم مالك رقاب الامم علاء الدنيا والدين ابوالفتح كيقباد بن كيخسرو برهان امير المؤمنين حاجی طغرق امير شكار سنة احدى وثلاثين وستمائة »

امام‌سیه والیسی شهزاده (سلطان احمد) ك لالاسی وزرادن خضر پاشا زاده (محمدپاشا) ۹۰۰ ده مسجد شریفك شرق طرفنده یول اوزرنده یشیل ایرماغه ناظر بر موقعده کارگیر بر جامع شریف وغرب طرفنده بر مناره واوکنده عمارتخانه ومدرسه وشرق طرفنده کندیسنه مخصوص تربه بنا وبوخیراتی جسم بردائرة احاطه ایتمشدر .

جامع شریف ؛ شرقدن غربه طوغزی مستطیل اولوب منبری غایت مصنع وممر اوزرنده قبارتمه‌لی چیچک‌کرله مزیندر . قبله طرفی جسم باغچه اولوب اوکنده اوفاق بر شادروانی وجناح‌لرنده برر مقصوره‌سی وشماله ناظر ایکی قپوسی واردر . اورتہ قپوسی جسم وممر مردن مصنوع اولوب اوزرنده شو عبارة عربیه محکوکدر .

« انشأ هذه العمارة المباركة في أيام الدولة السلطان الاعظم
بايزيد خان ابن محمد خان خلد الله سلطانه الوزير الكبير محمد پاشا
زيد قدره في تاريخ محرم سنة تسعمائة »

بو جامع شريفك جنوب طرفنده پاشای مشاراليه بر زاويه
خلوتيه بنا ايدوب بونلرك اوقافنى تنظيم ايتمشدر ويور كج پاشا
زاده مصطفى بك ۸۴۰ ده بو جامع شريفك غرب طرفنده بر
حمام لطيف و ۹۱۰ ده قبله طرفنده (اوروج بك) بر چشمه
و ۹۸۷ ده قضاادن (خيرالدين افندى) بر مسجد شريف
و حمامك شرق طرفنده ۱۰۷۱ ده (الشيخ محمد آغا) بر
دارالقراء وبوندن اول (نوح بك) ديكر بردارالقراء و ۱۲۵۷ ده
اخسخهلى مفتى زاده (على افندى) محمد پاشا دائره سلك شرق
قيوسى ايچنده تربه سى ياننده بر مدرسه و ۱۳۰۸ ده احفادن
متولى (محمد بك) غرب طرفنده يول اوزرنده ديكر بر
مدرسه بنا و اوقاflرئى تنظيم ايتمشلردر .

۵۰ و ۵۱ (هلكيس محله سى) اچاق كو پرينك جهت
شماليه سندن قوش كو پرى اوزرنده (لكن قيا) به قدر ممتد
بر طول اوزرنده اولوب شرقاً و جنوباً يشيل ايرماق و غرباً
سراى محله سى و شمالاً خرشنه طاعى ايله محدرددر . اعيان
روميه دن (هالكييس) قبل الفتح بوراده اقامت ايدوب شرق طرفى
باغچه سى و غرب طرفى ده خانه سى اولدينى مناسيته نامى قالمش
وبعده تخفيفاً (هالكييس) ديتمشدر .

بومحله قدیماً یکی قسمه منقسم اولوب حکومت کوپریسندک
جهت غربیه سنده بولونان ساعتخانهك اوکنه قدر (ساده
هلیکیس محله سی) و بورادن لیکن قیایه قدر اولان طرفه دخی
(باغ هلیکیس محله سی) دینور. سابق امامیه مبعوثی (اسماعیل
حقی پاشا) ساده هلیکیس محله سنده تولد ایتمشدر .

۶۹۰ حدودنده خواجه (محب الدین مودود زیاری)

بو محله ده بر مسجد شریف ویاننده بر دارالعلم بنا ایتدیکی
قیداً ثابت ایسه ده هانکی طرفه اولدینی بیلمه مدی . باغ
هلیکیسك نصف شرقیسی عموماً کومشلی زاده (شمس الدین
احمد چلبی) بن بدرالدین محمود چلبی طرفدن ۸۰۵ ده وقف
ایدلمشدر . تاجیه جامی یعنی کومشلی زاده جامی اوقافدندر .

بوباغ هلیکیس محله سنده ۱۰۱۸ ده چاوشان درگاه عالیدن
مصطفی اغا بر مسجد شریف ویاننده بر مکتب بنا و اوقافی تنظیم
ایده رك احفادی (حاجی افندی زاده لر) دن (الحاج علی اغا) بعده
(الحاج احمد اغا) مجدداً تعمیر ایتدرمشلر در . بومسجد شریفك

جهت غربیه سی عموماً قبودان دریا حافظ علی پاشا زاده (الحاج
احمد مقداد پاشا) ك خانه و باغچه سی ایکن ۱۲۸۱ ده امامیه
متصرفی (ضیا پاشا) عزت و نوری بکلردن اشترا ایدوب
یرینه غایت مکمل بر حکومت قوناغی وارقه سنده طاغ کنارنده
برحبسخانه عمومی و پاشانك سلاملغنی (بلدیہ دائرہ سی)
و فوقانیسی (تلغرافخانه) یادرمش و ۱۳۱۲ ده بلدیہ باغچه سی
شرقده بر پولیس دائره سی ده علاوه ایدلمشدر .

متصرف مشارالیه ، باغ هلاکیس ایله ساده هلاکیس اراسنده حد فاصل اولان قیا اوزرنده عموماً شهره ناظر بر موقعده جسم بر ساعت قله سنی انشا و شرفه سنه مربع وجسیم ، اوج جبهه لی بیوک ساعت وضع ایتدرمش اولدینی افکار عمومیه یی ایقظه بروسایه اولمشدر . بوساعتخانه نك اتصالنده ۱۳۱۲ ده بلدیة اجزاخانه سی وبونك قارش-وسنده برده اوراق مخزنی احداث ایدلمشدر .

۵۲ (یا قوتیه محله سی) تیمارخانه نك غرب طرفنده اولوب شرقاً وجنوباً کومشلی زاده شمالاً محمدپاشه محله لری وغرباً یشیل ایرماق ایله محدوددر . قدیمآ (غیاث الدین شاه باغچه سی) یرنده اولوب امرای عثمانیه دن (سنان الدین یا قوت پاشا) بوراده اقامت ایتدیکی مناسبتله مومی الهك نامنه نسبت اولنمشدر .

بومحله نك اوکنده (دارالشفای) اولوب الیوم السنه عامه ده . (تیمارخانه) دیمکله مشهوردر . بودارالشفای غایت متین اوله رق طاشدن بنا ایدیلوب جبهه سنده کورولن قبارتمه چیچکلر ، صنایع لطیفه ؛ آثار سلجوقیه یه مشابه برلوحه عرض ایتمکده در . قپوسنك اوزرنده ویان طرفنده مشاهده اولونان صنایع ، دیگر طرفنده یوقدر . فقط هر طرفی غایت متیندر . درونی واسع ویشکلاً مربع اولوب اوج ربعده یعنی شمال ، جنوب وشرق طرفلرنده بیوکه اوچر حجره وقپونك ایکی یان طرفلرنده برر حجره وارددر . وحجره لرك اوکنده طاشدن ستونلر اولوب اوزری قپالی

واورته سی آچیق در. انسانه بر مدرسه قدیمه شکلی تخطیر ایتدیرر .
قبوسی اوزرنده شو عبارة عربیه محکوک در .

« وفق الله عز سلطانه بعمارة دار الشفاء المبارکة بایام السلطان
الاعظم والحاقد المعظم غیاث الدین والدنیا الجایتو محمد خان خلد الله
سلطانه وایام عزرة الخاتون المعظمة ملکة الکابر ایلدوش خاتون
زیدت دولتها العبد الضعیف عنبر بن عبد الله تقبل الله منه فی ثمانية
وسبعمائه » بونک یان طرفنده ایریجه « و امیر اناطولی احمد »
شو عبارة صریحه نك دلالت ایلدیکی اوزره بودار الشفای تاتار
حکمداری (سلطان الجایتو محمد خان خدا بنده) نك زمان
سلطنتده و حکمدار مشار الیهک حلیه سی (ایلدوش خاتون) ك دور
عز تنده (عنبر اغا) و اناطونی امیری (احمد بك) ۷۰۸ ده بنا
ایتملدر در . بوقیونك یان طرفلرنده مستطیل برر طاش اوزرنده
برر کتابة دخی موجود اولوب بر درلو اوقونه مامشدر . یالکیز
جنوب طاشنده (علاء الدولة والدین علی) و شمال طاشنده (ابن
المرحوم المغفور له محمد) عبارة لرینه مشابه یازی کورلمکده در .
قیود عتیقه ده عموماً (دار الشفاء المرحوم علاء الدین) و
سجلات عتیقه محکمه ده (دار الشفاء المرحوم علاء الدین علی)
و (دار الشفاء المرحوم پروانه بك) و (دار الشفاء پروانه)
صورتلریله مقید در . وثائق عتیقه و تواریخده اماسیه ده صولک
سلجوق حکمداری سلطان مسعودك پروانه سی (عزالدین محمد
بن قطب الدین عثمان) و بونک اوغللری (علاء الدین علی پروانه)

و (ناصرالدین احمد پروانه) و (اسدالدین جعفر) اولدیغی مذکور اولدیغنه باقیلیرسه بودارالشفای بنا ایدن عنبرآغا واحمد بك اوقافنی تنظیم ایتمه دن وفات ایتدکلی و (علاءالدین علی پروانه بك) بعده وقفیه سنی تنظیم ایتدیکنندن بودارالشفای علاءالدین پروانه بکه نسبت ایلدیکی اکلایشیله بیلیر . اما سیه مولویخانه سی وقفیه سنی ده تنظیم ایدن بو (علاءالدین علی) اولدیغی قیداً مثبت در .

بناءً علیه : قیودك اثبات ایلدیکی (علاءالدین علی) بودر . (سلطان علاءالدین) تعبیرینه کلنجه تاریخ بوکا مساعد دکلدر . اخرملوک سلجوقیه اعتبار ایدیلن (سلطان علاءالدین کیقباد ابن فرامرز سلجوقی) ۸۰۷ دن اول وفات ایتمش بولندیغندن اصلاً بو (سلطان علاءالدین سلجوقی) اوله من بلادنا طولی ده یوندن بشقه بوعصرده (سلطان علاءالدین) نامیله برکیمسه معلوم دکلدر وقفیه سی ضایع ایدلمشدر . هر حالده (علاءالدین) لقبی (سلطان علاءالدین) عنواننك قید ایدلمسنه باعث اولدیغی ظن اولنور .

بودارالشفاده (رشیدالدین لقمان خوارزمی) و (بدرالدین محمود دچلی) : (نفیس الدین محمد دچلی) کی ذوات حکیم عصر اوله رق اشهار ایتمشدر . کبار صلحادن شاملر شیخی (الشیخ صالح الخلوئی) نك انفس مبارکده سی مجانیزه اکسیر شفا اولدیغی شهرور اولدیغندن (دارالشفای شیخی) اولدیغی حالده ۱۰۷۶ حدودینه طوغرو وفات ایتمشدر .

دارالشفای دروننده تربه سی وارد در (لغات تاریخیه وجغرافیه)
 مؤلفی مرحوم (محمد رفعت افندی) بودارالشفای ، و قیله پتخانه
 اولوب بده بیمارخانهیه تحویل ایدلیدیکنی و (مصطفی واضح افندی)
 دخی معین الدین سلیمان پروانه بك طرفندن بنا اولندیغنی
 یازیورلر ایسه ده هرایکیسی ده قیوسی اوزرنده محکوک اولان
 عبارۀ عربیه یی اوقومدقلری اکلایلیور . بودارالشفانك آثار
 اسلامیه دن اولدیغنی طرز انشاسندن و محکوکاتندن بددار ایکن
 و قیله پتخانه اولدیغنی ادعا ایتك قدر غریب برشی اوله من
 چونکه اماسیه ده پتخانهك اولدیغنی صورتده مطلقا مشرکلر
 دورنده ینی میلاد - حضرت عیسان مقدم قرون اولی ده بنا
 اولنه جنی شبه سزدر . حالبوکه اماسیه ده قرون اولی ائاری انجق
 الی یدی متره قدر یرك اته قلدیغنی خالده بودارالشفانك بر
 متره بیله یره کومولمکسزین یراوستده مشهود اولمسی ، قرون
 اولی ائارندن اولدیغنی اشعار ایدر . یاقین وقته قدر اوقافی ،
 متولیسسی ، کاتبلری ، جابیلری ، زنجیرجیلری ، قیوجیلری ،
 وطیبی ، شاگردلری ، اجزاجیسی ، چامه شورجیسی ، آشچیسی ،
 ونقطه جیسی معلوم ایدی . شمدی کراسته جیلره دیواولمشدر .
 بودارالشفانك طرف جنوبیسنده (یاقوت پاشا) ۸۱۶ ده بر
 زاویه وایانده برمسجد شریف ودارالضیافه بنا ایدهرك اوقافی
 تنظیم ایتمشدر . بومسجد شریفك شرق طرفنده (چوبلیجه
 مدرسه سی) اولوب قریباً زاویه سیله برابر ذکر اوتور .

۵۳ (یعقوب پاشا) اشاعی پیرلرک اطرافنده بولونان محلهیه
دینور . شرقاً صاواجیه وغرباً کومشلی زاده وشمالاً محمد
پاشا محلهلری وجنوباً پیر الیاس مزارلنی ایله محدوددر .
بوراده امرای عثمانیه دن (یعقوب پاشا) کارگیر بر دائره ایچنده
بر جامع شریف ویاننده بر مناره وایکی طرفنده چله خانه یعنی
زاویه خلوتیه واوکنده بر درسخانه وایریجه برده شیخ اوطه سی
انشا ایدهرک ۸۱۵ ده اوقافی تنظیم ایتشددر .

وقفیه سی دروننده (پیر الیاس) حضرتلرینک ارتحالی
وخلیفه سی « مفتی الثقلین وشيخ الاسلام الاجل مولانا پیر
جلال الدین عبدالرحمن » و(چلبی سلطان محمد خان بن بایزید
خان) حضرتلری مذکور اوله رق بو پیر عبدالرحمن چلبی
حضرتلریچون بنا ایدلیدیکی مسطور وتولتی عزیز مشارالیهک
خلفاسندن (مولانا الشیخ الاجل شمس الدین محمد البخاری)
واولادینه مشروط اولدیغندن بودائرّه جسیمه نک ۸۱۵ ده ختام
بولدیغی محقودر . زاویه نک بقیّه احوالی مبحثده ذکر
ایدیله جکدر .

بو یعقوب پاشا دائره سنک شرق طرفنده (چوکچی بابا)
دیمکه مشهور (شمس الدین محمد القرطاسی) تکیه سی اولدیغی
مناسبته بو طرف (چوکجه) و (یعقوب پاشا) طرفده
(چله خانه) نامرلیله مشهور اولمشدر . چله خانه نک غرب
طرفنده (قوشیاز تکیه سی) دیمکه مشهور (شیخ یعقوب افندی

زاویه سی) اولوب (الشیخ عبده افندی تکیه سی) دخی پیر الیاس
منارلغنك منتهای غریب سنده در .

ایشته اماسیه شهرینك حدودی داخلده مشهور اولان
الی اوج محله بونلردن عبارتدر . شهرك خارچنده ایکی محله
دها واردر که بونلرده اماسیه شهرندن معدوددر .

۱ (قره سکیر محله سی) اماسیه نك غرب جنوبی طرفنده
اولوب اون بر کیلومتره قدر اوزاق بر مسافه ده واقع در . بوراسی
امیر سیف الدین قره سنقر چفتلکی اولدینی مناسبتله (قره سنقر
چفتلکی) بعده تخفیفاً غلط اوله رق صاغر کاف وفتح سین
ایله (قره سکیر) دینمشد . بو محله ده قره سنقر بکک جامعی
ومکتبی واردر . الیوم بوجامع ایله مکتب اعانات اهالی ایله
اداره اولنمقده در . اسبق حجاز قوماندانی میرلوا (حسن پاشا)
بو محله دندر .

۲ (قیا باشی محله سی) قره سکیر محله سنك جنوبنده اولوب
یشیل ایرماق ایله چکهرک ایرماغنك اراسنده مثال بر جزیره
شکلنده در . (امیر قیا بای) ك ، بوراسی چفتلکی اولدینی مناسبتله
(قیا بای چفتلکی) نامیله قید ایدلمش اولوب مؤخرأ غلط اوله رق (قیا
باشی) دینمشد . بو محله نك ایرماق کنارنده بولونان بر موقع
لطیفه (پهلوان) دینمکده در . (امیر شیجاع الدین پهلوان بك)
بو قیا بایك مخدومی اولوب اوراده اقامت ایتمی باعث تسمیه اولمشدر .
(پهلوان زاده) لردن قیالی (احمد پاشا) ۱۰۶۸ دم

پهلوان ناميله مشهور اولان موقعده بر جامع شريف و مکتب و درس-خانه بنا و اوقافنى تنظيم ايتمى. بو ذاتک عايله سینه عموماً (قبالى زاده لر) دينور. بونلردن (على پاشا) و (السيد کاشف عمر پاشا) رجال و امراندنر. جدلرينک اوقافه متولى اولمشلردر.

بو ايکي محله نك آراسنده لطيف بر تپه اولوب (سرچوبان) دينور بو تپه نك جهت شرقيه سينده کائن (طاملر قريه سي) قره سکير محله سندن معدوددر. قره سکير و قيا باشى محله لرى معمور بر کوى شکلنده اولوب باغلرى، بستانلرى، ياغلرى، يوغورتلرى، پينيرلرى و سائر محصولات ارضيه سي پک مقبولدر. هله قيا باشى قارپوزلرينک امثالى يوقدر. بو محله لرده مشاهده اولونان احوال، اطوار، معيشت کمال صفوت اوزره اولوب اسكى تورکمنلرک اصولى جارى در.

هر دوره سي بر سلسله عشق و جنون در
هر بر دره سي طولمش انک اشک ايله خون در
هر گوشه سي بيک مدفن ارباب قنون در
اقطاره بتون منتشر اذکار اماسيه

اماسيه نك هر طرفى برر سلسله جبال ايله محاط و مستور
اولوب ارباب عشق و غرامک مسيره سي و هر طرفده برر
مجنوب الهى مقرى اولدينى مشهوردر. مثلاً شمال بوغازنده

(تکیر طاغلی بابا) نك و جنوب بوغازنده (خاص بابا) نك و شرق طرفنده (عبدالرحمن بابا) نك و غرب طرفنده (ممی دده) نك مكنلری واردر . اماسیه نك ایچنده اوچ دره موجود اولوب برنجیسی (صاواچه دره سی) ایکنجیسی (چقاللر دره سی) اوچنجیسی (قره قیسا دره سی) در . بو دره لرك اك مدهشی چقاللر دره سی اولوب سیل اغزنندن ایرماغه اینر . بو دره ، پك چوق مهلك قضالره باعث اولمشدر .

۱۲۷۱ ده نزول ایدن باران شدید متعاقب دهشتلی بر سیل اینهرك اوزرنده بولونان کوریلری ، خانه لری هدم ایدوب اوکنه قاش و اوافق قبه کی طاشلردن برنی سیل اغزینك جهت غربیه سنده اولان سنان حمانك قبه سی اوزرینه براقوب پك چوق حیواناتی ، عربهلری ، کراسته لری ، انسانی ایرماغه دوکمشدر .

بو حمانك اوزرنده قالان طاشی ، پك چوق کیمسه لر اوغراشه . شهرق کال مشکلات ایله ایندرمشلردر . بو حمام ، خضر پاشانك عتقاسندن اسبق سیواس بکربکیسی سنان پاشا طرفندن ۹۱۷ ده بنا ووقف ایدلشدر . بودره ایاغی ایرماق اوزرنده بولونان شوسه یولنه تصادف ایتدیکندن مخاطره سی دائم اولدینی نظر دقتی جالب اولماقلا ۱۳۲۵ ده اماسیه متصرفی (احمد جودت بك) شوسه یولنك الته برتونل انشاسیله دره نك ایاغنی شوسه یواندن قطع ایشدر .

اکثر بلاد اسلامیة جاری اولان عادت اوزره امامیه نك هر
کوشه سنده پک چوق اولیا ، علما ، صلیحا ، مشایخ مدفون
اوله رق اطرافی مزارستان اولوب معتنی موقعلرنده وزرا ،
امرا ، قضات بنامک مدفون مخصوصلری و پک چوق اولیای
کرامک تربۀ مخصوصه لری اولدیغندن بو تربه لر ، حروف هجا
ترتیبی اوزره ذکر اولنور .

(آق بیلک تربه سی) قرمان طاغ نك اتکنده باغ لرك
اوزرنده بر ترلا کنارنده اولوب اوراده منلا بخشنی خلیفه
حضر تلی مدفون در . مشاهیر فضالان خلوتی بر پیر مفسر
ایدی . زیارتگاه علمادر .

(آلا کوز بابا تربه سی) شاملر مزارلنی کنارنده یول اغرنده
غایت اسکی بر تربه در . بو تربه ملوک دانشمندیهدن (اسماعیل غازی)
بکه منسوب اولوب شکلی ، طرز انشاسی التنجی قرن هجری
آثارندن اولدیغنی ارا نه ایتمکده در . ۸۰۷ ده بنام و (آلا کوز)
دیمکه مشهور (الشیخ شمس الدین احمد بابا) اورایه دفن
ایدلیکی مناسب تله (الا کوز بابا تربه سی) دینمشددر . بو تربه ده
ملک مشارالیه (اسماعیل غازی) نك مدفون اولدیغنه دائر
عنعنات منقولهدن ماعدا دلائل وسائر آثار محکوکه بولنه مدی .
(ابواسحق چلبی تربه سی) قلیج آرسلان یعنی طورمطای
تربه سی صره سنده آچیق بر باغچه دروننده اولدینی خبر
ویرلمکده در . اوراده کوریلن ایکی قبرک بری (قتلو پاشا)

دیگری ده مخدومی (ابواسحق چلبی) اولوب وقفیه سی ابواسحق چلبی طرفدن تنظیم واجزا وقف ایدلمشدر . بونلر امرانددر . جز خوانلری واردر .

(اسکندر ممی چلبی تربه سی) اوچلر تربه سنک قارشوسنده کائن مزارلغک بر گوشه سنده کارگیر ، اوافق بر تربه اولوب دروننده قتلوبک زاده (ممی چلبی) دیمکله مشهور (محی الدین محمد چلبی) ومخدومی (اسکندر چلبی) مدفون در . تربه نی یابان ووقفیه سنی تنظیم ایدن (اسکندر چلبی) در . بونلر ده امرانددر . (افرومیه بانو تربه سی) کوک مدرسه جامع شریفنک اوست طرفنده کائن بر تپه اوزرنده در . اوستی طام واطرافی کر بیچ دیوار ایله محاطدر . دروننده اماسیه ده بیزانس ایمپراطورلغک صوک والیسی اولان ژوتاتئوسک قیزی واماسیه فاتحی ایلتکین غازینک حلیله سی اولان (افرومیه بانو) مدفون اولدینی عنعنات محلیه دندر مخدومی (امیر حسام الدوله حسن غازی) طرفندن اوقافی وجز خوانلری اولدینی وثائق شرعیه ده کورلمشدر . (تاریخ آل دانشمند) ده بوجاهده نک غزاسی ، حکایاتی مذکوردر .

(امیر امام تربه سی) سلطان بایزیدک مکتبی قارشوسنده کائن کتبخانه نک جهت شمالیه سنده باغچه ایچنده در . دروننده کتبخانه صاحبی خواجه زاده امیر امام (عبداللطیف افندی) واولادندن (السید سعده افندی) و (السید خلیل افندی)

و (السید ابوبکر افندی) ایله وزرادن اسبق کردستان والیسی
(بسیم پاشا) مدفون در .

(انبارلی اولیا تره سی) شیخ قریق محله سنده کائن بر خانه
درونده در . تره دینیلان یر ؛ قیونک اتصاانده اوزری دوز
اولوب انبار شککنده بر حقور ایچنده در . بو تره تمامیه یرک
التنه غائب اولمش کی بروضعیتده اولوب حقورک ایچنه اینلمدکجه
اوراده تره اولدیغی اصلا بیلنه من . حقوره اوفاق بر اغاج
مردیون ایله اینلیر . تره نک قیوسی اوفاق اولوب اکیلمدکجه
کیریه من کیرلکده قبه سی بکتاشی طاقیه سی شککنده اولوب درت
کوشه لی اوفاق کارگیر براوطه مشاهده اولنور .

اوطه نک اورته سنده اوزری اسکی بر یشیل اورتو ایله
مستور غایت اسکی بر تخته اوزادلمش اولوب بو تخته نک
اوزرنده پارچه ، پارچه انسان کیمکلی سرلمش اولدیغی
کورونور بو کیمکلی ایچنده پارچه نهمش بر کیمکه تصادف
ایدیه من قول و باجاق و بیلک کیمکلی کسکین بر آلت قاطعه
ایله کیلمش کی بر وضع کوستر مکده در . خانه صاحبی بیه
بو کیمکلی کیم اولدیغی یعنی بو تره ده مدفون اولان ذاتک
کیم اولدیغی اصلا بیه میور .

تره نک شو حال مکتومانه سی و کیمکلی شو وضع مکسورانه سی
۶۳۷ ده اماسیه ده دعوی نبوت ایدن مشهور یلانجی پیغمبر
(بابا - حاق کفر سودی) تره سی اولدیغی اخطار ایتکده در .

باب اولده تفصیل اولسه جنی اوزره بابای مرقوم
(اسحاق کفر سودی) دعوای نبوت ایدره رك عصیان واماسیه
وتوقاد و سیواس سنجاقلرینی استیلا ایلدکده (مبارزالدین
ارمغانشاه) مقابله واماسیهده محاصره ایتمشدی امیر مشارالیه
مرقومی صومعه سننده اخد و گرفت و صلباً اعدام ایدوب
لاشه سنی تفسخ ایدیجیه قدر دار اغاجنده کونشك قارشوسنده
طوردرمش وبعده ایندیروب پارچه لتمش و بابانك اتباعی ده
کیمکیرینی کیجه طوپلایوب صاقلامش اولدقلری توارینخده
مسطوردر . شو حادثه ایله تربه نك احوال ووضعی واوراده
مدفون اولان انسانك کیمکیری تأمل اولنورسه بو تربه بابانك
اتباعی طرفدن قصداً یر آلتنده بنا و بابانك کیمکیرینی زیارت
ایچون بورایه دفن وخلقندن اخفا ایتدکیری فیکری حاصل
اوله مق قابل دکلدر .

مقدما یر اوزرنده یاییلدیغی حالده مؤخرآ اماسیه نك سطحی
طولوب یر التنه کومولمش اولدیغی ادعا ایدیله مز . چونکه
اوجوارده بولوب ۶۲۲ ده بنا ایدیلن خلقت غازی تربه سی
و ۶۷۷ ده بنا ایدیلن (طورمطای تربه سی) غایت یوکسك اوله رق
طورییور . بونلرك اوست طرفنده ۵۴۰ حدودنده بنا ایدلدیکی
ظن ایدیلن (خانقاه مسعودی) خراب اولدیغی حالده تمیل دیواری
حالا یر اوزرنده عرض اندام ایتکده در .

شمدی یه قدر خواص وعوامك او تربه یی زیارت ایتسی

واوزرنده قبه بولنسی ؛ دروننده مدفون اولان کیمسه نك ولی ،
 صالح اولدیغنه دلالت ایلدیکی ومشهور یلانجی پیغمبر اولمدیغی ده .
 ادعا ایدیه من چونکه تربه نك یر التنده غایت مخفی بر صورتده
 یاپیلمسنده بر مجبوریتم اولمدیغی کبی هر قبه صاحبی ده ولی اوله من .
 ثروت وسامانی دوزکون اولان کیمسه لر ، نامنی دنیاده ابقا
 ایچون محتشم تربه لر بنا ایتشلر در . بعده ایچنده مدفون اولانلرک
 ترجمه حالی اونودلش اولدیغندن شریعت اسلامیه نك امر ایلدیکی
 اوزره حسن ظن ایدیه لرک تربه لری خواص و عوام طرفندن
 زیارت ایدلمکده در . (رب قبر یزار وصاحبه فی النار)

(اوچلر تربه سی) اوچلر محله - نده سعدی چلبی جامع شریف نك
 غرب طرفنده کائن عیسی افندی زاویه سی قارشوسنده بر خانه
 دروننده در . اوراده نیکده لی زاده (صوفی بازید چلبی)
 وعموجه سی (فیض الله چلبی) و (یعقوب چلبی) و (ایران
 خاتون) بنت علی بك موفونلر در . بونلرک ترجمه حالی و کتابه سی
 باب ثانی ده ذکر ایدیه جکدر .

(اوروج بك تربه سی) خضر پاشا جامعی حظیره سنده در .
 پاشای مشارالیهک دامادی اولان قاسم بکک مخدومی اولوب
 کنديسندن مقدم وفات ایتدیکنندن متأثر اوله رق ۸۷۰ ده تربه
 یاپدرمش واجزا وقف ایتشد .

(اهلی خاتون تربه سی) میدان کوپرسی باشنده کائن
 مدرسه نك ارقه طرفنده زاویه اوکنده در . خاتون مومی الیه

اماسیه امیری شاد کلدی پاشا زاده دواتدار (احمد پاشا) نك
كریمه صالحه سی در . ۸۷۱ ده تربیه و تمه سی بنا و اوقاتی تنظیم
ایتمشدر . تربیه حاوی اولان حیره هدم ایدلمش اولدیغندن
قبری اچیقده قالمشدر . کتابه سی یوق ایسه ده وقفیه سنده تربیه سی
مذکوردر . قادینلرک زیارتگاه مشهوری در .

(ایبک بابا تربیه سی) شیخ قریق محله سنده خانقاه مسعودی
خرابه سی جوارنده کائن برخانه نك باغچه سی ایچنده در . اوراده
تاتار حکمدارلری اباقا وارغون خانلرک زماننده نفوذ و اقباله
مالك اوله رق پروانه بلك اعدامنه باعث و طریقت بابائییه نشره
خادم اولان (صدرالدین ایبک الترکانی) و خلیفه سی (احمد بابا)
مدفون بولتمقده در .

(ایگرلی اولیا تربیه سی) یورکیچ پاشا عمارتی شرقنده کائن
اوافق مزارلغک دروننده شرق طرفنک اورته سنده بیوکه
ایکی دوغوم اغاجنک اراسنده در . اوراده مربع اوله رق خصوصی
ایگر شکلنده یاپدیرلمش برطاش مشاهده اولتمقده در . بوطاشک
التنده کیمک مدفون اولدینی ا کلاشیله مدی . انجق (العیلم
الزاهر) ده کوریلن برحکاییه اخطار ایتک اوزره اورایه
برطاش قوندینی ظن اولنور . (العیلم) ده مصطفی جنانی
افندی دیورکه : « حلب حکمداری سیف الدوله نك عمزاده سی
(ابو فراس الحارث) حکمدار مشارالیهک نزدنده مکرراً
اماسیه قلعه سنه هجوم وصولت ایدرهک اشتهار ایدوب برهجومنده

قلعه بالانك يوكسك يرنده روملر طرفندن محاصره وتضييق
ايدلمش واسير اولمسنه رفق قالمش ايكن راكب اولديني حالده
آتيله برابر كنديني ايرماغه طوغرى آتمش ، آتى ايرماغك
كنارينه دوشوب اولمش و كنديسى بعون الله تعالى خلاص
اولمشدر . « العلم عندالله »

(ايكنه جي زاده تربه سى) قوجه جق محله سى او كنده
چارشو اپچنده برتربه مخصوصه در . اوراده شيخ ز كرايى
خلوتى خلفاسندن ايكنه جي زاده (الشيخ صفى الدين محمود
خلوتى) حضرتلى مدفون در . تربه نك اولديني دائره قديمه
محكمه اولوب اماسيه قاضيلرينك سكناسنه موقوف وسنوى
اجارات موقوفه سى بوتربه مخصص ايدى . چونكه : بوخانه ي
شيخ مشاراليهك حفيده سى (عايشه خاتون) تربيه وقف
وحكام ومحكمه يه تخصيص ايتمشدر .

۱۳۱۱ حريقنده تربه و خانه ايله برابر سجلات قديمه نك
بر قسم مهمى يانديغندن اماسيه معارف قوميسيونى بغير حق
قوجه مان عرصه قيمتدارى ضبط ويرينه عقارات مهمه انشا
ايدهر ك بردانه جك دكانى بيله تربه ايچون براقه مشدر . فقط
شوقوميسيونك رئيس و اعضالرينك اوغرا دينى احوال ؛ تدقيق
اولنورسه غصب موقوفاتك برمكافات دينويه سى اولديني ظاهر
اولور .

(ايلتكين تربه سى) ايلتكين باغلرينك اوستنده طاغك

اتکنده در . درت دانه طاش دیرک اوزرنده مخروطی برقبه
سنگین در دروننده وزرای دانشمندیهدن (ناصرالدوله ایلتکین
الارتقی) ومخدومی امیر (حسامالدوله حسن غازی) مدفون
اولوب قدیم هر سنه شعبان اوائلنده جم غفیر ایله زیارت اولتور
ایدی .

(اینکلر تربهسی) محمد پاشا عمارتی اوکنده یول اوزرنده
ودغراقیه مدسه سنک اتصائلنده کائن در . تملی ویان طرفلری
غایت متین، غریبه طوغرو اوزون برتبه سنگین اولوب اوزری
بالق صرتی شکلنده کارگیر برقبه ایله قبالی در. دروننده امرای
سلجوقیه دن اماسیه والیسی (نورالدین طغرق) ومخدومی
(شمس الدین اینساج) وحفیدی (عزالدین بلبان) و دیگر
احفادی مدفون در. (اینساج تربهسی) دیمکله مقید ومعلوم ایکن
اوراده مدفون اولان اینساج بکک و اولادینک کیم اولدقلری
اونودلش وسلامت خاتونک جوارنده بولنش اولدینی، حکایه عجیبه
معلومه نك تصنیع ایدلسنه باعث اولقله سلامت خاتونک اینکلری
فرض ایدلش واینکلر تربهسی دیمکله مشهور اولمشدر .

السنة عامه ده دوران ایدن حکایه عجیبه شودر . « کویا نوح
علیه السلامک بد دعاسیله طوفان اولدینی اتاده بنی مشارالیه
ایمان ایدوب طوفاندن خبری اولمیان خاتونک اینکلری یاغمورک
یاغمدینی بر کونده ایاقلری و دیز قیاقلری یاش اولدقلری حاله
کلرینه شاشوب اسبابنی صورمش وطوفانک وقوعنی خبر

آلديغده اينكلرك هلاك اولدقلرينه وكنديسنگ سلامتده
قالديغنه حمد و ثنا ايدوب كندينه سلامت خاتون ديمش
وكندي تربهي جوارنده مبارك اينكلري ايچون بر تره
ياپيلوب (اينكلر تربهي) ناميله مشهور اولمشدر .

شو حكايه عجيبيهك يالان اولديغي ميدانده اولوب بر طاقم
صافدلانك ايناندقلرينه شاشماق قابل دكلدر . بو (ايناج
بك) يدنجي (وسلامت خاتون) دخي طقوزنجي قرن هجري
رجال ونساسندن اولدقلري حاليه ايناج واولاديني اينكلر
فرض ايدوب سلامت خاتوني ده نوح عليه السلامك دورى
بقاياسندن اولديغنه قناعت ايتك قدر كوانچ بر شي يوقدر .
بونلرك باب ثاني ده مسطور اولان تراجم احواله مراجعت
بيورولورسه بو حكايهك درجهسي اكلاشيلير .

(بكتاش بابا تربهي) اشاغى پيرلرك غرب شاليسنده
تكيه مدرسهسي اتصالنده اولوب كاركير برقبهيني حاوى حجره
مخصوصه در . دروننده بكتاشيلردن قيرشهرلى (بكتاش بابا) مدفون
اولوب باش اوچنده (الحاج بكتاش باباي ولى) لوحهسي
واردر . پير اشيكنى زيارت ايلديكى مناسبتله حاجى ديمشدر .
اماسيه قراسنده مسكون فرقه علويه طرفندن ۱۲۸۴ ده
ابتدا بر تره انشا ايديلوب ۱۳۱۴ ده ينه قرا علويهسي طرفندن
تعمير ايدلمشدر . علويلرك زيارتگاهيدر .

(پروانه لر تربهي) پروانهك جامع شريفك شرق طرفي

منتهاسنده اولوب اوزرى تخته پرده ويانلرى پرمقلىق ايله محافظه آلتنده بولمقده در اوراده وزراى سلاجوقيه دن جامع شريف بانيسى (نجم الدين فرخ) و واقفى (عز الدين محمد پروانه بك) و اوغللىرى (ناصر الدين احمد پروانه بك) و (علاء الدين على پروانه بك) مدفون اولدينى محقق و (معين الدين سليمان پروانه بك) مدفون اولدينى مشكوك در .

(پير الياس تربهسى) بكلى سر اينك طرف غريب سنده كاڭن مزار لغنىك باشنده بر تپه جك اوزرنده اولوب محتشم ، على بر تربه در . ابتدا كومشلى زاده (احمد پاشا) طرفدن بر حجره اولمق اوزره بنا ايديلوب ۸۹۰ ده سلطان بايزيد خان ثانى طرفدن كاركي واورته سنده بيوك بر ويانلرنده اوفاق ايكي قبه اوله زق انشا و غرب طرفى رجاله و شرق طرفى نسايه مخصوص مسجد شريف واورتهسى تربه اتخاذايدلمش و مرزيفونده ايكي قريه بو تربه شريفه وقف و توليتى پير مشار اليهك احفادندن (پير خير الدين خضر الخلو تى) حضر تلىنك اولادينه تخصيص بيورلمشدر .

درونده كومشلى زاده (پير شجاع الدين الياس الخلو تى) و دامادى (پير جلال الدين عبدالرحمن چلبى) و حفيدى (پير خير الدين خضر چلبى) و آياق طرفلرنده بونلرك حليله و كريمه لرندن درت خاتون مدفون اولدينى مناسبته (پيرلر تربهسى) دينوب بونلره يوقارى پيرلر دينور . بو تربيه يى متوليسى اولان

حضرت پيرك برادري اولادندن كومشلى زاده (ابراهيم پاشا)
دخى ۱۱۰۰ ده مجدداً تعمير ايتدرمشدر . عمومى بر زيارتكاه
مسلمين در .

بعده مكرراً زلازله معروض اوله رق اطرافه وهن طارى
اولدينى نظر دفته آلتوب ۱۳۱۲ ده تماميله هدم ايدلمش
وقول آغاسى خورشيد بكك غيرتى و عموم اهالى محليه نك
اعانات نقديه سى و سلطان مخلوع عبدالحميد خانك دخى اوقافندن
مقدار كافى مبلغك اعطاسى سايه سنده اطرافنده كائن مزارلغك
اوستى تسويه و بردارء جسيمه تشكيل واورته سنده اسكى وضعيتى
محافظه ايدلمك صورتيله يان طرفلرى رجال ونسايه مخصوص برر
مسجد شريف واورته سى تر به اتخاذ و حجره و مسجدلر توسيع
وقبله لرى برشكل و جسامتمده ترفيع ايدلمش و غايت منتظم بر صورتده
ياپيلمشدر . اسكى تر به نك شمالنده كائن غرب پنجره سى او كنده
كبار امتدن برقاج ذاتك مدفنى اولدينى حالده يكي وضعنده بونلر
تسويه اولتوب اوزرينه تر به داره مخصوص اوطه ياپيلمش
وشمديكى تر به نك قبله طرفى عمومأ باغچه اولمشدر . فقط بو
باغچه يى اعمار ايدرك باغچه حالنده محافظه ايدلمسى پك مناسب
اولدينى حالده اعيان و اشراقك مدفنى اولمى روادكلدر . اسلاف كرام
قبله طرفه غايت اعتنا ايدرك باغچه حالنده بولندرملرى و ديوار
ارقه سنده اولسه بيله مزارلغه قارشو نماز قيلمق خصوصنده
احتياطه رعايت ايتدكلرينى اثبات ايتمكده ايكن ، اخلافك بوكي

اینبه لکله دقت ایتیمه رک اسلافک هر مسلدکلرینی ترک ایتلمی
بزی پک فنا بریوله سوق ایتشلردر .

(پیر سنان تربه سی) شهره کوسدی محله سنک یوقاری سنده
کائن یولک اوزرنده بر موقع مخصوصدر . اوراده رجال خلوتیه دن
واعظ مشهور (پیر سنان الدین یوسف افندی) مدفوندر .
تربه سی زیارتگاهدر .

(پیر عبدالرحمن چلبی تربه سی) یعقوب پاشا یغنی چله خانه
دائره سی ایچنده وقفیه ده مسطور اولان حجره مخصوصه در .
قبله طرفنده بولونان فاتحه بنجره سی حجره نك تاریخ بناسندن
صوکره آچیلمش و اوزرنده کتابة بی حاوی سیاه مرمر
قونمشدر . دروننده قبا اولیاسی پیر حسام الدین خلوتی مخدومی
وحضرت پیر الیاس خلوتی حفیده زاده سی (پیر جلال الدین
عبدالرحمن ثانی) مدفوندر . بورایه (اشاغی پیر تربه سی)
واشاغی پیرلرده دینور .

(پیر محمد چلبی تربه سی) سیل اغرنده کائن صیغیر
پازاری جامع شریفک غرب طرفنده اطراف دیوار ایله محاط
اوافق بر حظیره ایچنده در . اوراده جامع شریفک بانسی (پیر
خواجه الحاج محمد چلبی) وحلیله سی (قر خاتون) مدفون
اولدقلری سجالاً مضبوطدر . مصطفی واضح افندی دفتردار
مشهور اسکندر چای نك پدری محمد چلبی بوراده مدفون .

اولدیغنی یازیور ایسه ده اسکندر چلبی نك پدری موسی چلبی
اولدیغنی قیداً مثبت در .

(تاج الدین تره سی) پیر الیاس حضرتلرینک تره سی
جوارنده مسدس شکلنده سنکین محشم و اوافق بر تره در .
هر طرفی سیاهه مائل طاشدن مصنوع و هر ضلعی محشم و قبه سی
قوشاغی (دائراً مادر) چیچکلر ایله مزین اولوب اوزرنده
بعض آیت محکوک در . دروننده اماسیه امیری کومشلی زاده
(تاج الدین محمود چلبی) و حلیله سی (دوندی خاتون)
و کریمه سی (عایشه خاتون) مدفون اولوب وقفی (عایشه خاتون)
طرفدن ترتیب ایدلدیکی قیداً معلوم در . دعوای تولیت ایدن
بعض ذواتک بورای (قدم پاشا تره سی) اولمق اوزره کوسترمسی
قدم پاشا تره سنک موقعی اونوتدیغنی آ کلا تمقده در .

(تکیر طاغلی بابا تره سی) صولی اووایه ناظر بوغاز
ایچنده غرب طرفنده کاشن باغلرک اوستنده برصرتک اوزرنده در
کبار مجاذیب الهیه دن عیدی زاده عاکف مصطفی افندی یه
معاصر تکیر طاغلی بابا دیمکله مشهور اولان ذات اوراده
مدفون در . بوذاته پک چوق غرائب اسناد ایدلمکده در .

(تیمارخانه اولیاسی تره سی) پروانه بکک دارالشفا سی
دروننده شرق طرفنده جنوب گوشه سنده حجره ایچنده در .
اوراده پک چوق دایلمری انفاس مبارکه سیله افاقیب عقل

و شعور ایدن شاملر شیخی مشهور (صالح افندی) حضر تلی
مدفون در . بوکا (صالح بابا) ده دینور .

(جمودار تربسی) بورمه مناره جامع شریفك او كنده
مناره حذا سنده اولوب قپوسی جامع شریفك بناسندن اوچ سنه
صكره سیاهه مائل طاشدن بنا ایدلمشدر . تربنهك شكلی تاج الدین
تربسی کی مسدس [۱] واولدقچه محتشم اولوب درت ربی
جامع شریفك خار جنده در . دروننده تحتانی و فوقانی اولمق اوزرم
اوافق ایکی حجره سنکین اولوب تحتانی ده واقع حجره ، تربه
و فوقانی ده واقع حجره دخی کتبخانه اتخاذ ایدلمشدر .

تحتانی سنده کائن حجره ده بعضیلری یکدیگری اوزرنده سکر
تابوت اولوب اوزرلری یشیل اورتویله اورتولمشدر اوک طرفده
بولونان ایکی تابوتك ایچنده جسدی تام اوله رق عرب ظن
اولونان ایکی میتة واردر . دیگرلرینك اعضاسی تام اولمیوب
کیمیکلری هیئت اصلیه سیله طور مقده اولدقلری کورلمکده در .
بونلرك کیم اولدقلری اماسیه جه مجهول اولوب مصطفی واضح
افندی بونلر ، پروانه بکک کوله لری و جاریه لری اولدقلرینی
واوروپا مدققلری ده قرون اولی دن قالمه جسدلری مومیا ایدلمش
آدملر اولدقلرینی یازیورلر بونلرك هر ایکسی ده تخمینا تدن
عبارت اولدیغی شه سزدر .

[۱] بواکی تربی زیارت ایدنلر ، تدقیق نظرایدرسه شکلا و حجما
هرایکی تربه اراسنده بر مشابیه تامه اولدیغی کوریرلر و بونلرك یا معماری
بر آدم یا خود قاین پدر و داماد اولدیغنه حکم ایدرلر .

فقط اجرا ایدیلن تحریات قیودیده بوتربه تاتار حکمداری
هلاکوخانک حفیدی اناطولی ناظری شهزاده (جمودار) بن
یشموت بن هلاکوخانک تربه سی اولدینی محقق وزدنده اماسیه
امیری ایشقای (ایشبوغانوین) مدفون اولدینی اکلایشلمشدر.
بونلرک یاننده واک طرفده بولونان تابوتلرایله دیگر ایکی تابوت
مقدما فتحیه جامع شریفنک التنده مخزن ایچنده ایکن ۱۲۷۱
حدودنده بورایه نقل ایدلرکرنی بیلنلر ایوم موجوددر.

معین الدین سلیمان پروانه بکک تاریخ شهادتی اولان ۶۷۵
سنه سنده هنوز جامع شریف بیله یاپیللمه مش اولدیغندن کوله و
وجاریه لرینک بورایه دفن ایدلمسی واوزمان بونلر ایچون قوجه
برتربه یاپیللمسی شایان قبول اوله مز و قرون اولی مشرکلرینک
برجامع شریف التنده شمدی به قدر محافظه ایدلمسی قبول ایتمکده
حسیات اسلامیه ایله قابل توفیق دکلدر. کلیسای جامع شریفه
تحویل ایدن (فتح غازی) و اوغلی (محمود غازی) لرک وحلیله
لرینک، یاخود کریمه لرینک جسدلری اولمسی دها زیاده معقولدر
(چلبی اوغلی تربه سی) خواجه سلطان جوارنده تقسیم
اوکنده اوزون یول مزارلغنک باشنده بر موقع مخصوصدر. اوراده
رجال خلوتیه دن (چلبی خلیفه) دیمکله مشهور جمالی زاده
جمال الدین محمد چلبی حضرتلرینک مخدومی خواجه سلطان
تیکپه سی شیخی (بدرالدین محمود چلبی) حضرتلری مدفون
وزیارتکله مشهوردر.

(حاجی حمزه افندی تربه سی) بازید پاشا محله سند کائن
 حاجی حمزه افندی جامع شریفنک شرقاً اتصانده اولوب جسم
 برقبه بی حاوی بیوک بر حجره در .

جامع شریف ایله بوتربه اراسنده بردمور پرماقلق اولوب
 دروننده کبار مشایخ خالیه دن (قرا باغی الحاج حجره نکاری
 ول حضرت تلی ویاننده مخدومی (سراج الدین اسماعیل افندی)
 وبونک یاننده خلفادن (میر حسن افندی) مدفونلردر .

(حاجی حمزه بك تربه سی) حاجی حمزه بك محله سی اورته -
 سنده حاجی حمزه بك مسجد شریفی اتصانده کائن باغچه
 دروننده در . بوباغچه ایچنده امرای عثمانیه دن (الحاج حمزه بك)
 ومخدوملری (احمد ، محمود ، قاسم) بککرم و مشاهیر علمادان
 بالی بك زاده (عبدالرحمن چلبی) مدفون اولدینی خبر ویرلدیکی
 کبی خواجه سلطان اوزرنده برباغچه ایچنده اولدقلری ده سو -
 یانمکده در . لدی التحری بالی بك زاده عبدالرحمن چلبی مسجد
 شریف باغچه سنده اولدینی سنک مزارندن اکلشلمش و دیگرینه
 دائر بر کتابه کوریه مه مشدر .

(حبیب قرامانی تربه سی) محمد پاشا جامع شریفنک شرق
 طرفده کائن محمد پاشا تربه سنک باغچه سنده موقع مخصوص در .
 اوراده کبار مشایخ خلوتیه دن (الشیخ حبیب قرامانی) ویاننده
 خلفادن (سیدی احمد خلیفه) وبونلرک غرب طرفده (الشیخ

حسن افندی) وبونك شالنده محمد پاشا وقفي متوليسى قورد
بك زاده (محمد بك) مدفونلردر .

(حسين دده تربهسى) چريباشى محلهسنده جامع شريفك
شرق جنوبى طرفنده كائن باغچهك غربنده يول اوزرنده
بر موقع مخصوص در . اوراده كبار خلوتيه دن و اعظ مشهور
(الشيخ حسين افندی) ومدرس (مصطفى افندی) وبونلرك
شرق طرفنده محرر عاجزك والدهسى (زاهده خاتون) وبرادري
(حافظ خليل افندی) وهمشیرهسى (فاطمه خاتون) مدفونلردر .
(حلقهلى دده تربهسى) چريباشى محلهسنده شهره كوسدى
محلهسى اوكنده يالكز بر موقعده اولوب مريع درت طاش
ديرك اوزرنده مخروطى برقه در اطراف ثلثهسى باغچه وجنوب
طرفى يول اولوب بر ديوار ايله محاط در . دروتنده اماسيه
اميرى شاد كلدى پاشا احفادنن شادى بكك كريمهسى (سارو
خاتون) مدفون اولدينى باش طاشنده وقبله ديوارنده موضوع
طاش اوزرنده محكوك در .

بو تربهك اورته يرته صندوقهسى اولوب آلتى سارو
خاتونك جسدىنى حاوى بر محزن در او محزن تربهك جسماننده
اولوب اورته يرته اوستى اچيق تابوت ايچنده جسد موجود
وجزئى صارارمش كوريلن كفك ايچنده ، بلا تغير تام
اولدينى حالده مشاهده اولمقده در . صندوقهك شالنده مستطيل
پر صورتده سياهه مائل ، يكديكرينه مقابل ايكي طاش اولوب

کنارلرنده ایکیشر دمیر حلقه واردر . بودمیر حلقه لری حاوی
 طاشلر؛ مخزنك اغزنده اولوب ایجاب ایلدیکی تقدیرده بو حلقه لره
 طاشلر طوتولوب قالدیریلر و مخزنك اغزی اچیلر بو حلقه لره
 یورومین چوجقلرك ایقلری اوچ هفته جمعه ایرتسی کونلری
 طاقیلرسه باذن الله تعالی یورورلر اعتقادی ، راسخ اولدیغندن
 قادینلر طرفندن بو حلقه لره نسبتله سارو خاتونه (حلقه لی دده)
 نامی ویرلمشدر .

(خلفت غازی تربه سی) شامیجه محله سنده غازی مشارالیه ک
 مدرسه سی اتصالنده برتبه عالیهدر . هر طرفی طاشدن مصنوع
 وجنوبه ناظر اولان جبهه سی قبارتمه چیچکلره مزین قپوسی
 اوزری غایت مصنع ، فوق العاده یوکسک وقبه سی اهرام مصریه
 کبی مخروطدر . قپوسنك اوستنده کنیش بر قوس ایچنده
 مزین ، خط کوفی ایله محرر بر کتابه سی اولوب ایه الکرسی
 مسطوردر . قپوسك دروننده غایت کرفت اوله رق یازیلان
 خط کوفی چیچکلر آراسنده یاپیلمش باشقه چیچك کبی
 کورلمکده اولوب قرائتی غایت مشکلدر . بوتربه نك ایچنده
 امامیه والیه سی (امیر مبارزالدین خلیفه آلپ) مدفون اولدیغی
 قپوسی بالاسنده محکوک اوله رق کورولمکدهدر . تربه نك
 دروننده طاشدن برصندوقه اولوب غربدن شرقه طوغرو
 قونمش مستطیل شکلندهدر . بوسندوقه نك جنوبه ناظر
 جبهه سنده قبارتمه اوله رق قیز وقیون قفالری واسکی تورکلرك

دائماً قوللاندقلىرى اشكال مخصوصه واردر . بو قفالرى
واشكال مخصوصه يى كوروبده حقيقت حاله واقف اوله ميانلر ؛
بو تر به نك مشر كلر دورندن قالمه يا خود هجرتدن اول خرستيانلره
عائد اولديغنى درميان ايتمكده در .

فقط اسكى توركلرك اسكى عادتلرينى بيان ارباب مراق ،
بو قفالردن واشكال مخصوصه دن مقصد نه اولديغنى كال سهولته
آكلارلر مدرسه سنك قپوسى اوزرنده (مبارزالدين خليفه بن
تولى) ناميله محكوك و ۶۲۲ تاريخلى وقفيه سنده مسطور اولان
امير مشاراليه اشكال مخصوصه نك دلالتى اوزره نسباً (قانق ،
قنق) قبيله سندن اولوب قيز وقيون قفالرينك دلالتى اوزره
والده سى طرفندن (قيونلى) قبيله سنه منسوب در . [۱] شو
اشارانه وقپوسى اوزرنده كوريلن محكوكاته واقف اولسه بيله
بو تر به نك طرزىنى ، صندوقه نك وضعى تدقيق ايدن برذات ،

[۱] اسكى توركلر ؛ صويلره (انسابه) ، قبارلره (شعوبه)
واو يماقلره (قبائله) پك زياده رعايتكار ومربوط اولدقلىرى
داردندان كيتيدكلى حالده بيله هانكى صويه ، هانكى اويماغه
منسوب اولدقلىرى اكلاتمق اچون عادت قديمه لرى اوزره قوللاندقلىرى
اشكالى واو يماقلرينك آذربى كوسترن صورتلى تر به لر ينك قپولرى
ياخود صندوقه لرى اوزرنده حك ايتديرمكده مسلم اولدقلىرى حالده
بر باس شرعى كورمديكلى اكلاشلمقه در . اناطولى بلادنده تحريات
اجرا ايديليرسه بونك پك چوق امثالنه تصادف ايديله چكى محقق در .

بورانك بر مسلم تربه‌سی و آثار بلیجوقه‌دن اولدیغی ا کلامقدمه
مشکلاته اوغراماز. [۱]

(خواجه سلطان تربه‌سی) دارالسلام محله‌سنك اوستنده
وتقسیم اوکنده شرقه کیدن یولك ایلریسنده بر موقع مخصوص در.
اوراده زاویه مشهوره و عمارتی بنا ایدن (خواجه سلطان)
دیمکله مشهور ، تجارندن (شمس الدین احمد چلبی) مدفون
اولدیغی کمال مشکلات ایله برارمنی خانه‌سنده بولونان سنك
مزارندن ا کلاشلمشدر .

(درسی تمام تربه‌سی) قوش کویری باشنده دره‌نك غرب
طرفنده بر حجره مخصوصه در. مقدما اوستی آچیق و درت دیواردن
عبارت ایکن ۱۳۱۴ده امامسه تحریرات مدیری اولان استانبولی
(محمد مظهر بك) اوستی قبالی منتظم بر حجره مخصوصه اوله رق
تعمیر ایتدرمشدر . دروننده مدفون اولان ذاتك کتابه‌سی
اولمادیغی جهته (درسی تمام) دیمکله مشهور مفتی زاده (الحاج
عمر افندی) اولدیغی یدی سنه قدر تحریرات نتیجه‌سنده ا کلاشيله
بیلمشدر .

(رجب چلبی تربه‌سی) حاجی الیاس محله‌سنده شوسه یولی

(۱) بو تربه ، خرسیتانلره عائد اولدیغندن و غایت یوکسك ، کلاه
کبی سیوری اولان قبه‌سی مشرف خراب اولوب محله اوزرینه بیقلمسی.
ملحوظ و غایت مخاطره لی بولندیغندن بمحله بلایه طرفندن هدمنه رمق.
قالمش ایکن محرر عاجز، امامسیه متصرفی (کمال بك افندی) یه ایضاحات
ویرمك صورتيله منعه موفق اولدم .

اوزرنده شهزادگان تربه سنك صره سنده غرب طرفنده مربع
برباغچه در. باغچه نك اورت سنده درت طرفی طاشدن واورته سی
طوپراق برقبر اولوب جنوب طرفنده ایکی قبر دها واردر طاش
قبرك صاحبی مشایخ کرامدن (ابراهیم بن علی الاشجع) اولدینی
محکوک اولوب بونك یاننده محله صاحبی (صدرالدین رجب چلبی)
وحفیدی مشاهیر علمادن (الحاج بیرام افندی) مدفون اولدینی
تبعاتدن اکلا شلمشدر .

(سلامت خاتون تربه سی) درسی تمام تربه سنك قبله طرفنده
یعنی جنوب غریب سنده و تخمیناً یکرمی متره قدر ایلی ریسنده بر
حجره مخصوصه در دروننده امامیه قاضیسی (منلا بکلك) دیمکله
مشهور (نظام الدین عبدالرحمن چلبی) نك کریمه سی فضلات
نسادن (سلامت خاتون) مدفون در . اینکله تربه سی ذیلنده
عرض ایدلیدی اوزره (طوفان نوح) زمانندن قالمه بر خاتون
دکدر . ۸۵۷ ده بنا ایتدردیکی زاویه سی ؛ شفیق پاشا طرفندن
بغیر حق تملک و باغچه یه تحویل ایدلیدیکنندن ضایع اولوب تربه سی
محافظه ایدلمشدر .

(سلطان مسعود تربه سی) یوقاری بازارك جانب غریب سنده
رجب و اوچلر محله لرینك اوکنی تشکیل ایدن و (نارلی باغچه)
نامیله مشهور اولان مزارلغك جنوب طرفندن جسیم وهر طرفی
طاشدن مصنوع ، غایت محکم ، غربه ناظر اولان جبهه سی عجیب
بر صورتده مصنع و شکلا مربعه یاقین مستطیل ، برتر به بدیعه در .

شالدين جنوبه طوغرو اوزون وداخلا اورتەسندە برکمر اولوب
ایکی قبه یی حاوی وخارجاً قبه لرك اوزری دوزدر .

تربه نك دروننده صندوقیه ویاخود شبکه یه دائر هیهچ بر
شی اولمیوب منتهاسنده یورکج باشانك ایکی کریمه سی مدفون در.
التي، تماميله محزن اولدینی نظر دفته آلنیرسه سلطان مشارالیه
ایله برابر بر قاج شهزادگان سلجوقك بوراده مدفون اولدینی
اکلاشیلیر. تربه نك وضعی بر متره قدریره کومولدیکنی کوسترمکده در
جبهه سنده ایکی یان ستونلری اوزرنده پك چوق ذواتك چیچك
ظن ایتدکلی کتابة موجود اولوب خط کوفی کرفت ایله
محرردر . یازیلرك اشاغیسندن اونده ایکسیسی مقداری یره
کومولمش اولوب قرائتی پك مشکل در . بو تربه دروننده
(سلطان مسعود سلجوقی) نك مدفون اولدینی محقق ایسه ده
دیگر شهزادگانك بوراده مدفون اولدقلرینه دائر بر علامت
یوقدر بو تربه مکرراً یانغینه معروض اولدینی جبهه سـنـك
سیاهلغندن استدلال ایدلمکده اولوب دروننده صندوقه نك یاخود
شبکه نك بوکی عوارض کونیه ده صنایع اولدینی شبهه سزدر .
ملوک سلجوقیه دن اماسیه سمیره سنده مدفون اولان برنجی (سلطان
مسعود) ایله حوضه سمیره سنده مدفون اولان ایکنجی (سلطان
مسعود) ک قبرلرندن قرائت اجزایه مشروط وموقوف اولان
اماسیه ده ای طوغدی، افته ، قوجه اوغلان وتاتار وحوضه ده

شیخ صاوحی، قباقلر، قوناج کویلیری اولدینی مقید و برنجی سلطان مسعودک نامی ستون اوزرنده محکوکدر .

ان افندی تربه سی (اوچلر تربه سنک جوارنده برخاز دروننده در. اوراده فحول علمادن شیخ الحرم و) تبیین المحارم) تفسیرینک مؤلفی (الشیخ سنان الدین یوسف الخلوئی) مدفون در. (شاد کلدی پاشا تربه سی) خلفت غازی مزارلغنک ایچنده اسکی برقبه محکمه در تربه نک غربه ناظر اولان جبهه سی تمامیه آچیق اولوب اوستی بالق صرقتی شکننده طاشدن یاپیلمشدر . شکنه ، طرزانشاسنه باقیلیرسه ملوک دانشمنده دورنده کی تربه لره پک مشابه اولدیغندن بوراده ملوک یاخود وزرای دانشمنده دن بری مدفون اولدینی اخطارایتمکده در بوراده (امیرسیف الدین سنقر بن طابوق) واورته سنده امامیه حکمداری (شمس الدین شاد کلدی پادشاه بن قوتلو) و بونک شمائنده کبار علمادن (سعیدالدین موهوب بن الزیاری) و عثمان پاشا زاده (حسین بک) و (اسی خاتون) مدفونلر در. بو تربه حکمدار مشارالیه ک یاپدردینی تربه اولمیوب کندیسندن ایکی یوزسنه یاخود دهازایده مقدم یاپیلمش اولدینی دروننده مدفون اولان ذواتک تاریخ وقاتلرندن ا کلاشلقمده در . [۱]

[۱] بو ذواتک مدفون اولدقلری برقاق سنه دوام ایدن تحریاتده ا کلاشیه بیلمشدر بوراده و سلطان مسعود تربه سنده حفریات اجرا ایدیلیرسه ده ا چوق ذواتک مدفنلری بولنه جفته شبهه یوقدر

(شروانی تربه‌سی) شاملر مزارلغتك اوستنده بردائره
 مخصوصه ايجنده لطيف بر موقعه در. تربه كار كيرا يكي قبه يي حاوی
 اولوب غرب طرفی مسجد شریف و شرق طرفی تربه در بوتربه يي
 صدر اسبق شروانی زاده (محمد رشدی پاشا) ۱۲۸۶ ده بنا
 و ۱۲۹۰ ده اوقافی تنظيم ایدوب دروننده پدری (الشیخ
 اسماعیل سراج الدین شروانی) حضرتلری و برادری صدوردن
 اسبق استانبول قاضیسی (السید احمد خلوصی افندی) و انشته‌سی
 (الحاج عیسی روحی افندی) مدفونلر در .

(شهزاده تربه‌سی) ناری باغچه مزارلغتك شمال غریبسنده
 درت طاش دیرك اوزرنده مبنی بر قبه سنکین اولوب اما سیه ده
 مدفون اولدینی (بهجة التواریخ) ده مسطور اولان سلطان
 مراد خان ثانی حضرتلرینك برنجی شهزاده‌سی (سلطان احمد)
 بوراده مدفون اولدینی ، شهزاده تربه‌سی دینمندن اکلایشیلیر .
 هیچ بر طرفنده کتابیه دائر بر اشی یوقدر . تربه نك جنوباً
 خارجنده مدفون اولدینی کوریلان ، امرادن (یحیی بك) در .
 (شهزادگان تربه‌سی) شامیجه محله‌سی اوکنده واقع شوسه
 یولنك شمال طرفنده حاجی الیاس محله‌سندن اینه خان اوکنه
 کیدن یولك غرب طرفنده کوشه باشنده بوده درت طاش دیرك
 اوزرنده مبنی بر قبه محکمه در. بوتربه مکرراً تعمیر ایدلمش و اك
 صکره ۱۳۱۴ ده کورجی زاده (محمد نجیب بك) طرفندن اعمار
 اولمش بولمقله معمور و مجدد بر حالده در. دروننده چلبی سلطان

محمد خان حضرتلرینک شهزاده سی (قاسم چلبی) وبعده وفات
ایدن شهزاده (محمد چلبی بن سلطان بایزید خان) وبعده وفات
ایدن شهزاده (محمد شاه چلبی بن سلیمان چلبی) و شهزاده
(مصطفی چلبی بن سلیمان چلبی) مدفون اولدقلرینی کتابه لری
اثبات ایتمکده در .

(شهیدلر تر به سی) ایکی دانه اوله رق مشهور اولوب بری
بالاده ایضاح ایدیلن بورمه مناره دروننده (جمودار تر به سی)
دیگری ده طور مطای جامی دروننده حجره مخصوصه در . بو حجره
مخصوصه سکز قدر طاش مردیون ایله اینیلیردرین برطاش او طه
اولوب شرقه ناظر اولان قپوسندن ماعدا اشیق و هوا آله جق
نجره سی و دلیکی یوقدر . دروننده ایکی تابوت اولوب بری
جنوبده ، دیگر شمالده موضوع و هرا یکینک اراسی آچیقدر
اوستی قبالی اولان شوتابوتلرک دروننده متعدد انسان قفالری ،
قوللری ، باجاقلری و سائر اعضالری موجود اولوب اتلری ، کیمکلری
اوزرنده قورومش کی طور مقده در . شو حاله نظراً ایکی تابوت
ایچنده بش التی قدر انسان جسدی موضوع اولدینی کلاشیلیر .
بو طاش او طه نک اوزرنده ، ایچنده مدفون اولان ذواتک
شبکه لری ، طاش صندوقه لری اولوب تام او طه نک اوزرینه کلان
شبکه درت عدد ایسه ده بونلرک شرق طرفده دیگر بر حجره
مخصوصه ایچنده سکز قدر ذواتک مدفون اولدقلری شبکه لری
اثبات ایتمکده در . بونلرک کیم اولدقلرینه دار شبکه لرک

وصندوقه لرك اوزر لرنده كتابة اولمديغندن ديكر امارات محكوكه بولنه مدى فقط طور مطاي مرحومك مخدومي (امير سنان الدين موسى) وحفيدي (امير جلال الدين محمد پروانه بك) واحفادنندن اماميه اميري (زين الدين يعقوب شاه رومي) وبونلرك احفادي مدفون اولدقلري قوياً مظنوندر .

(شيخ حسام الدين تربهسي) قمر الدين محله سنك اوستنده حكيم چلبی محله سي او كنده خضر پاشايه كيدن يول اوزرنده در شكلاً مربع ويوكسك اولوب اوستي آچيقدر . اوراده اقطاعي زاده (الشيخ حسام الدين حسين افندي) ومخدومي (محي الدين افندي) مدفون اولديني قيداً معلومدر . ديكر (شيخ حسام الدين تربهسي) ده خواجه سلطان اوستنده بر باغچه دروننده اولوب اوراده صونسه ني (شيخ حسام الدين حسن افندي) مدفوندر .

(شيخ زكريا تربهسي) سراجخانه جامع شريفك شرق طرفنده قيونك ايچنده بر حظيره مخصوصه در . اوراده سراجلر شيخی كبار اوليادن (پير صنع الله خلوتي) وخليفه سي اولان (پير زكرياي خلوتي) حضراتي مدفونلدر شيخ زكرياي خلوتي حضر تلرينك تربه سنده اجزاي شريفه اوقونمق اوزره حقاله ناحيه سنده كائن وپدري (شيخ پاشا) دن موروث ايكي چفتلكني ۸۷۴ ده وقف ايتمشدر .

(صاحلي افندي تربهسي) شرق طرفندن سلطان بايزيد

جامع شریفی حولیسنه کیریله جك قبونك قارشوسنده خانه-ی دروننده حجره مخصوصه در اوراده اماسیه مفتی مشهوری (صاجلی الحاج محمود افندی) مدفون اولوب بو تره بی حیاتنده یادرمش اولدیغندن کندیمی اوزرنده کائن اوطه ده اوتوررکن برزائک فاتحه اهدا ایلدیکنی کوردکده «اوقوییکز؛ محتاج رحمت بر آدم در» دیدیکی منقولدر.

(صفا پاشا خاتون تره بی) شاملیلر محله سنده شوسه یولی اوزرنده کائن بیوک چشمه نك ارقه سنده اطراف دیوارایله محاط اوافق بر موقع در. اوراده اماسیه امیری شاد کلدی پاشانک کریمه سنی (صفا پاشا خاتون) مدفون اولدینی و ثائق عتیقه ده کورولمشدو. یاننده زوجی اولدینی ظن ایدیلن (یخشی بک) مدفون اولوب مؤخرأ وصیتی اوزره تاریخجه سنی یازان (مصطفی واضح افندی) بونلرک یاننه دفن ایدلمشدر.

(طاشکوپریلی تره بی) قاکلی بازارنده اوچلر محله سنک یولی اوزرنده کائن مسجد شریفک ارقه سنده بر حجره مخصوصه در. دروننده طاشکوپریلی (الشیخ الحاج عبده افندی) و جنوب طرفنده واقع حجره دروننده مخدومی (الشیخ محمد طازف افندی) مدفوتلدر.

(طورمطای تره بی) کوک مدرسه بی حاوی جامع شریفک شمالنده شوسه یولی اوزرنده محشم بر تره سنکین اولوب اماسیه ده بدایع آثار سلجوقیه دن معدوددر. خارجاً درت طرفی قبار.

تمه لی چیچک کله مزین و قبله یه ناظری جهه سی دها محتشم کورولور. ۶۷۷ تاریخنده بنا ایدلیدی قبله یه ناظر اولان جهه سنده پنجره سی اوزرنده محکوک در کتبه سی شودر .

« عمر فی ایام الدولة السلطان الاعظم غیاث الدین ابوالفتح کیخسرو بن قلیج ارسلان خلد الله سلما نه العبد الضعیف المحتاج الی رحمة الله طرمه سی بن عبدالله غفر الله له فی سنة سبع وسبعین وسمائة »

قیوسی شرقه ناظر اولان بوتربه عالیه غایت یوکسک اولوب طاش مر دیون ایله جیقیلیر دروننده امامیه والیسی بکربکی (سیف الدین طورمطای) اولوب صندوقه سی سیاه مر مردن غایت جسیم اوله رق یاپیلمش و اطرافنه ایه الکرسی یازلمشدر . اسمی و تاریخ و قاتی صندوقه سی اوزرنده محکوک در . صول طرفنده اولادندن (یعقوب چلبی) و بونک مخدومی (محمد چلبی) و بونک مخدومی (علاء الدین چلبی) و بونک مخدومی (ابوبکر چلبی) و صاغ طرفنده اولاد سلجوقیه دن تاج الدین غازی چلبی زاده سیواس حاکمی (قلیج ارسلان سلجوقی) و ایاق طرفلرنده امامیه والیسی ایکن مخنوقا وفات ایدن شهزاده (سلطان علاء الدین بک) مخدوملری (تاج الدین) و (غیاث الدین) چلبیلر مدفون اولدقلری طوکدرمه کیرج اوزرنده محکوک اولان کتبه لرندن ا کلاشمشدر . اورایه مؤخرآ دفن ایدیلن قلیج ارسلان سلجوقیه نسبتله (قلیج ارسلان تربه سی) ده دینور .

(عائشه غازی تربه سی) شاملیلر محله سنده شیخ اسماعیل شروانی تربه سنه کیدن یولک شمانده بر موقع مخصوص در . ایکی قبری آله جق جسمانده شکلا^۱ مربع اولوب اطراف سیاهه مائل طاشدن یاپیلمشدر . حکومت دانشمندیه مؤسسه سی (ملک دانشمند احمد غازی) حلیله سی (کلوش بانو) و کریمه سی (عائشه غازی) مدفون اولدینی عنعنات محلیه دندر . فقط بونلرک اوزرینه صوکرده دن برقاج کیمسه دفن ایدلمشدر .

(عارف افندی تربه سی) چریباشی مزارلغک ایچندن مرور ایدن یولک جنوب طرفده برباغچه دروننده در . اوراده شهر کتخداسی زاده (الشیخ محمد عارف نقشبندی) ویاننده مخدومی (الشیخ احمد کامل افندی) واقرباسی مدفونلردر اوتجی قرن هجری اوایی رجالندن (پیر محمد چلبی) دخی بوراده مدفون اولدینی شیخ مشارالیهک باش طرفده قونمش اولان طاشک کتابه سندن اکلاشلماقده در .

(عبدالرحمن بابا تربه سی) صاواغجه محله سنک شرق طرفده طاغ کنارنده بر موقع مخصوص اولوب یاقین وقتلره قدر زیارتگاه عمومی اولدینی حالد غائب ایدلمشدر . اوراده مدفون اولان ابرزنجان (عبدالرحمن خلوتی) حضرت تلرینک زاویه سی واوکنده چشمه سی موجود ایکن مرور زمان ایله جمه سی ده ضایع اولمشدر . (عبدالرحمن مصلحی تربه سی) اسکندر می چلبی تربه سنک شرقا حذا سنده درت دیوار ایله محاط برباغچه در اوراده امامیه

قاضی منلا بکک (عبدالرحمن مصلحی) و پدری (محمدشاه)
و مخدومی (محمود چلبی) مدفون اولوب (عبدالرحمن مصلحی)
طرفدن اجزای شریفه وقف ایدلمشدر .

(عثمان بك تربه سی) سلطان بایزید جامع شریفنك شرق
جنوبیسنده اولوب هر طرفی طاشدن وقبه سی کارگیر اوله رق
مصنوع و محتشم بر تربۀ عالیہ در . دروننده سلطان بایزید خان
نی حضر تلرینك شهزادکانندن اماسیه والیسی سلطان احمدك
شهزاده سی (عثمان بك) مدفون اولدینی قپوسی بالاسنده محكوك
اولان بیتلردن و قیود عتیقه دن اكلاشلمقده در . تربه داری
وجز خوانلری وار ایدی .

(عجم علی تربه سی) عجم علی محله سنده بالی بك جامع
شریفنك قبله سنده كائن باغچه ایچنده در اوراده (خواجه الحاج
عجم علی اغا) ویاننده بانی جامع (بالی بك) و حفیدی (عیسی بك)
مدفونلردر .

(علی چلبی تربه سی) اخی سعدالدین محله سنده یول اوزرنده
اوافق بر باغچه در اوراده مشاهیر علمادان اماسیه مفتیسی مؤید
زاده (علی چلبی) و مخدومی اماسیه قاضیسی (عبدالکریم
افندی) مدفوندر . علی چلبی تربه سته اجزا وقف ایتمشدر .
(عیسی افندی تربه سی) دخی اوچلار جامع شریفنك غرب
طرفنده خانه سی باغچه سنده اولوب خلفای نقشبندیہ دن (الشیخ
عیسی القریمی) مدفوندر .

(فخرالدین جوهری تربه‌سی) اوق میداننک جنوبنده
واقع مزارلغک ایچنده قورد بوغان تربه‌سنک غرب طرفنده
درت دیواردن عبارتدر . اوراده (خواجه محمد جوهری)
مدفون اولوب مشاهیر فضلادن جمال‌الدین اقسرای زاده
(فخرالدین الیاس زومی) یاننده اولدینی وثائق عتیقه‌ده
اکلاشلمقدهدر . (فخرالدین جوهری) هرایکیسندن مرکب
بر خلیطه اولدینی مظنوندر . خواجه محمد جوهری طرفندن
اجزای شریفه وقف ایدلمشدر .

(قاضیلر تربه‌سی) خلفت غازی مزارلغک کنسارنده
وتربه‌سنک قارشوسنده بر قبه جسیمهدر . شماله ناظر ویوکسک
اولان جبهه‌سی آچیق وقبه‌سی بالیق صرتی شکلندهدر . دروننده
قاضی (پیر نظام‌الدین محمود) وقاضی (پیر شمس‌الدین محمد)
ودیکر کده غره قاضیمی (شمس‌الدین محمد) وقونیه قاضیمی
(عزالدین حسن) چلییلر مدفوندر .

(قبااویلیاسی تربه‌سی) قبا محله‌سنده یوکسک برتبه اوزرندهدر
اطرافی کارگیر دیوار ایله محاط و اوستی اخشاب کرمیدلک ایله
مستور اولوب اوراق بر حجرهدر بوراده اعزّه کرامدن وسادات
حسینیهدن قبالوچای زاده (الشیخ حسام‌الدین حسین‌الخلوتی)
مدفوندر . اجزای شریفه وقف ایدوب تربه‌داری
وجزخوانلری وارایدی .

(قدم‌پاشا تربه‌سی) ایلتکین باغلری اوزرنده ایلتکین‌غازی

تربه سنك جوارنده در . اوراده اماسيه اميرى شادكلى پاشا
كريمه سى (قدم پاشا) ديمكه مشهور (جهان خاتون) مدفون در .
بوخاتونك اوقافى واجزای شريفه سى وارد در .

(قطب تربه سى) يوركچ پاشا عمارتنك شرق طرفه واقع
اوقاف مزارلغك ايچنده كوشه غريبسنده در . كبار صلاحدان
مى دده خليفه سى (قطب دده) ديمكه مشهور (الشيخ احمد
الخلوتى) حضرتلى مدفون اولوب صاحب كشف قبور ، حاجى
عبدالله اوغلى (الشيخ مصطفى افندى) وصيتى اوزره بوذاتك
تزدينه دفن ايدلمشدر .

(قورد بوغان تربه سى) اوق ميداننك جنوبنده واقع
مزارلغك ايچنده جسيم و كاركير برتربه عاليه در . قبه سى و اطرافى
متين و تملى سنكين اولوب ايچنده كبار اوليادن (پير الياس)
حضرتلرينك خواص خلفاسندن (پير شرف الدين حمزه خلوتى)
حضرتلى مدفون در اوقافى واجزای شريفه سى اولوب تربه دارى
وجز خوانلرى وار ايدى . قورد بوغان ناميله مشهور اولسنك
اسبابى باب ثانى ده ذكر ايديله جكدور .

(كل چيچك خاتون تربه سى) جامع اندرون محله سنده
جامع شريفك طرف غريبسنده كاشن حجره مخصوصه در .
اوراده اماسيه واليسى شهزاده (سلطان احمد) ك حليله سى
(كل چيچك خاتون) مدفون در . اوقافى واجزای شريفه سى
وارد در .

(کمال پاشا تره‌سی) اشاغی پیرلرک غرب جنوبیسنده یول
اوزرنده مزارلق ایچنده در . اطراف قبه‌سی کارگیر اولوب
مشرف خراب برحاله طورییور . دروننده سلطان بایزید خان
ثانی وزراسندن اولوب شیخ الاسلام شمس‌الدین احمد افندی‌نک
جدی اولان (کمال‌الدین محمدپاشا) و مخدومی (سلیمان چلبی)
وسلطان سلیم خان اول حضر تلرینک وزراسندن اولوب امام‌سیده
مقتول اولان دو قه‌کین زاده (احمدپاشا) نک مدفون اولدقلری
سجلاً مضبوط در . بونلرک صندوقه‌لرینی اوراده درس او قودان
(حضوری محمدافندی) نک قالدردیغی (مصطفی واضح افندی)
یازیور .

(کومشلی زاده تره‌سی) سیل اغرنده کائن چشمه‌نک
ارقه‌سنده اوافق بر حجره مخصوصه در . دروننده کبار صلحادن
کومشلی زاده (الشیخ محی‌الدین محمدالحلوتی) حضر تلری
مدفون در .

(محمدپاشا تره‌سی) محمدپاشا جامع شریفنک شرق طرفده
آریجه بر موقع در اطراف اربعه‌سی و قبه‌سی کارگیر اولوب
قبرک سطحی زمیندن بر بقی متره قدر یوکسه‌ک در . دروننده
جامع شریفنک باندهی وزرای عثمانی‌دن (محمدپاشا) وقپوسنک
اوکنده کائن طاش مردیونک شمالنده باش طرفده پدری
(حضر پاشا) مدفون در . پدرینک سنک مزارنده کتابه‌سی
وارایسه‌ده محمدپاشانک یوقدر .

(مصاح الدین تربہ سی) اوچلر محلہ سندنہ اسکندر ممی چلی
 تربہ سنک شرقاً حذا سندنہ کاٹن عبدالرحمن مصاحی تربہ سی
 حاوی باغچہ نک بر طرفی عد ایدلمکده در . انجق محرر عاجزک
 تحریاتنه نظراً عبدالرحمن مصاحی و پدری محمدشاه و مخدومی
 محمود چاییلرک تربہ سی اسکندر چلی تربہ سنک جنوباً قارشوسندنہ
 کاٹن بیوک چشمہ نک شرقاً حذا سندنہ یولک اوزرنده کوریلن
 طاشلر اولوب باش وایاق طاشلری ضایع اولدیغندن تمامیلہ
 حکم اولنہ مدی . بو باغچہ دروننده کیلر ؛ اما سیہ مفتی سی
 و مخزن الفقہ مؤلفی (مصاح الدین موسی افندی) و مخدومی
 (عبدالرحمن افندی) و حفیدی (محمدشاه افندی) اولدقلری
 اما سیہ زیارتکاهلرینہ پک زیاده واقف اولان ذواتن منقولدر
 العلم عندالله

(مصطفی دده تربہ سی) کوبجککز محلہ سنک غرب طرفندنہ
 و شیخ قریق محلہ سنک اوزرنده کاٹن بر باغچہ در . اوراده کبار
 علمادن و سادات کرامدن اما سیہ مفتی مشہوری توقادلی
 (السید الشیخ مصطفی افندی) و مخدومی (السید اسماعیل
 افندی) و حفیدی کبار علمادن (السید الشیخ عثمان افندی)
 مدفونلردر .

(ملاطیہ لی صوفی تربہ سی) چریباشی مزار لغندنہ الشیخ
 محمدعارف افندی تربہ سنک اتصالنده اولوب اطرافی دیوار ایله
 محاط بر باغچہ در . دروننده کبار صلحادن و مشاہیر علمادن

ملاطیه‌لی (صوفی محمد افندی) و شمالنده پنجره اوکنده مخدومی
اماسیه مفتیسی (محمد خلوصی افندی) و بونلرک غرب طرفنده
مرید خاصی اینجه زاده (حافظ محمد عارف افندی) و بونک
یاننده مخدومی کبار صاحب‌الدان (حافظ احمد نجیب افندی)
مدفونلردر .

(ملک غازی تربه‌سی) بونام ایله اماسیه‌ده اوچ موقعده
تربه‌ری کوسه‌ترلمکده‌در . برنجیسی شاملیلر محله‌سنگ غرب
طرفنده یول اوزرنده بولونان (الا کوز بابا تربه‌سی) اولوب
بوراده (ملک غازی اسماعیل دانشمندی) نک مدفون اولدینی
عنعنات محلیه‌دندر . ایکنجیسی (شاد کلدی پاشا تربه‌سی)
اولوب بوراده (ملک غازی) نامنده برینک مدفون اولدینی خبر
ویرلمکده‌در . فقط تحریاتده بوکا دأثر بر معلومات بونه‌مدی .
اوچنجیسی یورکیچ پاشا عمارتی جوارنده کائن مزارلغک شرق
طرفنده اولدینی خبر ویرلمکده اولوب محرر عاجزک تحریاتنده
اوراده زاویه‌نک بانسی اولان (ملک غازی) مدفون دکلدر .
بوذاتک تربه‌سی خافت غازی تربه‌سنگ شرقاً حداسنده
اولان مربع و اوافق عرصه‌خالیه اولدینی حفریاتدن اکلاشلمشدر .
اوراده وزرای عثمانیه‌دن اولدینی سنگ مزارنده محکوک اولان
ملک الامراء (غازی اسماعیل بک) و اولادی مدفوندر .
یورکیچ پاشا جوارنده بولونان زاویه‌نک بانسی‌ده بوذات اولدینی
وقفیه‌سنده محرر اولان اسم و اوصافدن اکلاشیلیر .

(مئی دده تربہ سی) حاجیلر میدانہ کیرہ جک یولک غربا
کزارندہ اطراف دیوار ایلہ محاط برباغچہ در . اورادہ کبار
صلحادن و مشاہیر علمادن (مئی دده) دیمککہ مشہور (الشیخ
محمد الخلوٹی) و مخدومی (الشیخ ابراہیم افندی) و خائفاسندن
(الشیخ حسام الدین حسین افندی) مدفونلردر .

(منصور بابا تربہ سی) عبداللطیف افندینک کتب خانہ سی
اتصالندہ آق حسن زادہ الحاج حافظ حسن اغلک زاویہ سی
باغچہ سندہ در . بوباغچہ دہ مشایخ خلوتیہ دن (الشیخ ابراہیم
حق افندی) ویانندہ خلیفہ سی (الشیخ منصور افندی) و بونک
مریدی اعیان دن قیرمہ جی زادہ (الحاج محمد توفیق افندی)
مدفونلردر .

(مولوینخانہ تربہ سی) سراجیخانہ محلہ سنک شرق طرفندہ
کائن مولوینخانہ نک ایچندہ بیوک بر حجرہ مخصوصہ در . اورادہ
(الشیخ محمد عارف دده) و (علاء الدین علی دده) و (عثمان
ناقب دده) و (عرب صالح دده) و (اجد دده) و (محمد
صدقی دده) مدفون اولدقلری سجلات شرعیہ دن اکلاشلہ مقدمہ
ایسہدہ بونلردن زیادہ اولان ذواتک کیم اولدقلری اکلاشلہ مدی
ہر حالہ مشایخ مولویہ دن (عبدالقادر دده) و (محمود دده)
لرک دہ بورادہ مدفون اولدقلرینی ظن ایدرم .

(نصوح بابا تربہ سی) اوق میدانہ کیدن یولک قبلہ طرفندہ
باغلر اوکنندہ کی چوریم مزار لغلک شرق طرفندہ بر موقع مخصوص

اولوب اوراده کبار صلحادن سلطان بايزيد جامع شريفی امامی
واعظ مشهور (الشيخ نصوح افندی) و قربنده مشاهير
فضلا دن عیدی زاده (مصطفى عاكف افندی) واعيان دن
چايچي زاده الحاج محمد افنديـك مخدومی (محمود افندی)
مدفونلردر .

(يديلر تربهسی) اوچلر محلهـسـنك جنوب طرفنده سقا
سوقاغی قارشوسنده كائن سوقاغك ارقهـسـنده و مزاراغك دیواری
دینده بر موقع مخصوصـدر . شهزاده سلطان احمد دورنده
اشتهار ایدن یدی اميرلك النيسی بوراده مدفون اولوب بری
اولان اماسیه مفتی مشهوری قوجه امیر (السيد ابراهيم
افندی) استانبولده ابو ایوب انصاری جوارنده مدفونـدر .
بوالتیلردن امیرعجم (غياث الدين شیرازی) و کوچك امیر (سنان
نيكساری) و قبالی امیر (شرف حمزه چلبی) و (امیر عقیل
چلبی) اولدینی محقق و شهری (امیر محمد چلبی) و (امیر
مظلوم ملك چلبی) اولدینی مشكوكـدر .

(يعقوب خلوتی تربهسی) کومشلی زاده محلهـسـنك اوستنده
(پیر الیاس خلوتی) تربهـسـنه کیدن يولك شمالنده پیر الیاس
مزاراغك منهای غریبسی قارشوسنده گوشه باشنده اوافق بر
مزارلق ایچنده موقع مخصوصـدر . اوراده کبار مشايخ بنامدن
(الشيخ يعقوب خلوتی) و مخدومی اماسیه مفتیسی (مصطفى
افندی) وسائر اولاد و احفادی مدفونلردر . دیگر (الشيخ

یعمقوب افندی) و (الشیخ عبدالله افندی) ده بوراده مدفون اولدقلری مظنون در .

(یورکچ پاشا تربه سی) جامع شریفی قبوسنک غرب طرفنده یوکسک و طاشدن مصنوع بر حجره مخصوصه در . اوراده اماسیه والیسی وزرای عثمانیه دن (یورکچ پاشا) ویاننده مخدومی امرادن (یونس بک) و کریمه سی (خوندی خاتون) مدفونلر در . اماسیه ده بونلردن ماءدا پک چوق مقامات وزیرتگاه بولمقده ایسه ده آنلر ، تمامیه معلوم اولدیغندن یازیه مدی و تربلری ، مقامات مخصوصه سی تحریر ایدیلن ذواتک تراجم احوالی و تاریخ وفاتلرینی اشعار ایدن کتابه لری باب ثانی ده ذکر و تحریر ایدیه جکدر . انشاءالله

هر گوشه فیضنده بر عاشق شیدا
هر کوی کمالنده بر شاعر دانا
هر ذره خاکنده بیکر فیض ، هویدا
مسطور کتبدر نیجه اشعار اماسیه

اماسیه ، زمان فتحندن اعتباراً مقرملوک و سلاطین ، مرکز علمای مسلمین اولدینی جهتله ارضنده قوه جلیله فاطمه نک ایداع بیوردینی فیوضات مادیه و معنویه جمله سندن اولق اوزره اماسیه دن پک چوق عشاق و شعرا ظهور ایده رک هر برینک اشعار کزیده سی تذاکر شعراده مسطور بولمشددر .

شمس‌دی به قدر یازیلان تذا کر شعر ادا کلاش دینی اوزره اناطولی
بلانده تورک ایلنده صرف تورک دیلی اوزره ایلک شعر (ازکی)
سویلمن، اماسیه‌لی بابا زاده (عاشق پاشا) دره سک‌زنجی قرن
هجری اوائلنده ظهور ایدن بوذاک تورک ادبیاتنده آچ‌دینی
چیغیری، سلاطین عثمانیه‌ک اماسیه‌یه اولان عنایتی سایه‌سنده
ینه اماسیه‌لیلر نشر و توسیعه چالشدینی ظاهر اولور .

اماسیه‌ده بوچیغیری تعقیب ایدنلر ایچنده معلوم اولنلری ،
دوریکلی زاده (یاری) دیمکله مشهور (یارعلی چلبی) دره .
بعده کومشلی زاده (شمس‌ی پاشا) وعاشق پاشالی (حمدی چلبی)
ودفتردار (غنای چلبی) وکاتب سلطانی (ذهنی چلبی) و علمادان
(دقیق چلبی) و کریمانی (احمدی چلبی) چلبی سلطان محمد
خان حضر تلرینک اماسیه‌ده اجرای سلطنت بیوردینی زمانلرده
اشتهار ایتشلردر .

بونلرک ایچنده احمدی ، حمدی ، شمس‌ی مشهور اولوب سلطان
مراد خان ثانی حضر تلرینک دورهایونلرنده اماسیه‌ده نیسابورلی
(فتاحی) و (شیخی پاشا) وقضادن (بلائی چلبی) وسلطان
محمدخان ثانی حضر تلرینک دورهایونلرنده رجالدن (فهمی چلبی)
و (سعدی) ونسادن بلائی چلبی کریم‌سی (زینب خاتون)
غایت اشتهار ایتشلردر .

هله سلطان بایزید خان ثانی حضر تلرینک اماسیه‌ده یکرمی
آلتی ومتعاقبا شهزاده‌سی سلطان احمدک اوتوز ایکی سنه قدر

والیلکه بولندقلری زمان، ادبیات عثمانیه خادملى تیکثر ایدره
 تاجی، آفتابی، فغانی، قطبی، منیری، جعفری و سعدی
 چلییلر کی فضلالی شعرا ظهور ایتمشلردر. بونلردن تاجی بک
 زاده جعفری و سعدی چلییلر استانبولده نادرالامثال اوله رق
 مشهور اولمشلر ایدی. نسادن اماسیه لی (مهری خاتون)
 بودورک بدایمندنر. سلطان سلیم خان اول حضر تلینک ارکان
 سلطنتدن معدود اولان اماسیه لیلردن رحیمی، رفیقی، کشفی
 و روحی افندیلر علماً، ادباً و قلماً غایت مشهور اولمش و سلطان
 سلیمان خان اول حضر تلینک دور هایونلرنده آتی، خضری،
 زمانی، فکری و ادایی کی اماسیه لی شعرا او عصرک فضلالی
 نزدنده مظهر قبول اوله رق اشتهار ایتمشلردر. بونلردن صوکره
 هاتفی، کلامی، متعدد عبدی، شوقی، شیخی و صدقی و بونلری
 تعقیباً عیدی، عاطف، عاکف، سعید و نائل و بعده کاشف،
 صارم، عاصم و بعده نکاری، صادق، کامل افندیلر و اسملری
 درج ایدلیان پک چوق شعرا اماسیه سنجاغندن ظهور ایتمشلردر.

طوپراغی ایدلمش ازلی عشق ایله نخمیر
 هم جوهر حسن ایتمش انک ذاتی تنویر
 هر صنعت و دانشده یتشدردی مشاهیر
 ابراز فضائل ایدر احرار اماسیه

ذیل عطاییده مذکور اولدینی اوزره «اماسیه قدیمآ بر

منبت کریم علمای کرام و معدن بی عدیل فضلالی بنام ، اولدینی
منابله علوم و صنایع بشریه نك هر شعبه سنده اختصاص تام
صاحب لری یتشدر مکده پك زیاده ابراز سماحت ایتش بر شهر
مبارك اولدیغه بتون تراجم کتابلری شاهد عادل در . صنایع
نفیسه دن معدود اولان (خط) صنعت بدیع سنده اماسیه ایلرك
ابراز ایلدیکی مهارت خارقه بی تنظیر دكل ، تقلید ایده جك بر
صاحب اختصاص اولدیغنی بتون نفایس پروران اعصار ، تسلیم
ایتمکده در لر . مشاهیر خطاطیندن ابراهیم نفیسی وحسین حامد
و مستقیم زاده سعدالدین افندیلك تذکره لرنده اماسیه لی اولدینی
مسطور اولان (یاقوت مستعصمی) ایله اماسیه لی اولدینی محقق
اولان شیخ زاده (حمده افندی) نك خطوط بدیع سنی بوقدر
خطاطان جهان ، جهد بلیغ ایتدکاری خالد هیهچ بری ده تقلیده
موفق اوله مه مشدر .

هله استاذ دیمکله مشهور اولان اماسیه لی عبده افندی و
پولاد دست نامیله مشهور اولان اماسیه لی (کوسه محی الدین
افندی) و برادری (جمال الدین افندی) و بونلرك پدر لری
(جلال الدین افندی) و قبله الخطاطین و شیخ الخطاطین و صفلیله
مشهور اولان (حمده افندی) نك دامادی و عمزاده سی (شکراه
خلیفه) و اماسیه لی (عبده ثانی) و مصطفی دده) و (درویش
محمد دده) لرك امثالی ممالک عثمانیه ده پك نادر اوله رق کلن خطاطان
جهاندن اولدقلری متفق در . مشارالیه (یاقوت) ایله (حمده) دن

هربری صنعتنده مخترع اولدینی کبی صنایع نفیسه‌دن دیگر خط بدیع سیاقی دخی دیگر اماسیه‌لی تاجی زاده (جعفر چلبی) اختراع ایلدیکی تاریخیاً مثبت در . هربری مخترع اولان شو اوج خطاطک نظیری شمدی‌یه قدر کله مشدر . تذاکر خطاطین مطالعہ ایدنلرک معلومی اولدینی اوزره «خطاطان روم» ایچنده اک زیاده حائر شهرت کیمسه لرک اکثریا «اماسیه‌لی» اولدقلری کورلمکده در . بناء علیه (فن بدیع خط) ده اماسیه لیلر استاذ کل اولملر در .

تفسیر ، حدیث ، اصول ، فروع ، کلام ، حکمت و منطق کبی علوم شرعیه و عقلیه ده اماسیه لیلردن پک چوق ارباب اختصاصک ظهور ایلدیکی معروضات سابقه‌نک توصیفات شاعرانه‌دن عبارت اولیوب برر حقیقت تاریخیه اولدیغه شاهد بلیغ در بو علومک کافه‌سنده صاحب اختصاص اوله رق (علامه) اولان اماسیه لیلردن مؤید زاده (عبدالرحمن افندی) و تاجی پک زاده (سعدی چلبی) و کمال پاشا زاده (احمد شمس الدین افندی) و جعفر افندی زاده (خضر افندی) و (مصطفی عاکف افندی) و سکو کویلی زاده (محمد کاشف افندی) کبی ذواتک اقرانی ممالک عثمانیه ده کله مش کبی در هله اماسیه ده مدفون اولان کمال پاشانک حفیدی (احمد شمس الدین افندی) متأخرین اراسنده مجتهد منسوب اولمق اوزره طائمش سیالردن در .

علم تفسیرده صاحب اختصاص اولان اماسیه لیلردن عبری

زاده (منلا محي الدين چلبی) و امام مشهور (منلابخشی خليفه)
 وقاضيعسكر (محشی سنان افندی) وديكر شيخ الحرم (سنان
 افندی) و امير مدرس ديمككه مشهور (السيد احمد افندی)
 وصاحب تفسير (نابی افندی) كبار مفسريندن ايديلر .

علم حديثده صاحب اختصاص اولان امامسيه ليلردن شو
 ذوات ايله برابر شرمی زاده (حافظ عثمان تقي الدين افندی)
 ومفتي عصر (شيخی محمد افندی) وعمدة المحدثين امامسيه لى
 شيخ القرا يوسف افندی زاده (عبده افندی) [۱] ومحدث
 مشهور مؤذن زاده (سليمان افندی) وصارى احمد زاده (حافظ
 محمد افندی) كبار محدثندن ايديلر .

علم اصول وفروعهده صاحب اختصاص اولان امامسيه ليلر يك
 چوق اولوب بونلرك ايچنده شيخ حميد زاده (حميد الدين افندی)
 و جمالى زاده (علاء الدين على افندی) و شيخ عماد زاده
 (مصلح الدين موسى افندی) و (ابراهيم كمال الدين افندی) وسيدى
 على زاده قاضيعسكر (عبدالرحمن افندی) و نفس زاده
 (مصطفى افندی) و بيرام زاده قاضيعسكر (حسن افندی) و
 پيرى زاده (حسين افندی) ومتولى زاده (احمد افندی) و چلبى
 زاده (حسين افندی) و فنارجى زاده (الحاج محمد افندی)
 كبار اصوليين وفقهادن ايديلر .

[۱] فاضل مشاراليه ، شيخ الاسلام اسبق خالد افندی زاده (محمد

جمال الدين افندی) حضرتلرينك جد اعلا سيدر .

علم عالی تصوف ده صاحب اختصاص اولان اماسیه لیلردن
 کومشلی زاده (پیر الیاس خلوتی) و (پیر شرف الدین حمزه خلوتی)
 و (پیر صنع الله خلوتی) و (پیر عبدالرحمن خلوتی) و جمالی زاده
 (پیر محمد چلبی خلیفه) و مؤید زاده (عبدالرحیم افندی)،
 کومشلی زاده (محی الدین افندی) دیگر امام زاده (عبدالرحیم
 افندی) و (قطب احمد افندی) و قاضی زاده کوچک (محمد
 افندی) و استاذ عصر اولان (الشیخ صالح خلوتی) و شیخ
 زاده (الشیخ احمد رشدی افندی) قدس الله اسرارهم حضراتی
 پک مشهوردر .

علم کلام و حکمت و منطق کبی فنون لازمده صاحب
 اختصاص اولان اماسیه لیلر تعدادی مشکل بریکونه بالغ اولمقده در
 بالاده تعداد اولونان ذواتک اکثریسی بو فنون عقلیده دخی
 صاحب اختصاص اولوب مفتی زاده (صاری عثمان افندی)
 و (عبدالله افندی) و (حافظ محمد افندی) و امثالی پک چوق
 اولدیغدن باب ثانی؛ علوم و صنایعک کافه شعباتنده کرک متخصص
 و کرک متطلع اولان ذواتک تراجم احوالی متکفل اولمقله بوراده
 تعدادندن صرف نظر ایدلمشدر .

گلش نیجه مجذوب الهی نیجه مشتاق
 حقیقش اورادن دهره نیجه کامل و عشاق
 کویا بوراده اولمشیدی عالم میثاق
 بر فضا و هم زاویه در دار اماسیه

اماسیه نك خاك فیضا كندن شمدی به قدر ظهور ایدن
مشایخ کرام طریقت پك چوق اولوب طریقده تمایز و یاخود
مجددانه بر شعبه طریقت تأسیس ایدنلرك شهرتی جهندن تدقیق
اولنورسه اماسیه ؛ کویا معظم بر زاویه فیوضات اولدینی ثابت
اولور .

چونكه اماسیه ؛ فتحندن یاریم عصر صوكره (سلطان
مسعود سلجوقی) به مركز سلطنت اولدینی زمان ، سلطان
مشارالیه بر مدرسه ، برده خانقاه یقنی تکیه بنا و مدرسه یی
علوم و معارفك نشر و تعمیمنه و خانقاهی ده اخلاق عمومیه نك
اصلاح و تهذیبنه تخصیص ایدهرك مدنیت اسلامیه یی اماسیه ده
تأسیس و تحکیم و فرقه اهل صلیك مهاجرتندن خراب اولان
مواقعی اعمار و تنظیم ایتمه بذل همت ایتمشیدی .

اماسیه ده ایلک خانقاهی بنا ایدن سلطان مشارالیهك اواخر
عصرنده خانقاه مذکور شیخلرندن اتحق (محمود بابا) نامیه مشهور
اولان (سراج الدین محمود بن علی) و بعده مخدومی ظن اولنان
(علاء الدین محمد بن محمود) اولدینی تتبعات و تحریاتدن معلوم
اوله ییلدیرسه ده بونلرك طریقی تماماً بیله مدی . بعده بو خانقاهك
شیخلکی ۶۲۸ تاریخندن اعتباراً (بابا الیاس خراسانی) دیمكله
مشهور اولان (شجاع الدین ابوالبقا الیاس بن علی الخراسانی) نك
فضل و کالی ، زهد و تقوایی و کثرت اتباعی ايله کسب اهمیت
ایلدیکندن مشهور (بابا اسحاق کفر سودی) بابا مشارالیهك

سایه ارشادینه د خالته تأمین مقاصد ایدہ بیلمش ویلانجی پیغمبر الکنی
 بابای مشار الیہک نفوذندن استفادہ ایتک صورتیہ اعلان ایله مشیدی .
 بابا الیاس خراسانی طریقتی ، مشایخ اهل سنتدن جنید
 بغدادی حضر تدرینہ منسوب و مذهب اهل سنتہ موافق اولہرق
 انتشار و (طریقت بابائیہ) نامیلہ اشتہار ایدوب قبول عامہ یہ
 مظهر اولمشدر . مرقوم (اسحاق بابا) اساساً طریقت اباحیہ یی
 التزام ایدہ رک دعوائی نبوت ایتمش اولدیغندن بابائیہ طریقتہ
 ظاہراً سلوکی ، طریقت بابائیہ یی انظار عامہ دہ شائبہ دار ایدہ من .
 بابا الیاس خراسانی اوغللری (شمس الدین محمود طغرائی)
 ایله (فخر الدین علی) نک و زرای سلجوقیہ دن اولہرق اشتہاری
 (بابائی) طریقتک انتشارینی موجب اولدیغندن اوچنجی اوغلی
 (مخلص الدین موسی بابا) خانقاه مشیختندہ بولنہوق مرجع انام
 اولدینی کبی بابای مشار الیہک خلفاسندن (ایبک بابا) و (بہلول
 بابا) و (سلطوق بابا) اناطولی دہ فوق العادہ صاحب نفوذ و اقبال
 اولمشدر .

(ایبک بابا) نک اماسیہ دہ خانقاه شیخی اولدینی اثباده
 طریقت مولویہ رجالندن (ولی الدین احمد دده) مشہور اولوب
 (علاء الدین علی پروانہ بک) ۷۱۴ حدودندہ ایلک مولویخانہ یی
 بنا ایتمش وایکنجی اولمق اوزرہ اماسیہ دہ مولوی طریقی ظهور
 ایتمشدر . انجق مخلص بابا زاده (علاء الدین علی عاشق پاشا)
 خانقاه شیخی اولدیغندن بابائی طریقی متفوق اولمشدر اماسیہ دہ

واقع اولان حادثات مهمه تدقیق اولنورسه ، شو ایکی طریق
رجانك یكدیكربنه مقابل اتخاذ ایتدکری اوضاعك؛ عامل مؤثر
اولدینی اكلاشیلیر .

فقط (پیر الیاس) خلوتی حضرتلرینك شرواندن عودتیله
برابر اماسیهده ظهور ایدن طریقت خلوتیه بابائی و مولوی
طریقلرینك رجالنه نمونه امثال اوله جق درجهده مفتسلبرینی
علوم معارفه تشویق ، زهد و تقوایه ترغیب ایدهرك امر اوایانه
امرض و تداخلدن منع ایتمش اولدینی جهتله قبول عامیه مظهریتله
بك چابوق انتشار ایتمشدر .

سلطان مراد خان ثانی حضرتلرینك دورنده زینی و نقشبندی
طریقلری ده شایع اوله رق اولدقجه انتشار ایلدیهده (حبیب
قرمانی) و (چلبی خلیفه) حضراتی کبی کبار صلحادن خلوتیلر
بك زیاده اشتهار ایلدکیری جهتله بواکی طریق ایله بابائی ،
مولوی طریقلری اسکی شهرتلرینی غائب ایتمشدر .

فقط (دورسلیم خان اول) ده نقشبندیه رجاندن (صنع الله
بخاری) کبی کامل برمرشد عالی همت ، اماسیهده نشر طریقت
ایتمکله باشلادیغی زمان ، فیوضات نقشبندیه قلوب امتی تسخیر
ورجال خلوتیه بی ده تنویر ایدهرك نشر انوار ایتمشدر . ۹۶۰
تاریخنندن صکره قادری ، جلوتی ، شعبائی طریقلری ده ظهور
ایلدیهده رجال و اتباعی قلیل اولدینی جهتله بك چوق دوام
ایدهمه مش و ۱۰۴۷ ده بیرام پاشا اماسیه مولوینخانه سنی مجدداً انشا

ایده رک طریقت مولویه بی احیا ایدوب ۱۱۶۰ حدودنده خلوتی،
نقشبندی و مولوی طریقلری جمله سنه فائق اولمشدر .

کبار محدثیندن تورحالی (الشیخ مصطفی النقشبندی)
خلفاسی سیواس ولایتده تکیه ایده رک نقشبندی طریقی جمله
تفوق ایتمش و بعدده نقشبندی طریقندن تشعب ایدن (میرزاجانی)
و (خالدی) قوللری امامیه ده کسب رجحان ایدوب شمدی یه
قدر نشر فیوضات ایتمکده بولنمشدر . شو طررق علیه نک رجانه ،
مسکن اولان زاویه لر ، تکیه لر امامیه ده مدارس علمیه یه تقابل
ایده جک درجه ده کثیر اولدیغندن حروف هجا ترتیبی اوزره
تحریر اولندی .

۱ (آق حسن اوغلی تکیه سی) سلطان بایزیدک شرقده
واقع عبداللطیف افندینک کتبخانه سی اتصالحده در . بوتکیه بی،
اسبق امامیه متسلمی آق حسن زاده (الحاج حافظ حسن اغا)
۱۲۴۵ ده بنا و مشیختی رجال خلوتیه دن (السید الشیخ ابراهیم
حق افندی) یه اعطا ایتمشدر . بونک ارتحالنده خلیفه سی
(السید الشیخ منصور افندی) تکیه شیخی اولوب ۱۲۸۳
ارتحالندن سوکره درسخانه و ۱۳۰۳ ده آلتی فتواخانه و اوستی
مدرسه اتخاذا ایدلمشدر .

۲ (اهل الله تکیه سی) اوق میدانی اوزرنده خضر پاشا
مجلسنده اولوب (میدان آغاسی) دیمکله مشهور اسبق امامیه
متسلمی (الحاج خضر اغا) طرفندن ۱۰۶۴ ده بنا ایدلمشدر .

بوزاویده هابل زاده (الشیخ اهل الله افندی) ۱۱۱۰ تاریخه
قدر اجرای مشیخت ایلدیکندن (اهل الله تکیه سی) نامیه
اشتهار ایتشدرد. بوتکیه، خلوتیلره مخصوص اولوب (الشیخ
یحیی افندی) و حامی زاده (الشیخ محمد افندی) تکیه شیخی
اوله رق معروف اولمشلردر.

۳ (اوچلر تکیه سی) اوچلر محله سنده سعدی چلبی جامع
شریفک اتصال غریب سنده اولوب خلفای نقشبندیه دن قریملی
(الشیخ عیسی افندی) خانه سی ایکن ۱۲۳۸ ده زاویه یه تحویل
ووقف ایتشدرد. خانه ک سکناسی اولادینه مشروط اولدیغندن
ارتخالنده مخدومی زاویه دار اولدیسده مسلاک قضاده بولمقله
مشیخت واقفته منحصر اولمشلردر.

۴ (چله خانه تکیه سی) حضرت پیر الیاس خلوتی تربه سنک
شمالنده بولونان یعقوب پاشا دائره سی دروننده در. بو تکیه یی
۸۱۵ ده امرای عثمانیه دن (یعقوب پاشا) مفتی الثقلین کومشلی
زاده (عبدالرحمن چلبی) ایچون بنا وتولیتنی خلفا سندن
(شمس الدین محمد بخاری) یه واولادینه وانقراضنده (مؤید
چلبی) یه واولادینه تخصیص ایتشدرد.

بوتکیه، خلفای خلوتیه یه مخصوص اولوب حضرت پیرک
یرینه دامادی کومشلی زاده (پیر عبدالرحمن چلبی) بعده
(پیر شمس الدین محمد بخاری) بعده حضرت پیرک مخدومی
(پیر جلال الدین عبدالرحمن چلبی) ۸۴۳ ده سراجلر شیخی

(پیر صنع الله خلوتی) بعده (پیر زکریا خلوتی) وبعده ایکنه جی زاده (پیر صفی الدین محمود خلوتی) بعده قبالو چلبی زاده (پیر عبدالرحمن حسامی چلبی) بعده ۹۰۳ ده کومشلی زاده (پیر محی الدین محمد چلبی) بعده ۹۲۱ ده بخاری زاده (پیر محمد خلوتی) بعده (الشیخ یعقوب خلوتی) بعده خلفادن (الشیخ عبدالرحمن خلوتی) بعده مخدومی (الشیخ عزالدین حسن خلوتی) بعده دیکر مخدومی مشاهیر علمادن (الشیخ حسام الدین حسین خلوتی) حضراتی بوجه خانه ده شیخ عالی شان اولمشدر در . امامیه خلوتیلری اراسنده بوسلسله خلوتیه (سلسله الذهب) دینمشدر .

بعده چله خانه شیخی بولونان (الشیخ محمدافندی) ۱۰۹۹ فورطنه سنده ارتحال ایدوب (السید ابراهیم افندی) و ۱۱۱۶ ده بوده فوتیله مخدومی (السید محمدافندی) شیخ ومتولی اولمشدر در . ۱۱۶۸ ده السید محمدافندینک ارتحالنده علمادن (حافظ السید محمود افندی) شیخ اولدیه ده ۱۱۷۲ ده رفع اولنه رق (حافظ السید عبده افندی) شیخ ومتولی اولدینی حالد (۱۲۱۴) اواخرنده ارتحال ایلدیکندن تولیت کریمه سی شریفه خاونه ویرلوب مشیخت ؛ ضمیمه تدریس اولمشدر .

۵ (چو کجه تکیه سی) یعقوب پاشا دائره سنک جهت غربیه سنده اولوب چلبی سلطان محمد خان حضر تلرینک دور هایوننده امامیه ده قائمه نقدیه نک طبع واعمالنده ابراز مهارت ایدن

و (چویکچی) نامیله مشهور اولان (الشیخ شمس الدین محمد القرطاسی) طرفدن ۸۳۱ ده بنا و مشیختی خلفای خلوتیه یه و تولیتی اولادینه تخصیص ایتشدرد . بوزاویه مکرراً خراب و معمور اولوب ۱۰۸۸ ده (الشیخ سایان افندی) اعمار ایدرک تکیه شیخی اولمش و ۱۰۹۹ فورطنه سنه قاریشدیغدن خلفای خلوتیه دن (الشیخ عمر افندی) یه ویرلمش و ۱۱۴۲ ده قصریدیله (الشیخ حسین افندی) تکیه شیخی اولوب ۱۱۸۰ ده فوتیله مشاهیر علمادان (سنانی الشیخ حسن الخلوتی) حضر تلی شیخ اوله رق اوجاغی اویاندرمش و ۱۲۰۹ شوانک آلتیسنده ارتحال ایتدکه چوکه مشیختی محمد بن علی و اسماعیل بن احمد نام کیمسه لره ویرلمش ایسه ده اسماعیلک نا اهل اولدیفی تبین ایتدکه مشارالیه الشیخ حسن افندی نك خلفا سندن (الشیخ عثمان افندی) و محمد بن علی یرینه دخی ۱۲۴۶ ده علمادان آقشهری (اسماعیل افندی) شیخ اولمشلردرد . (الشیخ عثمان بابا) ۱۲۴۸ ده و (اسماعیل افندی) دخی ۱۲۵۹ ده وفات ایتلری اوزرنه مدرسه یه منقلب اولمشدر .

۶ (حجابی تکیه سی) زیاره محله سنده کچی اوغلی جامع شریفنک اتصافده در خلفای نقشبندیه دن قریملی (السید الشیخ عبدالباقی حجابی افندی) زیاره ده اقامتله ۱۲۱۲ ده بر تکیه بنا ایدرک اجرای مشیخت ایتمش و ارتحالده خلیفه سی و دامادی (السید

الشیخ ابراهیم زهدی افندی (شیخ اولوب بوده ارتحال ایتدکه مکتب اتخاذ ایدلمشدر .

۷ (خضر پاشا تکیه سی) شامیجه محله سنده اولوب یورکچ پاشا اولادندن وبککربکیلردن (حضر پاشا) ۹۷۱ ده بنا و اوقافی تنظیم ایتمشدر . مشاهیر علمادن (منلا شیخ) دیمکله مشهور خلفای خلوتیه دن (الیاس افندی) حضر تلری ابتدا شیخ اوله رق ارتحالنده (ممی دده) دیمکله مشهور (الشیخ محمد افندی) بعده مخدومی (الشیخ ابراهیم افندی) بعده کبار علمادن (الشیخ حسام الدین افندی) شیخ اولمشدر .

حسام الدین افندی صکره علمادن (الشیخ مصطفی افندی) بوجه تقاعد شیخ اولمشدر . بعده واعظ مشهور (الشیخ حسن افندی) و بعده مخدومی (الشیخ محمد افندی) بوتکیه شیخی اولدیسده ۱۱۴۳ حریقنده یانديغندن تماميله ضایع اولوب یری بولنه مه مشدر .

۸ (خواجه سلطان تکیه سی) دارالسلام محله سنک اوستنده الیوم قبری بولونان یرک شرق وجنوب طرفلرینی محیط اولان خانه لرك موقعی دره سلطان بایزید خان ثانی امامیه والیه ایکن خواجه سلطانی اولان اعیانندن (شمس الدین احمد چایی) ۸۸۰ ده اوراده برزاویه جسیمه بنا ویاننده مسافر خانه و مطبخ انشاء و اوقاف کافیہ ترک ایدره رک نامنی ابقا و شیخ لکنی کبار خلوتیه دن

جمالی زاده (الشیخ جمال الدین محمد چلبی خلیفه) حضر تلمیینه اعطا ایتمشدر .

مشار الیهک ارتحالندن صوکره مخدومی (الشیخ بدرالدین محمود چلبی) وبعده بونک مخدومی (الشیخ خیرالدین خضر چلبی) وبعده احفادنن (الشیخ محی الدین محمد چلبی) و (علاء الدین علی چلبی) تکیه مزبورہ شیخی اولمشدر . علاء الدین افندی صوکره کبار علمادن اولان ذوات بروجہ تقاعد تکیہ شیخی اولوب نظارت و فقیہ سی چلبی زاده لرہ تخصیص اولمش و ۱۰۹۷ ده الشیخ محمد افندیکن ارتحالنده سادات علمادن ظنہ لی (السید احمد افندی) تکیہ شیخی وبعده متوالیسی اولوب ۱۱۴۱ ده وفاتیلہ مخدومی (السید عبداللہ افندی شیخ و متولی وبعده ناظر اولاقده ۱۱۷۲ تاریخہ قدر اوغلاری (السید محمود ، عمر ، عثمان ، احمد ، محمد ، حسین) چلبیلر تکیہنک کافہ جهاتنه تصرف ایدہرک مومی الیهک ارتحالنده مکان و جهاتی تقسیمات ارنہ یہ معروض و تدریجاً ملک اولہرق تمامیلہ ضایع اولمشدر .

۹ (سعد الدین تکیہ سی) ایجری شہرہ میدان قپوسی جوارنده انخی سعد الدین محلہ سندہ اولوب ۸۷۱ ده کاتب سلطانی (سعدی افندی) بنا و اوقافی تنظیم ایتمشدر . بو تکیہنک طعامیہ سی و مسافر خانہ سی مکمل اولوب متقاعدین علمادن پک چوق فضلا بورایہ شیخ اولمشدر . اخیراً خلوتیہ رجاندن

(الشیخ الحاج محمد مشتاق افندی) تکیه شیخی اوله رق

۱۲۶۰ سالندن صکره تکیه منهدم وجهتی منعدم اولمشدر .

۱۰ (شاملر تکیه سی) شاملر محله سنده ایاس اغاجامع شریفنک

جوارنده اولوب مشاهیر اعیانندن (خواجه الحاج صالح چلبی)

طرفندن ۹۵۱ده بنا و اوقافی تنظیم ایدلمشدر. خلوتیه رجالندن

یک چوق ذوات بوتکیه ده اجرای مشیخت ایدوب (الشیخ

صالح افندی) حضر تلمری کبی ذوات کرامتسمات بوتکیه شیخی

اولمش و بده (الشیخ یوسف نقشبندی) خلفاسندن (الشیخ

ترابی علی افندی) ۱۲۳۱ تاریخندن اعتباراً تکیه شیخی اوله رق

طریق نقشی فیوضاتی نشر ایتمشدر .

۱۱ (شهر کتخداسی اوغلی تکیه سی) عجم علی محله سنده

عجم علی پیکارینک جهت شرقیه سنده چیقماز سوقاق ایچنده در.

خلفای نقشبندیون (السید الشیخ عبدالباقی حجابی افندی)

خلفیه سی شهر کتخداسی زاده (السید الشیخ محمد عارف

افندی) ۱۲۳۸ ده خانه سی اتصالده بر تکیه انشا و مشیختی

اجرا ایتمشدر . بعده مخدومی (الشیخ احمد کامل افندی)

و ۱۲۹۹ ده کوچک مخدومی (الشیخ یوسف ضیاء الدین

افندی) و ۱۳۱۲ ده اورتانجه مخدومی (الشیخ محمد بهاء الدین

افندی) بوتکیه نك شیخی اولمشلردر .

۱۲ (شهره کوسدی تکیه سی) شهره کوسدی محله سنک

منتهای غریب سنده کائن چشمه نك اوستده ایدی . مشایخ

کرامدن (پیر سنان خلوتی) حضرتلرینه مریدانی طرفندن بنا ایدلمش برتکیه اولوب اوراده محله‌نک حدوثنه باعث اولمشدر . پیر مشارالیه، ایلك شیخ اولوب ارتحائنده خلیفه‌سی (درویش علی خلوتی) بعده (الشیخ احمد افندی) تکیه شیخی اولمشدر . بوتکیه ۱۲۴۱ تاریخنه قدر معمور اولدینی خالده بعده خراب ویری ده ملک اولمشدر .

۱۳ (شیخ اوغلی تکیه‌سی) کومشلی زاده محله‌سنگ جهت شمالیه‌سنده اگری جامع شریفی جوارنده اولان چیقماز سوقاغک ایچنده در . مشاهیر فضلادن چوروملی شیخ حسن افندی زاده (عبدالله وجیه افندی) طرفندن امیر مدرس السید احمد افدینک ورثه‌سندن آلتان جسیم خانه‌نک اوک طرفده ۱۱۹۰ ده برتکیه انشا و نقشبندی طریقتی اوزره آیین اجرا ایدلمشدر . بعده مخدومی (الشیخ احمد رشدی افندی) تکیه شیخی اولوب ارتحائنده مخدومی (الشیخ حافظ علی افندی) قادری اولمق اوزره تکیه شیخی و ۱۳۱۲ ده بونک مخدومی (الشیخ الحاج علی افندی) یرینه قائم اولمشدر .

۱۴ (شیخ جوعی تکیه‌سی) امامیه‌نک جهت غربیه‌سنده شیخ جوعی باغلرینک شمال غربیه‌سنده شیخ جوعی قریه‌سی آلتنده کول جوارنده در . بوتکیه ، مولویخانه اولوب شیخ مشارالیه طرفندن ۸۱۷ ده بنا ایدلمشدر .

بومولویخانه شیخی ابتدابانیسی (محمد جوعی دده) بعده

خليفة سى (يغورتجى بابا) ناميله مشهور (پيرى احمد دده) بعده
 (عمر آهى دده) اولوب دها پك چوق ذوات ، شيخ مشويخوان
 اولمش بعده كلن شيخلر (مشوى خوان) ناميله مشهور ومقيد
 اولوب بونلردن ۱۱۵۴ ده (اسماعيل دده) و ۱۱۷۷ ده وفاتيله
 (ابراهيم دده) و ۱۱۹۰ ده اسماعيل دده زاده (فيض اده)
 و ۱۱۹۴ ده (السيد حسن دده) و متعاقباً (السيد مصطفى دده)
 و ۱۲۰۴ ده اماسيه مولويخانه سى شيخى احمد افندى زاده
 (فيض اده افندى) و ۱۲۰۸ ده رفعدن برادري (عبده دده)
 و ۱۲۰۹ ده قصر يدندن حاجى زاده (حسين دده افندى)
 و متعاقباً برادري (حافظ مصطفى دده) و ۱۲۲۰ ده وفاتيله
 اوغللى محمد و ابراهيمك ۱۲۲۷ ده فوتندن اماسيه مولويخانه سى
 شيخى السيد محمد كامى دده زاده (السيد محمد ثابت دده)
 مشويخوان وتكيه شيخى اولمشلردر . فقط بوتكيه دن شمدى
 اثر قالمه مشدر .

۱۵ (شيخ عبدل تكيه سى) صوفيلر محله سنده پير الياس مزار لغلك
 منتهاي غريب سنده اولوب مشايخ نقشبنديه دن (الشيخ عبده
 افندى) طرفندن ۹۶۱ ده بنا و اوقافى تنظيم ايدلمشدر . بو تكيه
 مكرراً خراب و معمور اوله رق ۱۲۷۱ تاريخنه قدر محافظه
 ايدلديكى حالده بعده ضايع اولمش و ۱۳۱۵ ده سيواس مشايخندن
 (الشيخ غلامى افندى) معارف طرفندن مأموراً اماسيه
 كلديكى زمان ، اوقاف مندرسه دن عديله معارفه ضبط ايدلمشدر .

۱۶ (شیخ قریق تکیه سی) اماسیه ده ایلک بنا ایدیلن و خانقاه مسعودی نامیله مشهور اولان بوتکیه اولوب کوبجکیز محله سنک غرب طرفنده قاشیق پیکارینک التنده و چیقرق محله سنک جنوبنده ایدی . بو خانقاهی ۵۴۵ حدودنده (سلطان مسعود سلجوقی) بنایتدیردیکی (بهجة التواریخ) ده مسطور اولوب خانقاه مسعودی نامیله مشهور اولمسی ده بوقیدی تصحیح ایتمکده در .
بو خانقاهک اوائل احوالنه دائر معلومات بولنه مدی انجق ۵۷۱ ده (الشیخ سراج الدین محمود بن علی) و ۶۰۷ ده (الشیخ علاء الدین محمد بن الشیخ محمود) بو خانقاهک شیخلری اولدیغی معلوم اولوب ۶۲۸ تاریخندن اعتباراً شهر ایدن (شجاع الدین الیاس بن علی الخراسانی) بو خانقاهک شیخی اولمقده (بابا الیاس) دیه مشهور اولمش و ۶۳۷ ده بابای مشار الیهک مریدی اولدیغی ادعا ایدن (بابا الیاس کفر سودی) وقعه سنده شائبه دار اولدیغندن اماسیه قربنده اولان چفته لمکنه ارسال واعیان اتباعی برر طرفه اعزام و خانقاه مذکورده سد ایدلمشدر .

۶۴۶ حدودنده اوغللری (شمس الدین محمود ، فخر الدین علی) تشبثاتیه اعاده و خانقاه دخی کشاد ایدلمش وثانیاً خانقاه شیخی اولدیغی حالده وفاتنده برادر زاده سی (بهلول بابا) شیخ اولوب مؤخرأ بوده صو شهرینه اعزام ایدلمکله بابا الیاسک مریدی (ایبک بابا) یرینه قائم اولمش و بوده پروانه بکه معارض اولدیغندن

۶۷۱ حدودنده مصره فرار ایدوب بابا الیاس اوغلی (مخلص بابا) شیخ اولمشدر .

پروانه بکک اعدامنده اعمال نفوذ ایدن (ایبک بابا) عودت ومخلص باباده طریق امارته سلوک ایلدیکندن ۶۷۶ حدودنده ثانیاً خانقاه شیخی اولدیغی حالدّه بعده وفات ایتمکله خلیفه سی (احمد بابا) شیخ اولوب ۷۰۱ نهزامنده تانار حکمداری (سلطان محمود غازان خان) امیر مخلص پاشا ایله بوندن شبهه ایلدیکی معلوم اولدیغندن (امیر مخلص پاشا) مصره فرار واحمد بابا دخی اختفا ایتمشدر .

بواثناده علمادن (الشیخ محمدالدین عیسی) خانقاه شیخی اولدیسده ۷۰۳ ده سلطان محمودک وفاتیه برادری (سلطان محمد خدا بنده خان) جلوس ایدهرک مشهور توقادلی (بوراق بابا) نک توصیه سیله (احمد بابا) ثانیاً خانقاه شیخی اولمش و ۷۱۱ ده فوت اولدقه مخلص پاشا زاده (علی عاشق بابا) یربنه قام اولوب جدی بولونان بابا الیاس خراسانی زماتئی جانلاندرمش وسلطان ابوسعید بهادر خانک وکیل مطلق (امیر چوبان) ک توجهنی فوق العاده جلب ایلدیکندن سیواس امارتنده بولونان اوغلی (امیر تیمور طاش) ه وزیر و مستشار اولمشدر .

(علی عاشق پاشا) خانقاه شیخی ایکن اناطولی ده اعیلان استقلال ایدن امیر تیمور طاشک وزیر ی اوله رق اشتهار ایتمکله ۷۲۷ فلا کتنده امیر مشارالیه رفیق اولدقه علمادن (زین الدین

يعقوب الزيارى) وبعده مشاهير فقهاء دن (جمال الدين ابراهيم
اقسرايى) خانقاه شيخى اولمشلردر . معين الدين بليمان پروانه
بكك اقرباسندن جعفر بك زاده (سلطان آرتنا بك) اناطوليدنه
احراز نفوذ و اقتدار ايتدجكه بو خانقاهك اسكى نفوذى
زائل اوله رق ۷۳۹ ده فاضل مشاراليهك ارتحالندن صكره
مسدود حالى اكتساب ايتمش ومع هذا بعض علمايه جهت
معيشت اولمشدر .

فقط (شاد كلدى پاشا) اماسيه اميرى اولدقده علمادن
(الشيخ حسام الدين حسين التركمانى) وبعده (سعيد الدين موهوب)
خانقاه شيخى اوله رق افتايه مأذون اولمش و ۷۸۷ ده الشيخ
حسامك مخدومى (عز الدين حسن چلبى) خانقاه مذكور
شيخى اولوب بعده فضلالدن (صارو شيخ) ديمكله مشهور
(الشيخ شمس الدين احمد رومى) شيخ اولمشيدى .

۸۰۴ ده تاتار حكمدارى طوپال (تيمور خان) طرفندن
اماسيه واليدكنه تعيين اولونان (قره دولتشاه) عليهنه خلق
تشويق و عثمانلى طرفنى فوق العاده التزام ايدهرك قره دولتشاهى
اماسيه يه يانشدير مدينى تيمور خانه شكايه اولدقده شهزاده سى
(قره سلطان محمد) ى اماسيه يه ارسال ايتديكى ائزاده اختفا
و حاليه فرار ايتمشدر .

چلبى سلطان محمد خان حضر تليزك بوليدن عودتنده
خانقاه مذكورك مشيختنى صارو شيخك تليزى و شيخ عز الدينك

مخدومی (شیخ قریق) دیمکله مشهور (محي الدين محمد چلبی) یه اعطا بیورمش و خانقاه مذکورک نامی یالکز محله ده قالوب (شیخ قریق تکیه سی) نامیله مشهور اولدینی حالدیه بعده غلط اوله رق (چیقریق تکیه سی) دینمشد.

بو تکیه نك مشیختی یوز سنه قدر شیخ قریق سالله سنه منحصر اولدینی حالدیه (سلطان سلیمان خان اول) حضر تلیزینک دورنده مقام تدریسده پیر اولمش علمایه بوجه تقاعد ویرلمش و ۱۱۳۱ حدودنده مشاهیر علمادان توفادلی (السید الشیخ مصطفى افندی) و بعده (الشیخ محمد افندی) و بعده (السید الشیخ اسماعیل افندی) شیخ ومتولی اولوب بر مدت خراب اولدیه ده علمادان و رجال نقشبندیه دن مفتی شیخ زاده (السید الشیخ عثمان افندی) اعمار ایدهرک شیخ ومتولی اولدینی حالدیه مومی الیهک ارتحالنده بردها اعاده سی ممکن اوله میه جق درجه ده ۱۲۵۷ ساله طوغری منعدم اولمشدر. غایت مختصر اولان شوا یضاحاتی، مطالعه بیوریلان ارباب تدقیقک نظرنده شو خانقاهک نه قدر تاریخی برتکیه اولدینی تعین ایدر.

۱۷ (ضربخانه جی تکیه سی) پروانه بك محله سنده اولوب بالی بك جامع شریفی شرقنده پروانه بك محله سنه کیدن - و قاعک ایچنده چشمه نك ارقه سنده ایدی. شیمدی یرینی ایکی خانه اشغال ایتمکده در. بو تکیه یی (اخى ضربخانه جی) دیمکله مشهور، اما سیه ده ضربخانه امینی اولان (شمس الدین احمد

چلبی (۸۳۶ ده بنا و اوقافی تنظیم ایتمشد . سادات رفاعیه دن
(السید الشیخ احمد افندی) و مدرس عبدی افندی زاده
(السید الشیخ علی افندی) کبی علما بو تکیه ده اجرای
مشیخت ایتمشلردر . شیمدی یالکیز مسجدی خراب اوله رق
طوریور .

۱۸ (قاکلی تکیه سی) دوه خانه محله سنده اولدینی مقید
اولوب اسبق اماسیه متسلمی قاکلی (الحاج علی اغا) ۱۰۱۷
حدودنده بنا وقادری مشایخنه تخصیص ایتمشد . بوتکیه نك
متولسی آیدین پاشا زاده علی بك ۱۰۷۹ ده اعمار ایدوب
۱۱۴۳ ده یاندیغندن ضایع اولمش و ۱۲۲۶ ده مشاهیر علمادان
ورجال نقشبندی دن طاشکوپریلی (الحاج حافظ عبدالله افندی)
خانه سی اوکنده تکیه بی احیا وش یخلکینی کندیمی ایفا ایتمش
وارتحالنده مخدومی (الشیخ محمد عارف افندی) یرینه قائم
اولمشد . بو طاشکوپریلی تکیه سی ، اسکی قاکلی تکیه سی یرنده
اولدینی مظنوندر .

۱۹ (قطب تکیه سی) عمارت ارقه سی دیمکله مشهور
اولان حاجی الیاس محله سنده سلطان بایزید مدرسه سنك غربنده
کلشن سوقا نك ایچنده در . خلفای خلوتیه دن (قطب دده)
دیمکله مشهور (الشیخ احمد افندی) طرفندن ۱۰۱۸ ده بنا
و اوقافی تنظیم ایدلمشد . قطب مشارالیه اوراده شیخ اولوب
ارتحالنده خلیفه سی (الشیخ محمد افندی) بعده کبار علمادان

(الشیخ السید ابراهیم افندی) تکیه شیخی اولمش وبعده علمای
مقاعدین شیخ اوله رق (چتال حافظ) دیمکله مشهور ، مظنه
کرامدن (الشیخ احمد افندی) و ۱۲۲۰ ده ارتحالنده (یشیل
شیخ) دیمکله مشهور آپاردی زاده (السید الشیخ احمد افندی)
بوتکیه شیخ لکنده بنام اولمشلردر .

۲۰ (قوشباز تکیه سی) یعقوب پاشا دائره سنک شرق
طرفده کائن میدان ناظر بر موقعده ایدی . خلفای خلوتیه دن
(الشیخ یعقوب افندی) طرفندن ۹۶۱ ده بنا و اوقافی تنظیم
و ارتحالنه قدر مشیختی اجرا ایدلمشدر . بعده (الشیخ عبدالرحمن
افندی) و ارتحالنده ایکنجی (شیخ یعقوب افندی) بعده
(الشیخ حسن افندی) شیخ اولمشلردر . مؤخرأ خراب
اولوب ۱۳۱۵ ده اوقافی معارفه ضبط ایدلمشدر .

۲۱ (کلابی تکیه سی) ایچری شهرده جامع اندرون
محله سنده اولوب ۹۷۳ ده بکربکیلردن (کلابی پاشا) طرفندن
بنا و اوقافی تنظیم ایدلمشدر . بوده قادری طریقه مخصوص
اولدینی حالد ۱۱۰۰ سالندن صوکره طریق نقشبندی رجالی
شیخ اولمشلر ایدی شمدی یری بیله غائب اولمشدر .

۲۲ (کومشلی اوغلی تکیه سی) تاجیه دیمکله مسجل
اولان کومشلی جامع شریفک شرق و جنوب طرفلرنده بولونان
موقع خالی در . اما سیه ده خلوتیلره مخصوص اوله رق یاپیلان
ایلاک تکیه ، بودر . ایکی یوزسنه دن زیاده کومشلی زاده خاندان

گرامنه معبد اولمش مبارك بر موقع در . كوشلی زاده (پیر الیاس) حضرت تلیرى ابتدا بوراده اختیار خلوت ونشر طریقت ایدوب ۸۱۳ ده ارتخالنده خلیفه سی و دامادی كوشلی زاده (پیر عبدالرحمن چلبی) وبعده مخدومی كوشلی زاده (جلال چلبی) وبعده بونك مخدومی (پیر خیرالدین خضر چلبی) و ۸۹۰ ده حضرت پیرك احفادنندن كوشلی زاده صوفی (اویس چلبی) وبعده كوشلی زاده (الشیخ محی الدین محمد الخلوتی) وبعده پیر اویس اوغلی (عبدالرحمن چلبی) كوشلی اوغلی تکیه سی شیخی و حضرت پیرك تربهداری اولمشلردر .

۹۹۳ ده پیر اویس اوغلی (الحاج احمد چلبی) وبعده (الشیخ حسن افندی) وبعده (عبدالرحمن چلبی) و ۱۰۹۹ ده وفاتیه (علی چلبی) و ۱۰۷۳ ده فوتیه (الحاج محمد چلبی) و ۱۰۹۹ ده حضرت پیرك اولادبناتندن (الشیخ مصطفی افندی) و ۱۱۱۴ ده (الشیخ محمود افندی) و ۱۱۲۴ ده وفاتیه مخدومی (حافظ حسین افندی) و ۱۱۳۵ ده وفاتیه مخدومی (عبدالرحیم افندی) كوشلی اوغلی تکیه سی شیخی و حضرت پیرك تربهداری و متولیس اولدیسه ده نا اهل اوله رق الشیخ اسماعیل افدینك تحت وصایتده بولمشدر .

۱۱۵۰ ده بو عبدالرحیمك وفاتیه تربهدار مشهور (الشیخ اسماعیل افندی) متولی كوشلی اوغلی تکیه سی شیخی اولوب سرایی (فاطمه خانم) بوزاته غایت محب اولدینی مناسبتله بونك

توصیه و اخطاری اوزرینه ۱۱۵۳ ده کومشلی اوغلی تکیه‌سی
یرینه مکمل بر مدرسه بنا و اوقافی تنظیم ایتمش و ۱۱۷۹ ده
شیخ مشارالیه اسماعیل افندینک ارتحانه بناء مدرسه فاطمیه
مدرسلی و حضرت پیرک تربهدارلغی آیرلمشدر .

بعده متولی و تربهدار اولقی اوزره (یکن خلیفه) دیمکله
مشهور (محمد افندی) ۱۱۷۹ ده اسماعیل افندی یرینه قائم
و دیگر اولاددن (عبده افندی) ابن محمد افندی ۱۱۹۱ ده
تربهدار اولوب (یکن محمد افندی) تولیده قالمش و ۱۲۱۵ ده
فوتیله عبدالرحمن افندی زاده (محمد افندی) و ۱۲۲۰ ده فوتیله
(السید احمد افندی) تربهدار اولمش و ۱۲۲۲ ده متولی
(یکن محمد افندی) ده وفات ایدوب مخدومی (الشیخ علی افندی)
معاقباً قصریدیلله (السید حافظ عبده افندی) متولی و ۱۲۲۳ ده
تربهدار السید احمد افندینک فوتیله تربهدار و (۱۲۳۱ ده
(السید عمر افندی) بن السید محمد خلیفه و ۱۲۴۷ ده فوتیله
مخدومی (السید محمد افندی) و ۱۲۷۵ ده فوتیله برادری
(السید عبده افندی) و ۱۲۸۰ ده خلفای خلوتیه دن (السید
الشیخ منصور افندی) متولی و تربهدار اوله رق ۱۲۸۴ محرمنده
وفات ایتمشدر .

۲۳ (محمد پاشا تکیه‌سی) محمد پاشا جامع شریفنک جنوب
طرفنده یول اوزرنده اولوب پاشای مشار الیه طرفندن خلوتیه
رجائندن (حبیب قرامانی) حضر تلری ایچون ۸۹۰ ده بنا و اوقافی

تنظیم ایدلمشدر . شیخ مشارایه ، بوراده ارتحالهقدر اجرای
مشیخت وارشاد خلقه همت ایتمشدر .

مشارالیهك ارتحالنده خلیفه سی امام زاده (سیدی خلیفه)
دیمکله مشهور (الشیخ سیدالدین علی الخلوتی) وبونك ارتحالنده
حبیب قرامانی زاده (الشیخ حسن افندی) وبعده مخدومی
(یماق شیخ) دیمکله مشهور (الشیخ محمد افندی) و ۹۶۱ ده
استانبوله نقلنده برادری (الشیخ عمر افندی) بعده اولادندن
(الشیخ محمد افندی) و ۱۰۷۸ ده وفاتیه مخدومی (الشیخ
عبدلرحمن افندی و ۱۱۰۷ ده فوتیه مخدومی (الشیخ عمر
چلبی) و ۱۱۵۱ ده وفاتیه مخدومی (السید محمد چلبی)
و ۱۲۰۲ ده فوتیه مخدومی (السید احمد افندی) و ۱۲۱۰ ده
فوتیه اوغللری (السید عمر ، علی ، محمد) افدیلر و ۱۲۲۵ ده
دیگر مخدومی (السید عبده افندی) شیخ ومتولی اولمشدر .
انجق بونلر ورثه دن اولدینی جهتله اصل مشیخت ، و کالتنده
بولونان ذوات طرفلرندن اداره ایدلمش و ۱۲۹۶ ده ۴۰ هاجرین
اسکانیه تکیه ، مسکن خصوصی اولمشدر .

(۲۴) (محمود چلبی تکیه سی) ایجری شهرده قراطای محله سنده
اولوب مشاهیر قضادن عمادزاده (بدرالدین محمود چلبی) ۸۰۷ ده
بنا و اوقافی تنظیم ایتمشدر . مسافر خانه سی مکمل ، طعامیه سی مبذول
اولوب نقشبندیه طریقه مخصوص ایدی . (خواجه بهاء الدین
محمد نقشبند) حضر تلرینك کبار خلفاسندن (خواجه رکن الدین

محمود بخاری (حضرت تلی امامیه کلدکده قاضی مومی الیه ،
 بوتکیه بی بنا و مشیختی خواجه مشارالیه اعطا ایتشدر .

انجق سلطان بایزید خان ثانی حضرت تلرینک دروننده .

خلوتیلر بوتکیه ده اجرای مشیخت ایدرک ختم خواجکانی

ابقا وعادت خلوتیه بی اجرا ایتشدر . چلبی خلیفه حضرت تلرینک

خلفاسندن (الشیخ خیرالدین خضر توقادی) بوتکیه ده شیخ

اولوب بعده (الشیخ محمد افندی) بعده احفادندن (الشیخ

خضر افندی) بوتکیه ده سجاده نشین طریقت خلوتیه اولمشدر .

مؤخرآ آرپه جی زاده (الحاج عثمان افندی) و ۱۰۹۷ ده

علمادن (اسماعیل افندی) و ۱۱۱۵ ده قصریدنن مخدومی

(محمد افندی) و ۱۱۳۲ ده وفاتیه ثانیاً پدری (اسماعیل افندی)

و ۱۱۳۷ ده حفیدی (السید عبدالرحمن افندی) و ۱۱۴۰ ده

وفاتیه آرپه جی زاده (الشیخ عثمان افندی) بن عبدالرحمن

افندی و ۱۱۵۱ ده وفاتیه اوغللری ابراهیم و عبدالغفور

وعبدالحمید مشترکاً تکیه شیخی اولمشدر .

انجق بونلر نااهل اولدینی مناسبتله عبدالحمیدک بر ماه

صکره فوتندن (حافظ سلیمان افندی) و ۱۱۶۶ ده حافظ

ابراهیمک رفعیاه مشاهیر علمادن (الحاج مصطفی افندی)

تکیه شیخی اولوب (عبدالغفور افندی) ابقا ایدلمش و حافظ

سلیمان افندینک ۱۱۵۹ ده فوتیه (عبدالکریم افندی)

و ۱۱۶۰ ده بونک ده رفعیاه علمادن (احمد افندی) و ۱۱۹۳ ده

قصر یدیلہ (عبدالسلام افندی) و ۱۲۱۷ دە وفاتیلہ کوچک
مخدومی (محمد عارف افندی) و ۱۲۲۳ دە وفاتیلہ (علی
افندی) تکیہ شیخی اولمشلردر .

دیگر شیخ (الحاج مصطفی افندی) ۱۱۷۳ دە وفاتیلہ
مخدومی (حافظ عبداہ افندی) و ۱۱۷۹ دە بوده فوتیلہ کلن
(خلیل چلبی) بر ماه صکرہ رفع اولنہرق حافظ عبداہ
افدینک اوغللری (حافظ محمد ، عبدالرحمن) شیخ اولمش
و حافظ محمد افدینک ۱۱۹۲ دە فوتیلہ اوغللری (احمد
وابراہیم) و ۱۲۰۰ دە بونلرک و ۱۲۰۱ دە عموجہلری حافظ
عبدالرحمن افدینک قصریدلرندن علمادن زینت زاده السید
علی افدینک مخدومی (السیدالحاج عمر چلبی) و ۱۲۲۰ دە
فوتیلہ اوغللری حاجی یوسف زاده دیمکله مشہور (السید
محمد ، علی ، ثابت ، سلیم ، احمد) چلبیلر تکیہ شیخی اولمشلردر .
بالاخرہ برادرلرینک مجموع حصہلریلہ دیگر حصہدار
اولان علی افدینک حصہلرینہ ۱۲۴۱ دە متصرف اولان
اسبق امامیہ متسلمی حاجی یوسف اغا زاده (السید الحاج
علی اغا) ۱۲۴۴ دە مقتول اولمقلہ مشیخت جہتی اوغللری
(السید عبدالرحمن اشرف ، محمد راشد) افندیلرہ قالمش
وبونلرک طرفندن مشہیر علمادن جانیکللی (الحاج محمد افندی)
وبعدہ مخدومی (الحاج محمد حامی افندی) وبعده بونک
مخدومی (الحاج احمد افندی) وبر مدت مفتی اسبق کورجی

(الحاج عثمان افندی) ابتدا وکالة بعده اصاله اجرای مشیخت و ختم خواجگان قرائت ایتمش لر در .

۲۵ (مفتی اوغلی تکیه سی) امامیه مفتیلرندن تاج الدین افندی زاده (احمد افندی) طرفندن ۱۰۱۲ ده بنا ایدلمش اولدینی مضبوط ایسه ده ۱۰۹۹ حریقده یانديغندن زرده اولدیغنه دائر معلومات یوقدر . بوتکیه خلوتیلره مخصوص اولوب (هدایی محمود افندی) حضرتلرینک خلفاسندن (الشیخ علی افندی) ابتدا بوتکیه یه شیخ اولوب ارتحالمده خلیفه سی (الشیخ مصطفی افندی) بعده (الشیخ رمضان افندی) بعده (الشیخ یعقوب افندی) اجرای مشیخت ایتمش لر در .

۲۶ (ملک غازی تکیه سی) یورکچ پاشا جامع شریفنک شرق شمالیسنده کائن مزارلغک شرقمده اولوب بیرام بک زاده ملک الامرا (غازی اسماعیل بک) طرفندن ۸۱۹ ده بنا و اوقافی تنظیم ایدلمش در . بوزوایه مکرراً خراب و معمور اولوب اک صوکره طاشکوپرلی الشیخ الحاج عبده افندینک خواص مریدانندن قاضی زاده (السید سنبل محمد افندی) ۱۲۴۱ ده مجدداً اعمار و یاننده بر مسجد شریف احیا و اوراده اجرای مشیخت و تولیت ایتمش و (سنبل تکیه سی) دیمکله مشهور اولمش و ۱۲۷۱ ده وفاتیلره مخدومی (السید حافظ عثمان افندی) متولی اولدیه ده مشیخت (السید سنبل افندی) یه منحصر قالمش در .

۲۷ (مولوینجه) حکومت کوپریسی جوارنده یشیل ایرماق

ساحلنده اولوب اما-یه ده ایکنجی درجه ده تاریخی برتکیه در
 قیود واوراق عتیقه ده « مولویخانه مرحوم علاءالدین در اما-یه »
 و « مولویخانه پروانه در اما-یه » نامیه مسطور و سجلات شرعی ده
 « مولویخانه مرحوم علاءالدین پروانه بك » ديه مقید و ۱۰۷۱ ده
 ضایع اولان وقفیه سنك مندرجاتی شهادتیه اثبات اولنه رق
 (علاءالدین پروانه بك) نامه مسجل اولدیغه بناء ۷۱۴ ده
 (علاءالدین علی پروانه بك) طرفدن بنا و اوقافی تنظیم
 ایدلیکی اكلاشلمقه در [۱]

لكن مولویلك اما-یه ده موجودتی مولویخانه بناسندن
 مقدم اولدیغی شهسزدر . چونكه ۶۷۵ ده (الشیخ ولی الدین
 احمد دده) و ۶۸۳ ده (علاءالدین علی دده) و ۶۹۹ ده
 (الشیخ جلال الدین محمد دد) مولوی شیخی اولدقلى ، الده
 ایدیلن وثائق عتیقه دن ظاهر اولور . پروانه بكك مولویخانه یی
 بنا ایتدیکی زمانلرده مولوی شیخی (الشیخ یوسف دده) اولوب
 (شاد کلدی پادشاه) دورنده زلوی نصرت زاده (الشیخ
 جمال الدین احمد دده) بعده خلیفه سی (الشیخ محمد جوعی دده)
 مولویخانه شیخی اولمشلردر .

شیخ جوعی دده کندی قریه سنده مولویخانه بنا ایده ك

[۱] ۶۳۶ شوالنده وفات ایدن (سلطان علاءالدین سلجوق)
 طرفندن بنا ایدلیکی ادعاسی ، ۶۷۲ ده ارتحال ایدن مولانا جلال الدین
 محمد رومی) حضرتلرینك انتشار طریق تأمل اولنورسه بك واهی اولور .

اورایه چکد کده (الشیخ مجدالدین کوبه‌لی دده) بعده ۸۴۰ ده
 (الشیخ مستجد دده) مولویخانه شیخی کورلمش و ۹۷۵ ده
 (الشیخ عمر چلبی) بعده (الشیخ ابراهیم چلبی) مولوی شیخی
 اولدینی ائنده اشقیا وقعه‌سی ظهوریله ۱۰۱۱ ده مولویخانه محترق
 وشیخی ده منعدم اولمشر .

بو ابراهیم چلبی مخدومی (الشیخ محمد عارف دده) صدر
 اسبق (بیرام پاشا) یه عرض کیفیت ایدرک ۱۰۴۷ ده صدر
 مشارالیه طرفندن مولویخانه بنا وواقفی توسیع ایدلمش وابتدا
 مومی الیه (الشیخ محمد عارف دده) بعده دامادی (الشیخ
 محمود دده) بعده (عبدالقادر دده) بعده (الشیخ علاء الدین
 دده) مولویخانه شیخی اولمش و ۱۱۱۲ ده بونک وفاتیه (ابراهیم
 چلبی) متولی و (الشیخ بلال افندی) شیخ اولدینی حالده
 ۱۱۱۳ ده (الشیخ بلال افندی) متولی دخی اولمشر .

۱۱۱۸ ده ارتحال ایدوب هر ایکی جهت محمد عارف دده
 اولادندن (الحاج عثمان ثاقب افندی) یه ویرلمش و ۱۱۱۸ ده
 رفغندن (الشیخ ابوبکر دده) مولویخانه شیخی و (مصطفی
 افندی) ۱۱۲۱ ده فوتیه مخدومی (علی چلبی) و ۱۱۲۶ ده
 فوتیه مومی الیه (الحاج عثمان ثاقب افندی) متولیمی اولوب
 ۱۱۳۱ ده شیخ ابوبکر دده‌نک وفاتیه مولویخانه شیخی اولان
 (الشیخ صالح دده افندی) حاجی عثمان اقدینک رفمنده متولی
 دخی اولدیسده ۱۱۳۵ ده (سید حافظ خلیل چلبی)

متولی و برادری (السید حافظ مصطفی چلبی) ناظر اولشدر .
 بعده بر قاج دفعه تولیت و نظارت جهتلری رفع و توجیه
 اولتهرق ۱۱۴۳ ده (الشیخ صالح دده) متولی و ناظر اولش
 و ۱۱۵۱ ده ارتحال ایدوب (درویش محمد دده) بعده ۱۱۶۶ ده
 و قاتیلہ شیخ جوعی مشوینخوانی (الشیخ اسماعیل دده)
 و ۱۱۷۷ ده و قاتیلہ حاجی زاده (الشیخ احمد دده) [۱]
 ۱۱۹۰ ده و قاتیلہ اسماعیل دده زاده (فیض الله دده) ۱۱۹۴ ده
 رفعلیه (السید حسن دده) و ۱۲۰۴ ده بوده رفع اولتهرق
 الشیخ احمد دده زاده (فیض الله دده افندی) مولوینخانه شیخی
 و شیخ جوعی مشوینخوانی اولشدر .

۱۲۰۸ ده فیض الله دده نك رفعلیه برادری السید عبدالله
 دده مشوینخوان و احمد دده نك برادر زاده سی (حسین دده
 افندی) مولوینخانه شیخی اولدیه ده ۱۲۰۹ ده بوده رفع اولتهرق
 احمد دده زاده (السید محمد کامی دده) یالکیز مولوینخانه شیخی
 اولش و ۱۲۲۷ ده و قاتیلہ الشیخ حسین دده زاده (السید
 محمد افندی) مولوینخانه شیخی و کامی دده زاده (السید محمد
 ثابت دده) دخی شیخ جوعی مشوینخوانی اولدینی حالد ۱۲۲۸

[۱] شیخ جوعی متولیلرندن ۱۱۴۳ ده وفات ایدن حاجی محمد

چلبی زاده سعید دده نك مخدومیدر .

فوت اولديغندن السيد محمد دده مولويخانه شيخي وشيخ جوعى
مثنويخوانى اولمشدر . [۱]

اون بش سنه قدر (السيد محمد دده) مولويخانه شيخي
اولوب ۱۲۴۴ ده قونيه دن عودت ايدرکن مقتول اولمقله السيد
ثابت دده زاده (السيد احمد سالم دده) وبعده حسين دده
زاده (السيد حسن دده) بعده برادري (السيد علي رضادده)
وبعده وفاتيله مخدومي (السيد محمد صدقي دده) وبعده مخدومي
(السيد احمد دده) بعده مخدومي (السيد جمال الدين محمد دده)
اليوم مولويخانه شيخي اولمشدر .

۲۸ (ميدان تكيه سي) ميدان کوپريسي باشنده شمال غربي
طرفده سابق الدين محله سنده در (اهلي خاتون تكيه سي) ده
دينور . اما سيه اميري شاد گلدي پاشا زاده دواتدار احمد پاشانك
كريمه صالحه سي (اهلي خانون) ۸۷۱ ده بنا و اوقافي تنظيم
وتوليتني برادري بوراق بك زاده (احمد ، محمد) چليلره تخصيص
ايتمشدر . خاتون مشارالیهانك قبری بوتكيه دروننده اولديغندن

[۱] شيخ مومي اليه ، ۱۲۳۵ ده مثنويخوانلني برادري (السيد
حسن دده) يه وبوده ، ۱۲۴۵ ده الشيخ مصطفي افندي زاده
(عثمان خليفه) يه قصر يد ايتمش و ۱۲۶۹ ده عثمان افنديك وفاتيله
(السيد الشيخ ابوبكر وحدتي افندي) و ۱۲۸۷ ده وفاتيله (الحاج
مصطفي رفقي افندي) وبونك ده وفاتيله مخدومي (حسام الدين دده
افندي) مثنويخوان اولمشدر .

یومی یدی جزء شریف قرانتنی اولادینه ومشیختنی ارباب استحقاقه شرط ایتشدر .

مشاهیر خلوتیه دن (السید الشیخ علی افندی) بوتکیه شیخی ایکن ۱۱۱۳ ده وفاتیه اوغللری (السید اسماعیل ، ابراهیم ، عثمان) افندیلر مشترکاً وراثتله شیخ اولوب ۱۱۴۷ ده السید اسماعیل افندی زاده (الشیخ السید علی افندی) و ۱۱۵۵ ده فوتیه اوغلی (السید محمد خلیفه) شیخ ومتولی اولدینی حالد ۱۱۸۹ ده فوتیه (السید عبده ، حسین ، یونس) و ۱۲۱۴ ده (السید مصطفی بن السید عبده) و (السید محمد بن السید حسین) مشترکاً و السید مصطفی ۱۲۱۷ ده فوتیه عمزاده سی (السید محمد چلبی) مستقلاً شیخ ومتولی اولدیه ده تکیه خراب اولمشدر .

۲۹ (نوح تکیه سی) چریباشی محله سنک شرقاً منتهاسنده چوریم مزارلغک التمه یول اوزرنده کوریلن اوافق مزارلق یریدر . اوراسی مقدا اسبق امامیه مفتیسی متولی زاده (الحاج احمد افندی) طرفدن ۱۱۱۶ ده مدرسه یاپیلمش ایکن ۱۱۴۳ ده محترق واعاده ایده جـک وقفی ده مفقود اولدیغدن دیگر متولی زاده (الحاج علی اغا) برزایه خلوتیه بنا ومشیختنی درسعام افندیلره تخصیص و اوقافی تنظیم ایتشدر .

ابتدا عبادالله جامعی و کرسی شیخی الحاج خضر افندی زاده (الشیخ الحاج نوح افندی) بعده (الشیخ عبدالرحمن

افندی) بعده (الشیخ مصطفی افندی) تکیه شیخی و چرباشی
جامعی واعظی اولدیغندن تکیه، (الشیخ نوح افندی) یه نسبت
ایدلش و ۱۲۳۳ حریقنده یانوب عقارات موقوفه سی ده ضایع
و مقدا تکیه شیخلرینه مدفن اولدیغی جهتله اعاده سی ممکن
اوله میوب عمومی مزارلق حالی آلمشدر .

۳۰ (یاقوتیه تکیه سی) تیمار خاننك جنوب غربیسنده
یشیل ایرماق ساحلنده کائن یولك اوزرنده در . مسجدی و
شیخ اوطه سی و مسافر خانه سی و عمارتی اولوب بونلر عموماً
کارگیر و غایت متین اوله رق امرای عثمانیه دن (یاقوت پاشا)
طرفدن ۸۱۴ ده بنا و تولیتی ابتدا شیخ اولان (محمد بن عبده
بخاری) یه و اولادینه بعده یارعلی چاپی زاده (مؤید چاپی) به
و اولادینه تخصیص ایتمشدر .

(الشیخ بهاء الدین محمد بخاری) ابتدا شیخ اوله رق ایفای
تولیت ایدوب ایکوزسنه قدر اولادی متولی لولملر در علامدان
خیلی ذوات تکیه شیخی اولوب متقاعدین علامدان (الشیخ
عثمان افندی) شیخ و منقرض اولان محمد بخاری اولادی رینه
متولی اولدیغی حالد ۱۰۸۰ ده ارتحال ایلدیکندن مؤید زاده
(عبدالباقی افندی) اثبات شرط و وراثتله یاقوتیه شیخی و متولیه سی
اولمش و ۱۰۸۵ ده ارتحال ایلدکده مخدومی (یحیی افندی)
شیخ و متولی اولوب ۱۱۲۴ ده وفاتیه له مخدوملری (السید محمد
احمد) افندی لر متولی و محمد پاشا جامعی کرسی شیخی بولیلی

(ابراهیم افندی) و ۱۱۴۱ ده مخدوملری (السید محمد امین ،
علی عارف) افندیلر تکیه شیخی اولمشلر وبعده تولیتی دخی
الده ایتمشلردر .

مؤخر ا مشیخت و تولیت ، الحق وظیفه نك اخذندن عبارت
اولدیغنه قائل اولان کیمسه لرك تسیب و اهمالیله تکیه معطل
اولدیغندن ۱۲۸۱ ده اماماسیه مفتیسی علی قیا زاده (الحاج احمد صدقی
افندی) یه فتوا خانه اولمش وبونك ارتحالنده یینه متروک
اولدینی جهتله ۱۳۰۰ ده (مکتب ابتدائی) اتخاذا ایدلمشدر .
۳۱ (یاورود تکیه سی) پرنجی محله سنك شمال شرقیسنده
درسی تمام افندی تربیه سنك قبله طرفنده در . بوتکیه یی ، امامیه
قاضیسی منلا بلكك دیمكله مشهور نظام الدین عبدالرحمن مصلحی نك
کریمه فاضله سی (سلامت خاتون) ۸۵۷ ده بنا و اوقافی تنظیم
ایتمشدر . رجال نقشبندیده دن (سعد الدین کاشغری) حضر تلرینك
خلفاسندن (صنع الله بخاری) حضر تلری وبعده مخدومی (الشیخ
عبدالودود افندی) مؤخرأ بوتکیه شیخی اوله رق مشهور و تکیه
دخی عبدالودود افندی یه نسبتله معروف اولمشلردر .

بعده (الشیخ ادهم چلبی) وبعده (الشیخ محمد چلبی)
تکیه شیخی اولوب ۱۰۹۹ ده (الشیخ محمد افندی) و ۱۱۱۰ ده
(الشیخ مصطفی افندی) تولیتله شیخ وزوایه دار اولمش و ۱۱۲۱ ده
وفاتیله اوغلی (محمد چلبی) و ۱۱۴۹ ده دیکر اوغلی (عثمان
چلبی) و ۱۱۵۳ ده فوتیله اوغلاری (عبدالله ، حسن) و ۱۱۵۴ ده

رفع لرندن درس عام (السید حافظ حسین افندی) شیخ ومتولی
اوله رق تکیه ، درس خانه اولمش وبعده مخدومی (السید مصطفی
افندی) و ۱۱۷۸ ده وفاتيله (محمود چلبی) و ۱۲۱۰ ده فوتيله
اوغلی (مصطفی) و تة قبا برادری (السید محمد) و ۱۲۲۳ ده
فوتيله فضلی زاده السید الحاج عبدالقادر افندیك اوغللری
اعیاندن (السید محمد سعید ، مصطفی) افندیلر شیخ اوله رق
وراثت ، تکیه یی خراب ایتشدیر . بوتکیه نك مسجدی واریکن
مدرس ناميله اوقافی ۱۳۱۵ ده معارف نامنه قید ایدلمشدر .
شمدی یالکیز سلامت خاتونك تربہ سی قلمشدر .

هر بر جهتی مدرسه علم و ادب در
ارباب ذکا فیضنه اعلا ی سبب در
مقبول ام ، ملجأ اصحاب طلب در
مدخول اولور البتہ دلازار امامیہ

شراعت اسلامیہ نك مداری ، جهان مدینتک مابه الافتخاری ؛
علوم و معارف در . امامیہ ؛ علوم و معارف س ایه سنده معدن
عالما ، مدارس و مکاتب سایه سنده مرکز فضلا الدینی منابته
هر طرفی ؛ مدارس علوم ، هر جهتی ؛ مکاتب معارف در .
مؤسسات علمیہ سنك کثرتی ، فضائل کالیہ سنك شهرتی
اعتباريله امامیہ ؛ قدیمآ مقبول انام اولدیمندن علما و طلبه لوم ،
هر زمان بومعدن علومه مراجعتله اکتساب فیوضات ایدهرک

نائل سعادت اولدقلری تاریخه مدققانه بر نظر دن ا کلاشیلیر .
 اماسیه ده علوم و معارفک بدایت حالی ، ترقی استقبالی کشف
 و تعین ایتمک ، انجق مدارس و مکانیک توارخ بنا و اعمارینی
 بیلمکله ممکندر . ترقیات فیکریه نیک بر نتیجه مسعوده سی اولان
 بو مؤسسات عامیه دن اول ، تنویر افیکاره همت ایدن علمانک
 نشر علوم و معارفه اولان خدماتی و بونک صورت سیرو جریانی
 تعقیب ایتمک ، عز مکارانه فتوحاتی اقدم وظائف بیلن ام سلفه
 اسلامیه نیک علوم و معارفه و یردکلی قیمتی ، تقدیر ایتدکلی
 اهمیتی اکلامغه مدار واجدادینک احفادی اولدیغی عزم
 و متانتله اکلامق ایسته یین اخلافه دخی سرمایه تیقظ و افتخار
 اولور .

اما سیه نیک بدایت فتح نیدن ۵۳۸ تاریخه قدر حکومت
 دانشمندیه ملوکی ، اماسیه خوارزم و خراسان طرفلر دن آقین ،
 آقین کلن تورک او یماقلرینک اسکانی و اماسیه یی قورتارمق
 ایچون هر سنه تجدید هجوم و صولات ایدن روم و متعاقباً اهل
 صلیب فرقه لرینه قارشو مدفعه و منع تجاوز ایله فوق العاده
 مشغول اولدیغدن خارجدن کلش اولان علما ایله انجق تأمین
 حقوق و توزیع عدالته ساعی اولدقلری جهته نشر علومه
 مساعد بر زمان بوله مدقلری تبعات تاریخیه دن ا کلاشیلیر .
 فقط بوتاریخده آل سلجوقه انتقال ایدن اماسیه ؛ مرکز سلطنت
 اولدینی جهته (سلطان مسعود سلجوقی) مدنیت اسلامییه یی

اماسیه‌ده تأسیسه همت ایدرک جامع ، مدرسه ، خانقاه کبی
مؤسسات علمیه و دینییه طرح اساس ایتشدر .

بعده اماسیه والیری بولونان (مبارزالدین خلیفه الپ)
ایله (سیفالدین طورمطای) برر مدرسه‌ئه عالییه بنا و تدریس
علوم ایدن علما و مدرسینه تخصیصات کافییه اعطا و خارجدن
اماسیه‌یه کلن علمایی ، کرک امرا ، کرک اعیان و کبرا بذل
نقود و معاشات ایله اغنا ایتدکاری جهته هرات ، خراسان ،
خوارزم ، بخارا کبی بلاد بعیده و مهمه‌دن اماسیه‌یه علما و فقها
کلوب تعمیم معارفه ، نشر علومه غیرت ایتش اولدقلرینی الیه
ایدیلن و ثائق عتیقه اثبات ایتدکده در .

عبدالمک البرکندی ، ابونصر الکشانی ، محمودالپسوی ،
تقی‌الدین عثمان‌الهروی ، فخرالدین محمدالبخاری ، تاج‌الدین
یوسف‌التبریزی ، ضیاءالدین عیسی‌الهکاری ، نجیب‌الدین موسی
الحلاطی ، سعدالدین محمدالرومیکی کبی فضلا اماسیه‌ده تدریس
علومه اقدام و نشر فیوضاته قیام ایدرک پک چوق تلمیذلر
یتشدرمشلردر . بونلردن تقی‌الدین عثمان‌الرومی ، بدرالدین
ابراهیم‌القیاری ، صدرالدین محمدالاماسی ، الحاج مجدالدین عیسی
الساغری کبی فضلا اماسیه‌دن ظهور ایدرک بنام اولمشلردر .
حکومت ایلخانیه نفوذی اماسیه‌ده جاری اولدینی زمانلرده
تاتارلرک مظالم و سیئاتی کسب دهشت ایلدیکنی کورن شوعلما
اسلام ؛ وظائف علمیه‌ده اصلا فتوره دوچار اولمقسزین تاتارلری

رفق وملايتمله ايفاظ وافكار وحسيات غليظه لرني يموشاده رق
دائرة اسلاميه ادخال ايتلمرى ، قوه مسلحه نك عاجز اولديغى
برموقعده قوه ناطقه نك ، علوم عاليه نك نه قدر مدهش بر سلاح
موفقيت اولديغى اثبات ايدر .

بناء عليه آل سلجوقك نفوذى اماسيه ده زائل اولديغى
صره ده تاتارلرك دين جليل اسلامى قبول ايتلمرى علوم ومعارفك
نشر وتعميمنه كرمى ويرمش اولديغندن ۷۰۰ تاريخندن اعتباراً
اسكى مسلك دها زياده رواج بولمش وهر طرفدن اماسيه كلن
علما ، فضلا مقدارينه كوره اقدار ، فضل وكمالنه كوره اعتبار
كوروب مشاهير امرادن (ناصر الدين احمد اتا بك) مدارس
موجوديه بر مدرسه دها علاوه ايدرك علمانك وطلبة علومك
ترفيه احوالنه تقود وهمت نثار ايتمشدر .

بوسكزنچى قرنك فضلاسندن اماسيه ده نشر علوم ايدن
بيوك وكوچك شمس الدين محمد ننجوانى ، جمال الدين ابراهيم
اقسرايى ، مصلح الدين موسى سيواسى ، شرف الدين محمد ارزنجانى ،
سعد الدين محمد الحجندى ، زين الدين سياوش الدفركى ، قوام الدين
قاسم الارزنجانى كې ذواتى متعاقب مجد الدين عمر ، شمس الدين احمد ،
بدر الدين طوغان ، فخر الدين الياس ، نظام الدين عبد الملك ،
صدر الدين ارتق ، فخر الدين عثمان ، ضياء الدين مسعود ،
جلال الدين عبد الرحمن كې فضلا اماسيه لواسندن ظهور وعالم
تدريس وقضا واقفاده اشتهار ايتمشلردر .

۷۸۸ تاریخندن اعتباراً اماسیه امارتی ؛ سلطنت جلیله عثمانیه حمایه سنی کمال افتخارایله قبول ایتدکدن صوکره شهزادگان کرامه تعلیمگاه سطوت اولمسی ؛ اماسیه نك قدرینی اعلا و ترقیات علوم و معارفی احیا ایلدیکندن وزرا ، اعیان طرفلرندن بذل نقود و همت ایدیلرک مؤسسات علمییه تزیید ایتمشدر .

طقوزنجی قرنک اوائلندن قانونی سلطان سلیمان خان حضر تلمرینک جلوسنه قدر اماسیه ده بنا ایدیلن مؤسسات علمییه نك مقداری ، کالنی بولمش و بوزمانلرک یتشدیردیکی فضلانک امثالنی اماسیه ، بودور کالدن صکره نادرآ کورمشدر . یعقوب پاشا ، یورکچ پاشا ، خضر پاشا ، محمد پاشا ؛ عبدالله پاشا ، قاسم بک ، حسین اغا ، ایاس اغا کبی ارباب همت برر مدرسه عالییه بنا و علما و طلبه علومه تخصیصات کافییه اعطا ایدرک نشر علوم و معارفه مالاً خدمت بیورمشلردر .

سکزنجی قرنک بقیاسندن اولان کومشلی زاده شجاع الدین ایاس ، جلال الدین عبدالرحمن ، شمس الدین محمد بنخاری ، تاج الدین ابراهیم توقادی کبی فضلانک یتشدیردیکی و خارجدن کلن پیر صنع الله اماسی ، فرید الدین محمد دوانی ، مؤید چلبی ، مدرس زاده حسام الدین رومی ، جلال الدین یوسف چلبی ، عبری زاده منلا محی الدین ، سیدی احمد قریمی ، منلا رجب رومی ، سیدی عبدالله افندی ، منلا مدرس عبدی ، خطیب قاسم ، منلا بنخشی ، تاج الدین اماسی ، منلا شادیلو محی الدین ،

منلا سنان بردعی ، قوجه امیر ابراهیم افندی ، منلا مصلح الدین
وامثالی فضلا اماسیه بی برنجی درجه ده بر دارالفنون حائله
قویملردر .

۹۲۶ تاریخندن ۱۰۴۱ تاریخنه قدر موجوده انحق ایی
مدرسه علاوه ایدیله بیللمش ایسه ده شو ذواتک یتشدیردیکی
حقالهل منلا محی الدین ، توقادلی منلا علاء الدین ، منلا کمال
خلیفه ، منلا شیخ الیاس ، شیخ سنان ، بخش زاده یحیی ،
مؤید زاده پیری ، قاضی زاده کوچک محمد افندیلر عالم تدریسده
پک مشهور اولملردر . بونلری درجه کماله ایصال ایدن اسبابک
برنجیسنی ؛ اماسیه ده بولنان مدارس علمیه نک اربانه توجیهی
وهروجهله علمانک ترفیهی خصوصاننده آراق ایجاب ایدر .
چونکه ۱۰۰۴ تاریخنده اساسی وضع اولونان اصول وراثت
تدریجی بر صورتده اجرای تأثیر ایدرک پدرینک حین وفاتنده
مجاز اولان اولاده جهات علمیه توجیه ایدلیدکندن علما
زادکانی تحصیل علومه تشویق ایدلمش ایسه ده افراد اوزرنده
خفیف بر تأثیر اویندیرمقدنده خالی قالمه مش و مدارس موجوده
حالی اوزره قالب تراید ایدمه مشدر . بو قرنک یتشدیردیکی علما
یغمور کویلی اسماعیل ، خواجه زاده عبدالله ، جعفر زاده الحاج
خضر ، اوزون مدرس محمد ، چوروملی الحاج عمر ، دیگر
الحاج اسماعیل افندیلر کبی فضالادر .

۱۰۹۸ وقعه هائله سی اماسیه ده عموم جهات علمیه بی زیروزبر

ایده‌رک اصول وراثت ؛ تحصیل علم اوزرنده بولسان اولاده شامل اولدیغندن تدریس ، مشیخت ، خطابت و امامت کبی جهات مهمه‌ده نیابت اصولی احداث و ۱۲۴۱ تاریخنه قدر شواصول نیابت ؛ مدارسک بعضلرینی خراب ، دیکرلرینی اعمار ایتمشدر . مع‌هذا او عصر ایچنده چوروملی مفتی زاده عبدالله ، متولی زاده الحاج احمد ، چوروملی حافظ محمد ، توقادلی الشیخ مصطفی ، ایناللی الحاج محمد ، اقطاعلی الشیخ مصطفی ، عیدی زاده الحاج مصطفی عاکف ، اولوسلی محمد ، سکو کویلو زاده الحاج محمد کاشف افندیلر کبی مشاهیر فضلا ظهور ایده‌رک امامیه‌یی احیا ایتمشدر .

بونلری متعاقب ارکوبلی الحاج احمد ، شیخ زاده عبدالله وجیه ، تورکمن زاده نابی ، صوروقلی الحاج علی ، پیاسلی الحاج محمد افندیلر کبی فضلا امامیه‌ده نشر علوم خدمتنده نصب نفس ایده‌رک بنام واستاذ انام اولمشلردر . بونلرک تلمیذلری اولان جانیکلی الحاج محمد ، سپاهی حافظ عمر ، طاشکوپرلی الحاج حافظ عبدالله افندیلر دخی استاذالکل اوله‌رق طانمشلردر . ۱۲۴۱ تاریخندن اعتباراً اصول وراثتی احداث ایدن اصول نیابت ؛ انحق بعض علمایی بر درجه ترفیه ایتیش اولدیغی جهته صرف برحمیت دینه اولمق اوزره بقایای اسلافدن امامیه مدرسه لرنده تحصیل علوم ایده‌رک بنام اولانلرک غیرتی سایه‌سنده امامیه اسکی شهرتی غائب ایتمه‌مشدر . شوغیر توران ایچنده جانیکلی زاده الحاج

محمد ، پیاسلی زاده الحاج عبدالحلیم ، اینه پازارلی الحاج اسماعیل ، ملاطیه لی صوفی محمد ، ایبکلی الحاج حسن ، شروانی الحاج مصطفی و عیسی افندی لر فوق العاده بنام اوله رق شمدی بونلرک تلمیذلری نشر علوم ایتمکده درلر .

تنظیمات خیریه زماننده شرائط وقفیه خلافتده اولان شواصول وراثت ، معقول و مشروع برحاله افراغ اولنمق لازم کلیرکن دیناً و زماناً پک اهمیتلی اولان مدرسه مدرسه ملکینی و مکتب معلم ملکینی چوجقلره توجیهی حقه ده کویا مخلفات موتایی ، اموال موروثیهی تقسیم ایدرکبی وضع قوانین ایدلمسی عقول سلیمه اربابی اغلاته جق احوال دن اولمقله اسلاف کرامک میایونلر صرفیله میدانه کتیردکلری مؤسسات عالیهدن استفاده یی فوق العاده تنقیص ایتمش اولدینی اماسیه ده کائن مدارس ، مکاتب و سائر مبانی علمیه نک یکان ، یکان شرح احوال دن مستبان اولور .

اماسیه ده اسلاف کرامک وجوده کتیردکلری مدرسه لر ، مکتبلر ، کتبخانه لر ، دارالقرالر تدقیق اولنورسه اماسیه یی ؛ نه قدر بویوک همتلرله دارالفنون ، مرکز علوم حالته قویدکلری اکلاشیایر . بویله بویوک همتلر درکه اماسیه یی تاریخاً مشهور بر بلده معظمه ایتمشدر .

اماسیه ده ۸۷۰ ده مدرسه سی اتصالنده خضر پاشا و ۸۹۰ ده جامعی دروننده سلطان بایزید خان ثانی و ۱۰۱۷ ده خاتونیه

جامعی اتصالده مؤید زاده پیری چلبی و ۱۱۴۷ ده بورمه
مناره جامعی دروننده حفظی زاده الحاج عثمان فائق افندی
و ۱۱۵۹ ده سلطان بایزید مکتبی قارشوسنده امیرامام عبداللطیف
افندی و ۱۲۴۸ ده تربه سی اوزرنده صاچلی الحاج محمود
افندی و ۱۲۵۸ ده موقتخانه سی دروننده قبانجی زاده الحاج
حسین زکی افندی و ۱۳۲۹ ده سلطان بایزید حوایسنده یموق
عثمان زاده محمد حمدی افندی طرفلرندن سکرکز کتبخانه بنسنا
واوقافی تنظیم ایدلمش ایسه ده عبداللطیف ، حسین ، حمدی
افندیلرک کتبخانه لری موجود ، دیکرلری پریشان ومفقوددر .
اماسیه ده معارف ابتدائیه یی تلقین ووجوه قرآنییه یی تعلیم
ایچون پک چوق مکتبلر ، دارالقرالر بنا وتأسیس ایدلمشدر .
یونلردن اوقافی مکمل ، هیئت تعلیمیه یی اعاشه ایده جک حاصلاتی
مبذول اولان مکتبلر ؛ سکرکز عدد اولوب منتظم ایکی مکتب
دخی صکره دن علاوه اولمشدر .

۱ (تمنا مکتبی) تمنا محله سنده اولوب خضر پاشانک
عتقاسندن (حسام الدین تمنای) طرفندن ۸۷۸ ده بنایدمشدر .
متین بر مکتب اولوب اوقافی منتظم ، قدیمآ هیئت تعلیمیه سی
مکمل ایدی . شمدی متروک برحالده در .

۲ (خاتونیه مکتبی) خاتونیه جامع شریفنک شرق طرفده
اولوب ۹۱۵ ده اماسیه والیسی شهزاده سلطان احمد والده سی (بلبل
خاتون) طرفندن بنایدمشدر . کارگیر ، غایت متین بر مکتب اولوب

اوقافی ده مکملدر. مشهور قواقلی (ابراهیم افندی) ۱۲۱۰ تاریخنه قدر بومکتب معلمی اولمشدر. مکتبک شهرتیه بناء ۱۳۰۰ ده (مکتب ابتدائی) اتخاذایدلمشدر.

۳ (خضر پاشا مکتبی) خضر پاشا محله سنده جامع شریفی اتصانده اولوب ۸۷۰ ده پاشای مشارالیه طرفندن بنا ایدلمشدر. بومکتب قدیمآ پک مشهور اولوب اوقافی منتظم، هیئت تعلیمیه سی مکمل ایدی. امامیه ده خطاط مشهور اولان حافظ مصطفی و محمد حسنی افندیلر بوراده معلم ایدیلر. شمعی متروک برحاله در.

۴ (سلطان بایزید مکتبی) جامع شریفک شرق طرفنده عمارت حذاسنده گوشه باشنده اولوب سلطان بایزید خان ثانی طرفندن ۸۹۰ ده بنا ایدلمشدر. بومکتبک دخی اوقافی منتظم و هیئت تعلیمیه سی مکمل ایدی. امیر امام زاده (السید خلیل افندی) و مخدومی (السید محمد امین افندی) بوراده معلم اوله رق اشتهار ایتمشلر در. ۱۳۰۰ تاریخنده (مکتب ابتدائی) اتخاذایدلمشدر.

۵ (شاهبولا مکتبی) صوفی زاده محله سنده مسجدی اتصانده اولوب یورکچ پاشا حایله سی (شاهبولا خاتون) طرفندن ۸۴۱ ده بنا و اوقافی تنظیم ایدلمشدر. قدیمآ مشهور بر مکتب اولوب شمعی مکتب صیدان اوله رق مشرف خراب برحاله طور مقده در.

۶ (عجم علی مکتبی) محله سنده چشمه سی جوارنده
و غرب طرفنده خواجه مومی الیه (الحاج عجم علی اغا)
طرفندن ۸۷۳ ده بنا و اوقافی تنظیم ایدلمشدر . بو مکتبده
(۱۲۵۸) تاریخچه قدر (بالجی خواجه) دیمکله مشهور (السید
اسماعیل افندی) معلم اولدیغندن (بالجی مکتبی) دیمکله معروف
اولمشدر . محرر عاجزک معلمی بولان (الحاج حافظ خلیل
افندی) یهده بالجی مکتبی معلمی بولندیغی مناسبتله (بالجی
خواجه) دینمشدر .

۷ (علی پاشا مکتبی) سیل اغزنده کومشلی زاده محله سی
جنوبنده بولونان و چقور باغچه یه کیدن یولک صاغ طرفنده
کوشه باشنده اولوب صدراسبق (علی پاشای عتیق) طرفندن
۹۱۶ ده بنا و اوقافی تنظیم ایدلمشدر . فحول علمادان (کرد
حافظ) دیمکله مشهور (علی افندی) ۱۱۳۰ تاریخچه قدر بوراده
معلم اولدیغی مناسبتله (کرد مکتبی) دینمشدر . ۱۳۰۶ ده
(مکتب ابتدائی انات) اتخاذ و ۱۳۲۶ ده قبه سی و کارگیری
قالدیریلوب توسیع و بناسی ترفیع ایدلمشدر .

۸ (کوچک اغا مکتبی) شاملیلر محله سنده کوچک قپواغاسی
(ایاس اغا) طرفندن ۹۰۰ ده بنا و اوقافی تنظیم ایدلمشدر .
منتظم ، بناسی لطیف و کارگیر بر مکتب شریف اولوب ۱۳۲۷ ده
(مکتب ابتدائی) اتخاذ ایدلمشدر .

مؤخرأ بونلره ایکی مکتب علاوه اولنوب برنجیسی

(حاجی حسن افندی مکتبی) در که سلطان بایزید حولیسند
اسکی دوهلك موقعنده یشیل ایرماق ساحلنده اولوب اشراف
مملکتندن زیله لی حاجی ولی زاده (الحاج حسن افندی)
طرفندن حریتک اعلاتی متعاقب اوچویز لیرا قدر برنقد مهم
صرفیه بنا و ۱۳۲۸ ذی الحجه سنده رسم کشادی اجرا و معارف
طرفندن (مکتب ابتدائی) اتخاذایدلمشدر . غایت لطیف ،
واسع بر اثر شریفدر . اوکنده چشمه سی و باغچه سی و آلتنده
متعدد حجره سی وارددر . دیکری ده (آلاجه یحیی مدرسه سی)
ذیلنده ذکر اولنه بقدر .

اماسیه ده وجوه قرآنیه بی تعلیم ، قراآت عشره بی تلقین
ایچون ارباب همت طرفندن بنا ایدیلن دارالقراالر دخی سـکـز
عدد اولوب هر برینک اوقافی منتظم ، خدامی مکمل ایدی .

۱ (چریباشی دارالقراسی) چریباشی محله سنده جامع
شریفک آلتنده و چشمه نک ارقه سنده کاثن واسع بر حجره
سـنـکـین در . پنجره سی چشمه نک موقعنده اولدینی حالده
۱۲۸۱ ده اماسیه متصرفی مشهور (ضیا پاشا) اوکنده بولونان
یولی تسویه ایتدیردیکی ائناده چشمه بی بو پنجره نک اوکنه کتیرمش
و پنجره بی سد ایدوب دارالقراالی تعطیل ایتمشدر . جامع شریف بنا
اولونورکن انشا ایدلمش اولوب والده مک جدی شیخ القرا
(الحاج خلیل افندی) بودارالقرا شیخی اولمشدر .

۲ (سلطان بایزید دارالقراسی) سلطان مشارالیه طرفندن

عمارتنك اتمكخانهسى شالنده وتابخانهك غرب طرفنده خطاط
اوطهسى صرهسندنه بنا بيورلمشدر . ۸۹۱ ده ختام بولان
دارالقرا اماسيهده مشهور اولوب يك چوقا اهل قرآن يتشدير مش
و ۱۲۶۴ ده متروك بر حالده قالوب ۱۲۹۶ ده دبوى مأمورلرينه
مسكن اولمشدر .

۳ (سلطان خانون دارالقراسى) عجم على محلهسندنه بالى
بك جامع شريفى قربنده اولديغى الده ايديلن وثائق عتيقهدهن
ا كلاسلىقمده ايسهده شمدى موجود اولمديغندن ىرى تعيين
اولنهمدى . ۹۱۱ ده اوقافى تنظيم ايدلديكنه نظراً بوتاريخده
سلطان بايزيد خان ثانى حضرتلرينك ايلك حليلهسى واماسيه
امراسندن امير بكك كريمهسى (خاتون سلطان) طرفندن بنا
ايدلمشدر . مؤخرأ جزخوانلغه تحول ايدهرك كرد حافظ
اوغللارينه وبعده توليتله برابر حاجى بك اوغللارينه توجيه
اولنمشدر .

۴ (شيخ محمد اغا دارالقراسى) محمد پاشا جامع شريفنك
جنوب طرفنده مصطفى بك حمامك ارقه طرفنده سوقا ايچنده
اولوب ۱۰۷۳ ده اعيانندن حاجى افندى زاده (شيخ محمد اغا)
طرفندن بنا واوقافى تنظيم ايدلمشدر . ياقوتيه مسجد شريفى
صرهسندنه اولان اون دكان وقارشوسنده بنا ايدليكى جسيم بر
دكرمن بو دارالقرا نك اوقاقدن ايدى . مشهور شيخ القرا

(حسن افندی) وبعده (اهل الله افندی) بودار القرا شیخی
اولمشدر .

۵ (عبدالله پاشا دارالقراسی) صوفیلر محله سنده عبدالله
پاشا جامع شریفی شرقنده اولوب مخدومی دفتر دار (عبدالکریم
بك) طرفندن ۹۱۱ ده علاوه و اوقافی تنظیم ایدلمشدر .
اوکنده باغچه سی و شمالنده چشمه سی و سائر تمه سی واردر .
مشاهیر قرادن کریدلی شیخ القرا (الحاج حافظ محمد افندی)
و شیخ القرا (یوسف افندی) بودار القرا شیخی اولمشدر .

۶ (علی چلبی دارالقراسی) ایجری شهرده قورشونلو
محله سنده جامع شریفک غرب طرفنده اولدینی کلاشلمقده ایسه ده
شمدی یری غائب اولمشدر . اسبق امامیه مفتیسی مؤید زاده
(علی چلبی) طرفندن ۸۸۴ ده بنا و اوقافی تنظیم ایدلمشدر .
مؤخرأ خراب و معدوم اولدینی جهته جز خوانلغه تحول ایده رک
برقاج مشاهیره توجیه اولمشدر .

۷ (محمود چلبی دارالقراسی) ایجری شهرده قراطای
محله سنده محمود چلبی تکیه سی اتصالنده اولوب مومی الیه عماد
زاده (بدرالدین محمود چلبی) طرفندن ۸۰۷ ده بنا ایدلمشدر .
مشاهیر قرادن شیخ القرا شیخ جوعیلی (الشیخ ابراهیم
افندی) بودار القرا شیخی ایدی ،

۸ (نوح بك دارالقراسی) یاقوتیه محله سنده تیمارخانه ک
صاغ طرفنده و زاویه یاقوتیه اتصالنده اولدینی اوراق عتیقه دن

ا کلا شلمقده در. مشهور قرامان دفترداری اماسیه لی حاجی بك زاده (نوح بك) طرفندن ۹۲۷ ده بنما ایدلمشیدی . فقط ۱۰۵۹ ده یاندیغندن بردها اعاده سی ممکن اوله مامش و اوقافی ضایع اولمشدر . مشهور شیخ القرا (حافظ محمد افندی) بودار القرا شیخی ایدی .

شوسکنز عدد دارالقرا نك اماسیه ده یتشدیردیکی اهل قرآن قدیمأ مشهور و بك چوق ایدی . مكتب صبیان دخی هر سنه بك چوق حافظ قرآن یتشدرمكده اولدیغندن اماسیه لیلرك رجالندن همان اوچده بری حافظ قرآن اوله رق طائمش ایدی . بونلرك ایچنده شیخ یحیی افندی کریمه سی (فاطمه منلا) کبی عصرینك قراسنه فائق ، اهل قرآن قادینلر دخی بولنمقده ایدی . شمدی بونلرك هدسی ده بر خیال زائل کبی اولمشدر .

و ثائق عتیقه دن ا کلا شیلدینخی اوزره اماسیه ده بوندن یوز سنه اولکی زمانه قدر یوز اوتوز قدر مكتب صبیان اولوب هر برینك اداره سی ایچون ارباب همت طرفندن نقود ، عقارات ، املاك وقف و تبرع ایدیلهرك متولیلری طرفندن مکملأ اداره ایدلمكده ایدی . اداره ایدمكده جك وقفی اولمیان مكاتبلر دخی اوعصرك - شمدی توریدی ، مغلب ، جبار دیه بکنم دیکمز - اعیانی ، اوقور یازار آغالری ، بکلری طرفندن اداره ایدلمكده ایدی .

بو قدر مكاتب صبیان دن چیقان افندیلرك لا اقل درنده بری

اماسیه مدرسه لرینه دخول ایدهرک ا کمال تحصیل ایتمکده ایدی .
 بناءً علیه شو مکتبلر ، دارالقرالر ؛ ابتدائی واعدادی حکمنده
 اولوب مدارس علمیه دخی مکاتب عالیہ صره سنده ایدی .
 اماسیه ده تحصیل ایدیلن علوم عالیہ اوچ قسم اعتبار ایدیلوب
 بر قسمی تفسیر ، حدیث ، اصول ، فقه ، کلام کبی علوم
 شرعیہ دن و بر قسمی دخی حکمت ، منطق ، طب ، هندسه ،
 حساب ، کبی علوم عقلیه دن و قسم دیگر دیده معانی ، بیان ، لغت ،
 نحو ، صرف ، تاریخ ، محاضره ، شعر کبی فنون ادبیہ دن
 عبارت ایدی .

لغت ؛ انجق عربی و فارسی لسانلرینه منحصر اولوب
 حساب ، هندسه ، تاریخ دخی مقدملرنده پک زیاده اعتنا ایدلمش
 اولدینگی حالده مؤخرأ ابتدائی بر حالده قلمش و تاریخ ایسه ادوار
 اسلامییه منحصر کبی اولمشیدی . بناءً علیه اک زیاده اعتنا ایله
 تحصیل ایدیلن علوم شرعیہ اولدیغندن اماسیه ده بو قسم شرعی
 ایله قسم ثالث فنون عربیه سی پک زیاده ترقی ایتمشیدی . قسم
 ثانی رجالی دیگر بلاده نسبتله اماسیه ده نادر دکل ایدی .

فقط بو قسم شرعی ایچنده (علم حدیث) بر اصول مخصوصه
 اوزره طرق واسانیده ، تراجم رجاله و تنقید احوال رواته
 مستند بر علم واسع اولدیغندن بو عالمی ؛ اسلاف کرام علوم
 سائرهن تفریق ایدهرک تحصیلنه مخصوص برر مدرسه بنا و
 (دارالحديث) ناميله تسميه ايتمشلورد . اماسیه ده درت دانه

(دارالحدیث) اولوب بونلر ؛ دارالحدیث عبداللہ پاشا ، دارالحدیث عثمان چلبی ، دارالحدیث ابراہیم افندی ، دارالحدیث عثمان بك نامیله مشہور اولہرق مدارس علمیه صرہسندہ ذکر اولنہ جقدر . بو دارالحدیثلرہ علم حدیثدہ اختصاصی اولان علملر مدرس اولہرق صحیح بخاری ، صحیح بخاری ، صحیح مسلم کبی علم حدیثہ مخصوص کتابلر ؛ تدریس وبر حدیثک صدق و کذبکی اکلامق ایچون تدوین اولونان کتابلر ؛ یعنی اصول حدیث ، طبقات روات ، تراجم رجال کبی فنونہ مخصوص مدونات اہل حدیث ، تعلیم اولنور ایدی . اما سیہدہ بو کبی محدثلر ۱۲۴۱ تاریخنہ قدر نادر اولمدینی حالہ دارالحدیثلرہ بر طاقم صبیان وارباب حرف و صنایع ارتا محدث ، مدرس اولدینی جہتلہ مؤخرآ کسب ندرت ایتشدیر .

دیگر علوم شرعیہ وقون عریہ وادیہ مدرسہ لرده مدرسہ لر ، درسہ عاملر طرفندن تدریس و بیضاوی ، مطالع ، مواقف یاخود مقاصد ، اصول بزدوی ، ہدایہ و شروحي ، مطول ، مغی الایب ، فناری ، جامی ، شافیہ شرحی رضی و اظہار کتابلری کمال اتقان ایله قرائت و تقریر و اکثر شروح و حواشی طلبہ علومک مطالعہ و مراجعتلرینہ ترک اولنور ایدی . عوامل ، اظہار ، شافیہ ، کافیہ ، منار منلری ہر طالب علم طرفندن مطابق حفظ و دائماً ازبردن قرائت اولنور و تمرین ایچون مسئلہ مشکلہ ایراد اولنہرق اثنای درسہ طلبہ علومک افکار ذاتیہ سی ،

مقدار ذکاسی و حواشی به مراجعتی یوقلمه ایدیلیر ایدی .
 شوعلومک تحصیلی ائناسنده تراجم اصحاب ، طبقات علما ،
 احوال روات ، سیر محدثین ، هر حالده سیرت نبویه عائد
 کتابلر ايله ادبیات عربیه به ، تواریخ اسلافه ، خصوصیه تاریخ
 اسلامه دائر مؤلفاتدن انفع اولانلری قرائت و مطالعه اولنه رق
 طلبه نك اذهانی توسیع اولنور ایدی . بعده طلبه علوم اجازت
 آلدینی ائناده مکمل بر عالم اولور و لااقل ایکی سنه بر مدرس
 عالی همه معید اوله رق تدریس علومه کسب استعداد ایدرسه
 اساتذّه زمانك لااقل اوچی طرفندن تدریس و نشر علومه
 اقتداری تصدیق اولندقدن صوکره انحق درسعام اوله بیلیر ایدی .
 بر مجاز افندی ؛ ابتدا معید اولدینی زمان یومی بش اچّه ،
 ملازم اولدینی زمان ، اون اچّه ، درسعام اولدینی زمان یکرمی
 اچّه وظیفه آلیر و هر سنه بشر ، بشر تزید اوله رق قرق اچّه به
 قدر ارتقا ایلدیکی زمان سلسله مدرسینه داخل اولور ایدی .
 اما سیه ده اوچ جهتدن سلسله دوام ایدوب التمش اچّه به قدر
 ارتقا ایدن مدرسین ؛ آرزو ایدر لر سه طشره مولویتلرندن بریله
 سلسله علمادن چیقار ، مسلك قضاته کیرر ، هر نه زمان آرزو
 ایدرسه تکرار سلسله علمایه چیقدینی راده دن دخول ایده رك
 مدرسلکه تعیین اولنور ایدی . مسلك علماده ایکی جهت اولوب
 بری تدریس ، دیگری وعظ یعنی کرسی شیخلکی ایدی .
 کرسی شیخلری دخی درسعام اولدینی حالده اوچ قولدن ترقی

ایده رك التمشده ديكړ علما ايله برلشیر وعلمان اختيار تقاعد ایدنلر؛ برتکیه شیخلکی ویاخو دمؤبداً بر مدرسہ مدرسلیکی ايله سلسله علمادن چیقار ایدی . اما سیه ده علمادن درجه خمسین راده سنه واصل اوله میانلر ؛ قضایه وستین راده سنه واصل اوله میانلر ؛ افتایه اصلاً انتخاب اولنه مازلر ایدی . امامت ؛ مشایخ قرادن ، هر حاله قرادن اولانلره وخطابت دخی اربعین راده سنه واصل اولان علمایه توجیه اولنق قانون قدیم ایدی . درسدن مجاز اولیان کیمسه لره امامت وجزء خوانلق ودرس عام اولیانلره تدریس ، خطابت ومشیخت کبی جهات علمیة توجیهی ممنوع ایدی ، شو اصول قدیمه ۱۱۰۰ تاریخلرینه قدر محافظه اولندینی حاله مؤخرأ جهات علمیة نك مربوط سلسله وراثت اولسی شو اصول قدیمه بی زیروزبر وعلماییه مضطر ایتمش واسکی اصول درس وفکر ترقی یرینه مراسم وعادات قائم اولمشدر .

اما سیه ده علوم عالیہ تدریس اولنان مدارس اوچ راده اوزرینه ترتیب اولنه رقی بری اربعین ، دیکری خمسین ، اوبری ستین اعتبار ایدلمشدر . اربعین راده سنه اولان بر مدرس لاقل بش سنه تدریس علوم ایده رك خمسینه وبعده ینه لاقل بش سنه علوم عالیہ تدریس ایده رك ستینه واصل اوله بیلیر ایدی . بونلر بر سلسله منتظمیه تابع اولوب مدرسین آراسنده تقدم وتأخر دخی بو مراتبه تابع طوتولور ایدی .

بناء عليه : بيك تاريخنه قدر اماسيه ده موجود اولان مدارس ؛
شواوچ تقسيم اوزره ترتيب ايدلمش ايسده مؤخرأ سلسله وراثت
بوترتيبات منتظمه يي بوزديغندن مدرسه ستين ، مدرسه حسين ،
مدرسه اربعين تعبيرلري اصطلاح قديم صره سنه كيرمشدر .
ايسته بومدارس ايله صوكره دن بنا و اعمار ايديلن بالجمله مدارس
اماسيه ، حروف هجا ترتيب اوزره ذكر اولنور .

۱ (آلاجه يحيي مدرسه سي) سراجخانه جامع شريفنك
شرق طرفنده يشيل ايرماق اوزرنده ايدى . بومدرسه يي ، ابتدا
اماسيه اميرى (شاد كادى پادشاه) ۷۷۵ حدودنده بناومدرسه ليكني
علمادن (صدرالدين آرتق التركانى) يه اعطا ايتديكى وثائق عتيقه
مطالعه سندن اكلاشلمشدر . بعده امير مشاراليهك احفادنن
سلطان بايزيد خان ثانى حضر تلرينك اماسيه واليه كننده ايكن
لالاسى بولونان (آلاجه يحيي بك) طرفندن ۸۷۵ ده مجدداً
اعمار و اوقافى تنظيم ايدليكي مناسبته مدرسه ، بوذاتك شهرت
واسميله بنام اولمشدر .

۱۱۰۰ تاريخنه قدر بك چوق فضلا بومدرسه يه مدرس
وبعده ظنه لى (السيد احمد افندى) اولادى وارث اوله رق
احفادنن باقرجى زاده (السيد مصطفى افندى) نك و فاتيحه
مخدومى (حافظ السيد نورالدين محمد افندى) ۱۲۴۸ ده مدرس
اولديسه ده مسلك قضاده بولنوب وكالتله اداره مصلحت ايدليكنندن

مدرسه متروک بر حالدہ قالمش و ۱۲۸۱ دہ اماسیہ متصرفی مشہور (ضیا پاشا) ہدم ایدوب یرینہ مکمل ، عالی بر (رشدیہ مکتبی) بنا ایتمشیدی .

بو مکتب اتوز سنہ افکار مملکتی تنویرہ خادم اولوب پک چوق اذکیا یتشدرمش اولدینی حالہ ۱۳۱۱ حریق اغتشاشندہ یانمش و اون بش سنہ قدر عرصہ خالیہ اولہرق قالمش ایکن اشراف مملکتدن طوپیجی زادہ (الحاج خایل افندی) و برادری (منیب بک) ۱۳۲۸ دہ نقود وافرہ بذل ایدہرک مکمل بر (مکتب ابتدائی) و جامع شریف طرفنہ دخی بر «فتواخانہ عالی» بنا واسکی مکتب فیوضاتک نامنی احیا ایتشلردر .

۲ (اتا بک مدرسہ سی) صیغیر بازارندہ درہ کنارندہ اولوب امیر مشہور (ناصرالدین احمد اتا بک) طرفندن بنا و ۷۲۷ ربیع الاولندہ اوقافی تنظیم ایدلمشدر . مدرسہ نک شمال طرفندہ کائن تلمندن اکلاشلدینی اوزرہ غایت متین بر مدرسہ سنکین ایکن مکرراً زلازل مدہشہدن خراب اولمش و بعدہ واردات وقفیہ سیلہ اعمار ایدلمشدر . قدیماً جسیم ، اون بش حجرہ بی ، بردر سخانی ، اورتہ سندہ باغچہ بی حاوی بر مدرسہ اولدینی حالہ ۱۲۹۴ تاریخندن بری عرصہ خالیہ شکنی آلمش و اطرافی تملک اولہرق دمیرجی دکانلری یاییلمشدر .

نو مدرسہ یہ ابتدا (جمال الدین ابراہیم اقسرای) کبی بر

فاضل وبعده ۱۰۹۸ تازیخانه قدر بك چوق فحول علما ، كبار فضلا . مدرس اولمشیدی بوتاریخده علمای ساداتدن ظنه لی (السید الحاج احمد افندی) و ۱۱۴۰ ده وفاتیله مخدومی (السید عبدالله افندی) و ۱۱۷۲ ده اوغللری وبعده طورونلری تدریسه متصرف اولوب ۱۲۴۵ ده شهرکتخداسی (السید مصطفی افندی) بن السید محمود بن السید عبد اللهك وفاتیله علمادن اسکلبلی (حسین افندی) و ۱۲۷۸ ده السید محمود بن السید عبدالله بن السید احمد بن السید عبد اللهك فوتیله علمادن شهرلی (مصطفی افندی) مدرس وپدری السید احمد بن السید ولی بن السید احمدك ۱۲۶۶ ده فوتیله شهرلی مصطفی افندیك ۱۲۹۱ ده ارتحالندن مخدومی باقرچی زاده (السید الحاج محمد امین افندی) واسکلبلی زاده حافظ محمد افندیك اوغللری حصه موروثلرینه متصرف اولمشلردر .

۳ (بکر پاشا مدرسه سی) کوپری باشی محله سینه روم کلیداسنك شرقاً اتصالنده گوشه باشنده اولوب اسبق میرلوی مصر اماسیه لی بکر بك زاده (الحاج عثمان بك) طرفندن ۱۱۶۴ ده دارالحديث اولق اوزره بنا وواقفی تنظیم ایدلمشدر . بومدرسه نك درسخانه سی ، کتبخانه سی مکمل وکارکیر ، غایت کوزل برمدرسه اولوب ۱۳۰۰ حدودینه طوغری مشرف خراب اولمش ایکن ۱۳۰۸ ده جهه سی هدم ایدیلرک التسه دکا کین ، اوسته حجرات بنا ایدلمك صورتیله اعمار اولنه بیلمشدر .

آلاجه حمام وایکی قبولی خان جسیم بو مدرسه‌نک وقفی در .
 بانی مشارالیهک ارتحالنده مخدومی (ابوبکر پاشا) متولی اولدینی
 مناسبته (بکر پاشا مدرسه‌سی) دینمشدر .

مشاهیر فضالادن استاذ مشهور (لاز ابراهیم افندی) و
 ۱۱۷۹ ده سکوکویلی زاده (الحاج محمد کاشف افندی) وبعده
 دامادی امیر امام زاده (السید الحاج ابوبکر افندی) وبعده
 مخدومی (السید سعدالله افندی) وبعده چرکشلی (محمد
 افندی و ۱۲۳۳ ده نابی افندی یکنی تورکمن زاده (الحاج
 ابوبکر افندی) وبعده مخدوملری (الحاج علی راشد، احمد
 رشیدی) افندیلر مدرس و ۱۲۹۳ ده احمد افندی‌نک فوتیله
 اوغلی (حافظ رحیمی افندی) و ۱۳۰۱ ده حاجی علی افندی‌نک
 فوتیله اوغللری حصه تدریسه برمدت متصرف اولمشلرایسه‌ده
 ۱۳۰۵ ده جمله‌سی ده رفع ایدیلوب فضالادن مجدی زاده (حافظ
 عبدالرحمن کامل افندی) بحق مدرس اولمشدر .

۴ (بندرلی مدرسه‌سی) قوجه‌جق محله‌سنده ایکنه‌جی
 زاده تربه‌سی ارقه‌سنده سوقاق ایچنده اولوب ۱۲۲۸ ده امامیه
 اعیان تجارندن بندرلی (الحاج حافظ فیض الله اغا) طرفندن
 ۱۲۲۸ ده بنا و اوقافی تنظیم ایدلمشدر . بو مدرسه اخشاب
 اولوب درس‌خانه‌سی ، باغچه‌سی ، صوبی وار ایدی . ۱۳۰۰
 سالنه طوغری مشرف خراب اولمش ایکن ۱۳۱۱ حریق
 اغتشاشنده یانديغدن اعیانندن شیخ احمد زاده (الحاج احمد

افندی (۱۳۱۶ ده وفات ایدرکن ثلث مالیدن بو مدرسه نك مجدداً بناسنی وصیت ایتمکه دامادی حاجی مسود زاده (الحاج حافظ محمد توفیق افندی) ۱۳۱۸ ده مجدداً بنا واسکی عمارتی احیا ایتشد .

بومدرسه نك ایلک انشاسنده بندرلی (حافظ محمد افندی) و ۱۲۴۷ ده محدث مشهور زیله لی (الحاج علی شکری افندی) وبعده علم ـادن جیرقچی زاده (حافظ احمد افندی) وبعده طاش آبادی (الحاج احمد افندی) وبعده مخدومی علم ـادن (محمد عارف افندی) ۱۳۲۷ ده وفاتنه قدر مدرس اولمش ـالر ایدی .

۵ (بورمه مناره مدرسه سی) جامع شریفك شرق طرفنده کائن چشمه نك اتصالنده در . بوراسی قدیمأ محکمه یری ایکن ۱۱۱۵ ده محکمه ، ایکنه جی زاده تربه سی اتصالنده محکمه اتخاذا اولونان خانیه نقل اولندقدده اسبق سرمعمار درگاه عالی اماسیه لی حسین بك زاده (الحاج حافظ حسن افندی) اشترا وبرمکتب صبیان بنا ایتدیرمش و ۱۱۱۷ ده بقالار ایچنده برقاچ دکان وقف و اجا اتی بو مکتبک معلم وبوابنه واعـازینه تخصیص ایتشدی . بعده مشرف خراب ، اوقافی ده ضایع اولمش برحالده ایکن علم ـادن (محرم افندی) مکتب معلمی اولدینی جهتله هذ ـکه اشرافندن خطیب زاده (الحاج محمد امین افندی) ۱۳۲۷ ده مکمل برمدرسه بنا ومدرسلیکنی (محرم افندی)

در عهده ایتمشددر . او کنده بولونان کارگیر چشمه یی ، اسبق
اماسیه نقیب الاشرف قائم مقامی (السید احمد افندی) ۱۰۸۱ هـ
بنا و علوی قریه سنده متصرف اولدینی مزرعه یی وقف و بورایه
تخصیص ایله مش ایدی .

۶ (بویوک اغا مدرسه سی) شاملیلر محله سنده باغچه لر
ایچی دیمکله مشهور باغلرک باشنده یول اوزرنده اولوب سلطان
بایزید خان ثانی حضرتلرینک اماسیه ده قپو اغاسی بولونان (حسین
اغا) طرفدن ۸۹۴ ده بنا و اوقافی تنظیم ایدلمشددر . مدرسه
مزبوره غایت متین ، هر طرفی سنکین اولوب حجراتی واسع ،
درسخانه سی مکمل ایدی . الیوم خراب بر حالده هر کسی متأثر
ایتمکده در . شو عبارۀ محکومه مشارالیه حسین اغانک آثار
خیریه سندن اولدینی اعلان ایدر . بوکا « مدرسه حسینیه » ده دینور .
« قد بنی هذا البناء صاحب الخیرات بانی مبانی المبرات حسین
اغابن عبدالمعین الشهیر بقپو اغاسی فی العتبة العلیة لسلطان البرین و خاقان
البحرین السلطان ابن السلطان السلطان بایزید بن محمد خان
خلد الله سبحانه و سلطانه فی ایام دولته من قراضة جوده
واحسانه تغمد الله تعالی بفقرانه فی تاریخ سنة اربع و تسعین و ثمانمائة »
شو عبارۀ حسین اغانک بنا و وقف ایتدیکی بدستانک اوزرنده
دخی کورلمکده اولوب یالکیز تاریخی (سنه ثمان و ثمانین و ثمانمائة)
محکومدر . بو مدرسه عالیهنک اوقافی واسع و مبذول اولوب
بری ده اماسیه ده مشهور بدستاندر . بو بدستان سراپا وقف

صحیح اولدینی حالدہ مؤخرأً بعض دکانلری تملک ایدلمشدر .
اورتہ بدستان دخی اون سنہ مدتلہ ابرانوسیان برادرلرہ انجق
اعمارى ملاحظہ اونہرق ایجار ایدلدیکی حالدہ یکر می سنہ یہ
قریب برمدت ظرفندہ وقفہ تسلیم ایدلمدیکی شایان تدقیق بر کیفیت
اولسہ کرک .

بو مدرسه عالیہ ترتیب مدارس اعتباریلہ ستین درجہ سبندہ
اولوب امامیہ دہ برنجی صنفدن معدود اولدیغندن پک چوق
« فضلالی روم » بومدرسه مدرسہ لکی ایلہ بنام اولمشدر .
ابتدا قوجہ امیر (السید ابراہیم افندی) بعدہ ۹۱۱ دہ
طاشکوپریلی (مصالح الدین افندی) مدرس اولوب ۹۱۸ دہ
استانبولہ تحویل مأموریت ایتمکله امامیہ فضلاسنہ توجیہ بیورلمش
وفاضل مشہور قیم زادہ (الحاج اسماعیل افندی) بومدرسه
مدرسی اولدینی حالدہ ۱۱۴۱ دہ وفات ایتمکله عینتابی (الحاج
قرہ عثمان افندی) ۱۱۵۱ دہ فوتیلہ (حافظ محمد افندی)
و ۱۱۶۸ دہ ایباتسہ لی فاضل مشہور (السید عبداللہ افندی)
و ۱۱۷۹ دہ (خلیل افندی) و بعدہ (السید مصطفی افندی)
بعدہ مخدومی (السید محمد امین افندی) و ۱۱۹۳ دہ مشاہیر
فضلالدن شیخ زادہ (عبداللہ وجیہ افندی) و ۱۲۱۸ دہ
فوتیلہ مخدوملری (السید محمد شریف ، عبدالرحمن ، احمد
رشدی) افدیلر و بعدہ مستقلاً (السید الشیخ احمد رشدی
افندی) و بعدہ مخدوملری (الحاج حافظ علی ، اسماعیل)

افندیلر مدرس و ۱۳۱۲ ده حاجی حافظ علی افندی زاده
(الحاج علی افندی) جهت تدریسه متصرف اولمشدر .

۷ (تکیه مدرسه سی) پیرالیاس مزارلغنتك شمالنده چو كجه
تکیه سی یرنده اولوب تکیه لر بحثنده ذكر ایدلدیکی اوزره
ابتدا تکیه اوله رق بنا ایدلمش و علمادان اقشهرلی (اسماعیل افندی)
تکیه شیخی اولدینی ائزاده درسخانه شكلنی اکتساب ایتمش
اولمقله ۱۲۴۸ سالندن اعتباراً مدرسه اتخاذا ایدلمش و (تکیه
مدرسه سی) دینمشدر بو (اسماعیل افندی) دن صو كره درسعام
مشهور ، اوزون (عثمان افندی) بومدرسه نك مدرسی اوله رق
وفاتنده برمدت متروك اولدیسده مؤخرأ تعمیر اولنوب عثمان
افندینك حقیقی مدرس بولمقله در .

۸ (چوبلیجه مدرسه سی) یاقوت پاشا زاویه سنك ارقه سنده
مكتب ابتدائی اتصالنده و بیارخانه اوكننده اولوب ۱۲۳۴ ده
اندرون هایون رجالدن اماسیه لی آشچی زاده (الحاج محمد اغا)
بنا و اوقافی تنظیم ایتشدر . بومدرسه ؛ اخشابدن بنا ایدلمش ،
اوافق لطیف اولوب بانی مومی الیهك عمرزاده سی (چوبلیجه)
دینكله معروف (الحاج مصطفی اغا) متولی اولدینی مناسبته
(چوبلیجه مدرسه سی) دینمشدر . اشاغی بازارده التی دكان
عقارات موقوفه سی وار ایدی .

مشاهیر فضالادن حاجی احمد افندی زاده (السید مصطفی
افندی) بعده دامادی قره كوز زاده كوچك (مصطفی افندی)

بعده بونك دامادی علی قیا زاده (الحاج احمد صدق افندی)
بحق مدرس اوله رق مفتی مومی الیهك ۱۲۹۱ ده وفاتیهلہ مخدومی
(احمد افندی) جهت تدریسه متصرف اولمشیدی .

۹ (حاجی حمزه افندی مدرسه سی) بایزید پاشا محله سنده
قرا باغی الشیخ الحاج حاجی حمزه افندی حضر تلیرنك جامع
شریفی غریبنده اولوب ختامنده ۱۳۱۲ ده بنا ایدلمشدر. اخشاب
برمدرسه اولوب مشاهیر فضلا دن (میر حسن افندی) ایلك
مدرس اولدینی حالدہ ۱۳۲۶ ده وفات ایلدیكنی متعاقب مخدومی
(محمد سعید افندی) مدرس اولمشدر .

۱۰ (حسامیه مدرسه سی) قبانك جنوب طرفنده كائن
جامع شریفك قبله طرفنده یول اوزرنده ابدی . قبالو زاده
(الشیخ حسام الدین حسین الخلوئی) حضر تلی ۸۵۷ ده
مدرسه اولمق اوزره بنا و اوقافی تنظیم ایتمش و مشاهیر علمادن
بك چوق ذوات مدرس اولمشدر . حسامیه مدرسه لکی ۹۶۰
تاریخنه قدر غایت محترم وستین راده سنده ایدی ۱۰۱۱ حریقنده
ضایع اولدیغندن اولادنن نقیب الاشراف قائم مقامی (السید
احمد افندی) تکیه اولمق اوزره تجدید ایلدیهده ۱۰۹۹
حریقده ینه یاندیغندن ۱۱۲۵ حدودنده درسعام مشهور قبالی
(حافظ علی افندی) تکرار درسخانه اولمق اوزره احیا ایتمش
و ۱۲۴۱ تاریخندن بری خراب اولوب باغچه حالتی آلمش
و شمیدی یه قدر باغچه اوله رق قالمشدر .

۱۱ (خضر پاشا مدرسه سی) اوق میدانده خضر پاشا
محلہ سنده بردارثہ مخصوصه ایچنده در . جامع شریفک شرق
وشمال طرفنی محیط اولوب ۸۷۰ ده امرای عثمانیه دن اتا بک
زاده (خضر پاشا) طرفندن بنا ایدلمشدر . مدرسه مزبورہ
کارگیر وحجراتی اوفاق وحوالیسی لطیف اولوب هر اوطه نیک
اوکنده یاز کونلرینه مخصوص برجیقارمه سی واردر .

بو مدرسه یه قدیمآ کبار علما مدرس اوله رق توجیهاتی
سلسله یه تابع اولدینی جهتله مدرس لری نی تعداد ایتک بوراده
موجب کلفت در . یالکز ۱۰۹۸ تاریخنده سلسله مدرسینده
برتحول کورلدیکنه بناء فضلادن معقول زاده (الحاج ابراهیم افندی)
بعده (عبدالله افندی) و ۱۱۱۵ (حافظ حسن افندی) مدرس
اوله رق اصول قدیمه ترک ایدلمشدر .

۱۱۲۱ ذی الحججه سنک یکر می اوچنده مدرس مومی الیهک
وفاتیله (حافظ احمد افندی) و ۱۱۲۳ ده قصریدیلہ (منلا
مصطفی) و ۱۱۲۴ ده قصریدیلہ (منلا ابراهیم) و ۱۱۴۱ ده
وفاتیله (منلا صالح) و ۱۱۵۳ ده وفاتیله (منلا مصطفی)
و ۱۱۵۵ ده فوتیلہ (حافظ احمد) افندیلر نصفه متصرف
و ۱۱۵۷ ده نصفه فضلادن (السید ولی الدین افندی) ونصف
دیگرینه علمادن (حافظ محمد افندی) مدرس اولمشلردر .

بعده حافظ محمد افندی نیک ۱۱۶۷ ده وفاتیله علمادن (السید
الحاج محمد افندی) وبونک ده ۱۱۶۹ ده وفاتیله علمادن کوپرلی

(محمد فندی) وبعده قصریدیلہ فضلادن (السید عبداللہ افندی)
والسید ولی افندینک فوتیلہ ظنہ لی زادہ (السید عبداللہ افندی)
و ۱۱۷۳ دہ فوتیلہ فاضل مومی الیہ (السید عبداللہ افندی)
و ۱۱۸۳ دہ وفاتیلہ نصفہ مخدومی (السید سعید افندی) ونصف
دیگرینہ دہ ارکوبی (الحاج احمد افندی) مدرس اولمشر .

ارکوبی الحاج احمد افندینک وفاتیلہ مخدوملری (السید محمد
کاشف ، احمد نجیب) افندیلر والسید محمد سعید افندینک
یرینہ علمادن جانیکی « الحاج محمد افندی » ومفتی اسبق ارکوبی
زادہ الحاج احمد نجیب افندینک وفاتیلہ مخدومی « حافظ احمد
افندی » وبونکده وفاتیلہ مخدومی « حافظ مصطفی افندی » وجانیکی
الحاج محمد افندینک وفاتیلہ مخدوملری « السید احمد ، محمد حامی »
افندیلر ومفتی اسبق السید الحاج محمد حامی افندینک وفاتیلہ
مخدوملری « السید عبداللہ ، احمد » افندیلر مدرس والسید
الحاج احمد افندینک ۱۳۱۸ دہ وفاتیلہ اوغللری حصہ تدریسہ
متصرف اولمشردر .

۱۲ (خلفت مدرسه سی) شامیجہ محلہ سنده خلفت غازی
ترہ سنک اتصال غریب سنده اولوب امامیہ دہ ایکنجی اولہ رقبنا
ایدیلن مدرسه عالیہ بودر . امرای سلجوقیہ دن (مبارزالدین
خلیفہ الب) طرفندن ۶۲۲ تاریخندہ بنا ایدلدیکی وقفہ سنده

مقید و ۶۳۲ د، بنا ایدلیدی قپوسی بالاسنده محکوک در. قپوسی بالاسنده حک ایدلمش اولان عباره شودر .

« امر بعمارة هذه المدرسة المباركة الامير الكبير المجاهد مبارزالدولة والدين خليفه بن تولى فى تاريخ سنة اثنتين وثلثين وستمائة » شو عباره کال صعوبتله اوقونمقده اولوب عادى وکرفت یازى ايله یازلمشدر .

فقط وقفیه سندہ امیر مشارالیه امامیہ والیسی ایکن ۶۲۲ تاریخندہ بنا ایدلیدی مذکور اولان بومدرسه ، شو تاریخ محکوکہ نظراً ۶۳۲ دہ بنا ایدلیدی اکلشامقده ایسه ده تاریخک وبولونان وثائق شرعیہ نک لالاتی ودغراقیه مدرسه نک قپوسی بالاسنده محکوک اولان قیدک صراحتی اوزره امیر مشارالیه خلیفه آلپ ۶۳۲ دہ امامیہ والیسی اولمبوب کرجستان سرعسکری ایدی . بو تاریخندہ امامیہ والیسی « امیر نورالدین طغرق » اولوب قاضی دخی « بدرالدین ابراهیم بن خلیل القیماری » و ۶۲۲ دہ امامیہ والیسی « امیر مبارزالدین خلیفه » وقاضیسی ده « تقی الدین عثمان بن علی » ایدی . وقفیه سی ، بو « قاضی تقی الدین عثمان » طرفندن تنظیم ایدلیدی امضاسندن معلوم اولمقله شو طاشک اورایه مدرسه نک بناسندن اون سنه صوکره قوندیغی اکلشامقده در . بومدرسه وقیله سنکیکن وکارکیر اوله رق یاپیلمش اولدیغی جهه سی وشمال طرفنده کائن تملى اکلتمه در . مؤخرأ زلازل ورجفانک کثرتی خراب ایدوب

متولیلری مکرراً تعمیر ایدرک حسن محافظه ایتمشلردر .
 ۱۰۱۱ حربقده وبعده ۱۰۵۷ زلزلهسنده بك فنا برصورتده
 مصاب اولديغندن مدرس « حسن افندی » معرفتيله اخشابدن
 بنا ايدلمش وینه مکرراً محتاج تعمیر اولمقله اعمار ايدلمش واک
 صوکره اسبق امامسيه مفتیسی کورجی « الحاج عثمان حامی
 افندی » ۱۳۰۵ ده تجديد ایتشدرد .

بومدرسهیه ايلك مدرس اولان قاضی شهيد « بدرالدين
 ابراهيم القیاری » در . بعده « جلالالدين عبدالوهاب بن
 يوسف التبریزی » بعده ۶۴۷ ده « صدرالدين محمد بن خضر
 التركمانی » بعده « نجيبالدين موسى الخلاطی » بعده ۶۹۸ ده
 « الحاج محمدالدين عيسى السلغری » بعده « محمدالدين عمر بن
 الهكاري » بعده « شمسالدين محمدانمخجنواني » بعده ۷۶۸ ده
 مفتی الثقلین « نظامالدين عبدالملك » بعده « فخرالدين عثمان
 التركمانی » بعده « شهابالدين احمدالرومی » بعده ۸۰۵ ده
 محمدالدين مسافرين ارتق « مدرس کورلمشدر .

۸۱۸ ده « عزالدين حسن بن امير على » و ۸۲۴ ده
 « تاجالدين ابوالكارم التوقادی » وبعده « بدرالدين محمودالمصاحی »
 وبعده « ركنالدين عبدالكريم الاماسی » بو مدرسه عالییه
 مدرس اوله رق اشتهار ایتمشلردر . بعده ۱۰۹۸ تاریخنه قدر
 بواسلوب اوزره بك چوق فضلا مدرس اولوب تاریخمذکورده

علمادان « الشيخ محمود افندی » و ۱۱۰۸ ده بهسنى مفتی سابق « حسن افندی » مدرس و متولى اولمشد .

۱۱۳۴ ده تولیتى مخدومی « السید محمد افندی » به قصرید ایدوب ۱۱۵۰ محرمده وفاتیه کبار علمادان « حافظ احمد افندی » مدرس و ۱۱۶۹ ده متولى دخی اولمش و ۱۱۷۶ ده جهت تدریسك نصفنى علمادان « السید عبدالله افندی » به و ۱۱۸۵ ده بوده « محمود افندی » به قصرید ایدوب ۱۲۱۰ ده فوتیه مفتی اسبق دزدار زاده « السید الحاج حسین افندی » و سنه سنده بوده فوتیه « الشيخ السید مصطفی افندی » و ۱۲۲۰ ده قصریدیه مخدومی « السید لطف الله افندی » حصه تدریسه متصرف اولدیه ده ۱۲۶۶ ده فوتیه نصف دیگرینه مدرس اولان علمادان ملاطیه لی صوفی « محمد عارف افندی » مدرس اولمشد .

مومی الیه حافظ احمد افندی تدریسك نصف دیگرینی ۱۱۸۹ ده بیوک اوغلی « السید عبدالله افندی » به تولیتیه برابر قصرید ایتمش اولوب ۱۲۰۵ ده تولیتی رفعدن « الحاج محمود افندی » به و ۱۲۱۴ ده فوتندن درسهام مشهور « الحاج ابراهیم افندی » به و ۱۲۲۲ ده فوتیه علمادان طاشکوبرلی « حافظ الحاج عبدالله افندی » به ویرلمش و ۱۲۲۶ ده نصف تدریسی مخدومی « محمد عارف افندی » به و تولیتی ده « الحاج اسماعیل بن احمد بن السید محمد افندی بن

الحاج محمود افندی ، ۱۲۴۲ ده قصرید ایدرک مومی الیه
طاشکوپریلی زاده « محمد عارف افندی » مدرس ومتولی
اولمشر .

مومی الیه دخی سالک طریقت اولدیغندن ۱۲۴۶ ده نصف
تدریسی انشتیسی ملاطیه‌لی صوفی « محمد عارف افندی » یه
وتولیتی ده ۱۲۴۸ ده ککلیک زاده « السید الحاج علی اغا » بن
مصطفی بن الحاج علی اغایه قصرید ایدوب ملاطیه‌لی « صوفی محمد
افندی » مدرسه مزبوریه مستقلاً مدرس اولمش و ۱۲۷۷ ده
ارتحالنه بناء مخدومی « محمد خلوصی افندی » وبونک وفاتیه
کورجی « الحاج عثمان حامی افندی » وبونک ده وفاتیه مخدومی
« محمد افندی » مدرس اولمشر درر .

۱۳ « خیریه مدرسه‌سی » کوك مدرسه محله‌سنده یورکیج
باشانک وقف خانی جوارنده یول اوزرنده اولوب اسبق امامیه
مدرسه‌سی درگاه عالی قبوجی باشیلرندن توریدی زاده « الحاج علی
اغا » طرفندن ۱۲۱۰ ده بنا وخیریه نامیه توسیم ایدلمش و « یوقاری
باقه‌جاق مدرسه‌سی » دیمکله مشهور اولمشر . بومدرسه اخشاب
اولوب جسیم واورته‌سی ایکی طرفلی باغچه‌در . بانی مومی الیه ؛
اوچ دکانتی ، ایکی قهوه‌خانه‌نی ، برباغنی ، بومدرسه‌یه وقف
وتخصیص ایتدیکی حالدله الیوم مدرسه موجود وواقفی مفتوددر .
بومدرسه‌یه ابتدا « حسن افندی » و ۱۲۳۲ ده وفاتیه
درسعام مشهور « سلیمان افندی » و ۱۲۳۷ ده طاشکوپریلی

« حافظ الحاج عبدالله افندی » و ۱۲۳۸ ده قصریدیه دامادی
 ملاطیه‌لی صوفی « محمد عارف افندی » و ۱۲۴۶ ده قصریدندن
 برادری درسعام مشهور « محمود افندی » مدرس و ۱۲۷۳ ده
 فوتیه اوغلاری « مصطفی ، ابراهیم ، احمد » مشترکاً حصه
 تدریسه تصرف و عموجه‌لری ایضای وکالت ایتمکده ایکن
 عموجه‌لرینک وفاتیه اوقافی ضایع ، مدرسه معطل اولدیغندن
 ۱۲۹۶ ده آجاره‌لی « عثمان افندی » فخری مدرس اولمشیدی.
 ۱۴ « دارالحديث مدرسه‌سی » پرنجی محله‌سنده دره
 کنارنده حاجی حمزه افندینک جامعی حذاسنده اولوب قضاتدن
 سیدی علی زاده « الحاج عثمان چلبی » طرفندن ۹۳۳ ده دارالحديث
 اولوق اوزره بنا ایدلمشدر . بومدرسه ، بدایت حالنده اخشاب
 اوله‌رق بنا ایدلمش اولوب ۱۰۱۱ حریقنده یانمش اولدیغندن
 بانی مومی‌ایلهک حقیده‌سی « عائشه خاتون » بنت احمد چلبی بن
 الحاج عثمان چلبی ۱۰۱۸ ده مجدداً بنا وتولیتی مخدومی « شعبان اغا » یه
 واولادینه تخصیص واملاکنی وقف ایدهرک وقفیه‌سنی ده توسیعاً
 تنظیم ایتمشدر .

۱۰۹۸ وبعده ۱۱۴۳ حریق‌لرنده مکرراً یانمش و ۱۱۰۰
 و ۱۱۵۱ سنه‌لرنده مکرراً و مجدداً بنا ایدلمش ایسه‌ده عقارات
 موقوفه‌سی ضایع اولوب حقاله ناحیه‌سنده بولونان مزرعه
 موقوفه‌سی وجه معاش مدرسین اولمقده ایدی . الیوم محتاج
 تعمیر برحاله موجوددر . ۱۱۵۱ ده صوکه بناسنده ایلهک

مدرس اولان « احمد افندی ، ۱۱۶۳ ده وفاتيله « حافظ حسين افندی ، مدرس اولديسه ده ۱۱۶۸ ده فوتيله « حسين افندی » و ۱۱۷۰ ده رفيعيله حافظ حسين افندی زاده « حافظ احمد افندی » تدريسه متصرف و ۱۱۷۸ ده قصر يندن درس عام مشهور فارجي زاده « اوليا خليل افندی ، و ۱۲۰۱ ده قصر يندن سوروقلي « حافظ علي افندی ، مدرس و ۱۲۰۴ ده رفيعيله « شيرين علي افندی » تدريسه متصرف اولديسه ده ۱۲۰۸ ده ثانياً « حافظ علي افندی » و ۱۲۲۱ ده وفاتيله مخدومي « حافظ احمد افندی ، و ۱۲۲۷ ده رفيعيله « محمد راشد افندی ، و ۱۲۳۱ ده فوتيله « حافظ عثمان فاضل افندی ، و ۱۲۵۳ ده وفاتيله درس عام مشهور اينه بازارلي (السيد الحاج اسماعيل حق افندی) مدرس اوله رق وفاتنده اوغللري (مصطفى ، محمد نوري) افنديلر تدريسه مشترکاً متصرف اولمشلردر .

۱۵ (دغرافيه مدرسه سي) محمد پاشا جامع شريفنك شمال غريبسنده يول اوزرنده يشيل ايرماق كنارنده واينكار تربيسي اتصالنده اولوب امامسيه واليسي (امير تورالدين طغرى) طرفندن ۶۳۱ ده مسجد شريف اولمق اوزره بنا ايدلمش اولديني قپوسي بالاسنده محكوك اولان شو عبارة عريبه دن اكلاشل مقده در .

« امر بعمارة هذا المسجد المبارك في ايام الدولة السلطان

المعظم شاهنشاه الاعظم مالك رقاب الامم علاء الدنيا والدين
ابوالفتح كيقباد بن كيخسرو برهان امير المؤمنين حاجي طغرى
امير شكار سنة احدى وثلثين وستمائة .

بعده خضر پاشا زاده محمد پاشا بونك قربنده بويوك جامع
شريفى بنا ايلدكده بك ياقين اولان بومسجد شريفى ۹۰۰ ده
مدرسه يه تحويل و (مدرسه طغرى) ناميله توسيم ايتشيدى .
۱۰۹۸ تاريخه قدر اربعين درجه سنده اولان علما مدرسه
مزبور يه مدرس اولدينى حاليه ۱۰۹۹ ده يانديغندن بر مدت
عرصة خاليه اوله رق قالمش و ۱۱۱۱ ده محمد پاشا متوايسى
اولان تاج الدين زاده (على بك) طرفندن مجدداً بنا ونقود
واراضى وقف ومدرسه لکنى علمادن (عمر افندى) يه
اعطا ايتمش و ۱۱۳۲ ده وفاتيله (عبدالرحيم افندى) مدرس
اولمشدر .

قيداً (دغراقه) و شمدي يه قدر السنة عامده (دراقه)
ديمكله مشهور اولان بومدرسه نك مدرسى عبدالرحيم افنديك
قصر يديله ۱۱۳۶ ده علمادن (على افندى) و ۱۱۴۷ اوائلده
وفاتيله علمادن ايناللى زاده (السيد ابراهيم افندى) و ۱۱۸۳ ده
وفاتيله مخدومى (السيد محمد افندى) و ۱۱۹۲ ده وفاتيله
علمادن (حافظ مصطفى افندى) مدرس و ۱۲۰۶ ده وفاتيله
اوغلى (حافظ عمر افندى) و ۱۲۱۲ ده فوتيله (ابراهيم
شاكر افندى) بن خليل افندى متصرف تدريس اولديلر ايده

۱۲۲۰ ده فوتيله علمادان (الحاج محمود افندی) مدرس اولمشدر .

۱۲۲۱ ده بونك ده قصریديله علمادان (علی افندی) و
۱۲۴۷ ده قصریديله مخدومی (السید محمد افندی) و ۱۲۶۷ ده
(السید الحاج حافظ احمد افندی) دراقیه مدرسی اولدینی
خالده ۱۲۷۶ ده وفات ایلدکده اوغلی (حافظ حسن افندی)
جهت تدریسه متصرف اولدینی اشاده مدرسه مشرف خراب
اولوب ۱۲۹۶ ده ایرماغك طغیاننده تماميله خراب و اوقافی ده
ضایع اولمش و بعده مشاهیر علمادان جانیکیلی (محمد افندی)
۱۳۰۸ ده جمع ایلدیکی اعانات نقدیه ايله مجدداً بناسنه همت
و مدرسلکنی فیخریاً درعهده ایدهرك ابراز حمیت ایتمشدر .

۱۶ (رحمانیه مدرسه سی) صاواقچه محله سنك شرق
طرفده طاغ کنارنده یوكسك بر موقعده اولوب (عبدالرحمن
ارزنجانلی) حضرتلرینك تربیسی جوارنده درگاه عالی قبوجی
باشیلرندن اسبق امامیه متسلمی حاجی فیض الله زاده (الحاج
عبدالرحمن اغا) طرفندن ۱۲۰۶ ده بنا ایدلمشدر . امامیه ده
اون بش سنه قدر تحصیلده بولونان جانیکیلی علی افندینك
تعریفنه کیره مدرسه مزبوره اخور اوکی نام محلك قبله طرفده
اولوب اخشاب اولدیغندن ۱۲۷۵ حدودینسه طوغرو خراب
وشمندی یری بینه غائب اولمشدر .

۱۷ (سراجخانه مدرسه سی) سراجخانه جامع شریفك

جهت غربیه سنده بردائره مخصوصه اولوب شوسه یولی اوزرنده
یشیل ایرماق کنارنده در . ارباب خیراتدن وحاجیکوی قضایی
اشرافدن قزبقلی زاده (الحاج محمود افندی) طرفندن ۱۳۰۰ ده
اختساب اوله رق بنا ایدلمشدر . مشایخ علمادن کورجی (الحاج
ایوب افندی) بومدرسه یه ایلك مدرس اولمش واماسیه مبعوث
فاضلی (محمد عارف افندی) حضرتلری بو مدرسه دن تفیض
ایتمشدر .

۱۸ (سلطان بایزید مدرسه سی) سلطان بایزید جامع شریفنک
جهت غربیه سنده بردائره مخصوصه اولوب ۸۹۱ ده (سلطان
بایزید خان ثانی) حضرتتلیرنک امریله بنا واکمال ایدلدیکی
مناسبته (مدرسه سلطانیه) دیمکله مشهور اولمشدر . بومدرسه
عالیه نك شماله ناظر اولان قیوسی و اطراف اربعه سی سنکین ،
حجرائی واسع ومتین اولوب جنوبنده قپو حداسنده مکمل بر
درسخانه سی ، اورته سنده برشادروانی ، ایکی طرفنده باغچه سی ،
اوج طرفنده اون دوت حجره سی وشمالنده اوج عدد ملازم
اوطه سی واردر .

بومدرسه عالی نك مدرسلیکی اماسیه مفتیلرینه مشروط
اولوب ۸۹۱ ده اماسیه مفتیلکنه نصب اولونان اسبق شیخ الاسلام
اماسیه لی جمالی زاده زنیلی (علی افندی) ایلك مدرس اولمش
و ۱۰۸۴ تاریخه قدر بوشروطه رعایت ایدیله بیامش ایسه ده .
مفتی الحاج خضر افندینک ارتحالنده فتوا امینی (یحیی افندی)

امامیه مفتیسی و مرزیفونی مصطفی افندی زاده (عیدی بیرام افندی) سلطانیه مدرسی اوله رق تفریق ایدلمشدر. فقط ۱۰۳۳ تاریخلرندن صکره برقاچ دفعه ده تفریق اولمشیدی .

۱۰۹۹ وقعه سنده سلطانیه مدرسی اولان (عیدی افندی) طرابلس شام منلاسی اولدقده شیخ یعقوب زاده (الحاج مصطفی افندی) و ۱۱۰۷ ده استعفا سیله فضلادن داماد (الحاج عثمان افندی) و ۱۱۱۳ ده کبار علمادن چوروملی (احمد افندی) بعده متولی زاده (احمد افندی) بعده مشاهیر فضلادن عیدی افندی زاده (مصطفی عاکف افندی) مدرس و ۱۱۷۳ ده وفاتیه مخدومی (اسماعیل افندی) تدریسه متصرف اولدیسه ده ۱۱۹۱ ده وفاتیه فضلادن (السید عثمان افندی) و ۱۲۲۱ ده فضلادن فضلی زاده (السید حافظ احمد افندی) مدرس و بونک ده برسنه صوکره ارتحالنده عاکف زاده (منلا عیدی) تدریسه متصرف اولمشدر .

۱۲۳۳ ده پدری السید عبدالرحیم افندینک ارتحالنه بناء رفع اولنه رق علمادن خطاط مشهور کاتب زاده (السید احمد کالی افندی) و ۱۲۴۴ ده ارتحالیه مخدومی علمادن (الحاج حافظ مصطفی رفعت افندی) سلطانیه مدرسی اولاش و ۱۲۸۱ ده در سعادته کیدوب اقامت و ۱۳۰۵ ده رحلت ایلدیکنه بناء و کالتنده بولان علمادن عربکیرلی (الحاج عثمان افندی) قاعده مدرس اولمشدر .

۱۹ (سونقورلی مدرسه سی) بورمه مناره جامع شریفنك
غرب طرفنده كائن سوقاق ایچنده پروانه بك محله سنده اولوب
۱۱۶۳ ده سونقورلی قضاسی اشراقندن سونقور زاده (الحاج
محمد انا) بنا و مدرسه لیکنی علمادن چوروملی (الحاج قره
اسماعیل هاتف افندی) یه اعطا ایتمشدر . اماسیه ده ، توقادده
و سونقورلی قضا سنده مسقفات موقوفه سی وار ایدی . بوک
(مدرسه سنقریه) دخی دینور .

ایلك مدرس اولان مومی الیه قره مفتی الحاج اسماعیل
افدینك ۱۱۹۸ ده وفاتیه مخدومی (حافظ محمد افندی) و
۱۲۳۰ ده فوتیه دیگر مخدومی اسبق اماسیه مفتیسی (مصطفی
واضح افندی) مدرس اولمش ایسه ده ۱۲۵۱ ده وفاتیه مخدومی
(نعمت افندی) تدریسه متصرف اوله رق مدرسه خراب
و ۱۳۰۴ حریقنده تمامیه محو اولمش ایکن علمادن یموق عثمان
زاده حاجی مسود (احمد شکری افندی) یالکیز شمال طرفنی
بنا و جنوبنده کندیسنه بردرسخانه و حجره مخصوصه انشا ایتمش
و ۱۳۱۲ ده وفاتیه بناء مخدومی (الحاج حافظ محمد توفیق
افندی) مقام پدری اشغال و تدریس ایله اشتغال ایتمکده
بولتمشدر .

۲۰ (صوفیلر مدرسه سی) صوفیلر محله سنده عبدالله پاشا
جامع شریفنك اتصال غربی سنده اولوب دارالحدیثك ارقه سنده در
بو مدرسه نك شمالا قارشو سنده بولتان درسخانه ده مشاهیر

فضای عصر دن کوپریلی (حاجی حافظ مصطفی توفیق افندی)
 حضرت تیرینک طایبه سنه بر مکان تحصیل اولمق اوزره ۱۳۱۰ ده اشراف
 مملکتدن وفاضل مشـار الیهک مخلصلرندن جنون زاده (الحاج
 مصطفی اغا) طرفندن بنا ایدلمشدر . بو مدرسه اخشابدن
 اولوب آغای مومی الیه طرفندن اداره ایدلمکده در . بو عبدالله
 پاشا جامع شریفنک اوکی دارالحدیث ، صاغ طرفی مدرسه ،
 صول طرفی دخی و قتیله دارالقرا وقارشوسی درسخانه فضـلا
 اولدینی مناسبتله غایت فیضناک بر محل اولدیغنی اثبات ایدیور .
 مدرسه مزبورده نک ایلک مدرسی مشار الیه (حاجی حافظ افندی)
 حضرتلریدر .

۲۱ (طورمطای مدرسه سی) کوك مدرسه محله سنك
 منتهای غربیتسند طورمطای تربه سنك قبله طرفنده کائن
 جامع شریفنک ایچنده اولوب ۶۶۵ ده امامیه والیسی بکربکی
 (سیف الدین طورمطای) طرفندن بنا ایدلمشدر . بومدرسه
 جامع شریفنک بویوک قبوسنك ایچ طرفنده کائن بوشلغك شمال
 وغرب طرفلرنده کوریلان اوراق وسنکین حجرات عیدده دن
 عبارتدر . درسخانه سی شرق طرفنده مسدس شکلنده واسع ،
 اوستی آچیق ، منظره خارجه سی دلفرب ، آچیق یاقوت کبی
 یشیل طاشلر ایله مزین اولدینی مناسبتله (کوك مدرسه)
 دیمکله مشهور اولدینی وققیه سنده مندرج ومحلیه علم مخصوص

اولمشر . بودرسجانه ؛ مؤخرآ واقف مشارالیهك اولادینه
تربه مخصوصه اوله رق موجوددر .

بو مدرسه عالییه حکیم عصر اولان (غیاث الدین محمود
غرمینی) ایلك مدرس اوله رق بعده (ضیاء الدین عیسی الهکاری ،
شمس الدین احمد وردی ، نصر الدین محمد بن غیاث غرمینی ،
شمس الدین محمد بن الحلاطی ، زین الدین یعقوب الزیاری ،
شرف الدین محمدارزنجانی ، بدرالدین طوغان ترکانی ، محی الدین
یحیی) کی فضلا ۸۰۰ تاریخنه قدر مدرس اولمشردر .

بین العلماء بوکا (مارتسه سیفیه) دخی دینور . ۸۱۷ ده
(بدرالدین اسرائیل رومی) بوسیفیه مدرسی کورلمش وبعده
جمال الدین اسحاق ، الشیخ محی الدین محمد جرومی کی فحول
علما مدرس اوله رق ترتیب مدارسده خمین اعتبار ایدلمش
و ۱۰۲۷ ده بقعه اعتباریله (الشیخ علاء الدین افندی) شیخ
اولوب ۱۰۳۱ ده وفاتیله مخدومی (الشیخ احمد شمس الدین
افندی) شیخ اولدیده ده ۱۰۳۲ ده شرط واقف وجهله مدرسه
اعتبار اوله رق علمادن (احمد افندی) مدرس اولمش وبعده
سلسله علمایه تابع اوله رق توجیهی اجرا ایدلمش و ۱۰۹۸ ده
حاجی افندی زاده (الحاج عمرافندی) مدرس اولوب مکرراً
(حسن افندی) ایله عزل ونصب اولمشر .

۱۱۱۵ ده عمر افندی محلوندن (خلیل افندی) ۱۱۳۷ ده
وفاتیله مشاهیر محدثیدن حفظی زاده (الحاج حافظ عثمان فائق

افندی) و ۱۱۵۱ ده وفاتيله مشاهير علمادين زاهد مشهور
اقطاعي (الشيخ مصطفى افندی) و ۱۱۵۸ ده ترك تدريس
ايدوب علمادن (عبدالله افندی) و ۱۱۶۴ ده فوتيله نصفه
(مصطفى افندی) ونصف ديكرينه (قره ابراهيم افندی)
مدرس اولمشلردر .

۱۱۷۴ ده مصطفى افدينك وفاتيله قراماني (احمد افندی)
و ۱۱۷۶ ده قصر يديله الحاج عثمان فائق افندی زاده (السيد
الحاج عبدالغني افندی) بعده مخدومي (منلا عثمان) وبعده
بونك مخدومي (منلا علي) افديلر نصف تدريسه متصرف
اولمشلر ايسهده ۱۲۳۷ ده قصر يديله علمادن اينه پازارلى (حافظ
السيد عبدالله شاكر افندی) و ۱۲۴۸ ده فوتيله مخدومي
(عبدالله افندی) و ۱۲۶۶ ده بونكده وفاتيله عموجه سي
اينه پازارلى (السيد الحاج اسماعيل حقي افندی) مدرس
و ۱۲۷۳ ده وفاتيله اوغللري (مصطفى ، محمد نوري) افديلر
نصف تدريسه متصرف اولمشلردر .

۱۱۷۳ ده قره ابراهيم افدينك وفاتيله علمادن (السيد
ابراهيم افندی) و ۱۱۷۸ ده وفاتيله فضلادن (الحاج حسين
افندی) و ۱۱۹۲ ده وفاتيله علمادن (الحاج عثمان افندی)
و ۱۲۱۸ ده طاشكويرلى (حافظ الحاج عبدالله افندی)
بعده مخدومي (الشيخ محمد عارف افندی) و ۱۲۸۱ ده
وفاتيله علمادن (حسن افندی) بعده علي قيا زاده (مصطفى

افندی) مدرس اولدیغی حالدده وفاتیلده اوغللاری محمد سعید ، حسین کمالی ، احمد نیازی افندیلر دیگر نصف تدریسه تصرف ایتملردر .

۲۲ (طیار پاشا مدرسه سی) میدان کوپریسینک شمال غریبسینده اهلی خاتون تکیه سی یرنده و تربیه سی اتصالنده اولوب جائیکلی حاجی علی پاشا زاده (طیار محمود پاشا) طرفندن ۱۲۱۸ ده بنا و اوقافی تنظیم ایدلمشدر . بو مدرسه اخشاب اولوب یشیل ایرماق کنارنده مکمل باغچه سی واردر . (میدان کوپری مدرسه سی) ده دینور . ۱۲۸۸ ده خراب اولدیغی کورن شروانی زاده (محمد رشیدی پاشا) تجدیداً تعمیر ایتدیرمشدر . بو مدرسه یه ابتدا فحول علمادان پیاسلی (الحاج محمد افندی) مدرس اولوب ۱۲۲۵ ده وفاتیلده کبار علمادان (السید محمد طاهر افندی) و ۱۲۳۳ ده (السید الحاج عبدالله افندی) مدرس و ۱۲۴۲ ده فوتیلده اوغللاری (محمد عارف ، مصطفی) افندیلر ایله فضلی زاده (السید عبدالسلام افندی) مشترکاً وظیفه تدریسه متصرف اولدیلر ایسه ده ۱۲۴۶ ده رفعلرندن علمادان یکجه لی زاده (السید محمد افندی) و ۱۲۴۸ ده فوتیلده (السید مصطفی افندی) و ۱۲۵۷ ده فوتیلده کبار علمادان (خواجه حافظ محمد افندی) مدرس و ۱۲۷۵ ده فوتیلده اوغللاری (عمر وهبی ، حسن صدقی) افندیلر مشترکاً وظیفه تدریسه متصرف اولوب اوقافی ضایع و مدرسه ده خراب

اولمشی ایکن ۱۳۱۳ هـ در سعام کورچی (محمدافندی) تجدیده
قیام وفوق العاده اقدام ایدرک اعانات ایله آتام ایتمش وفخری
مدرس اولمشدر .

۲۳ (عبدالله پاشا مدرسه سی) صوفیلر محله سنده پاشای
مشارالیهک جامعی حولی سنده اولوب ۸۹۰ هـ دارالحدیث اولمق
اوزره عبدالله پاشا طرمندن بنا ومخدومی (عبدی بک) طرفندن
وقفیه سی ۹۰۷ هـ تنظیم ایدلمشدر . بودارالحدیث ، جامع
شریفک ایچ قپوسی اوکنده کائن بوشاغک ایکی طرفنده ایکیشر
اوطه دن عبارت اولوب بوشاغک اوزری دخی بیوک برقه ایله
متورددر . بودارالحدیثک اوطه لری اوفاق ودرسخانه سی جامع
شریفدر .

شرمی زاده (تقی الدین عثمان افندی) ومدرس مشهور
(عبدی افندی) کبی فضلا بودارالحدیثه محدث اولوب ترتیب
مدارس ده خمسین راده سنده اعتبار ایدلمشدر . ۱۰۹۸ هـ
(محمود افندی) و ۱۱۰۱ هـ (حافظ عمر افندی) و ۱۱۲۴ هـ
وفاتیله مخدومی (حافظ عبدالله افندی) و ۱۱۳۶ هـ رفعیله
در سعام مشهور دیاربکرلی (اسماعیل افندی) و ۱۱۴۲ هـ
در سعام اورته کویلی (السید عبدالوهاب افندی) و ۱۱۴۵ هـ
فوتیله (عثمان افندی) و ۱۱۴۷ هـ (احمد افندی) و ۱۱۶۹ هـ
وفاتیله (الشیخ مصطفی افندی) و ۱۱۷۷ هـ شیخ القرا
(حافظ عثمان افندی) و ۱۱۷۹ هـ وفاتیله (عثمان افندی)

و ۱۲۰۴ ده (السید حافظ عثمان افندی) و ۱۲۲۸ ده
 (السید محمد افندی) مدرس و ۱۲۴۶ ده وفاتیهله مخدومی
 (السید ابوبکر افندی) تدریسه متصرف و ۱۲۹۰ ده فوتیهله
 مرعشلی (ابراهیم افندی) مدرس اولمشدر .

۲۴ (عثمانیه مدرسه سی) ایچری شهرده قراطای محله سنده
 حاجی محمود چلبی تکیه سی اتصالنده اولوب ۱۱۴۹ ده بویوک
 اغامدرسی کبار علمادان عینتابی (الحاج قره عثمان افندی) طرفدن
 بنا و اوقافی تنظیم ایدلمشدر . بو ذاتک بنا یلدیکی یالکز درس خانه
 کبیر اولوب اتصالده بولونان حاجی محمود چلبی تکیه سنده بر
 قاق او طه علاوه ایتمش و بعده تکیه تمامیه مدرسه اعتبار اولنه رق
 عثمان افندی مدرسه سی ، عثمانیه مدرسه سی دیمکله بین العلماء
 معروف و بعده السنه عامه ده تکیه مدرسه سی دیمکله مشهور
 اولمشدر . اوقافی بر قاق دکان و خانه و باغدن عبارت اولوب
 شمدی جمله سی ضایع اولمشدر .

ابتدا مومی الیه عثمان افدینک تلیندی (عمر افندی) و
 ۱۱۸۳ ده وفاتیهله مخدومی (حافظ مصطفی افندی) و ۱۲۰۶ ده
 وفاتیهله مخدومی (السید حافظ عمر افندی) و ۱۲۱۸ ده
 وفاتیهله (السید مصطفی افندی) و ۱۲۴۷ ده وفاتیهله اوغلی
 (السید احمد رفعت افندی) تدریسه متصرف اولدیغندن بر
 مدت معطل قالمش و بعده تکیه مشیختنده بولونان مفتی جانیکیلی
 زاده (الحاج محمد حلمی افندی) مدرسه بی او یاندر مشدر .

۲۵ (فاطمیه مدرسه‌سی) کومشلی زاده جامع شریفنک جنوب شرقی طرفنده کومشلی اوغلی تکیه‌سی یرنده اولوب (سلطان محمود خان اول) حضرت‌تلرینک سراییلرندن امامیه‌لی (فاطمه‌خاتون) [۱] طرفندن ۱۱۵۳ ده بنا و اوقافی ۱۱۵۸ ده تنظیم ایدلمشدر. بومدرسه‌ه عالییه اخشاب اوله‌رق بنا ایدلمش اولوب سلطان مشارالیه‌ک تملیکی اوزرینه صاری الاک واورته کوی مالکانه‌لرینی وقف واولکندن اون‌ایکی بیک وایکنجیدن سکز بیک غروش افراز و سنوی درت بیک غروش متولی‌یه و بش بیک غروش مدرسه وایکی بیک غروش جانی‌یه و درت بیک غروش مدرسه‌نک محروقات و تنویرات و تعمیراتنه و بقیه‌سنی ده درس‌عادتده عتیق علی پاشا جامعی امام و مؤذنلرینه تخصیص ایتمشدر.

مدرسه‌ه خاتونیه، مدرسه‌ه فاطمیه و کومشلی مدرسه‌سی نامیله مشهور اولان بومدرسه‌نک مدرسلکنه ابتدا بو تکیه‌نک صوک‌شیخی، تربهدار حضرت پیر اولان علمادان (الشیخ اسماعیل افندی) و ۱۱۷۹ ده علمادان (عمر افندی) و ۱۱۹۲ ده (السید علی افندی) و ۱۱۹۵ ده (السید زین‌العابدین افندی) و ۱۲۱۲ ده طویللی (الحاج حسن

[۱] مشاهیر زعمادان امامیه‌لی هندی زاده (الحاج احمد‌اغا) نک زوجیه‌سی اولدینی مناسبتله نولیتی بونک اولاد ذکورینه تخصیص ایتمشدر.

افندی) و ۱۲۱۴ ده نیکسارلی (اسماعیل افندی) و ۱۲۲۸ ده مخرومی درسعام (علی افندی) مدرس اولیسه ده باقیله مدیغندن ۱۲۸۰ تاریخنه طوغرو مدرسه خراب اولمشدر .

۲۶ (فیضیه مدرسه سی) کوك مدرسه محله سنده یورکچ پاشا نك وقف خانی صرہ سنده شوسه یولی اوزرنده وخیریه مدرسه سنك مقابلنده اولوب اسبق اناطولی قاضی عسکری امامیه لی (ابراهیم افندی) طرفندن اوغلی (السید فیض الله افندی) نامه بنا و ۱۱۵۱ ده اکمال و اوقافی تنظیم ایدلمشدر . بومدرسه اخشابدن اولوب شمال وجنوب طرفلرنده حجراتی وغرب طرفنده درس خانہ بی - وی ایدی . ابتدای بناسنده غایت مکمل ایکن ۱۲۰۷ حریقنده یان دیغندن ۱۲۰۸ ده امامیه لی (شریف احمد افندی) طرفندن بنا و ۱۲۰۹ ده ایکنجی وقفیه سی ترتیب ایدلمش و مرور زمان ایله تکراره شرف خراب اولدیغنی کوردن شروانی زاده (محمد رشدی پاشا) ۱۲۸۸ ده اوچنجی دفعه اوله رق مجدداً بنا ایتمشدر .

بومدرسه نك اوقافی امامیه ده سکز دکان وایکی خانه اولوب آلتیسی (ابراهیم افندی) وایکیسی ده خانه ایله برابر (شریف احمد افندی) طرفندن وقف ایدلمشیدی . بونلرک جمله سی ده ضایع اولدیغندن مدرسه خراب اولمشدر . بومدرسه یه ابتدا صدر مشارالیه ک اقرباسندن (الحاج محمود افندی) و بده مخدومی (شریف احمد افندی) و ۱۲۱۰ ده وفاتیه علمادن

(حسین افندی) و ۱۲۲۳ ده وفاتيله جانيكلي (الحاج محمد افندی) و ۱۲۴۹ ده علمادن منکولجی زاده (السيد يحيى افندی) و ۱۲۶۵ ده وفاتيله مخدومی (السيد ابراهيم افندی) مدرس اولمشلردر .

۲۷ (قاضی مدرسه سی) فتحيه محله سنده جامع شريفك جوارنده اولديني قيداً مضبوط ايسوده شمدي ناموجود اولديني جهته يری معلوم اوله مدي . بو مدرسه نك اطراف اربعه سی کارکیر ، حجراتی و درونی اخشاب اولديغندن عوارض کونیه مه قومت ایدمه يره ك غائب اولمشدر . برنجی بناسنی ۹۰۰ ده اناطولی قاضی عسکری منلا بکک زاده (منلا ولدان محمد چلبی) اکمال و اوقافی مخدومی قضاتدن (عبدالرحمن افندی) ۹۱۱ ده تنظيم ايتمشدر . بو محله ده بولونان (قاضی حمای) قاضی مومی اليه طرفندن وقف ايدلمشدر . ۹۴۵ ده اولادندن (سیدی پاشا) طرفندن و ۱۰۳۱ ده سلطانيه خطیبی (الحاج مصطفى افندی) طرفلرندن تجديداً تعمیر ايدلمشدر .

بو مدرسه ، ترتيب مدارس ده اربعین راده سنده اعتبار اولنه رق بالی بك زاده عبدالرحمن چلبی ، نيكساری امیر سنان افندی ، سنادی افندی کبی علما قرن عاشرده مدرس اولمش و ۱۰۶۱ ده مشاهیر علمادن (قره محي الدين افندی) بعده خواجه زاده (عبدالرحمن افندی) و ۱۰۹۹ ده (حسن افندی) بعده حاجی افندی زاده (عمر افندی) بعده ايراکلی

(الحاج حسن افندی) ۱۱۲۱ ده مدرس اولمش و ۱۱۴۹ ده ارتحال ایتمکه اخلافی طرفندن محافظه ایدیه میوب ۱۱۶۳ سالتدن صکره غائب اولمشدر . قره محی الدین افندی ایله الحاج حسن افندی اوقافی توسیع و بعض مسقفات وقفیه علاوه ایتمشر ایدی . بونلرک جمله سی ده ضایع اولمشدر .

۲۸ (قپانچی زاده مدرسه سی) دوه خانه محله سنده قاکلی بازارینک شمال غریبی نهایتده شوسه یولی اوزرنده و سلطان بایزید مکتبتنک حداسنده در . خواجکان دیوان هایوندن اماسیه لی قپانچی زاده (الحاج حسین زکی افندی) طرفندن ۱۲۵۸ ده بنا و اوقافی تنظیم ایدلمشدر . بومدرسه اخشابدن اولوب الحاج بکتاش اغادن اشترا و سلطان محمود خان ثانی حضر تلیرینک اراده سیله سلطان بایزید اودونلغندن استبدال و بانی مومی الیه طرفندن وقف اولونان مکان اوزرنده جسیم وظایت لطیف اوله رق بنا ایدلمشدر . قپوسی ابتدای بناسنده شرق طرفنده اولوب اوزرنده معظم بر درس خانه سی وایچنده صوبی وار ایدی .

مرور زمان ایله مشرف خراب و نقود موقوفه سی ده ضایع اولدیغندن هم مدرسه بی اعمار و هم ده تدارک عقار ایتک ملاحظه اولنه رق ۱۳۰۸ ده شرق و شمال جه تلیر تماماً هدم ایدیلوب التنده اون درت دکان و اوستنده حجرات اوله رق مکمل بر صورتده یایلمش ایدی . فقط ۱۳۲۵ ده تماماً یانوب عرصه

موقوفه سیله برابر او یله بر اثر عالی بلا سبب شرعی اشهاد اولنه رق
ملك عقار اولمشدر .

بومدرسه عالییه مشاهیر فضالادن ابتدا اینه بازارلی (السید
الحاج اسماعیل حقی افندی) و ۱۲۷۳ ده وفاتیه اوغللری
(مصطفی ، محمد نوری) افندیلر و بونلرک وفاتیه مصطفی
افندینک مخدومی (احمد افندی) مدرس اولمشدر .

۲۹ (کاشفیه مدرسه سی) اسکی کتبخدا محله سنده چوقور
کلیسانک غرباً اتصالده عبداللطیف افندی کتبخانه سنک شرقدیه
واقع سوقاغک اینجده در . امامیه اعیانندن اسبق بوستانجی باشی
قلایجی خلیل اغا زاده الحاج عمر اغا ۱۱۷۴ ده وفات ایدرکن
ثالث مالنندن بر مدرسه یاپیامسنی وصیت و مشاهیر فضالادن سکو
کویلی زاده (الحاج محمد کاشف افندی) بی وصی مختار نصب
ایلدیکندن ۱۱۷۵ ده وصی مشارالیهک همتیه مدرسه بنا و بقیه
ثالث مالنندن بر قاق دکان اشترا اولنه رق وقف و (کاشفیه)
نایله تسمیه ایدلمشدر .

بومدرسه دخی اخشاب اولوب مشرف خراب اولدیغندن
۱۲۴۴ ده آق حسن زاده الحاج حسن اغا طرفندن تجدید
ایدلمش و بعده یننه مشرف خراب اولوب ۱۳۰۴ ده وزرادن
شفیق پاشانک زوجه صالحه سی (عائشه خانم) طرفندن مجدداً
اعمار اولمشدر . بومدرسه یه ابتدا مفتی شهر الحاج کاشف محمد
افندینک اقرباسندن سکو کویلی زاده (الحاج حافظ عثمان افندی)

۱۱۷۵ ده مدرس اولوب ۱۱۹۱ ده وفاتيله برادری (حافظ محمد افندی) و ۱۲۱۳ ده وفاتيله فقه‌آدان جانيکلی (السيد حسن افندی) و بعده صاحلی دامادی منکولجی زاده (السيد ابوبکر افندی) و ۱۲۵۵ ده وفاتيله يکني (السيد علی افندی) مدرس اولمشیدی . ۱۲۹۸ ده مکتب رشیدی معلم عرفانی علم‌آدان ارخویلی (عثمان رمزی افندی) مدرس اوله‌رق اعمارينه همت ایتمدر .

۳۰ (کوچک آغا مدرسه‌سی) شاملیلر محله‌سنده ایاس آغا جامع شریفک اوکنده برداثره مخصوصه اولوب جامع شریفک شمال و غرب طرفلرینی محیطدر . کوچک قپو آغاسی دیمکه مشهور (ایاس آغا) طرفدن ۹۰۰ ده بنا و اوقافی تنظیم ایدلمدر . غایت متین ، اطرافى سنکین اولان بومدرسه عالیہ ؛ ترتیب مدارس صره‌سنده خمسين راده‌سنده اوله‌رق (ایاس آغا مدرسه‌سی) و (مدرسه‌ایاسیه) دیمکه ده مشهور و شمیدی به قدر معموردر .

بومدرسه‌یه فضالان ابتدا شاملو زاده (تاج‌الدین ابراهیم افندی) و بعده امیر قولى (شمس‌الدین احمد افندی) و بونک ۹۱۸ ده استانبوله نقلدن صوکره بک چوق علما مدرس اوله‌رق احراز مولویت ایتمدردر . ۱۰۸۶ ده فضالان پیری افندی زاده (حافظ حسین افندی) و آراقده (حافظ علی افندی) و ۱۱۰۱ ده حافظ حسین افدینک محلولندن (ابراهیم

افندی) وبعده (عمر افندی) و ۱۱۱۳ ده (علی افندی)
مدرس ومتولى اولديسه ده ۱۱۱۴ ده علی افندی توليده قالوب
(الشيخ محمد افندی) مدرس اولمش و ۱۱۲۹ ده (عبدالله
افندی) و ۱۱۳۲ ده فضلا دن چوروملى (حافظ السید محمد
افندی) مدرس اولمشدر .

۱۱۴۳ ده السید الحاج محمد افندینک وفاتيله نصفه مخدومى
(السید احمد سعید افندی) ونصف دیکرینه کبار علمادان
(السید علی افندی) و ۱۱۴۴ ده السید احمد سعید افندینک
ترکیله مفتی زاده (السید حافظ ابوبکر افندی) و ۱۱۴۵ ده
بونکده فوتيله اوبر نصفه دخی مومى اليه (السید علی افندی)
مستقلاً مدرس اولدینی حالده ۱۱۷۳ ده وفاتيله علمادان شریف
زاده (السید الحاج مصطفى افندی) و ۱۱۹۰ ده وفاتيله
نصفه مخدومى (السید محمد امین افندی) ونصف دیکرینه
شیخ زاده (السید عبدالله وجیه افندی) و ۱۱۹۵ ده السید
محمد امین افندینک رفیعيله مشاراليه (السید عبدالله وجیه
افندی) مستقلاً مدرس اولدقده بویوک اغا مدرسلکی کبی
عینيله اولاد واحفادی حصه تدریسدن مستفید اولمشدردر .

۳۱ (محمد پاشا مدرسه سی) محمد پاشا جامع شریفنک
حولیسندده بردائرة مخصوصه اولوب شمال وشرق طرفلرینی
محیطدر . ۹۰۰ ده خضر پاشا زاده محمد پاشا طرفدن کارگیر
ومتین بر صورتده بنا و اوقافی تنظیم ایدلمش اولوب حجراتی

لطیف و اولدجه واسع در . ترتيب مدارس ده ستين راده سنده
اولوب بو مدرسه نك مدرس اكنندن احراز مولوبت ايدن كبار
علما چوقدر .

بومدرسه يه مشاهير فضلا مدرس اوله رق چايي زاده عمر
افندي نك ۱۰۹۵ ده وفاتيله محلولندن درسام مشهور چوروملي (السيد
حافظ محمد افندي) و ۱۱۴۳ ده وفاتيله مخدوم نك حجاز ده بولمئسندن
استفاده ايدن ديار بكر لي (اسماعيل افندي) و ۱۱۴۴ ده عودتيله مخدومي
فضلا دن امير مدرس (السيد الحاج احمد سعيد افندي) و ۱۱۷۹ ده
مخدومي (السيد عبدالرحيم افندي) و ۱۱۹۷ ده وفاتيله
مخدوم لري (السيد مصطفى ، حافظ حسن ، محمد) افندي لر
و ۱۲۰۹ ده بونلرك رفاعيله امامسيه فتوى اميني (عمر افندي)
و ۱۲۱۳ ده قره حصار ي (احمد افندي) و بيمده (حافظ محمد
افندي) و بيمده ايكي سنكده رفاعيله ۱۲۱۴ اوائلنده ثانياً (عمر
افندي) مدرس و ۱۲۲۰ ده وفاتيله اوغللري (السيد علي ،
ثابت) و بيمده اوزون مفتي زاده (السيد مصطفى ، صالح)
افندي لر متصرف تدريس اولدي لر ايسه ده ۱۲۴۷ ده جمله سي ده
رفع اولنه زق كبار علمادن موركالي «حسن افندي» مدرس
اولمش و بونكده وفاتيله اوغلي «اسماعيل افندي» متصرف
تدريس و مخدومي «حافظ احمد افندي» كسب اقتدار ايلد بكنندن
۱۳۱۸ ده مدرس اولمشدر .

۳۲ «محمد بك مدرسه سي» محمد پاشا جامع شريفك غرب

جنوبیسنده یول اوزرنده اولوب وزیر مشارالیهک احفاندن
ومشاهیر اسخیادن قورد بک زاده « محمد بک » طرفندن ۱۳۰۸
ده اخشاب اولهرق بنا و آلتنده بولونان دکانلری بورایه وقف
وتخصیص ایتشدیر . مدرسه مزبوره بش حجره لطیفه دن عبارت
اولوب اقرباسندن شیخ القرا دیوان افندیسی زاده « حافظ
محمد نوری افندی » ایلاک مدرس اولمشدر .

۳۲ « مسعودیه مدرسه سی » امامیه ده « سلطان مسعود
سلجوقی » طرفندن بنا ایدیلن سمره قصبه سی دروننده یاپیلدینی
بهجة النوارینح ، العیلم الزاخر کبی توارینجده مذکور ایسه ده
ایذیلان تحریات جدیدیه نتیجه سنده امامیه نك داخل وخارجنده
کان سمره اطلاق ایدیلن بلده قدیمه لرده بو مدرسه یه دلالت
ایده جک آثاره تصادف ایدیه مدی . امامیه سمره سنده یعنی
اوچلر محله سنك منتهای شمالیسنده مزارلق ایچنده کوریلن
جسیم بنای سلجوقی مدرسه ظن اولنورسده سلطان مسعودک
تربه سی اولدینی یان ستونلری اوزرنده مشهود اولان کتابة
محکوکه دن اکلایشیلیر .

۳۴ (نارلی باغچه مدرسه سی) شهزادکان تربه سی اوکنده
کوریلان مزارلغک جهت غربیه سنده یول اوزرنده ایدی .
اون بر حجره سی ، بر درس خانه سی جسیم بر باغچه سی اولوب
اخشاب اولهرق یاپیلیمش وباغچه سی (نارلی باغچه) دیمکله
مشهور اولمش بولندیغندن بو مدرسه وجوارنده بولونان مزارلق

(نارلی باغچه مدرسه سی) و (نارلی باغچه مزارلنی) دیمکله مشهور اولمشدر . بومدرسه یی ۱۱۶۷ ده امامیه اعیانندن شهر کتخداسی توریدی زاده (الحاج حافظ سلیمان اغا) بناواوقافی تنظیم ایتمشدر . بوکا (مدرسه سایمانیه) دخی دینور .

بومدرسه یه ابتدا علمادن (حافظ عبدالله افندی) و ۱۱۸۹ ده وفاتيله البستانی (ابراهیم افندی) و ۱۲۰۰ ده (حافظ محمد افندی) و ۱۲۰۵ ده ارزنجانی (اولیا ابراهیم افندی) و ۱۲۱۱ ده (السید حسن افندی) و ۱۲۲۷ ده مجید اوزیلی (السید احمد افندی) و بعده اسکلبلی (حسین افندی) و بعده مخدومی (حافظ محمد افندی) مدرس اولدینی ائنده ۱۲۸۱ ده امامیه تصرفی (ضیا پاشا) شوسه یولی تنظیم ایدرکن تام یول اوزرینه کلدیکندن ذاتاً . شرف خراب اولان بومدرسه یی هدم و تخریب ایده رک نصفندن زیاده سنی یوله و دیگر نصفنی دخی مدرس اولان (حافظ محمد افندی) یه ویرمش و بوده اوزرینه برخانه بنا ایتمشدر .

۳۵ (یعقوب پاشا مدرسه سی) پیر الیاس حضرتلرینک جوارینده بولونان چله خانه تکیه سی اولوب مشارالیه یعقوب پاشا طرفندن ۸۱۵ ده چله خانه یعنی خلوتی تکیه سی اولوق اوزره بنا ایدلمشدر .

بومدرسه جامع شریفک یمین و یسارنده اولوب او طه لری اوافق و کار کیردر . شرق طرفنده او طه لک شمالنده واسع برشیخ

اوطه‌سی واردر . بو اوطه‌ده چله‌خانه و بو اوطه‌نك ده شيخ اوطه‌سی اولدینی و قفیه‌سنده مذکوردر .

بوتکیه ۱۰۳۱ تاریخه قدر بر شیخ‌ایله اداره اولنوب انجق یعقوب پاشا جامعی واعظی (الشیخ حسام‌الدین افندی) ایله علمادن (الشیخ عبدی افندی) اراسنده اون سنه قدر دوام ایدن مشیخت نزاعنی قطع ایچون شیخ اوطه‌سی تکیه و چله‌خانه دخی مدرسه اعتبار ایدلمش و تکیه شیخلکی حسام‌الدین افندی‌یه و یعقوب پاشا مدرسلکی دخی الشیخ عبدی افندی‌یه ویرلمشدر . بعده ترتیب مدارسه اداخل اولنه‌رق اربعین راده‌سنده اعتبار ایدلمش و درسعام اولان علمایه توجیه اولنوب ۱۰۹۹ ده علمادن (اسماعیل افندی) و ۱۱۰۷ ده قصریدیله مخدومی (خلیل افندی) و ۱۱۲۰ ده مخدومی (حافظ محمد افندی) و ۱۱۲۱ ده علمادن (ابوبکر افندی) و بعده مفتی زاده (السید ابوبکر افندی) و ۱۱۶۱ ده قصریدیله فضالادن محدث مشهور اوزون مدرس (سلیمان افندی) و ۱۱۹۳ ده وفاتیله تنصیف ایدلوب نصفه مخدومی (السید مصطفی افندی) و دیگر نصفه دخی فضالادن کشخانه‌لی (السید ابوبکر افندی) و ۱۱۹۸ ده (السید سلیمان افندی) و ۱۲۰۸ ده اوزون مدرس زاده السید مصطفی افدینك وفاتیله اوغللری (السید حافظ عبدالله حسن) افندیلر مدرس اولمشدر .

۱۲۰۷ ده السید سلیمان افدینك قصریدیله احمد افندی

زاده « محمد، احمد » افنديلر متصرف تدريس اولوب ۱۲۳۲ ده
السيد حافظ عبدالله افنديك وفاتيله مخدومي علمادن مشهور
صاري مدرس « السيد مصطفى افندي » و ۱۲۶۲ ده محمد
واحد افنديلرک وفاتنده برادري « السيد محمد افندي » ايله
مشترکاً يعقوب پاشا مدرسي اولمش و ۱۲۷۳ ده وفاتيله مخدومي
« السيد محمد طاهر افندي » مشترکاً وعموجهسي السيد محمد
افنديك ۱۲۸۳ ده وفاتيله مستقلاً مدرس اولديغي حالده
۱۲۹۱ ده وفات ايتمکله اوغللري « محمد سالم، حسن تحسين،
احمد شوق » افنديلر متصرف تدريس اولمشلر ايسه ده ۱۳۱۵ ده
رفع اولنه رق علمادن مجدي زاده « حافظ مصطفى صادق
افندي » مدرس اولمشدر .

۳۶ « يورکچ پاشا مدرسهسي » جامع شريفک ايجنده
واوکنده بولونان برقاج حجره سنکين اولوب پاشاي . شاراليه
طرفندن بنا ايدلمشدر . بو او طه ل ؛ اصلنده مدرسه اولق اوزره
بنا ايدلديکي وقفه منده مسطور اولوب ستين راده سنده معتبر
وبرنجي صنف مدارسدن معدود ایدی . بعده علمانک و طلبه
علومک کثرتنه بناءً متولی يورکچ پاشا زاده « مصطفى بك »
۱۰۴۴ ده جامع شريفک حولى سنده شرق طرفنده اخشا بدن
اوزايکي حجره يي حاوی بر مدرس بنا ايتمش و ۱۲۷۱ حدودنده
خراب اولوب باغچه شکنده قالمشدر . طقوزنجي و اوننجي قرن هجري
ظرفنده بك چوق افاضل بومدرسه يه مدرس اوله رق فضالان ،

کبار علمایه توجیه اولنمش و ۱۱۱۲ ده کبار علمادن حفظی زاده « الحاج حافظ علی افندی » و ۱۱۳۶ ده فضلادن « کرد حافظ » دیمکله مشهور (الحاج علی افندی) و ۱۱۴۸ ده مخدومی کبار فضلادن (الحاج حافظ عبدالرحمن افندی) و ۱۱۷۳ ده وفاتیه (حافظ عثمان افندی) و ۱۱۹۲ ده چوروملی (الحاج عثمان مخلص افندی) و ۱۲۱۲ ده وفاتیه کبار علمادن چایکوبلی (الحاج احمد خاکی افندی) ۱۲۲۱ ده وفاتیه علمادن ارکوبی زاده (السید کاشف محمد افندی) و ۱۲۳۳ ده مخدومی (السید عبدالرزاق افندی) و ۱۲۵۸ ده وفاتیه خاکی افندی زاده (محمد ، مصطفی) افندیلر مدرس اولوب ۱۲۸۰ ده محمد افندیکنک وبعده الحاج مصطفی افندیکنک وفاتیریه اولادی وظیفه تدریسه متصرف و بونلردن قهوه جی (محمدعارف) بولنمقده در . اما سیهده طلبه علوم و معارفی اتفاق ، ارباب تدریس و تعلیمی اعاشه و عموماً اما سیهده بولونان و خارجدن کلن فقرا و مسافرینی حسن اداره و اطعام ایتمک ایچون سلاطین ، وزرا ، امرا و اعیان و قنیه عمارتخانه لر یعنی مسافر خانه لر بنا ایدوب باشا یجه لری شونلر در :

بایزید پاشا عمارتی ، یورکچ پاشا عمارتی ، سلطان بایزید عمارتی ، محمد پاشا عمارتی ، خاتونیه عمارتی در . بو عمارت لک نزدنده ایریجه برر تابخانه اولوب شو حالد اما سیه شهرنده بش عمارتخانه بشده تابخانه واردر . بونلردن ماعدا عموماً مسافرین

وسياحين وفقرايه كـشاده اولمق اوزره اماسييده پك چوق
ضيافتخانهلر وار ایدی . باشلیجهلری شونلردر .

مولوبخانهده پروانه بك ضیافتخانهسی ، حاجی محمود چای
ضيافتخانهسی ، یعقوب پاشا ضیافتخانهسی ، شیخ جوئی
ضيافتخانهسی ، شیخ حسام‌الدین قباوی ضیافتخانهسی ، اهلی
خاتون ضیافتخانهسی ، خواجـه سلطان ضیافتخانهسی ، اخي
ضربخانه ضیافتخانهسی ، خصر پاشا ضیافتخانهسی ، یاقوت پاشا
ضيافتخانهسی ، اخي سعدالدین ضیافتخانهسی در . بو اون بر
ضيافتخانهك طعامیهسی مبذول ، طبایخی وخبازی معین و نقباسی
موظف اولوب بونلردن ماعدا خصوصی ضیافتخانهلر موجود
ایدی . دهـا بوندن قرق سـنه اولنه کلنجیه قدر اماسييده
موجود اولان اعیان و اشرافك خانهلری عموماً برر ضیافتخانه
حالنده ایدی .

وثائق عتیقه ، سجلات شرعیه ، قیور رسمیه و محکومه
واوقاف موجوده ایله ثابت اولان شوقدر مبائی دینه، مؤسسات
علمیه ، مآثر مدنیه و آثار اسلامییه ؛ اماسييده اسلاف کرامك
انتشار علومه ، تعمیم معارفه ، ترفیه اخوانه ، تسهیل اموره
نه بویوك همتلر ، نه یولده فداکاراقلر صرف و بذل ایلدکـلرینك
درجهسنى تعیین و بالعموم اعیان و اشراف عادتاً بوتون وارلغنى
ملت اسلامیـهك تعالیٰ اقبالنه وقف ایتدکـلرینی اثبات ایدر .
شو مؤسسات خیریهك تاریخلرینه دقت بیورولورسه

امامیه نك فتحندن سكز يوز تاريخنه قدر تدریجاً تزايد ایدن مبانی علمیه ؛ بیک تاریخه قدر فوق العاده تزايد و بیک یوز اون بش تاریخه قدر توقف و ایکیوز اون بش تاریخه قدر جزئی تزايد ایتدیکی حالده بعده تناقص ایتمش و بطی صورتده سیر ایدن تدنی ، اکتساب سرعت ایدرک اوکنه کلن مبانی علمیه یی ، مؤسسات خیریه یی هدم و تخریب ایله مش اولدینی اکلایلیر .

ایشته بوقدر تخریباتک اوکنی آلمق و تعمم ایدن جهلی علمه تحویل ایتک ایچون معارف عمومیه نظارتی امامیه ده آلاجه یحیی مدرسه سنئ ییقبوب یرینه ۱۲۸۱ ده جسم بر (مکتب رشدی) بنایتمش و قوجه برلوا مرکزینه بر مکتب عرفانک عدم کفایتی انجق ۱۳۰۰ تاریخنده تقدیر اولنه رق اوچ (مکتب ابتدائی) دهاکشاد اولنمشدر . فقط ۱۳۱۱ حریقنده (مکتب رشدی) یاندیغندن ۱۳۱۵ ده بکمر سرایی یرنده بر (مکتب اعدادی) و متعاقباً کرد مکتبی یرینه برده (انات ابتدائی مکتبی) کشاد اولنه رق اسکی (مکتب رشدی) دن پک چوق استفاده ایدلمش و ۱۳۲۶ ده حیات مشروطیت قائم اولدیغنی متعاقب امامیه محیطنده افکار عمومیه نك مظهر اولدیغنی بر تحول آنی اوزرینه هر کسده بر حرکت محسوس اولمش و امامیه اعیانی اسکی سماحتی یننه ابراز ایتکه باشلامشدر .

بنساء علیه : زیله لی (الحاج حسن افندی) ؛ بری قاتار محله سنده ، دیکری سلطان بایزید جامعی حوالیسنده ایکی مکتب

وطوپچی زاده (خلیل افندی) و برادری؛ اسکی مکتب رشدی
یرینه بر مکتب واماسیه اتحاد ترقی قلوبی؛ قرغانچی محله سنده
روضه اتحاد نامیه مشهور بر مکتب و خطیب زاده (محمد امین
افندی) بورمه مناره اتصالدند معمار باشی حسن افندی مکتبی
یرینه بر مدرسه ویموق عثمان زاده (محمد حمدی افندی)
سلطان بایزید جامعی حولیسند معظم بر کتبخانه بنا و تعمیم
معارفه همت واعتنا ایتملردر.

معارف نظارتی دخی مقدا ایکنجی صنفدن اولمق اوزره
کشاد ایدیلن اعدادی مکتبئی ۱۳۳۰ اوئلنده برنجی صنفه
اعلا [*] ایدرک اوچ مکتب ابتدائی آلتی به ابلاغ و برانات
مکتبی کافی اولدیغی اکلاییدیلدن اوچلر محله سنده بردها
شاد ایله مشدر.

عالمده ملوک و امرايه وطن اولمش
یوزلرجه صدور و وزرایه وطن اولمش
بیکلرجه شیوخ و علمایه وطن اولمش
فکرایت که کچیرمش نه لر اعصار اماسیه

اماسیه ده الیوم مشهود اولان آثار عتیقه و جدیده و مبائی

[۱] بومکتبی اعلايه اماسیه مبعوثی فاضل عارف افندی حضر تلرینک
همتی باعث اولاشدر.

علمیه و سائرہنک دلالت و تواریخ مضبوطہنک شہادت ایلدیکی
اوزره اماسیہ ؛ پونتوس قرالرینہ ، بعدہ بر قاج یزانس
ایمپراطورلرینہ و بعدہ دانشمندیہ ، سلجوقیہ ، عثمانیہ تورک
حکومتلرندن بر قاج پادشاه اسلامہ وطن اولمقلہ مشہور اولمشدر .
اماسیہدہ اجرای حکومت ایدن پونت قرالری ایلہ یزانس
ایمپراطور اخلندہ اشتہار ایدن ایکی خاندان قدیم ؛ اماسیہدن ظہور
ایلدیکی مشہور اولوب بونلردن بری (فوقاس خاندانی) دیگر یده
(قومنتوس خاندانی) در . برنجی خانداندن فوقاس ، نیکفور
وایکنجی خانداندن ایساق ، آکسی ، یانی نامیلہ مشہور بش
ایمپراطور اماسیہدن ظہور ایتمشدر .

× دانشمندیہ حکومتشدن ملک عزالدین محمد غازی بک
وسلاطین سلجوقیہدن برنجی وایکنجی سلطان مسعود و پادشاہان
آل عثماندن سلطان مراد خان ثانی ، سلطان سلیم خان اول
کبی ایکی پادشاه عالی شان اماسیہدہ اشتہار و تولد ایتدکاری کبی
ملوک طوائفدن سلطان آرتنا بک و شاد کلدی پادشاه کبی
اناطولی دہ تأسیس حکومت ایدن ایکی حکمدار ، اماسیہدن ظہور
ایتمشدر . بونلرک صورت ظہوری و تراجم احوالی باب اول
و ثانی دہ ذکر اولنہ بقدر .

دولت سلجوقیہ و زراسندن صاحب اعظم مقامندہ بولونان
(حسام الدولہ حسن غازی ، مہذب الدین علی ، مخدومی معین الدین سلیمان
پروانہ ، حفیدی عزالدین محمد پروانہ ، شمس الدین محمود طغرائی ،

برادری فخرالدین علی) وسلطنت جلیله عثمانیه وزراسندن
(یحییٰ بك زاده بایزید پاشا ، خواجه محمد پاشا ، جمالی زاده
پیری محمد پاشا ، بایبوردلی احمد اغا زاده قره ابراهیم پاشا ،
روس رضوان اغازاده احمد پاشا ، ظنه‌لی جعفر اغا زاده السید
احمد پاشا ، خطیب زاده نائلی عبدالله پاشا ، شروانی زاده محمد
رشدی پاشا) اماسیه‌نك یتشدیردیکی اعظم رجال سلجوقیه
وعثمانیه‌دندرز .

حکومت سلجوقیه‌دورنده قاضی القضاة اولان (اوحالدین
محمود القیماری ، صدرالدین محمدالترکمانی ، عمادالدین عمرالاماسی ،
نظام‌الدین عبدالملک الرومی) وسلطنت جلیله عثمانیه‌ده شیخ الاسلام
اولان (نیکده‌لی زاده صوفی بایزید چلبی ، کومش‌لی زاده
عبدالرحمن چلبی ، افضل زاده حمیدالدین محمد چلبی ، جمالی
زاده زنبیلی علی افندی ، کمال پاشا زاده شمس‌الدین احمد افندی ،
مؤید زاده عبدالقادر شیخی افندی ، ممک زاده مصطفی افندی)
دخی اماسیه‌دن ظهور ایدن اعظم علمادندر .

بونلردن ماعدا بك چوق وزرا ، صدور ، امرا ، موالی
واعیان ، اماسیه‌دن نشئت‌ایده‌رك هر بری اماسیه‌ده وبلادسأترده
برر سلاله عظیمه براقش وانسابندن بك چوق اكابر مسالك
مختلفه‌ده كسب اشتهار ایتشلردر . بوسالاله‌لردن بك زیاده‌مشهور
اولانلری شونلردر .

(آرتنا بك سلاله‌سی) اماسیه‌ده بککربکی عزالدین محمد

پروانه بكك نائل صحبتي اولان اويغور بکلرندن جعفر بکک
مخدومی سلطان آرتنا بك اولادینه دینور. بونلر مؤخرأ ایکی
فرقه اولوب برینه (اینه خانلو) دیکرینه ده (آرتنالو) دینشدر.
برنجیسی (اینه خان بن جعفر بك) وایکنجیسی (آرتنا بك
بن محمد بك) اولادلریدر. هر ایکی فرقه ده اماسیه ده تفرع
ایدهرك بيك تاريخلرته قدر انسابی بولنه بيلمشدر. بونلردن
محمد بك، جعفر بك، علی بك، اینه خان بك، علی پاشا بك
مشهور اولوب علی پاشادان اوچنچی بر فرقه ده ا ظهور ایدهرك
(علی پاشا زاده) دینشدر.

(اتابك سلاله سی) اماسیه ده ایکنجی سلطان مسعود
سلجوقی اتابکی اولان ناصرالدین احمد بك اولادینه دینور.
بونلردن اوچ فرقه عظیمه ظهور ایدوب برینه خواجه محمد
پاشا زاده دیکرینه یورکچ پاشا زاده او برینه خضر پاشا زاده
دینشدر. دیکر بر فرقه سی ده الیاس بك زاده اولوب بونلرک
جمله سی ده شهرت لرینی محافظه ایدهرك ادامه موجودیت ایتشدر.
اليوم خواجه محمد پاشا وخضر پاشا احفادی ذوی الارحام
ویورکچ پاشا اولادی تماميله عصبات اوله رق موجوددر.

(ایلتکین سلاله سی) اماسیه فاتح لرندن ودانشمند غازی
امراسندن ناصر الدولة ایلتکین خوارزمی اولادینه دینور.
بونلر اوچ فرقه یه منقسم اولوب غیاث الدین محمود فرقه سی
قونییه ده وحسام الدین حسین رومی فرقه سی مصرده قالمش

وانحق آیدین فرقه‌سی اماسیه‌ده تفرع ایتمشدر. بونلردن مؤخرآ قاکلی شعبه‌سی ظهور ایدوب بیک یوز تاریخنه قدر افرادی بولنه بيلمشدر. بونلردن آیدین پاشا، علی، حسن بک‌لر مشهوردر.

(بابا سالاه‌سی) ۶۵۰ تاریخنه قدر دور سلجوقی‌ده پک زیاده مشهور اولان بابا الیاس خراسانی اولادینه دینور. بونلردن اوج فرقه عظیمه ظهور ایدرک هربری شعبه‌لر تشکیل ایتمشدر. عاشق پاشا فرقه‌سی، قتلو بک فرقه‌سی، فیروز بک فرقه‌سی اک زیاده مشهور اولوب برنجی فرقه نامنی بیک تاریخنه قدر محافظه ایلدیکی حالده مؤخرآ انعام بک زاده، متولی زاده عنوانلریله تحویل شهرت ایتمشدر. ایکنجی فرقه‌دن باشلیجه اوغورلو، اولو بکلو بعده جبه‌جیلو، فغفورلو شعبه‌لری ظهور ایدوب جبه‌جی زاده، فغفور پاشا زاده فرقه‌لری دوام ایدرک سفر اغا زاده، حفظی زاده بعده غنی زاده شهرتلی تحدث و اوچنجی فرقه‌دن فیروز پاشا زاده شعبه‌سی اشتهار ایتمشدر. بوسالاه تحری ایدیلیرسه اماسیه‌نک همان اونده برنجی تشکیل ایدرک بر راده‌نی بولدینی اکلاشیلیر. افته، مورامول، اینه بازار، اولوس کویلرنده مسکون اولان تورکارک چوغی بوسالاه‌دن اولدینی کبی مجید اوزی قضا‌سنده علوان چاپی، قانی، قره‌یعقوب، قیشلاق کویلری‌ده بوسالاه‌دندر. بونلردن

تعدادی غیر قابل رجال دولت ظهور ایتمشدر. حاجی بکر اددلر
دخی بونلردندر .

(بیچار سلاله سی) یدنجی قرن هجری رجالدن امیر
حسام الدین بیچار اولادینه دینور . بونلر مؤخرأ حمزه پاشا
زاده ، اسماعیل پاشا زاده نامیه ایکی فرقه یه منقسم اوله رق
شرفلری ۹۲۶ تاریخلرینه قدر دوام ایلدیکی بولنه بیلمشدر .

(جمال الدین سلاله سی) اماسیه ده ۷۳۹ ده وفات ایدن
فضلادن جمال الدین اقسرای اولادینه دینور . بونلر مؤخرأ
اوج فرقه اولوب برفرقه سی مصره دیگر فرقه سی قونیه به بده
وطنلری اولان اقسرایه کیتمشلر و برفرقه سی ده اماسیه ده قلوب
جمالی زاده لکله تسلسل ایتمشلردر . بعده اقسرایه کیدن فرقه
دخی اماسیه به کلوب نما محله سنده توطن و بونلردن صدر اعظم
اعظم پیری پاشا و شیخ الاسلام زنبیلی علی افندی شعبه لری استانبولده
وجلای خلیفه شعبه سی اماسیه ده اقامت ایتمشلردر .

(حاجی افندی سلاله سی) اماسیه قضاتندن اماسیه لی چاوش
زاده حاجی محمد افندی اولادینه دینور . بونلر بیک تاریخنده
ظهور ایدوب قاضی زاده ، مفتی زاده ، حاجی بکر اغا زاده
ناملریله اوج شبهه یه آیرلمشلردر . بونلردن عمر پاشا ، احمد
پاشا ، مصطفی پاشا نامنده اوج وزیر چیقمشدر . بونلرک اولادی
واردر .

(خلاطی سلاله سی) اماسیه مدرسلردن و ۷۰۰ اوائلده

وفات ایدن نجیب الدین موسی الخلاطی اولادینه دینور. بونلردن
عمادی، مسعودی ناملریله ایکی فرقه عظیمه ظهور ایدوب
هربری متعدد شعبه لره انقسام ایتمشدر. عمادیلردن شیخ مؤید
زاده، کوبه لی زاده و چقال زاده شعبه لری امامیه دن و شیخ الاسلام
ابوالسعود افندی سالاله سی اسکلبدن تفرع ایدرک هربری
امامیه ده، استانبولده دیکر شعبه لر تأسیس ایتمشدر. مسعودیلردن ده
شیخ زکریا زاده، عبدالله پاشا زاده شعبه لری آریلوب برنجی
شعبه بیک حدودینه قدر کلمش وایکنجی شعبه ۱۲۸۰ تاریخنه
قدر امامیه ده و الیوم صونسه ده دوام ایتمکده بولنمشدر. بو
سالالهدن مشاهیر قضات، شیخ الاسلام، صدور، موالی،
امرا یک چوق کلشدر.

(رجب سالاله سی) ۹۰۰ سالنه طوغرو ارتحال ایدن
مشاهیر قضاتدن امامیه لی صدرالدین رجب چلبی اولادینه
دینور. بونلردن بیرام زاده، شعبان زاده فرقه لری ظهور
ایدوب برنجیسی انقرده بعده استانبولده ایکنجیسی امامیه ده
بعده استانبولده شعبه لر تأسیس ایتمشدر. بوسالالهدن زکریا
افندی، یحیی افندی کی ایکی شیخ الاسلام و حسن افندی،
شیخ محمود شفائی افندی کی ایکی قاضی عسکر ظهور ایتمشدر.
(سنقور سالاله سی) ۷۰۰ اوائلنده وفات ایدن امرادن
سیف الدین سنقور اولادینه دینور. بونلر مؤخرأ عثمان پاشا
زاده، چریباشی زاده، یخشی یک زاده عنوانلریله اوج فرقه

تأسیس ایدوب برنجی فرقه واوچنجی فرقه فوق العاده احراز شهرت واوچنجی فرقه اماسیه ده بولوب زانباق اوغللری ، متولی اوغللری عنوانلریله چریباشی محله منده ۱۳۰۰ تاریخنه قدر ادامه موجودیت ایتمشلردر . بولردن بایزید پاشا ، سنان پاشا ، داود پاشا ، احمد پاشا کبی وزرا وامرا ظهور ایدرک هربری برر شعبه براقشدر .

(شاد کلدی سلاله سی) اماسیه ده مسکون اچقه قیونلو قبیله سندن اولوب اماسیه حکمداری اولدینی حلاله ۷۸۳ ده وفات ایدن شمس الدین شاد کلدی پادشاه اولادینه دینور . بولردن دواتدارلو ، بوراقلو نامیله ایکی فرقه عظیمه تشکل ایدوب دواتدار احمد پاشا اولادینه دواتدارلو دینشدر . احمد پاشا اولادندن شادی بک زاده ، بوراق بک زاده ده صوکره شادی پاشا زاده ، سنان پاشا زاده وقاضی زاده ناملریله بش شعبه ظهور ایتمش وسنان پاشاشعبه سندن بکربک زاده ، درویش بک زاده فروعی کلشدر . بکربک شعبه سی ۱۲۶۰ تاریخنه قدر اماسیه ده اثبات موجودیت ایتمش ودرویش بک شعبه سی ۱۲۰۰ تاریخلرنده تحویل عنوان ایلدیکی مناسبته اکلایشیله مه مشدر .

(شیخ عماد سلاله سی) ۸۴۰ رجالندن الشیخ عمادالدین عمرالحلوتی اولادینه دینور . بولر مصالح زاده لکله اشتهار ایدوب بیکن صوکره استانبولده خواجه زاده واماسیه ده خواجه پاشا زاده عنوانلریله برر شعبه صدور وامرا تأسیس

ایتمشلدردر . خواجه سلطانی عمر افندی وقاضی عسکر عبده افندی ، عثمان افندی ، عمر افندی وخواجه احمدپاشا بونلردندر . (شروانی سلاله سی) سکزیوز رجالندن الشیخ علاء الدین علی شروانی اولادینه دینور . بونلردن غازی بك زاده ، تاجی بك زاده ناملریله ایکی فرقه چیقوب برنجیسی کوبری ده ایکنجیسی اماسیه ده واستانبولده اشتهار ایتمشلدردر . ایکنجی فرقه دن بعده تذکره جی زاده نامیله برشعبه آیرلمشدر . بونلردن تاج الدین پاشا ، محمودپاشا ، قاضی عسکر جعفر چلبی ، رئیس الکتاب محمد بك مشهور اولمشدر . اماسیه ده یاقین زمانلرده دیگر سراج الدین اسماعیل شروانی سلاله سی ظهور ایدرک جمله سنه شروانی زاده دینمشدر . بونلردن صدر اعظم محمد رشدی پاشا وقاضی عسکر احمد افندی کلشدر .

(طورمطای سلاله سی) ۶۷۹ ده وفات ایدن اماسیه والیسی سیف الدین طورمطای اولادینه دینور . بونلر دخی کچی زاده قیا پاشا زاده ناملریله ایکی فرقه یه آیریلوب هر برندن مهم ذوات ظهور ایتمشدر . بواچی فرقه افرادی ۱۱۰۰ تاریخلرینه قدر یاشایه بیلمشلدردر . بونلردن یعقوب شاه ، قیا پاشا ، مصطفی پاشا ناملریله رجال حکومت کلشدر .

(طوغان سلاله سی) ۷۴۰ علماسندن بدرالدین طوغان ترکمانی اولادینه دینور . بونک احفادند . کمال پاشا زاده فرقه سی غایت اشتهار ایدرک بیک تاریخنه قدر ادامه شرف ایده بیلمشدر .

وزیر کمال الدین محمد پاشا ، شیخ الاسلام شمس الدین احمد افندی
بوسالاله بی شرفلندیرمشدر .

(ظنه لی ساله سی) ۱۰۶۹ وقعه -نده اشتهار ایدن زعمادن
ظنه لی قره جعفر اغانک اولادینه دینور . بونلر یکن احمدپاشا
پاشا زاده ، میرزا پاشا زاده ، ظنه لی زاده عنوانلریله اوچ فرقه
عظیمه اولوب برنجیسی استانبولده دیکر ایکسی اماسیه ده تسلسل
ایتمشلردر . ظنه لی زاده فرقه سنندن شریف افندی زاده ، شریف
پاشا زاده باقرچی زاده شعبه لری آریلوب ایکنجیسی استانبولده ،
صدرده دیکر ایکسی ینه اماسیه ده تفرع ایتمشلردر . صدر
اسبق یکن احمد پاشا ، میرزا پاشا ، شریف محمد پاشا ، السید
احمد افندی ، السید عبدالله افندی ، السید ولی الدین افندی
کبی وزرا ، امرا ، علما وبرچوق اعیان بوسالالهدن ظهور
ایتمشدر .

(فضلی ساله سی) ۱۰۸۰ -انه طوغرو فوت اولان
واعظ مشهور فضل الله افندینک اولادینه دینور . بونلر فضلی
زاده لکله شهرتلرینی محافظه ایدرک یاقین زمانلرده حاجی باشی
اوغللری ، سلام اوغللری دیمکله تحویل عنوان ایتمشلردر .
بوواجغی اویندی ان بکلربی فضلی پاشا استانبولده قابوبقیه سی
اماسیه ده اعیان وهربری حائز رجحان اولمشلردر .

(قیالی ساله سی) ۱۰۶۰ رجالندن بکلربی قیالی احمدپاشا
اولادینه دینور . بونلر قیالی پاشا زاده عنوانیله ۱۲۶۰ تاریخنه

قدر ادامه شرف ایتمشلردر. اخمد پاشا ، علی پاشا ، عمر کاشف پاشا بوسالاه دندر .

(کشانی سلاله سی) ۶۰۰ رجالدن اماسیه قاضیسی تاج الدین ابونصر محمد کشانی اولادینه دینور . بونلردن پروانه بك زاده عنوانيله بفرقه عظیمه ظهور ایدهرک اناطولی رجال وامراسنه آمر مطلق اولمشدر . بوفرقه ؛ عنوانی غائب ایتیهرك طقوزیوز سالنه قدر ادامه شرف ایتمش وبقیه سی بوانه مشدر . بونلردن مهذب الدین علی صاحب سلجوقی اوله رق بواواجانی اوایندیرمش ومعین الدین سلیمان پروانه ، عزالدین محمد پروانه کی ایکی مهم ذات چیقارمشدر . برنجیسنک اولادی سینوب ده ایکنجیسنک اولادی اماسیه ده امارت ایتمشلردر .

(کودول سلاله سی) ۵۴۵ سالنده اماسیه ده سلطان مسعود سلجوقی سرعسکری ودامادی امیر کبیر کودول اولادینه دینور . بونلر سولی اوغللری ، خلفت اوغللری ناميله ایکی فرقه عظیمه اولوب خلفت غازی اولادی دوام ایتمشدر . بو اولاددن قوتلو پاشا زاده ، خطیب قاسم زاده ، ابوالقاسم زاده شعبه لری ظهور ایدوب ایکنجی شعبه استانبولده اوچنجی اماسیه ده قلوب ابول اوغللری دینمشدر . قوتلو پاشا زاده شعبه سی دخی اماسیه ده قاله رق امرادن بولمشدر .

(کورجی سلاله سی) ۱۰۵۷ ده اماسیه الای بکیسی اولان بیوک کورجی علی بکک اولادینه دینور . بونلر کورجی زاده لکله

شهر تلرینی ۱۲۴۰ تاریخچه قدر محافظه ایدوب بعده حافظ علی پاشا زاده ، دلی بك زاده عنوانرلیله اشتهار ایتشلردر . کورجی علی بك اولادندن خلیل پاشا ، حافظ علی پاشا ، حفطی محمد پاشا ، مقداد احمد پاشا نامرلیله اوچ میر میران ، ایکی وزیر ظهور ایتشدر .

(کومشلی سلاله سی) ۶۷۰ رجالدن وامرای سلجوقیه دن کومشلی امین الدین یونس مستوفی اولادینه دینور . بونلردن بك چوق فرقه لر ، شعبه لر یتشدیکی حالده جمله سی ده کومشلی زاده لکله اشتهار ایتشلردر . بونلردن اماسیه امیری تاج الدین محمود چلبی اولادی اعیانندن وسیدی حسام الدین حسن چلبی اولادی امرادن اوله رق احمد پاشا ، شمس الدین پاشا ، ابراهیم پاشا بوسیدی حسام اولادنددر . پیر علاء الدین علی چلبی اولادی ده مشایخ و علمادن اولوب حضرت پیر الیاس خلوتی واحفادی بوسلاله دندر .

(مؤید سلاله سی) ۷۴۷ ده اماسیه علماسندن بولونان (زین الدین سیاوش دفرکی) احفادندن اماسیه مفتیسی مؤید چلبی اولادینه دینور . بونلر عموماً مؤید زاده لکله مشهور ایکن عبدالرحیم افندینک حفیدی خصم محمد افندینک اولادینه خصم زاده وقضاتدن عبدالهادی افندینک اولادینه هادی زاده واماسیه اعیانندن عبدالواسع چلبی اولادینه واسع چلبی زاده دیمکله اوچ شعبه حدوث ایلش و دیگر فروع ، مؤید زاده شهرتی

محافظه ايله مش وایکی اولکیلر استانبولده قلوب واسع چلی زادلر اماسیهده الیوم موجود بولمشدر . بونلردن قاضیعسکر عبدالرحمن افندی ، شیخ الاسلام عبدالقادر شیخی افندی و پدری شیخ عبدالرحیم افندی پک مشهور اولمش وعلما ، قضات وموالی ناقابل تعداد بر حالدهدر .

(مصاح الدین سلاله سی) ۷۵۷ ده اماسیه علما سندن مصلح الدین موسی اولارینه دینور . بونلره عموماً (مصاحی) دینور ایکن ۹۰۰ تاریخندن صوکره محمدپاشا زاده ، سیدی پاشا زاده نامیله اماسیهده ایکی شعبه حاصل اولمش وبعده برنجی شعبه منطفی اولهرق ایکنجی شعبه دن خطیب زاده نامیله بر قول ظهور وکسب اشتهار ایتمشدر . ۱۱۴۰ سالته طوغرو بوقول تمامیه استانبوله نقل اقامت ایدهرک سیدی اوغللری اماسیهده قالمش واماسیهده قالانلری ده منطفی اولمشدر . بوسالاهدن پک چوق اماسیه قاضیلری ، قاضیعسکر منلا ولدان چلی ، وزرادن محمد پاشا ، صدر اعظم نائی عبدالله پاشا وامرادن محمود پاشا ، سیدی احمد پاشا ، مصلح الدین پاشا وبر قاق دفتردار ، یکچیری اغاسی وپک چوق علما ، قضات ظهور ایتمشدر .

(نیکده لی سلاله سی) ۷۷۰ ده اماسیه رجالندن بولونان اخی حسین نیکدوی اولادینه دینور . بوسالاهدن صوفی زاده دیمکله مشهور بر غرقه ظهور ایدهرک پک زیاده اشتهار و بیك تاریخنه قدر ادامه شرف ایتمشدر . بونلر معلم سلطانی صوفی بایزید

چلبی اولادی اولوب بری میرمیران دیکری وزیر اولان ایکی محمد پاشا بو سلاله دن ظهور ایله مش واما سیه ده صوفی زاده جمله سنده اقامت ایتمشلر در .

(یکن سلاله سی) اما سیه ده ۱۰۶۰ حدودنده مشاهیر زعمادن کوچک علی بکک حفیدی یکن علی بکک اولادینه دینور . بونلره عموماً یکن زاده دینوب وزرادن عمر پاشا واعیاندن ابراهیم عاصم بک بوسلاله نک اک مشهوری در . بویکن علی بک رختوان محمد پاشانک همشیره زاده سی اولوب بورختوان محمد پاشا دخی اما سیه ده بر سلاله تشکیل ایلدیه ده بونلرک نفوذی یکنلرینه غلبه ایده مه مشدر . جمله سنه رختوان زاده دینور . اک مشهورلری الحاج ابراهیم ، علی بکلر در .

(یکیجه لی سلاله سی) اما سیه جوارنده بولنسان یکیجه کویندن و ۱۲۰۰ ده اما سیه اعیانندن یکیجه لی احمد پاشا اولادینه دینور . بونک وبرادری دفتر دار محمود و علمادن علی افندیلرک اولادینه یکیجه لی زاده دینور . احمد پاشا اولادندن محمد پاشا ، حسین پاشا نامیله ایکی وزیر ظهور ایتمشدر .

شوانساب عالیهدن ماعدا اما سیه ده وزرا ، امرا ، علما ، مشایخ ، موالی ، اعیان سلاله سی پک چوق اولوب اما سیه نک نه قدر مشاهیر و اعیان یتشدیردیکی ملاحظه اولنورسه ایضاحنده بولند یغمز درت مصرعک بر مبالغه دن عبارت اولمیدیغی اکلا شیلیر . ایشته شورجالی بیلدیرمک ، اما سیه نک نصل مبارک ،

بر شهر معظم اولدیغی اکلایمق ایچون یکر می بش سنه لک بر
کلفت عظیمه اختیار ایدلمشدر .

لایقمی که بو منبع اختیار اوله مجهول
هر فاضلی بر کوشه نسیانده غمخول
لایقمی که شومنت ابرار اوله مذهب
مبهم قاله دهر ایچره شو اسرار اماسیه

بالاده اجمال ایدیلن مناقب واحواله نظراً اماسیه ؛ بر منبع
اخیار ، منت ابرار اولدیغی حالده وقیله کافه احوالی جامع بر
تاریخ مکمل تألیف ایدلمدیکی جهته شوقدر مناقب واحوال
ماضیه سی مجهول ، اخیار ی کوشه کیرخول اوله رق قالمسی لایق
کوريله مدی .

اناطولی ده اماسیه نك احوال ماضیه سنی ذکرایتمک ، تاریخی
یازمق (تورك) ملت معظمه سنك مفاخر عظیمه سندن ، مناقب
قدیمه سندن بحث ایتک قدر مهم اولدیغی محرر عاجز دن مقدم نظر
دقه آلان بعض ذوات ، اماسیه نك علما وشعرا سینه و بعض
وقوعات و آثارینه دائر کتب و رسائل جمع و تألیف ایتمش
اولدقلری اثنای تحریاتده اکلایمق اولمقله اله کچنلر شو
صورتله اختصار اولنه بیلیر .

(بزم و رزم) حاکم سیواس قاضی برهانک کاتب دیوانی

اولان عزیز بن اردشیرالاسترابادی طرفندن لسان فارسی اوزره یازلمش بر اثر نفیس اولوب ۷۶۸ - ۷۹۸ تاریخنه قدر سیواس، اماسیه و ملحقانتک احوال تاریخیه سنی جامع در . استانبولده ایاصوفیه ویره باتان کتبخانه لرنده بولنور .

(منشآت) چلبی سلطان محمد خان حضرت تلیزینک اماسیه ده اجرای حکومت بیوردینی زمانده بعض ملوک و امرای اطرافه کوندردیکی مکاتب و تحریرات رسمیه ایله برابر اماسیه امراسی طرفندن بعض امرای اطرافه یازلمش مکاتب مخصوصه دن عبارت اولوب عربی و فارسی لسانلری اوزره محرردر . ولی الدین افندی و اسعد افندی کتبخانه لرنده مجامیع و منشآت آراسنده بولنمشدر .

دیگر (منشآت) اماسیه لی منیری چلبی طرفندن یازلمش بر اثر اولوب ۸۸۶ - ۹۱۷ تاریخنه قدر اماسیه والیسی شهزاده سلطان احمد طرفندن پدری سلطان بایزید خان ثانی حضرت تلیزینه و سائر امرایه تحریر ایدلمش معروضات و مکاتب مخصوصه یی جامع در . بوده ولی الدین افندی کتبخانه سنده منشآت آراسنده بولنمشدر .

(تذکره عبیدی) مشهور عبدالله پاشا مدرسی اماسیه لی عبیدی افندی طرفندن ترتیب ایدلمش بر اثر ادبی اولوب ۱۰۰۰ - ۱۰۸۱ تاریخنه قدر اماسیه دن ظهور ایدن شعرانک اشعارینی و غایت مختصر تراجم احوالی جامع در . بونک کتارنده

امامیه ده حادث اولان زلازل و وقوعات غریبه بی دخی قید ایتمشدر . بواثر پک ناقص بر صورتده امامیه ده بولنمشدر .

(تذکره سادات) مدرس مومی الیه عبدی افندینک مخدومی (السید الشیخ علی افندی) امامیه نقیب الاشراف قائم مقامی ایکن ۱۱۱۰ تاریخنده مکمل بر خط ایله یازدخی دفتر سادات امامیه اولوب نقیب الاشراف امامیه لی خواجه زاده السید عثمان افندی طرفندن مصددر . حفا که شواثر شریفک انجق اون صحیفه سی اله کچمشدر . بونکله برابر پک چوق استفاده ایدلمشدر .

(دفتر وقوعات) قائم مقام مومی الیه شیخ علی زاده السید احمد رشدی افندی طرفندن ترتیب اولنوب ۱۱۲۱ - ۱۱۵۳ تاریخنه قدر امامیه ده حادث اولان زلازل و آفاتنی ضبط و بعض و فیاتی قید ایتمشدر . بونکده اورته لرندن اون ورقه سی ناقص اوله رق بولنمشدر .

(تذکره علما) مرزیفون مدرسلرندن عبدالرحمن اشرف افندی طرفندن ترتیب ایدلمش بر اثر اولوب عهد شهبانده استفاضه و اخذ علوم ایتدیکی اساتذه سنک و ۱۱۰۰ - ۱۱۴۰ تاریخنده قدر امامیه و ملحقاتنده ظهور ایدن بعض علمانک تراجم احوالی و و فیاتی ضبط و قید ایتمشدر . مدرس مومی الیه ک آثارندن اولان تذکره الحکم کنارنده بواثری طبع ایدلمشدر . (دفتر نفوس و محلات) اوچ قطعه اولوب بری ۸۱۶ - ۹۱۸ ،

دیگری ۱۰۰۰ - ۱۰۵۷ و دیگری ۱۱۱۲ - ۱۱۶۳ تاریخ لرینه
 قدر اماسیه نك نفوسنی ، محلاتنی ، اعیانی ، اوچر بطن قدر
 انسابنی جامع در. برنجی ، اوچنجی ناقص وایکنجی تام اوله رق ۵
 بولنش وهربری امنای دفتر خاقانی طرفندن تصدیق اولمشدر .
 (المجموع من المشهود والمجموع) اماسیه لی عا کف افندی
 زاده السید عبدالرحیم افندی طرفندن ترتیب ایدلمش بر اثر
 عظیم در ۱۰۵۰ - ۱۲۲۱ تاریخنه قدر خاصه اماسیه ده وعموماً
 اناطولی ده اشتهار ایدن علمایی و اساتذّه کرامنی ومعاصر لرینی
 جامع اولوب بدی سنه تحری اوله رق مورخ شهرور اسماعیل پاشا
 حضر تلیرنك مقرنی کوینده کائن خصوصی کتبخانه سنده تام
 ومؤلفك خطیله محرر اوله رق بولنه بیامشدر . آثار منأخرین ایچنده
 اناطولی ایچون بوندن ده کوزل طبقات العلماء کور یله مه مشدر .
 (البابل الراسیه فی یاض اماسیه) چوروملی قره مفتی
 زاده مصطفی واضح افندی طرفندن جمع ایدلمش بر اثر در .
 اماسیه نك فتحنه ، علمانه ، تشکیلاتنه واماسیه لیلرک طبایع
 و اخلاقنه دائر اولوب تاریخه مسند برشی دکدر . (دفتر
 وفیات) اماسیالی - جی عبدالله اوغلی (الشیخ مصطفی افندی)
 طرفندن ترتیب ایدلمش بر اثر نفیس اولوب ۱۲۴۵ - ۱۲۹۱
 تاریخنه قدر اماسیه ده کبار علمانك وفیاتنی قید ایتمشدر . بودتر
 دخی بش سنه قدر تحری اوله رق اومولیمان بر یرده تام
 اوله رق بولمشدر .

بوفکر ایله صرف ایلدی چوق سعی مکمل
جمع ایلدی اقوال و روایاتی مسجل
تحقیق ایله یازدی اکا تاریخ مفصل
عصری کبی بر خادم فخار اماسیه

عرض ایدیلن آنار متقدمین، اماسیه نك كافة احوال و رجائی
جامع اوله مدیغدن بونلری ضم و علاوه ایدرهك بر تاریخ مفصل،
تحریرینی تصمیم ایدن محرر عاجز ؛ زمان صبا و تمده بر مدت
ادبیات ایله اشتغال ایتدیكم جهته اقران آراسنده (عصری)
مخلصنی اختیار و بعده تتبعات تاریخیه حصر اشغال ایتمش
ایدم .

انهای تحصیلده اماسیه تاریخنی حقهده تحریرات و تتبعات
عاجزانه می و تحریرات جدیدیه نك صفحات مختلفه سنی عرض
ایده بیلیمك ایچون ترجمه حالمدن بر قسمنی بیان ایتیمك ضرورتی
حاصل اولدیغنه بناءً ضرورتك ایجاب ایتدیکی قدری ذکر
اولتور .

اماسیهده چریباشی محله سنده جامع شریفك اتصال غریب سنده
بولونان خانهده ۱۲۸۶ رجبك صوك جمعه سی حجر نده عبدی
زاده (الحاج محمد اغا) بن عبدی اغا بن الحاج محمد اغا بن
عبدی اغا بن الحاج علی اغا بن آلای بکی قره حسین اغا
صلبندن توأم اوله رق تولد ایدوب پدرم طرفندن (حسین)

تسمیه ووالدم (زاهده خاتون) بنت الحاج حافظ عثمان افندی
بن شیخ القرا الحاج خلیل افندی طرفدن قبا اولیاسی حسام الدین
خلوقی حضر تلرینه محبة (حسام الدین) لقبیه تلقیب ایدلدیکم
پدر ووالدم نقل ایتمکده ایدی .

۱۲۹۶ ده ابتدا بالچی مکتبه کیدوب اوراده حفظ قرآن
و ۱۳۰۰ ده مکتب رشدی یه کیروب درت سنهده ترکی ،
عربی ، فارسی ، تاریخ ، جغرافیا ، هندسه ، حساب کبی قنونک
قواعد و مقدماتی قرائت وتعلم خط ایده رک ۱۳۰۴ ده استاذم
ارخویلی عثمان رمزی افندی) نک حسن توجهی سایه سنده برنجیلسکه
شهادتنامه اخذ والیوم اماسیه مفتیسی بولونان مجدی زاده (حافظ
عبدالرحمن کامل افندی) حضر تلرینک و برادری مرحوم
(حافظ مصطفی صادق افندی) نک درس لرینه دوام ایلدم .

مکتبک اوچنجی صنفده ایکن عبداللطیف افندی کتبخانه سی
اتصالنده بولونان فتواخانه فوقنده کی حجره ده بیتوت ایده رک
شروانی زاده (احمد انور افندی) دن بوستان سعدی ، یوسف
وزلیخای جامی منظومه لرینی قرائت ولغات فارسیه دن شعوری
وناصری فرهنگلرینی ، برهان قاطمی وبعده پندنامه عطاری ،
منطق الطیری ، حافظ شیرازی دیوانی ، عجم شعرا سنک منتخبات
اشعارینی ، خرابات ضیا پاشایی وشننامه فردوسی بی مطالعه ایلدم .
دیگر طرفدن کافیه وشفافیه اوزرینه شیخ رضی وسید
عبداللهک شر حلرینی وایساغوجی اوزرینه فناری شرحی ،

حاشیه‌لرینی قرائت ووان قولی ، اختری کبی لغات عربیه
کتابلرینی مطالعه ایدوب یا آمده بولان کتبخانه دن و فیات الاعیان
وشقایق نعمانیه و عثمان فائق افندینک کتبخانه سندن طبقات اسنوی
نام تراجم کتابلرینی اخذ و مطالعه ایلدم .

شهنامه دن ملوک سالفه ایرانک وقوعاتی و فیات الاعیان ایله
شقایق نعمانیه دن تراجم احوال اعیانک تأثیراتی ؛ بن ده ، اماسیه نك
یالکیز علمای حضره سنی جمع و تراجم احوالی تحریره برشوق
اویاندردیغندن ۱۳۰۵ ده علمای بنامی زیارت و تراجم احوال
وانسابندن استفساره غیرت ایلدیکم زمان ، علمانک بعضلرندن
تقدیر کوردم .

فقط شوقم کتدجه تزیایدیدرک اماسیه نك احوال تاریخیه سنی ،
علمای سالفه سنی ده یازمغه قدر ایلریله مش اولدیغندن اماسیه ده
موجود اولان کتبخانه لری دور و قبور موتایی زیارت ایدرک
مزار طاشلرینی قرائت و شامیجه ، کوك مدرسه محله لرنده کوریلان
اسکی تربه لری حیرتله تماشا ایلدیکم ائنده واضح افندینک اماسیه
تاریخی بولوب مطالعه ایتدم .

بو تاریخده یازلمش اولان اقوال و حکایاته بر درلو قناعات
ایده مدم ایسه ده اماسیه لیلرک اخلاق و طبیعیه دائر ویردیکی
معلوماتدن متأثر اولدیغم حالدده اماسیه نك فتوحاتنه دائر اولان
حکایانندن منشرح اولدم . شو حکایات عجیبه نك حقیقتلرینی
اراشدیرمق ایچون بن ده فوق العاده برصراق جری اویاندی .

توسیع معلومات و اکمال تحصیل ایچون ۱۳۰۷ ده استانبوله کیدوب قلندرخانه مدرسه سنده اقامت و توقادی زاده (الحاج احمد نورالدین افندی) حضرت تفرینک درس نه ملازمت و ایام تعطیلی ده سلطان فاتح ، سلطان بایزید ، سلطان سلیمان ، شهزاده ، ایاصوفیه ، کوپرلی ، راغب پاشا ، نور عثمانیه ، منلا مراد ، عاشر افندی ، حمیدیه ، اسعد افندی کتبخانه لرنده موجود اولان کتب تواریخی و تاریخه دائر مجامیع و رسائل و منشاتی مطالعه و ۱۳۱۲ ده کرید و ۱۳۱۳ ده سوریه و لایتلرینه عزیمتله حانیه ده قادریه و شام شریفده ظاهریه کتبخانه لرنده تحریانه دوام و بده حجازی دولاشوب استانبوله و متعاقباً اماسیه یه عودت ایتدیکم زمان ، پک چوق ذواته مراجعتله خانه لرنده اسکی کتابلری ، دفترلری ، براتلری ، وقفیه صورتلری ، اجازتنامه لری ، اوراق و رسائلی تحری و کوردیکم بر رؤیای عجیبه [۱] اوزرینه اماسیه

[۱] قوش کوپری باشنده (درسی تمام افندی) ایله بورمه مناره قارشوسنده کی هزارلق ایچنده اغاجک دیننده مدفون اولان ذاتک هزار طاشلری اولدینی حالده کتابة لری بولمندیغندن اسملری نه اولدینی اکلایشیله ممش ایدی . بونلرک کیم اولدق لرینی تحری و استیکناه و اختیارلردن استفسار ایتدیکم ائاده ابتدا درسی تمام افندی بی بعده حفظی زاده عثمان فائق افندی اولدینی و اغاجک دیننده مدفون بولندیغنی اکلادیم ذاتی رؤیاده کوروب کندیلرینی بکاتعریف و شهرت و انسابلرینی اعلام و تحقیق ایچون اماسیه محکمه سی سبجلاقی تحری و عثمان فائق افندی ده کندیسنگ کتبخانه سنده براتری اولدینی و بولوب مطالعه ایتکلیکی اخطار ایتلری اوزرینه هرایک یسنی ده مطالعه ایدرک سویلدکلرینی عینله بولدم .

محکمه سی سجالاتی تحریری وایکی دفعه ال قدر کاغذ لره قدر
تدقیق وسنین مختلفه ده کوپری ، لادیک ، مجید اوزی ، چوروم ،
مرزیفون ، حاجیکویی ، بروسه ، سلانیک شهرلرینی زیارتله
جمع معلوماته اقدام ایتدم .

ایام تحصیلیه ده فاضل مشارالیه حضر تلرندن تصورات ،
تصدیقات درس لرینی ومغنی اللیب ، تلویح ، عقائد نسفیه شرحی
وخیالی ، سیدکوتی حاشیه لرینی ومقدمات اربعه نك سیدکوتی ،
قنوی حاشیه لرینی وعقائد عضدیه شرحی ، کنبوی حاشیه سی
وتفسیردن تبارك سورة شریفه سیله عم جزؤ شریفی واصول
حدیثدن تقریب النواوی وشرحی اولان تدریب الراوی ومعانیدن
مطول کتاب لرینی وفضالادن اوده مشلی (مصطفی افندی)
حضر تلرندن مرآت وحاشیه لرینی وخریوتی (عبداللطیف افندی) دن
مختصر المعانی وارمنا کلی (سلیمان سری افندی) دن عصام الفریده
واینه کولی (علی راتب افندی) دن قصیده البرده وشرحی وطاغستانی
(عمر ضیاء الدین افندی) دن مختصر البخاری وشام شریفده (الشیخ
بدرالدین محمد بن عبدالرحمن المغربي) حضر تلرندن صحیح البخاری
کتاب لرینی قرائت واستماع وهر برندن استفاضه علوم وفنون
ایده رك شوقلره دائر يك چوق کتب نفیسه مطالعه ایتدکن
صوکره استاذم (الحاج احمد نورالدین افندی) حضر تلرندن
۱۳۱۷ جمادی الاخره سی اواسطنده اجازت نامه اخذینه موفق
اولدم .

کنندیسندن علم فرائض اخذ ایلدیکم پرشنبه‌لی (احمد رمزی افندی) باب عالی* مشیخته قسمت عسکریه محکمه‌سی مقیدی اولدینی مناسبتله عاجزلرینی ۱۳۱۶ ده ایکبوز غروش معاش ايله معاونلکه قبول ایتدیکنه بناءً استانبول و ملحقاتی محاکم شرعیه سجالاتندن کوره بیلدکاریمی تدقیق واماسیه رجالنه تعلق ایدن جهتلرینی اخذ ایدوب شو معاونلکدن تاریخاً استفاده ایتدم .

۱۳۱۹ ده شیخ الاسلام (محمد جمال الدین افندی) حضر تلرینک لطف تقدیرینه مظهر اولدیغ جهتله صرّه هایون نیابت شرعیه سنه تعیین بیوریلوب نانیا شام و حجازه کیتدم . عودتمده کوپری نیابت شرعیه سنه تعیین بیورلدیغ ائنده مدت توقیتی اماسیه ده امرار و تحریاته اقدام ایدوب ۱۳۲۱ غره محرمنده ایشه مباشرتله بر طرفدن ایفای مأموریت و دیگر طرفدن کوپری یه دائر تحریاتی ا کماله غیرت ایتدم . [۱]

ایشته بوتاریخدن اعتباراً دائماً برابر طاشیمق مجبوریتنده

[۱] فقط اثنای تحصیل و تحریاتمه شام شریف والیسی و بشنجی اردوی هایون مشیری اولان (عثمان نوری پاشا) دن و سلائیکه اوچنجی اردوی هایون مشیری اماسیه‌لی (حسین فوزی پاشا) دن و شیخ الاسلام مشارالیه خالد افندی زاده (محمد جمال الدین افندی) دن پک بویوک معاونت و تقدیر و همت کوردیکم مناسبتله شو قوم تجدد و ضرورت تمخف ایتمش اولدی . بناءً علیه شو ذوات کرامک لطفلرینه الی الابد منتدارم .

بولنديغىم بر صنديق طولوسى اوراق تاريخيه يى پرا كنده اكدن
 قورتاروب تدقيق و ترتيب ايتمكه باشلادم . كوپرىدن مدت
 عرفيه مى اكمال ايدەرك ۱۳۲۳ شعبانك يكرميسنده عثمانچق
 نيابت شرعيه سنده نقل . اوريدت وايشه مباشرت ايدليكم اناده
 تاريخك ترتيب و تويدينه و بعد تقيضه غيرت وايكى سنده
 اكمال ايتمش ايسه مده مدت عرفيه مك ختاميله نيابت انتظارنده
 ايكن مشروطيت اعلان ايدليكنى متعاقب نيكسار نيابت
 شرعيه سنده تعيين اولتوب ۱۳۲۶ ذى القعدة سنده ايشه مباشرت
 وقصر و تلخيص و طى ايتديكم پك چوق حادثاتى علاوه ايدەرك
 نايباً تصحيحه اقدام و نيكسارده مدت عرفيه مى اكمال و مقدمه
 و برنجى بابى ده اتمام ايتدم . بالاده عرض ايدليكى اوزره
 (اما ميه سنجغى) اما ميه ، حاجيكوي ، حوضه ، كوپرى ،
 لاديك ، محيه اوزى و مرزيفون قضا لرندن مركب اولوب مركز
 لوا اولان اما ميه قضاسى درت ناحيه دن عبارت در .

(۱) آق طاغ ناحيه سى) دركه : اما ميه نك شرق طرفلرغى
 عمومأ احاطه ايدر . مركزى (آقويرن كوي) در . بونا حيه ؛
 سطح زمين بىك ايكيوز متره قدر يوكسك ، شرقدن غربه
 طوغرو متمد و قديمأ (آق طاغ) ديمكه مشهور بر طاغك
 اتكلرندە بولنديغدن تسميه ايدلمشدر .

بو طاغك يابلاسى مبذول ، قيشلاغى مقبول ، صوبى
 بول ، هوا سى غايت صاغلام اولديغى مناسبته اما ميه لوا سى نك

اکثر اغنامی یازین اوراد، اوتلار، یاغی، پینیری، یوغوردی مقبول اولوب (پوت) قطعه سنده فوق العاده شهرتی حائزدر. بونا حیه داخلنده بولونان باش آلاک قریه سندن (الشیخ محی الدین محمد اقطاعی) کبی بر مرشد کامل ظهور یله امام سیه ده شهرور اولمش و بوقریه ده بر زاویه بناسیله اوقافی تنظیم ایتمشدر. مخدوم لرنندن بری انالمولی قاضی عسکری (بدرالدین محمود افندی) دیکری امام سیه ده خلوتی شیخی (حسام الدین حسین افندی) یک مشهور اولوب احفادی قضات و مشایخ دندر.

ظنه قریه سندن بالاده عرض ایدلدیکی اوزره (ظنه لی سلاله سی) کبی بر سلاله عظیمه ظهور یله استانبول و امام سیه ده یوز سنه قدر موجودیتلرینی محافظه ایتمشدر. اقویرن قریه سندن استاذ مشهور آقطاعی (الشیخ مصطفی افندی) و فضلالی احفادندن استانبول پایه لی انکلین (عبدالکریم افندی) و یکیجه قریه سندن (یکیجه لی سلاله سی) و علمادن (مصالح الدین افندی) ظهور ایدوب کبار اولیان (سعدالدین محمد خراسانی) حضرت تلمرینک بوقریه ده تکیه سی و تربه سی و دفتر دار محمود افندی نیک جامی و اوقافی وارددر.

۲ (اوزنا حیه سی) درکه : امام سیه نیک جنوب طرفلرینی محیط اوب مرکزی (اذینه بازار کوی) در. بورایه قدیمآ جمعه پاراری و فارسیجه جمعه معناسنه اولان (اذینه) لفظنه اضافتله اذینه پاراری و تحریف ایله (اینه بازار) دینمشدر.

بوناحیه مرکزینی ، امرای عثمانیه دن (حاجی حمزه بك)
 برجامع شریف و درگاه عالی چاوشلرندن (محمد اغا) بر خان
 جسیم و حمام و زاویه بناسیله اعمار ایتمشلردر . بوناحیه؛ عموماً
 بایندرلو، اقجه قیونلو، اسلو، قره کچیلو کبی اوز (خالص) تورکمن
 عشیرت لر یله مسکون اولدیغندن (اوز) نامیله مشهور اولمشدر .
 کبار اولیادن (الشیخ شادی) حضرتلری نامیله مسمی
 اولان (شیخ شادی) کوینده اقامت ایلدیکندن قره کچی
 اروغندن [*] بکتمورلی (مصالح الدین موسی بك) شیخ مشارالیه
 ۸۱۲ ده برزاویه و تره بناسیله قره کچیلو مالکانه سنی بوتکیه یه
 وقف ایتمشدر . بابا الیاس خراسانی احفادندن (الشیخ بایزید
 چلبی) افته قریه سنده و مشاهیر خلوتیه دن (الشیخ مصالح الدین
 افندی) اینه پازارده و کبار خلوتیه دن (الشیخ احمد افندی)
 هنسکه قریه سنده مدفون اولوب مشاهیر وزرادن (دلی عمر
 پاشا) و (پچه لی زاده سلاسی) سونجر قریه سندن و مشاهیر
 علمادن (الحاج اسماعیل حقی افندی) اینه پازاردن ظهور
 ایتمشدر .

ینه بوناحیه داخلنده بولونان قره طاش قریه سنده
 بایندر اروغندن (اومور بك) جامع شریف و زاویه بناسیله
 مشاهیر علمادن (علی افندی) ۱۱۳۵ ده بوتکیه یی درسخانه
 اتخاذ و اوز ناحیه سنده بو قریه یی بر مدرسه عرفان شکنه وضع

[*] اسکی تورکجه مزده (اروق) اولاد معنا سنه در .

ایتمشیدی. مشاہیر خلوتیہ دن (الشیخ مقصود بابا) ؛ اور نقوش
قریہ سنده و (الشیخ مرا می بابا) ؛ نامیلہ مسمی اولان مرا می
کوبنده مدفونلردر. شیخ شادیلو (محی الدین محمد افندی)
کبار مفسریندندر .

۳ (حقالہ ناحیہ سی) درکہ : امامیہ نك شمال طرفلری
حیط اولوب مرکزی (حقالہ - حقلہ) کوبی در . بونا حیہ ؛
قدیمآ (ارغوما - صولی اووا) نامیلہ مشہور ایکن ۷۴۵
تاریخلرندن صوکرہ حقالہ کسب عمران و (ارغوما) اسمنه
غلبہ ایدہ رک ناحیہ مرکزی اولمشدر .

بو حقالہ کوبی دوز بر موقعہ اولوب شرق و شمال طرفلری
بایردر . کویک منظرہ عمریمہ سی و قتیله اولدقجه مهم ، غایت
معمور بر قصبہ اولدیغنی اکلآتمقدہ در. بورادہ سادات رفاعیہ دن
و کبار مشایخ و علمادن (السید نجم الدین یحیی الرفاعی) حضر تلی
۷۶۴ دە جسیم بر زاویہ بناسیلہ اوقافی ۷۷۱ دە تنظیم ایتمشدر .
تورکمن عشیرتی رؤسا سندن (حاجی محمد بک) بوقریہ دە
اقامت و ۸۰۵ دە قرہ دولت شاه وقعہ سنده چلبی سلطان محمد
خان حضر تلی نہ خدمات جدیہ ابرازیلہ اکتساب شہرت ایدہ رک
وفات ایتمش اولدیغندن کریمہ سی (عایشہ خاتون) بر جامع شریف
وسلالہ سندن (قاسم بک) ۸۶۸ دە بر مدرسہ عالیہ و حمام و دیگر
حاجی بک زادہ (میرزا بک) ۹۳۵ دە بر جامع شریف و ہمیشہ
زادہ سی دیگر حاجی بک زادہ (محی الدین بک) ۹۴۷ دە بر

مدرسه وبرحمام دها بنا و اوقافی تنظیم ایتشدر . اما سییه ده
قوماجق حمامك غرب طرفنده بولونان عرصه خایه بومدرسه یه
وقف ایتدیكى خانك عرصه سیدر .

بوحاجی بکزاده لردن میرزا بك زاده (مصطفى بك) بو
ناحیه داخلنده بولونان قوشجی قریه سنده مکمل برجامع شریف
بنا و اوقافی تنظیم ایتشدر . بوجامع شریفك بوکون خرابه سی
بیله وقتيله بك مصنع ومتین اوله رق یاییلمش برجامع شریف
اولدیغنی اكلاتمقده در . بوناحیه دن وقتيله بك بویوك رجال دولت
وامرا ظهور ایتشدر .

(حاجی بك سلاله سی) بوناحیه نك شرفی در بونلر عموماً
موسى ایه حاجی محمد بكك اولادی در . بوسلاله دن قاسم بك ،
عبدالله پاشا ، میرزا بك کبی امرا و بکلبکی ظهور ایدوب
(سلاحدار اوغللری) ناميله برقول چیقارمشدر . بو قولدن
موسى پاشا ، بویوك جعفر پاشا ؛ طوپال یوسف پاشا و احمد پاشا
کبی وزرا و امرا کورلمشدر . (طوپال پاشا اوغللری) اما سییه ده
(طوپال اوغللری) ناميله شهرت بولوب یکیچری رؤسائندن
اولمشلر ایدی .

علوی کویندن کبار علمادان (الحاج بیرام افندی) وفیروز
قریه سندن (حاجی ایواد پاشا) دیمکله مشهور (سلیمان پاشا)
و حقاله کویندن مشاهیر فضلائدن (السید محی الدین افندی)
وقضائندن (السید محمد افندی) ظهور ایتشدر . مصر حکمدار

مشهوری (الملک المنصور حسام الدین لاجین) بونا حیه نک حاجی
 پیرام کویندن اولوب اتصا لنده بولونان چفتلکی، (لاجین قریه سی)
 نامیله برکوی اولمشدر .
 (سمره ارغوما) نامیله ده معروف اولان (لب ارسلان -
 ایل ارسلان) کوی بونا حیه داخلنده اولوب (سمره) مبحثنده
 قریباً ذکر اولنور .

حقاله کوینده بولونان (قاسم بک مدرسه سی) کویک
 شرق طرفنده یالکیز و یوکسک بر موقعتنده اولوب کارگیر و متین
 و حجراتی واسع و درس خانه سی عظیم اولدنی شمدیکی خرابه سی
 کمال حزن ابله ارا نه ایتمکده در . بو مدرسه اماسیه مدارس
 علمی ارا نده پک زیاده حائز شهرت اولوب ترتیب مدارس ده
 اربین راده سنده اعتبار اولمشدر . بو مدرسه عالییه نک مدرسلری
 قدیمدن بری حقه کوینده اقامتله تدریس علوم ایتدکلری حالده
 اصول وراثت شوعات مشروعه بی ده قالدردیغندن اماسیه علماسندن
 مدرس اولانلر اماسیه ده اقامت و تدریس ایتشلر ایسه ده مؤخرأ
 ورثه یدنده هر وجهله معطل اوله رق خراب اولمشدر .

بو مدرسه یه پک چوق اکابر مدرس اوله رق حقه ده اقامتله
 تدریس علوم ایدن مدرسلرک صوکی (الشیخ محمود افندی)
 اولوب ۱۰۹۹ ده عزلیله فضلی زاده (مصطفی افندی)
 و ۱۱۰۲ ده حقه یه کیتمدیکنندن عزلیله ثانیاً (محمود افندی)
 و ۱۱۰۷ ده ثانیاً (مصطفی افندی) مدرس اوله رق ۱۱۱۲ ده

مخدومی (احمد افندی) به قصرید ایتمش ایکن ۱۱۱۵ ده
 وفاتیه برابر احمد افندی عزل اولنهرق ثالثاً (محمود افندی)
 و ۱۱۲۷ ده وفاتیه ثانیاً فضلی زاده (الحاج احمد افندی)
 مدرس و ۱۱۶۲ ده قصریدیله اوغلی (السید الحاج مصطفی
 افندی) تدریسه متصرف اولمشدر .

۱۱۷۷ ده مصطفی افندینک وفاتیه علمادن (عثمان افندی)
 و ۱۱۹۱ ده وفاتیه (السیدزین العابدین افندی) و ۱۲۰۹ ده
 رفعیله مومی الیه عثمان افندی زاده (السید احمد افندی)
 و بعده رفع اولنهرق (السیدزین العابدین افندی) و ۱۲۲۱ ده
 وفاتیه عثمان افندینک دیکر مخدومی (السید محمود افندی)
 ایله (السید احمد افندی) مشترکاً مدرس اولدیلر ایسه ده
 حاجی محمود افندینک ۱۲۲۲ ده قصریدیله حصه سنه کاشف
 محمد افندی زاده (السید لطف الله) و ۱۲۵۰ ده قصریدیله
 اوغلی (السید احمد فیضی افندی) متصرف اولمشلردر .

۱۲۳۹ ده السید احمد افندینک قصریدیله حصه سنه علمادن
 (ابوبکر افندی) و ۱۲۴۲ ده وفاتیه علمادن جانیکلی (الحاج
 محمد افندی) و ۱۲۵۰ ده وفاتیه مخدومی علمادن (الحاج
 محمد حلمی افندی) و ۱۲۵۱ ده قصریدیله علمادن (محمد
 عاقل افندی) و ۱۲۵۴ ده وفاتیه اوغللری (اسماعیل ،
 اسحاق) افندیلر و ۱۲۷۰ ده اسحاق افندینک وفاتیه
 برادری (السید اسماعیل حق افندی) متصرف اولمشلردر .

بوقریه ده ایکنجی مدرسه مشهوره حاجی بك زاده محی الدین محمد چایی طرفندن بنا و خورداز مالکانه سی نصفی مدرسه لکنه تخصیص ایدلمشدر . بو مدرسه (قاسم بك مدرسه سی) کبی اربعین راده سنده اولوب کویک ایچنده حمامی قربنده اولدیغی مناسبتله رغبت عامه یی جلب ایدرک کبار علمادان پک چوق ذوات مدرس و کویده اقامتله تدریس علومه مواظب اولمشلر ایدی . فقط مدرسلک جهتی وجه معیشت تلقی اولدیغی زماندن اعتباراً بومدرسه دخی برطاقم غربا و مسافرین و فقرایه مسکن اوله رق خراب اولمشدر .

مدره قاسمیه کبی کویده تدریس علوم ایتمش علمایه توجیه اولونان بومدرسه دخی علما وزادکانه توجیه اوله رق ۱۲۲۴ ده (السید الحاج عثمان افندی) نصفاً جهت تدریسه متصرف اولدیه ده ۱۲۲۶ ده قصریدیله علمادان دیگر (عثمان افندی) مدرس اولمش و ۱۲۳۹ ده بونکده قصریدیله اوغللری (مصطفی ، اسماعیل حق) افندیلر متصرف جهت و ۱۲۴۳ ده مصطفی افندیك وقاتیله علمادان (حسن افندی) مدرس و ۱۲۵۰ ده فوتیله اوغلی (محمد افندی) و ۱۲۵۰ ده قصریدیله علمادان (محمد عاقل افندی) مدرس اوله رق وقاتنده اولادینه قالمش و دیگر نصفه ۱۲۲۴ ده (السید حافظ عبدالله افندی) متصرف اولدیه ده ۱۲۲۶ ده قصریدیله محمد کاشف افندی زاده

(السيد لطف الله افندی) وارتخانده اولادی مدرس و متصرف مالیکانه اولمشلردر .

بوایکی مدرسه دن ماعدا ایکی مکتب ، بر اویره رفاییه اولوب تکیه نك عمارتی و ضیافتخانه سی و اوقافی دوز کون اولدیغندن بر قصبه معموره شکلنی آلان (حقاله قریه سی) ۱۱۰۰ تاریخلرینه قدر علما و طلبه علوم و درویشان و فقرای اطرافک ملتجاسی حکمنده ایدی . افندیلری ، بکلری ، اغالری غایت سیخی ، حقوقه راعی اولدقلری مشهور اولوب بونلرک سنک مزارنده کوربان لطافت و کتابه بدیمه مزاراق ایچنده شایان حیرت بر حالده در . سید یحیای رفای تربه سی پک مشهور اولوب زیارتگاه مسلمین در .

بوناحیه داخلنه ترس آقان چاینک کینارنده بولونان (غنی تربه سی) کبار اولیادن (الشیخ عبدالغنی الخلوتی) حضر تلرینک اولوب مرضای مسلمینک ملتجاسی در . بهار کونلری بو تربه نك اطرافی مجمع ناس اولوب پنایر شکلنی آلیر . هر کون قربان اکسک اولماز اماسیه ده مشهور (غنی سلاله سی) بو ذالک اولادی در . ۴ (کلککلان ناحیه سی) درکه : اماسیه نك ضرب طرفلرینی محیط اولوب مرکزی (اورته کوی) در . حکومت دانشمندیه دوری اوائلنده ۴۹۰ حدودنده خوارزم تورکلرندن (افشار) قبیله سی بکلرندن (بای کلدی) و عشیرتی بوناحیه ده اسکان اولنه رق بای کلدی چفتلیکی معناسنی اراؤه ایدن (بای کلدی آلاک)

دینش و مؤخر آ تخفیف اوله رق کلدی الاک و بعده تحریف
اوله ق (کلد کلان) نامیله مشهور اولمشر .

بوناحیه داخلده بولان افشار ، اولوس ، طوغان ، علی
قاضی ، یغمور ، قارلی ، اقجه قیونلو کویلی افشار و بایندر اولوسلرندن
آریلان برر قبیله بویوکلرینک اسملریدر . بوناحیهده مسکون
اقجه قیونلو اویماغندن اماسیه حکمداری مشهور (شاد کلدی
پادشاه) بوناحیهیی کندی اولادینه مالکانه اولمق اوزره تخصیص
ایلدیکندن اولادینک نفوذ حاکمانسی اماسیهده ختام بولدیغی
اشناده بوراده اقامت ایتمشر ایدی .

مشارالیهک اولادندن (شدی ، بوراق) بکلرک جامعی ،
تکیهسی ، مکتبی ، چشمهسی و (محمود شاه چلبی) مکتبی
وامیر بک نامیله مشهور (یعقوبشاه) بکلک زاویهسی بوناحیهدهدر .
اورته کویدن و بونلرک اولادندن مشهور کلد کلانلی (علی پاشا)
واماسیهده حاجی وهاب اوغلارینک جدی بولونان سادات
علمادن (السید الحاج عبدالوهاب افندی) و اولوس کویندن
(السید ابراهیم پاشا) کبی ذوات ظهور ایتمشر .

کلد کلان ناحیهده کائن ایلیجه قریهسی صحرانک اورتهدنه
بولونان ایلیجهنک نامیله مسمی اولوب کلا کلان حامنی ۹۸۷هـ
مشاهیر اعیانندن اماسیهلی (رضوانا) بنا و وقف ایتمشر .
(یغمور کوی) ۶۹۰ هـ دودنده بک مشهور اولان تورک
بکلرندن (نو الدین یغمور) بکلک نامیله مسمادر . اولادندن

(ناصرالدين محمد ، شرفالدين مقبل) بکھر پک مشهور در .
 طوغان و علی قاضی قریه لری علما و قضاتدن بدرالدين طوغان ،
 علاءالدين علی ناملریله مسمی اولمشدر . بوغا قریه سی دخی
 رؤسای اترا کدن برینک ناملیه مسمی اولوب اولادندن
 (صدرالدين محمد بن حضرالترکمانی) ۶۷۵ سالنده مشاهیر قضاتدن
 ورجال علمیه دندر .

بوکلدکلان ناحیه سی ؛ سلجوقیلرک نفوذی اماسیه دن زائل
 اولدقده (سمره ناحیه سی) اعتبار و مرکزى (التکین قریه سی)
 اتخاذايدلمش اولدینى و نائق عتیقه دن ا کلاشلمقده در . عرفای
 مولویه دن سیواسلى (شیخ ایلک دده) نک ناملیه مسمی اولان
 کوینده تکیه سی مشهور اولوب مخدومی (پیر مزیدچلبی) اماسیه ده
 کبار علمادندر . شاد کلدی پادشاه اولادینک بوکویده ،
 افکری ده ، قزلقه صغیره ، ایلجیه ده ، تکیه لری ، مدرسه لری ،
 مکتبلری ، خاملری واردر .

بالاده عرض ایدلایکی اوزره اماسیه سنجاغنى تشکیل ایدن
 قضاالردن برنجیسی و مرکزى اولان (اماسیه قضاسی) مشتملاتى
 بونلردن عبارت اولوب ایکنجیسی (حاجیکوی قضاسی) درکه
 اماسیه سنجاغنىک شمال غربى طرفلرینى احاطه ایدر . مرکزى
 (طاشان) طاغنىک جنوبنده کائن صحرائک اورتہ سنده بنا
 ایدلمش اولان (حاجیکوی) قصبه سی در .

حاجیکوی قضااسنىک هیئت عمومیه سی غایت منبت و محصولدار

اولوب شرقاً مرزيفون ، غرباً عثمانجق ، جنوباً مجيد اوزى
واماسيه و شمالاً كوپرى قضا-الريله محدوددر . غرب طرفنده
بولونان اينه كول طاغلرى مرتفع ، اورمانى مشهور ، يايلالى
مقبول ، صولرى مبذول اولديغندن حاجيكويى و عثمانجق قضا-الرينك
احتياجات مبرمه سندن بر قسم مهمنى تأمين ايتمكدهدر .

(حاجيكويى) قصبه سى فتوحات اسلاميه اوائلنده (كمارى
= كيمرى) توركلارندن بر قسمى بورايه اسكان ايدلىكى مناسبتله
(كمارى) دينمش واوچيوز سندهن زياده بو اسم ايله مسمى
ايكن (كيمرى) قبيله سى افرادندن ظهور ايدن (صدرالدين
آرتق التركانى القيمارى) ۷۸۰ حدودينه قدر بورايى بر صورت
جديده اعمار و جامع شريف ، مكتب كى مباني دينيه و علميه
بنا ايدلىكى مناسبتله (آرتق آباد) تسميه ايدلمش و كسب جسامت
ايدوب (كمارى) نامى بر محليه علم اوله رق قالمش و مؤخرآ
جزئى تحريفه اوغرايوب (جماره) دينمشدر .

بعده صدر مشاراليهك احفادندن (حاجى احمد چلبى)
بن محمد چلبى ۸۹۶ سالندن اعتبارآ (كومش معدنى ناظرى)
اوله رق طول مدت بوراده اقامت و عمراتى تزييده غيرت
ايدهرك داربقايه رحلت ايدلىكى مناسبتله (حاجى ناظر كويى)
دينمش و براز دها جسامت پيدا ايدهرك (آرتق آباد) دخى بر
محليه علم مخصوص اوله رق قالمشدر . غلط عامه اوله رق
(حاجى نضر كويى) ناميله اشتهاار ايدن بو اسم دن نضر لفظى

دخی حذف اولنوب (حاجیکویی) دینش وشو تجدادات
وتبدلاته بتون قیود عتیقه شهادت ایتمکده بولنمشر . بر مدت
کوپریلی محمد پاشایه (کومش معدنی) خاص آریهلق توجیه
وبوراده اقامتی امر بیورلمش اولدیغندن مؤخرأ کارگیر وضایت
محکم برکاربانسرای ویاننده بر بدستان بنا وشماننده جسم ، بر
جامع شریف ویاننده بر حمام لطیف احیا ایدرک جمله سنی ده
۱۰۷۱ ده وقف ایتمشدر .

۱۱۷۰ ده احفادنن کوپریلی زاده (عبدالباقی بک) بن
حافظ احمد پاشا کومش معدنی امینی وزعیمی اولهرق بوراده
اقامت ایتمدیکی اناده جامع شریفی تجدید وبر حمام لطیف دها
علاوة بنا وواقافی تنظیم ایدرک قصبه نك عمارت وشرفی
تزید ایتمشدر .

بوندن اقدم (الشیخ الحاج یحیی افندی) حاجی کویننده
اقامتله بر زاویه بنا وواقافی تنظیم ایدرک اشتهار ایتمکله ظهور
ایدن دیگر محله یه حاجی یحیی افندینک نامی علم مخصوص اولمش
وحاجی کوینندن ظهور ایدن مشاهیر فضلاذن (الحاج اسماعیل
افندی) ۱۱۱۸ ده کوپریلی جامع شریفنک یاننده یدی حجره
ودرسخانه یی حاوی بر مدرسه و آریجه بر جامع شریف ، برده
مکتب و کتبدیسنه جامعی یاننده بر تره بناسیمله حاجی کویننک
شرفی ، عمراتی تزید ایتمشدر .

۱۲۲۶ ده حاجی کریمی اشرفندن قورد اوغلی (الحاج

خلیل اغا) سرای محله‌سند بر مسجد شریف و ۱۲۳۵ ده
 عرب اوغلی اوزون (عثمان اغا) حاجی یحیی محله‌سند بر مکتب
 ۱۲۳۷ ده چوروملی اوغلی (الحاج خلیل اغا) بر مسجد شریف
 و آریجه برده مکتب و ۱۲۴۵ ده سرحدلی زاده (الحاج علی
 اغا) بر مسجد شریف و ۱۲۵۲ ده قزقلی اوغلی (الحاج احمد
 اغا) حاجی یحیی محله‌سند بر جامع شریف و مخدومی (الحاج
 یحیی افندی) ۱۲۸۷ ده برتکیه بنا و جمله‌سی ده و قفلرینی تنظیم
 ایدرک حاجیکوینی جدّا اعمار و احیا ایتمه‌لردر. حاجی یحیی
 افندی تکیه‌سی ۱۳۱۰ حدودنده مدرسه‌یه تحویل ایدلمشدر.
 خلاصه: ۱۲۸۰ تاریخنه قدر حاجیکوینی اشرافی، ناحیه
 مدیرلری بوقصبه‌یی اعمار همت ایدرک (جماره، آرتق آباد،
 سرای، حاجی یحیی، آطه‌تپه، بکک‌چایر، ارمنی کلیسا، چای)،
 نامرلیله سکز محله‌دن عبارت بر قصبه جدیدیه حاله افراغ
 ایتمه‌لردر. قصبه‌نک تزاید ایدن نفوس و اهمیتی مفتی قضا
 مشاهیر علمادان دارنده‌لی زاده (الحاج اسماعیل حقی اندی)،
 مرحومک نظر حمیتی اوکنده انکشاف ایلدیکنه بناء بتون
 اشراف قضا ایله مشترکاً همت ایدرک ۱۲۹۹ ده مقدم ناحیه
 مرکزی اولان حاجیکوینی، قضا مرکزی و مقدم قضا مرکزی
 اولان کومش قصبه‌سی ده ناحیه مرکزی اولمشدر.
 ۱۳۱۶ ده قضا قائم‌مقامی یانیه‌لی مصطفی پاشا زاده (علی
 رضا بک) منتظم بر حکومت قوناغی، مکتب رشدی،

تاغرافخانه ، ساعت قلهسی انشاسنه همت وبتون اهالی واشراف
قضا اعاناته غیرت وجداً ایشار مال ایدرک جمله سنی ا کمال
ایتمش لردر. بوخیراتک ایچنده کوپرلی محمدپاشانک جامعی مشرف
خراب اولدیغندن تمامیه هدم وتوسیعا کارگیر اوله رق بناسنه
خدمت وبرمناره لطیفه علاوه سیله ا کمال ایتسی میر مومی الیهک
جمله موفقیتا سنددر. بو اعاناتک جمعنده مفتی قضا (حافظ
مصطفی توفیق افندی) نک پک بویوک همتی کورلمشدر.

۱۳۲۴ ده قائم مقام قضا اولان (حاجی طاهر بک) دخی
معارف مملکته ایراد مخصوص اولمق اوزره حاجی یحیی جامع
شریفنک قبله طرفنده یول اوزرنده مکمل برحام لطیف انشاسنه
قیام وبتون اشراف واهالی قضا دخی اعاناته اقدام ایدرک ایکی
سنه طرفنده اتمام ایتمش لردر. قائم مقام قضا بافره لی (سلیمان
نجم الدین بک) دخی قصبه نک یوللرینی توسییع وحکومت
قوناغی اوکنده برباغچه وبر حجره بی مشتمل شادروان بناسیله
شرفی تزئید ایتمشدر.

بو قصبه ده قدیمآ تدریس علوم ایدن علما محترم اولدیغندن
(الشیخ یحیی افندی) بعده (الحاج احمد افندی) وبعده
(الحاج حسن افندی) تدریس علوم واشتهار ایتمش والحاج
اسماعیل افندینک بنا ایلدیکی مدرسه یه ابتدا کندیبی بعده
مخدومی علمادان (حافظ عثمان افندی) و ۱۲۴۵ ده وفاتیه
مفتی انقره لی عبدالله افندی زاده (الحاج علی افندی) وبونکده

وفاتنده یرینه مفتی اولان مشاهیر علمادان دارنده لی زاده (الحاج اسماعیل حق افندی) وبونکده ارتحالنده مخدومی مشاهیر علمادان (حافظ مصطفی توفیق افندی) یرینه مفتی اولدقه علمادان چرکس (اسماعیل افندی) ظهور ونشر علوم واشتهار ایدره ک مدرس اولوب قضاده تعمیم معارفه همت ومکتب رشدی معلملرینک مساعی جمیله سنه اشتراك ایتشلردر .

حاجیکوی قصبه سنک خانه سی سکز یوزه قریب اولوب قضانک نفوس عمومیه سی اوتوز ایکی بیک راده سنده در. قضانک حاوی اولدینی قرا التمش قدر اولوب قدیم آ درت ناحیه یه منقسم در . مرکز ناحیه سی بونواحیدن خارج اولوب مؤخرآ قبا قوز ناحیه سی سرایحق ناحیه سنه الحاق اولنه رق مرکز ناحیه سیله ینه درت قسمدن عبارت اولمشدر .

۱ (حمام اوزی) درکه : اینه کول طاغلرینک شرق وشمال اتکلرنده اولوب قضانک غرب جنوبی وقسمآ جنوب طرفلرینی احاطه ایدر . بو ناحیه قدیمآ تورک اویماقلرندن (کوچری ، کوچارلو) عشیرتی ایله مسکون اوله رق بر مقدار جنبی تورکلری ده اسکان ایدلمش وچتمی ، کوچری کویلری — بونلرک اسمندن غلط بر صورته — قالمشدر . بوناویه ؛حمام اوزی قریه سنک نامیله مسادر .

۲ (سرایحق ناحیه سی) درکه : قضانک شمال وقسمآ غرب طرفلرینی احاطه ایدر . بوناویه سرایحق قریه سنک نامیله

مسمی اولوب (شیخ سـلنوق بابا) نك واولادینك ساكن اولدیغی قریه (شیخلر - شیخ اوغللری) نامیله مشهور اولمشد. اما سییه برسلاله علمیه تشکیل ایدن سكو کونلی (الحاج محمد افندی) بونا حیه داخلنده بولونان (سكو) کونیندر .

۳ (قبا قوز ناحیه سی) درکه : قضانك غرب شمالیسنی عموماً احاطه ایدر تورك اویماقلرینك معروفلرندن (قیزیق اویمغی) بونا حیه ده مسكون اولوب قدیمأ (قیزیق ناحیه سی) دیندیکی حله مؤخرأ (قبا قوز ناحیه سی) دینمشد. قبیله رؤساسندن (قورقود ، قوتلوجه) بکلرك ناملریله مسمی برر کوی بولتمقددر . حاجیکوی علماسندن قیزیقلی (الحاج احمد افندی) وکوپری علماسندن قبا قوزلی (الحاج عمر افندی) بونا حیه دندرلر .

۴ (کومش ناحیه سی) درکه قضانك تمامیه جنوب وشرق طرفلرینی احاطه ایدر . بونا حیه ؛ قدیمأ قضا مرکزى برشهر لطیف اولوب برقاج شاهیره وطن اولمش وبك چوق مشاهیر بوقصبه نك اعمارینه همت ایتمشلردر. شهرك موقعی دوزوعمومیت اعتباریله شماله طوغرو مائل ، برمثلت شکلمدهدر .

(کومش قصبه سی) اینه کول طاغنك شرقأ اتکننده کائن و حاجیکوینك جنوبنده وایکی کیلومتره قدر قرینده اوافق برشهر اولوب جنوب و غرب طرفلری مذکور طاغك اتمکلرینه استد ایتمکده ایسه ده شرق و شمال طرفلری آچقدرد .

استاد ایتدیکي طاغ و تپه لرده کثرتله کومش معدنی واردر .
 بومناستله مذکور قصبه (کومش) ناميله تسميه ایدلدیکي ظن
 اولمقددر . هر حالده بوقصبهيه (کومش) دیندیکي ۵۷۵
 تاریخندن بری قیداً معلومدر . صوکره تسميه ایدلمش بر نام
 دکدر . [۱]

بعض علما طرفندن تعریباً (قومس) و تحویلاً (فضه)
 نامی استعمال ایدیلن بو (کومش قصبه سی) امرای سلجوقیه دن
 (امیرکمشلی) دیمکله مشهور اولان (امین الدین یونس القومسی)
 همتی سایه سننده انکشاف ایدرک ۷۶۸ سالنده مشایخ سهر
 وردیده دن (اخی ابراهیم بصری) بوقصبه ده نشر فیوضات و بر
 تکیه انشا و مخدومی (اخی براق بابا) اوقافی تنظیم ایتدیکي
 مناسبتله کومش قصبه سی کسب معروفیت ایتمشدر ۸۰۶ ده
 چلبی سلطان محمد خان حضر تلری طرفلرندن اماسیه لی قتلو
 بک زاده (خلیل بک) کومش معدنی امینی اولمش و ۸۱۶ ده
 بکلربیکی اولان بوخلیل پاشا ۸۱۸ ده طرز سلجوقی اوزره
 سنکین بر مدرسه عالیه بنا و اوقافی تنظیم ایدرک شهر ی احیا
 ایتمشدر . بوکا (مدرسه خلیله) دینور .

[۱] عصر مزده امور نافع حقه انتشار ایدن بعض رسائل
 موقوتده « کومش معدنک بوقصبه ده کشفی ۱۱۴۰ تاریخلرینه تصادف
 ایتدیکي » کوشتمکده ایسه ده سهو مبنی اولدینی شبهه سزدر . بوراده
 کومش معدنی امینلری ۶۵۸ تاریخلرندن بری تاریخاً مضبوطدر .

۸۳۳ ده یورکچ پاشا بومدرسەنک جوارنده اولدقجه بویوک
برجامع شریف بنا وبعده معدن امینی اولان (اسکندرچلی)
۸۵۶ ده برمکتب انشا ایتمش ویورکچ پاشانک جامعی مشرف
خراب اولدینی مناسبتله ۹۶۸ ده صدر اسبق (رستم پاشا)
مجدداً کارکیر اوله رق انشا ویاننه بر مناره بیضا وبر مکتب
وعقار اولق اوزره سکیز دکان علاوه بنا ایتدیکندن رستم
پاشا جامعی ، رستم پاشا مکتبی ، رستم پاشا وقفی دیمکله مشهور
اوله رق شهرى احیا ایتمشدر .

بعده (منلا علی افندی) بر مسجد شریف و ۱۱۳۶ ده
قره باش اوغلی (الحاج محمد اغا) برجامع شریف وبر مکتب
و ۱۲۲۷ ده مفتی شیخ عثمان افندی زاده (ابوبکر افندی)
ایرغاد محله سنده کائن مسجدی مجدداً بنا و احیا و هربری اوقافی
تنظیم ایدهرک شهرک اعمارینه همت و حمیت دینه لرینی ایفایه مسارعت
ایتمشلردر .

دور سلجوقی ده و سلطنت جلیله عثمانیه نك اوئل عهدده
بوقصبه ده ضربخانه تأسیس اوله رق سکه ضرب ایدلمش اولدیغندن
(ضربخانه) نامی شمدی بر محله یه علم مخصوص اولدینی کبی
یورکچ پاشانک بعده رستم پاشانک بنا و تجدید ایلدیکی جامع کبیر
چینیلر ایله ترصیع ایدلایکندن (چینیلی جامع) دینمش و شمدی
بونام دخی بر محله یه علم مخصوص اوله رق قالمش و ۷۵۷ ساله قدر
(ارماغان چلی) معدن امینی اوله رق بوراده قالدینی مناسبتله

اوپوردینی محله (ارمغان) دیمکله مشهور اولمش وبعده معدن عملیه سی، ایرغادلر ارمغان محله سنده اقامت ایلدکدرندن ارمغان محله سی (ایرغاد محله سی) نامه تحویل ایتمشدر .

بناءً علیه : (کومش قصبه سی) جامع کبیر نام دیگر چینیلی جامع ، ضربخانه ، ارمغان نام دیگر ایرغاد ناملریله مسمی اوچ محله دن متشکل و تقریباً اوچیوزه قریب خانه دن عبارت هواسی صاغلام ، صوبی مکمل برشهر لطیفدر. اداره ملکیه سی قدیماً خاص اغالری ، معدن اینلری انده ایکن ۱۲۹۹ ده حاجیکوبی قائمقاملرینه تفویض بیورلمش و معدن اینلری ، انجق معدن خصوصاتیله اشتغال ایتمشدر. بومعدن ۱۲۹۴ تاریخنه قدر استفاده لر تأمین ایتدیکی حالد بعه معدن مدیرلری تعیین و عملیاتی تعطیل ایدلمشیدی . کومش قصبه سنده موجود اولان خلیل پاشا مدرسه سی مدارس عالیه دن معدود اولوب خمین درجه سنده اعتبار و توجیهاتی اناطولی قاضیه سکرلکی طرفندن اجرا ایدلمش اولدیغندن ۱۱۰۰ تاریخلرینه قدر پک چوق کبار علماء بومدرسه یه مدرس اولمش و کومش قصبه سنده تدریس علوم ایتمشدر . انجق وقفیه سی ضایع اولدینی جهتله ۱۰۷۲ ده شهادتله مندرجاتی اثبات اولنه رق امامیه محکمه سنده ایکنجی دفعه تنظیم ایدلمشدر .

بروجه تقاعد مدرس اولان قضاذن محمد افندینک ۱۰۹۶ ده وفاتیله علمادن (یوسف افندی) متولی و مدرس اولوب بعه

کبار علمادان (حسن افندی) و ۱۱۳۰ ده وفاتیه مخدومی
 کبار علمادان (محمد افندی) مدرس اولمش ایسه ده دیکر مدرسه
 مدرسی اولدیغندن ۱۱۳۶ ده بومدرسه عهد سندن رفع اولنه رق
 (مصطفی افندی) و ۱۱۳۷ ده قصریدیله علمادان دیکر
 (مصطفی افندی) و ۱۱۵۹ ده وفاتیه علمای مشایخدن
 نقشبندی (حسین افندی) و ۱۱۶۸ ده علمادان (محمد
 افندی) و ۱۱۶۹ ده ثانیاً (الشیخ حسین افندی) و ۱۱۷۴ ده
 وفاتیه کبار علمادان قلاوز (محمد افندی) و ۱۱۷۸ ده وفاتیه
 انقروی (عبدالله افندی) و ۱۱۹۰ ده علمای مشایخدن مفتی
 سابق قلاوز محمد افندی زاده (عثمان افندی) و ۱۱۹۱ ده
 ثانیاً انقروی (عبدالله افندی) و ۱۱۹۲ ده کومشلی (مصطفی
 افندی) و ۱۱۹۶ ده ثانیاً (الشیخ عثمان افندی) و ۱۱۹۷ ده
 ثالثاً انقروی (عبدالله افندی) و ۱۲۱۵ ده وفاتیه قلاوز
 محمد افندی زاده علمادان (علی افندی) مدرس اولمشلردر .
 ۱۲۳۶ ده قلاوز زاده علی افدینک وفاته بناءً اوغللری
 (عبدالله ، صالح) افدیله نصفه و برادری عثمان افندی زاده
 (السید عبدالرحمن افندی) مشترکاً دیکر نصفه متصرف
 و بعده عبدالرحمن افدینک ۱۲۵۳ ده وفاتیه علمادان (مصطفی
 افندی) مدرس نصف اوله رق ۱۲۶۰ ده فوتیه اوغللری
 (حافظ محمد حامد ، احمد حمدی) افدیله مدرس اولمشلردر .
 ۱۲۶۲ ده قلاوز زاده عبدالله افدینک فوتیه دیکر

(عبدالله افندی) و ۱۲۷۱ هـ صالح افندینک وفاتیه اوغلاری (علی رضا، محمد عاکف، مصطفی نجیب) افندیلر وبعده دیگر عبدالله افندینک رفعیله بونلر نصف حصه تدریسه متصرف و مدرسه معمور اولدینی حالدہ معطل اولمشدر .

بوقضا داخلنده بولونان ووثائق عتیقه ده (اسلیمس) نامیه مقید اولان (اسله مز) کوینده کومشلی زاده لردن (شمس الدین احمد چایی) بر زاویه و عمارت و مسافر خانه بنا ایدوب جدینک بورادن ظهور ایلدیکنه بر علامت مخصوصه وضع ایتمش ایدی . مشاهیر امرای سلجوقیه دن (امیر کشلی) دیمکله مشهور (امین الدین یونس المستوفی) بوکویدن ظهور ایتمشدر . بوسلاله جلیله اماسیه ده پک بویوک بر شهرت و اقتداری حائز اولمشلردر . وزرادن کوسه (شعبان پاشا) دخی بوکویندنر . شیخ الاسلام اسبق مفتی زاده (احمد افندی) کومش قصبه سندن ظهور ایتدیکی کبی موالیدن شافیه جی (مصلح الدین افندی) و خطاط مشهور (ابوالخیر حسن افندی) و فاضل مشهور کاتب زاده (الحاج اسماعیل افندی) و کبار موالیدن مفتی زاده (عثمان، عبدالرحیم) افندیلر دخی بوکومش دن نشئت ایتمشلردر .

اوچنجیسی (حوضه قضاسی) درکه : شرقاً صامسون، غرباً کوپری، جنوباً اماسیه و مرزیفون و شمالاً بافره قضالریله محدود اولوب مرکزی اولان (حوضه قصبه سی) جنوبنده بولونان (طاشان) طاغنک شمال شرقی اتکننده بایر بر موقعه

کائن در . قصبه نك جنوبی مد کور طاعه استناد ایتمکده اولوب
شرق ، غرب و شمال طرفلری عموماً آجیقدر . شمال طرفی
تمامیله انکین اولوب شرقاً برخط مائل اوزرنده در .

بوقصبه نك نام قدیمی صورت قطعیده معلوم دکل ایسهده
تواریخدن ا کلاشلدیغنه کوره (خنجره) یاخود (غنجره)
یاخود (خنجزه) اولسی اغلب احتمال در . تواریخ موثوقده
مد کور اولان (غنجره) قصبه سی بو حوضه نك شمیدیکی
موقعنه نظراً حمامك غرب طرفنده دوز بر موقعده اولدیغی
تعریفادن ا کلاشلمقده در .

(آثارالبلاذ) ده زکریا بن محمدودالقزونی دیورکه :
« غنجره ؛ داخل روم (اناطولی) ده برمدینه اولوب اوراده
ترس آقان ایرمانچی واردر . روایت اولندیغی اوزره ۴۴۲ سنه
هجریه سنده اغشتوسك سکنرنجی بازار ایرتسی کیجه سنده قورقونج
برزلزله اوله رق ایکنجی کونه قدر توالی ایدوب پک چوق بنالر
سقوط ایتمش وبرکلیسا یره کچوب بناسندن بر اثر قالمه مش ویرندن
غایت صیجاق صوچیقوب یتمش قدر مزارعی خراب وپک چوق
خلق غرق واهلاک ایتمش وهرکس طاع باشلمرینه قاجوب
صیجاق صو ، طقوز کون دوام ایدره کبعده چکلمش وبرمقداری
قالمشدر . »

(تاریخ الامم والملوک) ده محمد بن جعفر الطبری دیورکه :
« طقسان اوچ سنه هجریه سنده مسلمة بن عبدالمکک ، عباس بن

الوليد ، مروان بن الوليد بلاد رومه غزا ايدوب عباس بن الوليد سمسطيه بي ، مسلمة بن عبد الملك اماسيه شهريني برقاچ حصون ايله برابر فتح ايتمش ومروان بن الوليد دخى (خنجره) يه قدر كيتمشدر .

(عقدالجهان) ده دخى بوخنجره مكرراً اماسيه ذباندە مذكور و (خنجره) ناميله مسطور بولنديغنه ونهر مقلوب (ترس آقان) ده شرقدن غربه وجنوبه طوغرو جريان ايتمكده اولديغى ديه تفسير اولنديغنه واماسيه جوارنده ترس آقان ايرماغنىك ياننده بو حوضه قصبه سندن ماعدا برمدينه بولنديغنه دقت بيورولورسه (خنجره) مدينه سى حوضه دن بشقه برشهر اوله من .

چونكه حوضه ده ايليجه نك ، يعنى صيحاچ صويك چيقدىغى ير ؛ حفر وتحرى اولنديغى صورتده اوراده برشهر ك بولنه جغنى اليوم كوزلمكده اولان آنارى ، خرابه سى ، طاش بيغينلرندن عبارت اولان انقاضى اشعار ايتمكده در . بو قصبه نك نامى ۵۸۰ تاريخندن اعتباراً الده ايدىلن وئائق عتيقه ده (حاوزه) و (هاوزه) اولديغى كوزلمكده اولوب ۹۳۰ تاريخلرندن صوكره يازيلان محررات رسميه ده (حوضه) ناميله قيد ايدلمشدر . شو قيود موثوقه دن استدلال اولنديغنه كوره (حاوزه) نامى ؛ (خنجره) نام قديمك توركلر اراسنده لفظاً تحول ايدهر ك بر غاطى اولديغى و بوده صوكره دن (حوضه) شكلنه قونديغى ظن اولتور . (حوضه قصبه سى) ترس آقان ايرماغنىك طرف غريبه سنده

اوافق بر شهر اولوب قديماً مرکز قضا اولديني حالده آنجق ؛
بر محله جسمه دن عبارت قالمش و برقاق مشاهيرك همتي سايه سنده
كسب عمران ايتمشدر . قصبه نك طرف غريب سنده يوكسك بر
موقعده بولونان (قابليجه صويي) قديماً جاري اولوب غايت
صيقاق و بدن انساني ده ظهور ايدن عوارض جلد يه يي ازاله
و بعض امراض داخليه يي تشفيه خصوصاً سنده نفعي مجرب اولديغندن
قديماً ميس و حزينان آيلرنده اطرافدن پك چوق زائر لري
واردر .

خلقك بورايه كثر تله و رودني نظر دفته آلان عالي حجاب
توركلر بوقابليجه نك اولديني يره بر حمام ، عمارت ، مسافر خانه
كبي لوازم مدنيه يي انشا ايتمكده تأخر و اهالي جائز كور مدكلرندن
اليوم السنه عامه ده (شادي پاشا حمامي) و قيود عتيقه ده (سعدي
پاشا حمامي) و ده اول (سلطان مسعود حمامي) ديمكده مشهور
اولان حمامي بنا ايتمشدر .

بو حمامك شكلنه ، طرز انشاسنه باقيلير سه سلجوقی آثارندن
اولديني اكلاشيلير . هر حالده سلطان مسعود سلجوقی طرفندن
بنا ايدلماسي ملحوظدر . چـونكه بو حمام ؛ ۶۶۵ تاريخخـلرنده
موجود و تاريخاً مضبوطدر . هيچ بر طرفنده كيمك طرفندن ،
نه زمان پايدليغنه دائر كتابه سي يوقدر . يالكيز سعدي پاشا
طرفندن وقف ايدليكي مقيددر . بوسعدي پاشانك كيم اولديغنه
دائر بر قيد صريحه تصادف ايدلمديكي جهته السنه عامه ده دوران

ایدن شادی پاشانك وقفی اولمسی ودفتر عتیق سلطانی یه سعدی
پاشا دیه قید ایدلمسی اغلب احتمال در . شادی پاشا ایسه اماسیه
حکمداری (شاد کلدی پادشاه) اولادندن و ۹۲۵ رجالندن
برذات اولدینی معلوم در .

بوحام ؛ حکمدار مشارالیهك بنا ایلدیکی خیراتدن اولمیوب
کندیسنه شراً ملکیتله انتقال ایتمی محتمل در مؤخرأ اولادی
طرفندن وقف ایدلمش اولور. فقط یوقاریده بولوتان شو بویوک
حمامك جهت شرقیه سنده یعنی ارقه سنده دیگر اوافق بر حمام
اولوب بویوک حمامك طرز انشاسنه پکنه مشابه دکلدر بوحامی؛
قصبهك اوست طرفنده اسکی شهر خرابه سنك اوزرنده بر عمارت
ومساخانه بنا ایدن یورکیچ پاشا زاده مصطفی بك بنا ایتمشدر .
امیر مومی الیه مصطفی بك ۸۳۵ ده بوقصبه ده بر عمارت
ومسافر خانه بنا ایده رك اوقافی ۸۴۰ ده تنظیم ایتمشدر . بو
حماملك اشغی طرفلرنده کوریان کارکیژ جامع شریف ۹۲۵ ده
قرمان بکلر بکیسی شادی پاشا طرفندن تجدید و اوقافی تنظیم
ایدلدیکنه نظراً بوجامع شریفده بویوک حمام ایله برابر یاپیلدینی
اکلاشمقده در .

۹۰۰ تاریخنده اماسیه ده قیزلر اغاسی دیمکله مشهور اولان
(فیروزاغا) بوقصبهك اورتیه سنده طاغ طرفنده کارکیژ، غایت متین
بر مدرسه عالییه بنا و اوقافی تنظیم ایده رك شهرك عمراننه پک
بویوک همت ایتمشدر . بده ۱۰۴۸ ده حوضه اشرا ایدن حاجی

اوغورلی زاده (مستجاب اغا) بر مکتب ۱۱۷۸ ده اشرافدن
(عثمان بك) شادی پاشا جامع شریفی تجدید و شرق طرفه
عالی بر مدرسه بنا ایده رک خدمات مبروره ابراز ایلشدر .

۱۲۹۸ تاریخه قدر بر قاضی و بر مدیر ایله اداره اولونان
بو قصبه اوکندن شوسه یولی امرار ، واردات و منباقلات
دائمه تسهیل ایدلیکی مناسبتله شهرک قیمتی ترقی و تاتار ایله
چرکس مهاجرلرینک اسکانندن دولای جسامتی ، نفوسی ،
احتیاجاتی فوق العاده تزايد ایدلیکندن بهار موسملرنده انقره ،
سیواس ، طریزون کبی ولایات بعیده دن کلن خلقک استراحتی
تأمین اولنقی اوزره هر کون بر پنایر شکلی اخذایدن بو قصبه ده
جسیم خانلر بنا ایدلمکه باشلامش و بر قائم مقامک اداره سمنه
ویریلرک قضا تشکیل ایدلمشدر .

ییلدن بیله اهمیتی تزايد ایدن بو قصبه ده منافع اقتصادی
دخی تزايد و تجار ، اصناف ، عمله و بوتون اهالی مسکونه
اکتساب ثروت ایده رک شهرک جسامت و تزیننه خدمت ایش
اولدقلرندن تاریخ مزبورده قدر نهایت یوزه قریب اولان خانه
لرینک اعدادی حال حاضرده بشیوزه تقرب ایشدر . فقط
شو مبانی جدیدنک ربعی دینه جک قدر خانلر چوغلمش
وییلدن بیله فعالیت تجاریه آیشدر .

لکن قضا تشکیل اولندوقده کویا حوضه ده هیچ بر بارینه جق ،
حکومت قوناغی اتخاذ ایدیلر جک بر یر یوق ایش کبی درتیوز

سنه دن بری دارالعلم اوله رق ادامه موجودیت ایدن فیروز اغا مدرسه سی ۱۳۰۰ تاریخده حکومت قوناغی اتحاد ایدلمش اولدیفندن جبهه سنک فوقانیسنه بر قاج حجره اشتغال بنا ایدلمش ومدرسه نك درسخانه سی حبسخانه وجهه نك تحتانیسی ضبطیه قوغوشی وسائر اوطه لری برر دائره یاسلامش وعثمان بکک مدرسه سیله مستجاب اغانک مکتبی چوقدن خراب اولمش بولمقله قوجه مان حوضه قصبه سنده تعلیم صبیان وتعمیم عرفان ایده جک بر یر قاله مشدر .

بناء علیه ۱۳۰۳ تاریخندن اعتباراً شوقصانک اهمیتی تقدیر اولنه رق بر مکتب ابتدائی و ۱۳۰۴ حدودنده اطانات ایله اشاغی محله ده بر جامع شریف و ۱۳۱۰ ده بر مدرسه بنا و ۱۳۱۲ ده مکتب ابتدائی کوریلن لزومه بناء (مکتب رشدی) یه تحویل وتعمیم معارف خصوصنده کی نقصانک ازاله سنه خدمت ایدلمش ایسه ده قوجه بر مدرسه متینه یوق یره احا وعرصه موقوفه سی ده اضاعه ایدلمش دیمکدر .

۱۳۰۸ ده سیواس والیسی اولان اسبق داخلیه ناظری مظلوم پاشا زاده (ممدوح افندی) شوقصبه نك منافع اقتصادیه سی کوردکده بویوک حمامک جنوب طرفنده یعنی قارشوسنده جسم بر او تل والته بر حمام لطیف انشا وجبراً بویوک حمامک صویندن آلدینی مقداری بوحامه اجرا ومتولی وقف اولوبده اعتراض ایدن اشراف قضادن (حاجی محمود اغا) یی انقریه نفی واجلا

ایلدیسه ده ۱۳۲۶ ده اعلان ایدیلش مشروطیت عقبنده کنیدیسی
منکوب و جبراً آلدینی صو دخی شو دکرلی عقارک معارف
مملکته بر ایراد مخصوص اولمق اوزره الندن چیقمنسه باعث
اولمشدر .

۱۳۲۲ ده قائم مقام قضا (عبدالرحمن نائلی بك) زماننده
حکومت قوناغی اتخاذا ایدیلن مدرسه قدیمه تمامیه هدم و تخریب
ایدیلرک یرینه جسیم بر حکومت قوناغی یادی رمش و زماننده
بیکلرجه نقد و همتله حصوله کلن بردارالعلم ، اوقایله برابر یکر می
سنه ظرفنده یوق اولمش و مصطفی بکک عمارتی ، مسافر خانه سی ده
خراب اوله رق اسکی (خنجره) قصبه سنک خرابه سی کبی بر
حاله کلشدر .

بومده ، وقتیه غایت معمور ، بك چوق فضایه مسکن
اولوب اربعین راده سنده اولان درس عام افندیله توجیه اولمش
و بورایه مدرس اولان افندیله دخی بو قصبه ده تدریس علوم
ایده رك نشر فیوضات ایتمشلر ایدی . فقط اصول وراثت بو
وظیفه تدریسی قید معیشته ربط ایلدیکندن مدرسلری حوضه ده
بولنه میوب و کالتله اداره امور تدریس ایتلرینه باعث اولمشدر .
بومدرسه نك مدرسلری اکثریتله کبار علمادان اولوب مفتی
زاده (السید عبدالرحمن افندی) مدرس اولدینی خالد ۱۱۴۸ ده
وفاتیله مفتی (احمد افندی) و ۱۱۵۸ ده حسین افندی زاده
(مصطفی افندی) و ۱۱۶۲ ده وفاتیله مخدومی (حافظ عبدالله

افندی) و ۱۱۹۲ ده وفاتيله علمادن (السيد على افندی)
و ۱۲۰۹ ده مشاهير فضلا دن پياسلى (الحاج محمد افندی)
و ارتحانده مخدومى كبار علمادن (الحاج عبدالحليم افندی)
بو مدرسه به مدرس اولوب حاجى عبدالحليم افدينك وفاتنده
مخدوملى (الحاج اسماعيل حقى ، محمد امين ، عبدالمجيد نائلى)
افندىلر تدریسه متصرف اولمشلر ایدی .

بوقضايه بدايت فتحنده تورك قبائلندن كيدورلو ، چارقلو ،
قانيقلو قبيله لرى اسكان ايدلمش اولديغندن بونا ملر ، اليوم
كوى اولق اوزره بولمقده در . قضانك حاوى اولديغى قرا
اللى قدر ونفوس عموميه سى ده اوتوز بيك راده سنده اولوب
قدیمآ خلیاس ، قاملق ، كيدورلو ، سمره نامرلیله درت ناحیه به
منقسم اولمشدر .

۱ (خلیاس ناحیه سی) دركه قضانك شرق جنوبی
طرفلرینی احاطه ایدر. اليوم بوکا (خیللاز) نامی ویرلمکده در.
بوناحیه ده قدیمآ بر (ایلجه) اولوب صوبی ایلق ، شفاسی
مجر ب ، موقعی لطیف اولدیغندن یاننده اوتل ، خان یاپیللمش
و ۱۳۰۰ تاریخندن بری اکتساب شهرت ایتمشدر السنه عامه ده
(خیللاز ایلجه سی) دینور . بعضلر بو ایلجه نهك خواص
شفاییه سنی تعداد ایدر كه حوضه قابلیجه سنه فائق عد ایتمکده
ایسه ده قابلیجه دن امید ایدیان فوآند ، ایلجه نهك تأمین ایتدیکی
منافعه راحح اولدیغی شبهه سزدر .

۲ (قاملق ناحیه سی) درکه : قضانك شرق شمالی طرفلرینی احاطه ایدر . بوناچیۀ قدیمه اولدقجه مشهور اولوب دره کوی بوناچیۀ داخلنده در . دره کوینده امرای سلجوقیه دن (امیر الحاج ولی الدین بن برکاتشاه) ۶۴۷ ده بر جامع شریف و تربۀ بنا و اوقافی تنظیم ایتمشدر . امیر مشهور (مبارزالدین عیسی بن ایلداش) دخی بوناچیۀ دندر . بوکا قیود عتیقه ده (قانیق ناحیه سی) دینور غالباً (قاملق) لفظی (قانقلغ) تعیرندن غلط اولملیدر .

۳ (کیدورلو ناحیه سی) قیداً بوناچیۀ ؛ (کدرلو) رسمیلہ مقید اولوب قضانك شمال غربی طرفلرینی احاطه ایدر . کیدورلو قبیله سی رئیس بولونان (امیر جلال الدین ماه ملک بن محمد الحوزی) بوناچیۀ دن نشئنله قضایی استیلا ۶۶۵ حدودنده اعلان استقلال ایتدیکی جهنله اماسیہ حکومتی برقاچ سنه مشغول ایتمشدر .

۴ (سمره ناحیه سی) درکه : قضانك غرب طرفلرینی احاطه ایدر . بوناچیۀ ده و قبیله قانقلو قبیله سی مسکون اولدیغی مناسبتله سلاطین سلجوقیه نك ایام انقراضنده اماسیہ ده بولونانلری بوناچیۀ ده اقامت ایتدکلرندن بوسمره ناحیه سی ؛ تاریخاً پك زیاده حائر شهرت اولمشدر .

اناطولیده ملوک سلجوقیه نك صوکی اولان (سلطان مسعود سلجوقی) بوناچیۀ داخلنده (تاتار قلعه سی) نام قریه ده مدفون اولدیغی کبی بونك شهزاده سی و خلفی بولونان (غازی چلبی)

دیمکله مشهور (سلطان تاج الدین آلتون باش سلجوقی) ده
(امور بك) نام دیگر (شیخ ساوجی) نام قریه ده مدفون
اولدینی قیود رسمیه ایله مبتدر .

قیود رسمیه ده « تربۀ سلطان مسعود بن کیکاوس در قریۀ تاتار
قلعه سی در سمرۀ حوضه تابع اماسیه » و مخدومی حقه ده دخی
« تربۀ غازی چلبی شهزاده سلطان مسعود در قریۀ امور بك
نام دیگر شیخ ساوجی در سمرۀ حوضه تابع اماسیه » و « تربۀ
سلطان تاج الدین شهزاده . الخ) دیه مسطور و سلطان مسعود ،
بویوك سلطان غازی و سلطان تاج الدین ، كوچك سلطان غازی
دیمکله مشهور اولدیغنه بناءً سلاطین سلجوقیه دن شوایکی ذاتك
بوسمره ناحیه سنده اولدینی محققدر .

بوقیدك اساسی (غازی چلبی) نك و قفیه سی اولوب ۷۵۶
تاریخنده تنظیم ایدلیکنی اشعار ایدن و قفیه ده سلطان تاج الدین
آلتونباش بن سلطان مسعود بن سلطان کیکاوس سلجوقی
اجزای شریفۀ قرآنیه قرائت ایچون بالاده تعداد ایدیلن قرانی
وقف ایتدیکی مذکوردر .

تاتار قلعه سنده سلطان مسعودك نامنه برتریه ، بر مدرسه
و برجامع شریف مقید و امور بك قریه سنده (شیخ ساوجی)
نامنه برزاویه و (سلطان تاج الدین) نامنه برتریه محرر و بونلرك
مدرسلی ، خطیلری ، شیخلری ، جزخوانلری ، متولیلری
قیداً مضبوط اولدیغنه بناءً شیخ ساوجی نام دیگر امور بك

و تاتار قلعه سی قریه لرینه عزیمتله تحریات جدیه اجرا ایدلدیسه ده
تاتار قلعه سنده (سلطان تره سی) نامیله طاش بیغیلرندن
عبارت بر تره خرابه سی و شیخ ساوجی قریه سنده درت دیواردن
عبارت سلطان آلتونباشک مزاری دیمکله مشهور بر مزار
بولنه بیلمشدر . مدرسه دن اثر اولمیوب هرایکی قریه ده اخشابدن
برر جامع و تکیه نامه بر کوی اوطه سی بولمقده در .

تاتار قلعه سی دیمکله مشهور اولان کوی ده و قتیله اما سیه ده
اقامت و بلاد رومه نظارت ایدن تاتار قوماندانلرینک بوجوارده
وکیل اموری اولان تاتار بکی او طور دینی مناسبتله تسمیه ایدلمش
اولدینی کبی بو قضا داخلنده شیخ طوراسن ، شیخ بایزید ،
شیخ ساوجی ناملریله مشهور کویلری واردر .

دردنجیسی (کوپری قضاسی) درکه شرقاً حوضه ، غرباً
عثمانجق و بوی آباد ، جنوباً مرزیفون و حاجیکویی و شمالاً بافره
قضالریله محدود اولوب مرکزی (طاشان) طاغنک شمال غربی
اتکلرنده ایکی تپه نك اورتی سنده عارضه لی و غربه طوغرو مائل
اولان بر موقع لطیف ده کائن (کوپری قصبه سی) در .

بو قصبه نك نام قدیمده (شین ، کده غره) ناملریله دائر
ایکی روایت موجود اولدیغندن بونلری تدقیق ایتک فائده دن
خالی دکلدرد . اولیا چاپی سیاحتنامه سنده دیورکه : « بوشهر ،
قدیمآ شین آدیله مسمی اولوب شین ، عمالقه لساننده کوپری
معناسنه در . » شور وایتدن اکلشلدیغنه کوره شین قصبه سی ،

کوپری قصبه سنک موقعاً و معاً عینی اولوب بری عملیقی، دیکری
تورکی اولور .

قرون اولی ده عمالقہ طائفہ سنک اناطولی ده بولندیغی بعض
روایات ضعیفہ دن مستبان اولمقدہ ایسہ ده بونی تأیید ایدہ جک
ادلہ تاریخیہ یوقدر . شین لفظنک عمالقہ لسانندہ کوپری معناسہ
اولدیغی تصحیح ایدہ جک روایت ، محرر عاجزہ مجهولدر .
بناءً علیہ : شور وایتک مأخذی معلوم اولمقدجہ شایان قبول اولسی
براز مشکل اولور .

(کدہ غره قصبہ سی) سلطان مسعود سلاجوقی طرفندن
۵۳۸ تاریخندہ بنا ایدلمش اولدیغی و کدہ غره نامیلہ تسمیہ
ایدلیکی العیلم الزاخر ، جامع الدول کبی تواریخ عمومیه ده
مذکوردر . بوقصبہ نک (کدہ غره) نام قدیمی بتون قیود
عتیقہ و سجلات شرعیہ ده مسطور اولوب کوپری قصبہ سنک
موقعاً عینی اولدیغنه دائر قید رسمی و دلیل تاریخی یوقدر
فقط غیری اولدیغی تدقیقات قیودیه دن ا کلاشلماقدہ در . شویله کہ :
یورکچ پاشانک کوپری یه عائد وقفیه سنده کدہ غره مدینہ سی
جوارنده کوپری قریہ سی باشنده برجامع شریف بنا و مصارف
شرعیہ سنہ دائر تعیین وظائف ایتدیکی مذکوردر . کذلک
ناج الدین پاشانک وقفیه سنده کدہ غره قصبہ سی جوارنده کوپری
قریہ سنده برجامع شریف و عمارت و حمام بنا و اوقافی تنظیم
ایتدیکی مسطوردر . ۸۳۴ تاریخندہ تنظیم ایدیلان یورکچ پاشانک

و ۹۰۰ تاریخنده ترتیب اولونان تاج‌الدین پاشا-انك وقفیه لرندن
اکلاشیلدینی اوزره کوپری ؛ کدغره قصبه‌سی جوارنده بر
کوی اولدینی محققدر .

بتون سجلات شرعیده ، وثائق عتیقه‌ده « جامع یورکیج
پاشا درقریه کوپری درجوار مدینه کده غره تابع امامیه » و
« جامع و عمارت تاج‌الدین پاشا درقصبه کوپری درجوار مدینه
کده غره تابع لواء امامیه » دیه مسطور اولدیغندن کده غره
قصبه‌سی موقعی باشقه ، کوپری کوی و مؤخرأ کوپری قصبه‌سی
موقعی ینه باشقه اولدینی و یکدیگرینه متصل بولدینی شبهه سزدرد .
شو حالده کوپری قصبه‌سی ؛ کدغره قصبه سنك موقعاً عینی دکل ،
بلکه متممی اولور . بویکی نامك دها اسکیمی نه اولدینی معلوم دکلدرد .
چونکه کوپری قصبه سنك یرنده اولان شهر قدیم ،
امامیه نك حکومت دانش مندییه طرفندن فتح اولدینی اناده
فتح ایدلمش اولدیغندن تکرار استرداد ایچون روملر ، بعدده
اهل صلیب طرفلرندن توالی ایدن محاربات صلیبییه ده خراب
اولمشیدی . مؤخرأ سلطان مسعود سلجوقی امامیه حکومتی
استیلا ایلدیکندن داخلنده بولونان بو قصبه یی اسکی شهره حاکم اولان
بر موقع عالی ده حصار ایچنده بر شهر لطیف بنا و (کده غره) [*]
نامیله توسیم ایتشدرد .

[*] (کده) سلجوق تورکلرینك لساننده ناحیه مرکزی کبی
ویوک کوی معناسنه اولوب قایی و سائر اوغوز تورکلری اراسینده

اليوم (كده غره قصبه سی) ایچ قلعه محله سیله جوارنده
بولونان ملا حسن ، غنی زاده ، عبد اللطیف و بونلرک
اراسنده واقع محلاتک بر قسمی حاوی اولان موقع اولوب جمله سی
بر حصارک ایچنده بولندیغی خرابه باقیه سندن اکلایلمقده در .
کوپری دخی الیوم اورته جامع دیمکله مشهور اولان یورکچ پاشا
جامع شریفنک شمال و غرب طرفلرینه تصادف ایدن لرلره دینور .
اناطولی ده اشقیای جلالیه نک ۱۰۰۹ ده اطرافه ویردیکی دهشت
اوزرینه کوپری ویوده سی مشهور (طوراقاغا) وزعیمی سنان چلبی
اوغلی (مصطفی اغا) [۱] ایچ قلعه محله سی جوارنده اشقیادن
تحفظ ایچون تعیه شککنده طور اقدن بر قلعه یامش و مؤخرأ
بوراسی ده کسب جسامت ایده رک بر محله شکلنی آلمش اولدیغندن
(طوراق قلعه محله سی) دخی بو کده غره قصبه سندن معدود اولمشدر .
قدیمأ بر شهر جسم اولدیغی حالده مؤخرأ خراب اولدیغی
وئانای حفر یانده جابجا تصادف ایدیلن آثار قدیمه سندن اکلایشیلان
وانحق بر قسمی اوزرینه کوپری نامیله بر کوی یاییلان موقع

(کند) نامی ویرلمکده در . (کوی کند) دینور که (کند) کویک
بویوک دیمکدر (غره) دخی (غارا) لفظندن عبارت اولوب حصار
معناسنده در . بوکا قایی تورکلری اراسنده (پارغان) و سلجوقلر اراسنده
(غارات) دخی دیندیکی کورلمشدر . شو معنالرله کوره (کده غره) نک
معناسی (بویوک کوی حصار) دها موجزی (کوی حصار) دیمک
اولور .

[۱] صدر اسبق مشهور کوپرلی (محمد پاشا) نک پدری در .

دخی (کوپری قصبه سی) اولوب بوراسی ۶۱۲ تاریخلرندن
 صوکره بولونان وثائق عتیقه ده عمومأ (کوپری قریه سی) اولق
 اوزره کوسترلمکده در . بونام دخی کده غره قصبه سنه قارشو
 یاقادن مروری تسهیل ایچون استاولاز چاینک اوزرینه یاپیلان
 (کوپری) دن دولایی تحث ایتدیگی شبهه سزدر .

کده غره قصبه سنده اقامت ایدن (سلطان جمال دانشمندی)
 اماسیه حکمداری (شاد کلدی پادشاه) طرفندن قیصریه
 ارسال و امیر مومی الیهک مشاوری اولان (الشیخ علاء الدین
 علی شروانی) بی بو کوپری کوینده اقامه ایتدیکندن شیخ
 مومی الیهک احفادی بوراده تمایز ایتمش و اماسیه والیسی یورکچ
 پاشا قوجه قیاسی بکی حیدر بکی اماسیه یه قالدیردینی اناده کوپری
 کوی ایله کده غره قصبه سی اراسنده بولونان موقع خالی ده بر
 جامع شریف بنا و اطرافنه بعض تورکمن عشیرت لرینی اسکان
 ایله مش بولندینی مناسبتله کوپری کوی ترقی ایتمکه باشلامشدر .
 اماسیه والیسی شهزاده (سلطان احمد) ه بو علاء الدین
 شروانی احفادندن (تاج الدین پاشا - تاجی بک) ۸۹۶ ده
 صاحب دیوان اولدقده بو کوی ده مکمل بر جامع شریف و عمارت
 و حمام و استاولاز چایی کنارنده (سلطان احمد چلبی) یه بر
 سرای عالی بنا ایدهرک شهزاده مشار الیهک بهار موسملرنده
 بو کوپری یه تشریفی تسهیل ایتدیکندن عمارت وسیله سیله بک
 چوق ضعفا ، ، فقرا و شهزاده نك تشریفی مناسبتله بعض امرا

بوکوی ده اقامت وقوناقلر بنا ایتمش وکوپری کوینک شرفی
تزاید ایدوب بورادن ظهور ایدن ذواته (کوپرلی) وقصبه دن
ظهور ایدن ذواته (کده غره لی) دینمشدر .

بوتاریخدن اعتباراً کوپری کوی برقصه حائی اخذایدهرک
کوپرلی (عبداللطیف افندی) شمدیکی محله سنده وکده غره لی
عبدالغنی زاده (محمد چلبی) بونک یاننده برر محله احداث
وهربری محله سنده جامع ، مکتب انشا و دبکر کوپرلیلر ،
کده غره لیلر دخی بونلره تبعیت ایدهرک منسوب اولدقلری
قصبه لرینی بنای خیرات ایله اعلا ایتمکده یکدیگرینه مسابقت
ایتمشلردر .

بناءً علیه ۱۰۶۸ سائنه قدر یازیانه بولونان شو ایکی قصبه نک
آراسی تمامیه دولوب یکدیگرندن تفریق اولنیمه جق بر حاله
کیش اولدیغندن کوپرلی محمد پاشانک زمان وزارتنده هرایکی سنه
بردن (وزیر کوپریسی) عنوانی ویرلمش و کده غره قضاسی
عنوانی وزیر کوپری قضاسی عنواننه تحویل ایتمش ایسه ده بو
عنوان بر قید رسمی دن عبارت قاله رق السنه عامه ده کوپری
قضاسی ، کوپری قصبه سی نامی اشتهار ایدوب کده غره قضاسی ،
کده غره قصبه سی نامی اونودلمشدر .

ایچ قلعه محله سنده آیدین تکیه سی بنا اولنش بعده جمودار
اوغلی (حسن غازی) طرفندن برجامع شریف و قیابک اوغللری
طرفندن بر مکتب انشا اولنه رق بوروق مالکانه سی جمعه سی

طرفندن وقف ایدلمشدر . کوپری قصبه سی کوی حانده ایکن
 شیخ علاءالدین شروانی اوراده برمسجد و مخدومی لالاجق
 (غازی بك) برنکیه بنا و اوقافی تنظیم و ۹۰۰ ده بوغازی
 بکک حفیدی تاج الدین پاشا مکمل ، غایت متین برجامع شریف
 و مکتب و عمارت و حمام و شیخ ابراهیم بابایه برتکیه بنا ایتمشدر .
 بوآناده شهزاده سلطان احمد سرایی جو وارنده مزین بر
 چشمه بنا ایدرهك سلطان پیکاری دیمکله مشهور و بعده بر محله یه
 علم مخصوص اولمشدر . عبدالغنی زاده محمد چلبی شیخ صالح
 افندی یه دیگر برتکیه بنا ایدوب ۱۰۱۱ ده اشقای جلالیه نك
 هجومیه کوپری قصبه سی محترق اولدیغندن شو اوقافك متولیلری
 جامعلری ، مکتبلری قسماً اعمار ایتمش و کوپری اعیانندن
 (یوسف اغا) دیگر حمام انشا و برقاج محترق مسجدی اعمار
 و کوپرلی طـوراق اغا شیخ محمد افندی یه دیگر برتکیه بنا
 ایتمشدر .

کوپرلی محمد پاشا ، زمان صدارتنده بو کوپری شهرینی اعمار
 همت ایدرهك شهرك شرق طرفنده جسیم بر مصلی بنا و طعامیه وضع
 ایتمش و شهره صو کتیرمك ایچون جسیم صو یوللرینه مباشرت
 ایتدیکی بر زمانده وفات ایلدیکندن حلیله سی (عایشه خانم)
 شو خیراتی اکمال و برجامع شریف و ایکی حمام و جسیم بر
 بدستان انشا و اوقافی ۱۰۷۸ ده تنظیم ایتمشدر .

بعده صدر مشارالیهك مخدومی (فاضل احمد پاشا) کارگیر

بر مدرسهٔ عالیہ واخلرنندن (حسین اغا) بر جامع شریف و
(عبدالکریم اغا) بر مدرسه وده یوسف اغا زاده محمد اغا
دکرمین باشی محله‌سندہ بر جامع شریف و مکتب بنا ایدہ رک
۱۱۰۰ تاریخہ قدر کوپری قصبہ‌سنی اعمار ایتشلردر .

۱۱۴۳ ده بوستانجی باشی کوپریلی (الحاج سلیمان اغا)
تاج‌الدین پاشا جامعی حولیسندہ بر مدرسه و سلطان پیکار محله‌سندہ
بر جامع شریف و مکتب و ۱۲۱۲ ده مفتی شہید (السید مصطفی
افندی) غنی زاده محله‌سندہ بر زاویہ وقارشوسندہ بر خان جسم
و ۱۲۲۰ ده (السید عثمان افندی) اوزون سوقاق محله‌سندہ
رحمانیہ مدرسه‌سنی بنا و جملہ‌سنی ده وقف ایتشلردر .

کوپرینک قدیم مدرسه‌لری ، مکتبلری ، علماسی چوق
اولوب شومبانی عالیہ‌نک اکثریسی اخشاب اولدینی مناسبله
مکرراً دوچار عوارض اوله‌رق تجدیداً اعمار ایدلمش و یک چوق
جامع شریف ، مکتب ، تکیہ اولدینی حالده صاحب‌لری ، بانیلری
حقیلہ بیلنه مدیکندن تحریرندن صرف نظر ایدلمشدر .

بوقضادن اوچ سالالہٗ مهمہ ظهور ایدوب کوپری قصبہ‌سنہ
براهمیت تاریخیه بخش ایدہ رک بنام و اوچنجیسی مشہوم انام
اولمشدر . برنجیسی طاشان سالالہ‌سی اولوب آل سلجوقدن
خسرو شام اولادندن اولمق اوزره مشہوردر . بوسالالہ‌نک
نفوذی کده‌غره ، مرزيفون ، کومش ، حوضہ ، زیتون
قضالرنده جاری ایکن جانیکن و سینوب سنجاقلرینہ قدر توسع

ایده بیامشدر . کوپری داخنده اولان قوجه قیاسی امارتی بوسلانهك برشعبه سی عد اولنور . ایکنجیسی کویك سلاله سی اولوب صاحب اعظم سلجوقی سعدالدین کویك بوسلاله یی تشکیل ایتمشدر . بونلره کویك اوغللری دینور . بونلردن موتوق ، قیا ، سوندك بکرك شهرتی پك زیاده در . اوچنجیسی واك مشهوری کوپرلی سلاله سی اولوب سنان اوغلی (محمد پاشا) بوسلاله یی تشکیل ایتمش و بونلردن بشی صدراعظم اولمق اوزره سکیز وزیر عالیشان چیقمشدر .

کوپری قصبه سی ؛ قدیم اورتی جامع ، اوزون سوقاق ، جدید ، چایر باشی ، چناقلی ، دباغخانه ، دکرمن باشی ، دیکیلی ، سلطان پیکاری ، شیخ ، طاش قلعه ، طوپراق قلعه ، عبداللطیف ، غنی زاده ، لاز ، ملا حسن ، نعلبندلو ، یکی جامع محله لرینی ، بیك بشیوز قدر خانلری ، الی بیك راسنده نفوسی حاوی اولوب کوپری قضاسی ؛ سکیز ناحیه دن ، قرق الی بیك قدر نفوسدن وایکیوز قدر قرادن متشکل بر قضای جیم در .

بوقضا ؛ کوپری وزیتون نامرلیله مشهور ایکی قضادن مرکب اولوب ۱۲۹۵ تاریخنه قدر بش ناحیه دن ، یوز قرق قدر قرادن متشکل ایکن بوتاریخده اوچ ناحیه دن ، التمش قدر قرادن متشکل اولان زیتون قضاسی ناحیه حالته افراغ و کوپری قضاسنه الحاق ایدلمکله کسب جسامت ایتمشدر .

زیتون قضاسنی تشکیل ایدن نواحیدن بری آولاغو [۱]،

[۱] اطراف اخشاب دیوار ایله محاط اولان داوار آغیلنه آولاغو دینور .

دیگری قزیل کیسہ ، اوبری کول ناحیہ لری اولوب بونلر کوپری قضا سنک غرب شمالی طرفلرینی عموماً احاطہ ایتہ کدہ در .
وقتیله زیتون امارتی مشہور اولوب کول ناحیہ سی بو امارتک مرکزی ایدی . زکریا ، زینل ، مراد بکلر امرادن اولوب ہر برینک کول قریہ بندہ تربہ سی ، وقفی ، جامعی وارد در . بو قضادن سلطان محمد خان ثانی زمانندہ قاضی القضاۃ زین الدین محمد زیتونی ، مشاہیر امرادن محمد پاشا ، مشیر محمود پاشا کی رجال دولت ظہور ایتشد در .

بوزیتون قضا سنندہ وقتیله قانیق اروغندن اسنلو ، قرملو اویماقلری ساکن اولمش و محمود بک بن خسرو شاہ کندی عشیرتیلہ کلوب یرلشمش واسنلو اویماغندن ارطوغانشاہ ، حاجی بوری بک و قرملو اویماغندن صوروک بک اشہار ایتمش اولدیغندن اسنلو ، قرملو ، محمود بکلو نام دیگر مہماد بکلو ، ارطوغانشاہ ، حاجی بک ، صوروک کویلری بونلردن قالمشدر .
۴ (اورتاقلر ناحیہ سی) درکہ قضا سنک شرق طرفلرینی محیط اولوب حوضہ قضا سنک منہای حدودی جوارندہ در .
مشہور کوپک ، اورن کویلری بوناہیہ داخلندہ اولوب حکومت سلجوقیہ زمانندہ سعدالدین کوپک ، بدرالدین اورن بکلرک نامندن قالمشدر . کوپک اوغللری تیمورک غلبہ سی زمانندہ سلطنت جلیلہ عثمانیہ یہ قارشو جرأتکارانہ حرکتدہ بواندقلرندن آق اورن بک اوغللرندن (اورتاق بک) و اوغللری ؛ کوپک

اوغلارینی استیصال ایتمشلردر . اورتاق بکه طرف پادشاهیدن احسان بیوریلان قریه اوغلارینه تملیک بیورلمش واورتاقلر نامی کویه علم مخصوص اولمشدر .

۵ (اویمه اغاج ناحیه سی) درکه : قضانک غرب جنوبی طرفلرینی احاطه ایدر . بوناویه دخی قانیق تورکلری ایله مسکون اولدیغندن ایچلرندن مشهور آدملر ظهور ایتمشلردر . کوپرلی محمد پاشانک کتخدالغندن چیقمه وزرادن (محرم پاشا) بوناویه داخلنده یحشی فقیه کویندن اولوب قلیج ، اسن ، یوروق بکلرک نامه منسوب قریه لر واردر . بونلر عموماً قانیق بکلرندن معدود ایدی .

۶ (پاشا ناحیه سی) درکه قضانک جنوب طرفلرینی احاطه ایدر . بوکا (یومری طاش ناحیه سی) دیندیکی حالد تاج الدین پاشانک چفتلیکی اولدیغندن پاشا ناحیه سی دینمشدر . مشهور طویراق ، آق اورن بکلر بوناویه دن اولوب ناملریله معروف برر کوی واردر . کده غمرده (سمره ناحیه سی) دخی پاشا ناحیه سندن عبارت اولوب بیرام کویی بوسمره نک مرکز قدیمی ایدی . اماسیه ده اناطولی ناظری (ایشبوغانوین ، ابشقه) نک مالکانه سی بوسمره اولوب یشبکی کویی ایشبوغان غلط اولدیغی تدقیقات قیودیه دن اکلایشیلیر . (سلطان کمال دانشمند) بو سمره ده اوطور مشدر . وزرای عثمانیه دن مشهور قبله لی (مصطفی پاشا) بوناویه داخلنده بولونان آق اورن کویندندر .

۷ (صاموق آلاک ناحیه سی) درکه قضانک شمال غربی طرفلرینی احاطه ایدر. تاتارلرک حکمدار مشهوری (هلاکو-اولاقو) خان اولادندن یشموتک اوغلی واماسیه ده ناظرانا طولی بولونان (جمودار) ن برادری (صاموق) بو ناحیه ده اقامت ایلدیکندن آدی چفتلیکنه علم اولمشدر . صاموق آلاکی ، صاموق چفتلیکی دیمکدر .

۸ (غلام ناحیه سی) درکه قضانک شمال شرقی طرفلرینی احاطه ایدر . بو ناحیه داخلنده (قپلاک - قپلان) مالکانه سی امرای مشهوره دن کده غره امیری (قپلاک بک) نامنه منسوب اولوب اولادی طرفقدن وقف ایدلمشدر . بونا حیه نک مرکزی اولان غلام کوینک قدیمآ اسمی قول ناحیه سی ، قول کوی محرر ایکن طقوز یوز تاریختندن صوکره غلام ناحیه سی ، غلام کوی یازلمشدر . قپلاک بکک قولی اسن بکه منسوب اولدینی بولتمشدر .

بو کویری قضا سندن کوپرلی سلاله سی سایه سنده صدراعظم سیاوش پاشا ، وزرادن مؤذن زاده علی پاشا ، حمزه پاشا ، رئیس الکتاب کوسه احمد افندی ، بکربیکی چومولی زاده الحاج علی پاشا کی رجال دولت ظهور ایتمشدر . کده غره قصبه سنک بناسی تاریختندن اعتباراً بو قضانک رجالی ، علماسی ، تاریخی پک مهم و مشهور اولوب اماسیه قضا لرینک عمومنه فائق در . ایوم بورججانی حائز اولوب اماسیه لواسنک ایکی مبعوث محترمی اولان (حاجی

مصطفی توفیق ، فاضل محمد عارف (افندیلر حضراتی بو قضا دندر .

بسنجیسی (لادیك قضاسی) دركه : اماسیه نك شرق شمالیسنی محیط اولوب شرقاً جانیك ، غرباً اماسیه ، شمالاً حوضه ، جنوباً اربعه قضالریله محدوددر . قضا مرکزی آقظاغك شمال اتكلرنده جنوبه طوغرو مائل ، لطیف بر بایر اوزرنده كائن (لادیك قصبه سی) در . تعریب اولنه رق (لادیك ، لادق) دینمش و قیود عتیقه ده بوصورتله یازلمشدر .

بوقصبه نك نام قدیمی (لاؤدیكیه) اولوب اماسیه حکمداری مشهور بویوك (مهرداد ، میتراد) ك زوجه سی (لاؤدیك) نام قرالیچه طرفندن بنا ایدلدیكى وبعده غلط اوله رق (لادیك) دیندیكى مشهوردر . شوخالده بوقصبه ؛ ایكى بیك سنه لك بر شهر قدیم اولدینی اكلاشیلیر . انحق قونیه داخلنده لادیك ناحیه سی ، دكزلی سنجاغنده لادیك قصبه سی ، بیروت ولایتی داخلنده كائن لاذقیه سنجاغی ده مذکور قرالیچه لاؤدیكه نسبت اولنه رق جمله سنه (لاؤدیكیه) دیندیكى وبونلردن اوچی لادیك ، بری لاذقیه نامیله اشهار ایتدیكى ادعا ایدلمكه ایه ده وادعانك موافق اولدینی مشكوك در .

اولیا چلبی سیاحتنامه سنده دییوركه « اماسیه قیاصره سنندن هاویك ، یاخود حاویك نام کیمسه طرفندن بنا ایدلدیكى مناسبته حاویك بعده تحریف اولنه رق لادیك دینمشدر . »

لكن سيواس ولايتى داخلنده وجوارنده بولونان (حافيك
 قصبهسى) نك نامى (بزم وزرم) ده (حاويك) يازلديغنه
 كوره حاويك طرفدن بنا وتسميه ايدلمسى حافيك قصبهسى
 حقنده اولمى در. هرايكيسى ده سيواس ولايتى داخلنده اولديغندن
 تشابه واقع اولدينى ظن اولنور .

ينه مذكور سياحتنامه ده اوليا چلبى مرحوم اوزمان
 لادىكليلردن نقلاً ديوركه : « بوقصبه نك عقيب فتحنده امرادن
 سلمان غازى ؛ قلعه يه كيروب برجنه سنجاغى ديكه يم مى ديه
 ملك احمد دانشمند غازى دن استيدان ايلدكه ملك مشاراليه
 دخى « لا ، ديك » ديه امر ويرديكى خلق اراسنده شايع
 اولديغندن بوقصبه يه لاديك دينشدر ، شو تواتر عامه يى تايد
 ايده جك بردليل تاريخى اولمدينى جهتله بوتسميه بر مصالح كى
 تلقى اولنه بياير . السنه عامه ده (ايلاديك) دينور .

بوقصبه نك دروننده و اطرافنده مسكون اولان تورك
 قبائلندن طوغانلو اويمانغى بكى (سولى بك) ملك مشاراليه
 (احمد دانشمند غازى) نك دامادى اولوب قيزى (ايلدوك
 خاتون) اولدينى و ملك مشاراليه ك قيزى اوغللىرى (ارسلان
 طوغمش ، اولوغ) بكار اولوب سولى بكك اوغللىرى بولندينى
 وثائق عتيقه دن اكلانلماقده در . (امير كبير بدرالدين شاهنشاه
 بن ارسلان تغمش التغانى) دخى نيكسارده مدفون و كتابهسى
 موجود ولاديك ده قيز اوغلى ، طوغانلو ناملىله جسيم كويلر ،

مالكانه لر بولنديغنه دقت اولنورسه بو قصبه نك نامى (ايلدوك خاتون) تعير ديكرا له (ايلديك خاتون) آديله تسميه ايدلديكى تخمين اولنه بيلير .

لا ديك قصبه سنك جنوب طرفلى طاغ واطراف نلثه سى آچيق ، دوز بر اووايه ناظر اولديغىدن منظره عموميه سى كوزل ، هوا سى صاغلام ، رطوبتى غالب در . اليوم اون يدي محله اعتبارنده اولوب بولردن (بخشى ، قوغه ، كلياس ، سراى ، زاويه ، قزىل سنى ، كوسره) محله لرى قديمآ موجود ايدى . تدريجآ قصبه معمور اولدقجه كسب جسامت ايدرك بعده (جامع جديد ، خرمئير ، خان بيكارى ، حاجى على بيكارى ، شهره كوسدى ، صنع الله پاشا ، اسكانيه ، نمازگاه ، طاشلى بيكار ، كليسا) محله لرى تحدث ايتمش وبشيوزقدر خانه يى حاوى بولمئشدر .

زاويه محله سنده بولونان جامع شريف كليسادن تحويل وبر مناره علاوه ايدلمش وجامع جديد محله سنده ۸۹۱ ده وزرادن داود پاشا طرفندن بنا اولنان جامع شريف مشرف خراب اولديغىدن ۱۰۸۵ ده (سلطان محمد خان رابع) حضرتلى طرفندن تجديد وايكى مناره لى اوله رق احيا بيورلمئشدر . بخشى محله سنده ۹۱۵ ده اماسيه واليسى شهزاده سلطان احمدك والده سى (بابل خاتون) طرفندن بر جامع شريف وحمام بنا وواقافى تنظيم ايدلمئشدر . بوجوامع شريفه عموماً كاراير ومتين در .

۱۱۱۲ ده جامع جدید محله‌سندہ شیخ الاسلام اسبق لادی کلی
(محمد افندی) اوزایکی حجره‌ئی بر مدرسه‌ عالیہ و غایت منتظم ،
کارگیر اولمق اوزره جامع ، بدستان و طاشخان بنا و ۱۱۱۷ ده
بونلری مدرسه و جامع شرفه وقف ایتشدرد . بخشی محله‌سندہ
بولونان طقوز حجره‌لی اخشاب مدرسه خضر پاشا طرفدن بنا
ایدلمش اولوب اوقافی واردر . زاویه محله‌سندہ بش حجره‌لی
اولمق اوزره یاقین زمان‌ده بر مدرسه دها بنا ایدلمشدر .

شو مبائی دینه و مؤسسات علمیه دن ماعدا مسعود بك ،
صنع الله پاشا ، پولاد بك ، امیر احمد چلبی و حاجی یونس اغا
طرفلرندن بنا ایدلمش برر مسجد و جامع شریف بر مکتب
رشدی ، بر مکتب ابتدائی و بر اثاث مکتبی واردر . ۱۳۲۳ ده
چرکس قره‌بك زاده (عمر بك) دخی سرای محله‌سندہ بر حمام
لطیف بنا ایتشدرد . لادیك قصبه‌سنی زیارتگاه انام ایدن زاویه
رفاعیه بانیسی (السید الشیخ احمد کبیر رفاعی) حضر تلرینك
تربه‌سی بك مشهور اولوب اوقافی ، عمارتی ، تکیه‌سی و ارایدی .
قصبه جوارنده بالی بابا تکیه‌سی‌ده زیارتگاه مشهوردر .

بو قصبه‌دن تاریخاً مشهور اولمق اوزره درت سلاله‌عظیمه
ظهور ایتشدرد . بونلردن برنجیسی امرای دانشمندیه و ساجوقیه‌دن
اوله‌رق طوغانلو سولی سلاله‌سی درکه : هربری عصرنده بك
مشهور ایدی . ایکنجیسی قباد سلاله‌سی اولوب احفاد
سلاجوقیه‌دندر . تاریخ عثمانی‌ده قباد اوغلاری مشهوردر .

اوچنجیسی یکی بك سلاله‌سی اولوب چلبی سلطان محمد خان
حضر تترینك امراسندن ایدی بونك اولادی عموماً امرادن
اولوب بك زیاده اشتہار ایتشلردر . دردنجیسی سید احمد کبیر
رفاعی حضر تترینك سلاله‌سی اولوب اولاد واحفادی اناطولی
وعربستان بلادنده انتشار ایتشلردر . بونلردن دخی امر
کلشدر .

صدر اعظم (طیار محمد پاشا) یکی بك سلاله‌سندن اولوب
پدری مصطفی پاشا امرادن ومخدوملری مصطفی پاشا ، احمد
پاشا ، حسین پاشا وزرادن اولمق اوزره لادیک قصبه‌سندن ظهور
ایتشلردر . شیخ الاسلام اسبق ، امام سلطانی محمد افندی ،
دیگر امام سلطانی علی افندی ، دیگر امام سلطانی حسن افندی ،
دیگر امام سلطانی امیر مصطفی افندی لادیک قصبه‌سندن
ویکیچری اغاسی وزرادن چالقی احمد پاشا احمد سرای
ناحیه‌سندن یتشمشلردر . بونلردن ماعدا لادیک قصبه‌سندن
وقراسندن ظهور ایدن امرای وموالی بك چوق اولوب مشہور
کوپریلی محمد پاشایی صدر اسبق لادیکلی طیار محمد پاشا یتشدردیکی
جهتله سلطنت جلیله عثمانیه‌یه لادیکلیرك بك بویوک خدمت
ایتدکلی آشکاردر .

لادیک قصبه‌سی سلطان مسعود سلجوقی طرفندن تجدید
وتعمیر اولوب قیزاوغللی اداره‌سندہ بولنش وبعده قباداوغلارینك
اداره‌سندہ ایکن سلطنت جلیله عثمانیه‌نك حمایه‌سنی اماسیه

حکومتی قبول ایتدیکی زمان ممالک عثمانیه دن معدود اولمش و اماسیه ده چلبی سلطان محمد خان حضرتلری و شهزاده سی و سلطان بایزید خان ثانی حضرتلری و شهزادگانی و ایلمکله بولندقلری ائنده سرای صیفی و ظیفه سنی کورمشدرد . بوجهتله لادیك قضاسی تاریخاً مشهور و امراسی چوقدر .

لادیك قضاسنك نفوس عمومیه سی انجق یکر می بش بیک راده سنده اولدینی حالده التمشی متجاوز قرایی و قدیمآ درت ناحیه یی حاوی در . بوقضانك شرق طرفنده قصبه یه اون کیلومتره قدر بعد مسافه ده کائن ، جسم بر کول اولوب بالینی و سازلنی پک مشهور اولدیغندن لذیز بالیقلر چیقاریلیر ، کوزل حصیرلر نسج اولنور . تأمین ایتدیکی منافع اقتصادیه اولدجه مهمدر . طولاً الی و عرضاً اوچ کیلومتره لک بر وسعتی حائز اولوب الی متره قدر درینلکی واردر . قصبه نك جنوب شرقی طرفنده بولونان کول سخی ، قیز اوغلی ، بولاد ، چاقیر کومش یا یلالرندن نبعان ایدن الی عدد چای بوکوله دوکولور . بورادن چیقوب (ترس آقان) نامیله مشهور اولان ایرماغی تشکیل ایدر . بو کولك قورودلمسی تصور ایدلمکده در .

درت نواحیدن بری (حمید ناحیه سی) اولوب قضانك شرق جنوبی طرفنی احاطه ایدر . مرکزی حمید قریه سی اولوب (کول تکیه سی) دیمکله معروف برتکیه سی و بولاد قریه سنده سلطان مصطفی جامعی دیمکله مشهور برجامعی واردر . ایکنجیسی

(قره ابدال سلطان ناحیه سی) اولوب ۱۳۱۴ ده حمید ناحیه سیله برلشدیرلمش و بر ناحیه جسیمه تشکیل اولنمشدر . ابدال سلطان تکیه سی مشهور اولوب تر به سی ده واردر . شیخلو قریه سنده سیفی دده دیمکله مشهور قلیج دده تکیه سی و تر به سی واردر . مشهور بویوک قیز اوغلی ، کوچک قیز اوغلی ، چاقیر کومش ، اشاغی اینوز ، یوقاری اینوز کویلری بونا حیه ده در .

اوچنجیسی (احمد سرای ناحیه سی) اولوب قضانک شمال طرفنی احاطه ایدر . احمد سراینده سید احمد کبیر رفاعی اولاد کرامندن السید زین العابدین رفاعی تکیه سی و کار کیر جامعی و بر مکتب ابتدائی و دیه دین قریه سنده (زین الدین صامود بابا) طرفندن بنا ایدلمش صمود تکیه سی و سالور قریه سنده حاجی نبی تکیه سی واردر .

دردنجیسی (طوغانلو ناحیه سی) اولوب قدیمآ مسلم تورکلر ایله مسکون ایکن الیوم تمامیه روملر مسکون در . طوغانلو ، تاتار اوغلو ، قره موق ، کمال ، عمر حافظ ، حاجی علی ، قریق ، طوراسن کویلری بونا حیه ده در .

التنجیسی (مجید اوزی قضاسی) درکه : اماسیه نک جنوبه طوغرو غرب طرفلرینی محیط اولوب شرقاً اماسیه ، غرباً چوروم ، جنوباً زیله و شمالاً حاجیکویی قضالریله محدوددر . مرکزی آوقات کویی جوارنده ایکی تپه نک دوزجه اولان صرتلرنده کاشن (مجید اوزی قصبه سی) در . بوقصبه : آوقاتلی

اوغلی حاجی علی اغایه نسبتله حاجیکویی دیمکله ده مشهور اولدیغندن بالاده کی حاجیکویی ایله ارالرینی تفریق ایچون بوکا آوقات حاجیکویی ، اوکا کومش حاجیکویی دیمکله در .

بوقصبه نك یری ؛ دور قدیم دانشمندی ده قاضی بلادروم اولان عبدالمجید هروی مالکانه سی اولدینی مناسبتله ۵۳۰ تاریخلرندن بری (مجید اوزی) دیمکله مشهور اولدینی و نائق عتیقه دن اکللاشلمقده در . آوقات کویی بوقصبه نك غرب شالیسده اولوب پونتوس قرالزاده لرندن برینك آدی اولدینی و بوکویده مشهور اولان قلعه قدیمه خرابه سی بو آوقاتك اولوب اجرای حکومت ایتدیکی السنه عامه ده دوران ایتمکده در .

بو قضاوه مسکون اولان تورکلرک اکثریسی (بایندر ، قایی) اروقلرندن اولوب تاتار ، کرد دخی بولنمقده در . مرکز ی اولان قصبه قدیمه برکوی حائده اولوب آوقاتلی زاده (الحاج علی اغا) ۱۱۴۰ تاریخندن اعتباراً بوکویده اقامت و کسب نفوذ و اقتدار ایلدیکنندن ۱۱۶۸ ده بر جامع شریف و حمام و مکتب و کندینه مهظم برقوناق انشا و مخدومی (مصطفی پاشا) دخی اوقافی تنظیم و بونك مخدومی (الحاج سلیمان بك) جامعی تجدیداً توسیع و اوکنده بر مدرسه بنا ایدهرک بر قصبه حاله قویملر در .

۱۲۹۱ حدودنده قضا تشکیل اولنه رق قائممقامك اداره سنه ویرلش و ۱۳۰۶ حدودنده بر مکتب ابتدائی بنا و ۱۳۱۲ ده

مکتب رشدی به تحویل اولنه رق طاہور مرکزی اولمش وابندا
بیکیباشی اولان قارصلی (احمد شکری بک) برجام وقرائنخانه
وقائم مقام اسکلبلی (اسماعیل کمال بک) ۱۳۱۶ء مجددر حکومت
قونانی، بر ساعت قله سی بنا وحاجی سلیمان بکک جامع شریفی
تعمیر وبر مناره لطیفه علاوة انشاسنه همت ایدهرک قضانک
اشراف وافرادی بذل اعانات خصوصنده یکدیگرینه مسابقت
وابراز حمیت ایتمشلر .

بو قضا ؛ مجید اوزی ، طانون اوزی ، واری ناملریله
مشهور اوچ قضادن متشکل اولدیغندن اکیوز قرق قدر قرانی،
یدی ناحیه یی ، اللی بیک قدر نفوس عمومیه یی حاوی اولدینی
حالدده مرکزی اولان مجید اوزی قصبه سی اوچیوز قدرخانه یی
محتوی اوفاق برشهر جدیددر . قصبه نک منظره عمومیه یی
لطیف اولوب قدیم بایندرلو سلاله سنک نفوذ واداره سی التنده
بولتمقده ایدی .

بایندر اروغندن اولان بابا الیاس خراسانی اولادی اماسیه ده
نفوذلری زائل اولدقده بو قضایه نقل اقامت ایدهرک محافظه
موجودیت ایتمشلردر . مجید اوزی قصبه سنک قربنده بولونان
(بایندر قریه سی) وقتیه بیوکجه بر قصبه اولدیغنی الیوم قریه نک
جسامتی اکلاتمقده در . بو قریه مکمل قالدرملر ایله مزین ،
باغلری، باغچه لری لطیف ومبدول، موقعی دوزکون اولدیغندن
وقتیه بر قصبه اولدیغنده شبهه یوقدر .

کبار مشایخ سالفه دن (بالم سلطان) دیمکله مشهور (الشیخ شهاب الدین بالی بابا) حضرت تلیزینک مجید اوزی قصبه سی قربنده تکیه سی ، تر به سی اولوب مجید اوزی امیری بولونان جبریل (جبله) زاده (الحاج تورقادیك) طرفندن ۸۳۶ ده بنا ایدلمش و اوقافی تنظیم اولمشدرد. مشهور زیارتگاهدر. ذوالنون مصری دیمکله مشهور (ذوالنون بابا) نك تر به سی دخی بومجید اوزی قصبه سنك غرب جنوبی طرفنده یاقین بر موقعنده اولوب بوده زیارتگاه مشهوردر . بو ذوالنون بابانك تاریخی ، داستانی مشهور اولوب باب نانی ده ذکر ایدیله جکدر . سلطنت جبله عثمانیه یی اون سنه قدر اشغال ایتشدرد .

قضانك حاوی اولدینی نواحی سبعة دن بری (آشتاغول ناحیه سی) در . قضانك جنوب طرفلرینی محیط اولوب قیود عتیقه ده (اوستاج اوغول) دیمکله مقید اولان بونا حیه نك آدی آشتاغول ، آجطاول ، ایشتاغول ، اشتقول ، ایجطاول کبی صور مختلفه ده ضبط وقید ایدلمکده در . ۶۷۵ حدودنده مجید اوزی قاضیلری بو (اوستاج اوغول) قریه سنده اقامت و بوتون وثائق شرعیه یی (القاضی بمدينة اشتغول) دیه امضا ایتلرینه باقیلیرسه و قبیله بونا حیه بر قضا مرکزی اولدینی اکلایلیر .

۲ (ذوالنون آباد ناحیه سی) در که قضانك غرب جنوبی طرفلرینی احاطه ایدر . بونا حیه نك قدیم بر قضا اولدینی و مرکزی ده (علوان چلبی قریه سی) بولندینی وثائق عتیقه دن اکلالمقده

اولوب ۱۲۶۳ تاریخلرینه قدر ذوالنون آباد قضاسی نامیله مشهور اولدینی حالده مؤخرآ ناحیه حالته افراغ و مجید اوزی قضاسنه الحاق ایدلمشدر . ۹۳۰ تاریخنه قدر بولونان و نائق شرعیه ده بوناویه (طانون اوزی) دیمکله مقید اولدینی حالده بوتاریخندن صوکره ذوالنون اوزی ، ذوالنون آباد صورتنده یازلدیغنه باقیلیرسه بالاده مذکور اولان (ذوالنون بابا) نك نامیله یاد ایدلمش اولدینی اکلایشیلیر .

۳ (علوان چلبی ناحیه سی) درکه قضانك شمالی طرفلرینی محیط اولوب مرکزی (علوان چلبی) نام دیکرله (الوان چلبی قریه سی) در. علوان چلبی حضر تلرینك بوراده اقامتندن اول بوناویه طانون اوزی دیمکله مشهور برقضا اولوب ذوالنون آباد ناحیه سی ده بوقضا داخلنده ایدی . بوقضانك تشکیلات قدیمه سنه دقت اولونورسه طانون اوزی ، حمید اوزی نامیله ایکی قضادن عبارت اولوب مجید اوزینك قضا مرکزی اشتقول قریه سی ، طانون اوزینك قضا مرکزی ده طانون قریه سی اولدینی اکلایشیلیر . بوقضایه ۷۲۷ تاریخلرنده طانون قضاسی و مرکزی نه طانون قصبه سی دینمکده ایکن مؤخرآ غلط اوله رق طانون دینمشدر .

۷۲۷ ده بابا الیاس اولادندن مخلص پاشا زاده (عاشق پاشا) بلاد مصریه عزیمت ایلدیکندن مخدومی (علوان چلبی) بو طانون اوزینه کلوب اقامت و پدیرینك قیر شهرنده

وقایع اوزرینه توطن ایتمش و ۷۵۳ ده غایت لطیف، مرمردن مصنوع، اوفاق بر جامع شریف و اوکنده کنیدیسنه بر تر به و غرب طرفده جسم برزاویه و بونک شمال طرفده عمارتخانه و بر حمام انشا ایده رک طانوق اوزینی احیا ایلدیکندن بوقصبه؛ بوخیراتک بناسندن صوکره (علوان چلبی قصبه سی) نامیله یاد ایلدیکه باشلامشدر .

سیواس حکمداری کوسه پیغمبر دیمکه مشهور سلطان آرتنا بکک وزیر اولان (علاءالدین علی شاه رومی) بوعلوان چلبی نک عمزاده سی اولدیغندن مشارالیهک خیراتی اداره ایده جک اوقاف جسمه احیاسنده علوان چلبی به معاونت و طانون اوزینی مخلص پاشا اولادینه اعطا ایتمشیدی. بوجهتن پاشای مشارالیهک اولادی بوقضاده مدت مدیده نافذالکلم اولمشدر .

۴ (قایی ناحیه سی) درکه : قضانک جنوب شرقیسی محیط اولوب اوغوز تورکلرندن قایی قبیله سندن برقسیمی بو ناحیه ده اقامت ایلدکلرندن قایی ناحیه سی دینمشدر. ایوم (قایی) نامیله مشهور برکوی بولنمده اولوب کردلر مسکون در . دور جلیل سلیمانی ده روم ایلی فتوحاتی ترقی ایلدیکندن سلاطین آل عثمان حضراتنک منسوب اولدیغی قایی قبیله سی افرادندن اولان بوکوی سکنه سی روم ایلی به نقل وطن ایلدکه آمد و قعه سنده ببقلی محمدپاشایه قارشو قویوب ده مغلوباً اخراج ایدیلن کردلردن برقسیمی بورایه اسکان ایلدیشیدی .

۵ (قره یعقوب ناحیه سی) درکه: قای ناحیه سنک جنوب بنده واقع اولوب بونا حیه ده اقامت ایدن تورک اویم اقلرندن قره ججه لی تورکمن عشیرتی بکی (قره یعقوب) بکک زیر نفوذ و اداره سنده بولندیغی مناسبتله قره یعقوب ناحیه سی دینمشد.

۶ (قیشلایق ناحیه سی) درکه: قضانک غرب جنوبی طرفلرینی محیط اولوب مخلص پاشا اولادندن (غیاث الدین محمد چلبی) یه زمان امارتنده بونا حیه قیشلاق اولمق اوزره ویرلمش و اقامت ایتدیکی یره قیشلاق قریه سی دینوب مؤخرآ ناحیه نك علم مخصوصی اولمشد. بونا حیه نك اکثر سکنه سی (بابا الیاس خراسانی) نك اولادی ظن اولنور. ۱۳۱۷ شوالنده سلانیکده وفات ایدن ملغسا اوچنجی اردو مشیری امامسیه لی (حسین فوزی پاشا) بونا حیه دندر.

۷ (وارای ناحیه سی) درکه: قضانک شرق طرفلرینی محیط اولوب تورکمن امراسندن شرف الدین ایناج اوغلاری بو ناحیه ده اقامت ایتمشلردر. بوزله شرف اوغلاری دینور. شرفلر قریه سی بونلرک مقری اولوب الیوم بوکویه غلط اوله رق (شرفدر) دینمکده در. تاتار بکلرندن (اجایتو سلطان) واری قصبه سنده اقامت ایلدیکندن بوراده جامع وزاویه بناسیله نامنی ابقا و (اجه سلطان) دیمکله اشتهار ایتمشد. مشهور (ذوالنون بابا) بونک احفادندن اولوب زاویه شیخاکنندن بر تاتار اوجاغی او یاندر، غه چالیشمش ایسه ده کندی اوجاغی سوندره شد.

اماسیه‌ده اجرای امارت ایدن (بانوقشاه) شرف اوغللرندن
 اولوب اولادی واری قضا-سندده ایکی یوز سنه قدر اقامت
 ایتمشیدی . ذوالنون بابا بواواجانی سوندرمکله اشتهار ایتمشدر .
 بونلردن اسن بك زاده علی پاشا مشهور اولوب اماسیه حکمداری
 (داواندار احمد چلبی) یه قاین پدر اولمشیدی . شیخ الاسلام
 اسبق اماسیه‌لی (قره خلیل افندی) بونا حیه‌دندر . بوقضادن
 علوان چلبی سالاه‌سی ، شرف سالاه‌سی ، جبله سالاه‌سی ،
 آوقاتلی سالاه‌سی نامرلیله درت سالاه مهمه ظهور ایدرهك
 قضایه اجرای نفوذ ایتمشلردر . سنین اخیره‌ده کرد میللی
 سالاه‌سی دخی اشتهار ایلدیس-ده شهرتی قضانك خارجنه
 چیقامه‌مشدر . دفتردار مشهور (محمد رجائی افندی) علوان
 چلبی سالاه‌سندن وناحیه‌سندندر .

یدنچیبسی (مرزيفون قضاسی) دركه : اماسیه‌نك شمالنده
 اولوب شرقاً و جنوباً اماسیه ، غرباً حاجیکویی ، شمالاً حوضه
 وکوبری قضا‌رلیله محدوددر . قضا مرکزی (طاشان) طاغنك
 جنوب اتکلرنده خفیف ، دوزه مائل ، غایت لطیف بر تپه
 اوزرنده کاشن (مرزيفون قصبه‌سی) در . اطرافنی باغ دلارا ،
 اوکی یعنی جنوب شرقی طرفلری یدی قیر نامیه‌له مشهور
 بر صحرا در .

مرزيفون ، یاخود مرزفون قصبه‌سی کیمك طرفندن نه زمان

بنا ایدلایکنه داتر معلومات صحیحہ اولیوب پون حکومتی دورنده
 بنا ایدلایکی تخمین اولتمقدہ در . چونکہ : پون حکومتی ایران
 دولت قدیمہ سی فروغندن اولوب زبان فارسی ده (مرز) سنور ،
 محل سکون معناسندہ در . (فون) دخی (پون) لفظنک معربی
 اولدینی امثال کثیرہ سیلہ مثبت اولدیغندن بالاضافہ (مرزفون)
 اولور . پون سنوری، پون قرارکاهی دیمکدر . مؤخرآ کسرہ
 اضافیہ یی اشعار ایچون (یا) علاوہ سیلہ (مرزیفون) دینمشدر.
 اسمک دلالت لفظیہ سندن ا کلاشیلان شومعناہ نظرآ بوقصبہ نک
 پون حکومتی دورنده بنا ایدلایکی منفہم وشو حالده ایکی بیک
 سنہلک برشہر قدیم اولور .

فقط باب اولده ذکر ایدیلہ جکی اوزره پونت قطعہ سسندہ
 پون حکومت قرالیہ سنی ابتدا تشکیل ایدن مہردارلر اولیوب
 ہونلر (تورکلر) در . بناء علیہ مرزیفون قصبہ سی مہردارلردن
 اول ہونلر ایلہ مسکون اولدینی تدقیق اولونورسہ ہونلر
 طرفدن تأسیس و بنا ایدلایکی ودها قدیم اولدینی ده ا کلاشیلیر.
 شو حالده بواسمک معناسی ہونلر (ہونلر - تورکلر) قرارکاهی
 دیمک اولور .

السنة عامہ ده بو قصبہ یہ (مارصیوان - مارسویوان)
 دینمکدہ در . مرزیفون لفظنک محرف بر غلط مشہوری
 اولدینی ا کلاشلمقلہ برابر (آثار العباد) تبعاتندن منفہم اولدینی

اوزره (بارسوینج) [۱] لفظندن بوزمه براسم تورکی اولدینی ده
ا کلاشیلیر. (بارسوینج) هونلرک بوقطعه ده نیم مستقل بکلرندن
اولوب بوقصبه نك بارسوینج طرفندن بنا و کندی نامیله توسیم
ایدلمسی و بعده غلط عامه اوله رق (بارسیوان - مارسیوان)
تلفظ اولنمسی ده اغلب احتمال در .

بعض سالنامه لرده « ارضروم حاکمی منکوجک طرفندن
فتح اولونان بوقصبه مومی الیهک نامیله تسمیه ومؤخرأ تحریف
اوله رق مرزیفون دیندیکی » یازلمقه اولوب صورت تحریره
کوره بوقصبه اثار اسلامیه دن اولدینی و ۴۸۰ تاریخلرنده تسمیه
اولدینی ا کلاشلمقه ایهده مرزیفون نامنک بو تاریخدن اول
موجود اولدینی تاریخاً مضبوط در . منکوجک ایله مرزیفون
لفظلری اراسنده برمناسبت اولدینی حالد ادعای تحریف ایدلمسی
برا زغریب در .

(تاریخ آل دانشمند) ده مذکور اولدینی اوزره مرزیفون
قصبه سی امرای دانشمندیه دن ایلتکین غازی طرفندن فتح
اولنشدر . امیر مشار الیهک مخدومی (سهام الدوله حسین غازی)

[۱] سوینج ، مومی الیهک اسمی ارلوب (بار) دخی وصفی در .
اسکی تورک دیلنده اویماق رئیس لرینه (باش) ، بویوک ایل بکلرینه ،
والیره (بای) ، والیکلرک . بایلرک یارم مستقل اولانلرینه (بار) ،
تمامیله مستقل اولانلرینه (خان) دینور . با ایله میم اراسنده لسانا ترادف ،
مساوات اولدیغدن (مار) ایله (مار) اراسنده بفرق معنوی یوقدر .
مانکا - باکه ، منکلو - بکلی ، مونکای - بوناق کی .

مرزيفونده طول مدت اجراى امارت ايتديكندن اقامت ايتديكى موقعه (سهام الدوله) نامى ويرلمشدر. قيود عتيقه ده سهام الدوله محله سى ، سهام الدوله قريه سى و اليوم سهم الدوله قريه سى^۱ مسطور و السنه عامه ده مذكور در . ارض روم طرفلرينك فتحنه مأمور اولان منكوجك بلك مرزيفونى فتح ايتمى تاريخاً معلوم دكلدر .

انجق مرزيفون قصبه سنك شمال شرقى طرفنده ايكي كيلومتره قدر ياقين برينده اولان (مارنجه) كوي ايله مرزيفون قصبه سنك آثار قديمه سى ، خرابه لرى تدقيق اولونورسه بارسوينج طرفندن بنا ايدلديكى ظن اولونان قصبه سنك (مارنجه قريه سى) اولدينى وپون حكومتى دورنده مرزيفون قصبه سى بر قرارگاه خصوصى اوله رق بعده بر قصبه شكلنى آلدینی ومارنجه قصبه سى ده بر كوى حاله كيرديكى تخمين اولنه بيلير . مارنجه نك بارسوينج آدينه ده ا مشابهتى اولدينى بوطنى تقويه ايدر .

مرزيفون قصبه سى ؛ اماسيه اوتوز ايكي كيلومتره قدر ياقين اولدينى كى اماسيه ملحق ديكر قصباتك دخى اك بويوكى در . دور سايجوقى دن مقدم اولان احوالى تاريخاً مجهول اولدينى حاله محلاتنك اسامى و تشكيلاتنه باقيليرسه ۶۷۰ تاريخلندن صوكره كسب جسامت ايتديكى اكلاشايير . اليوم قصبه نك شرق جنوبى طرفلرنده خرابه سى كورلمكده اولان قاعه سى ، اوافق اولدينى حاله آثار عتيقه دن معدود اوله جق بر اهميتى حائر دكلدر .

مرزيفون قصبه سى قديمآ آلاجه مناره ، ارزنجانى ، بالى ،

چاوش عباس ، حاجی احمد ، حاجی پیر ، حاجی رجب ، حاجی علی ، حسام جدید ، خرمنلو ، خواجه سلیمان ، سودجی ، سورمه‌سورد ، سیدی بلوک ، صوفیلر ، طوز ، عادل ، علی بوزه‌جی ، قاضی محبوب ، لخنه محله‌لرینی حاوی اولوب قیود قدیمده مارنجه قریب سی دخی بر محله کوسترملکده در . خلاصه یکریمی محله‌ینی ، درت بیک قدر خانه‌ینی ، درت ناحیه‌ینی ، اوتوز سکز بیک قدر نفوس عمومیه‌ینی و قرق بش قدر قرانی حاوی در .

شو اسامی محلاته دقت اولونورسه ارنجانی محله‌سندن اسمی بر محله اسمی کوریلده من مشاهیر علمادن (شرف‌الدین محمد ارنجانی) بو محله‌ده ۷۶۸ تاریخنه قدر اقامت و نشر علومه مواظبت ایتدیکی مناسبتله منسوب اولدینی بر بلده عظیمه‌نک اسمی اوطوردینی یره علم مخصوص اولمشدر . دیگر حاجیلرایله قاضی (عمادالدین محبوب بخاری) و خواجه سلیمان ایله صوفیلر طقوزنجی قرن هجری رجالدن و حسام جدید ، علی بوزه‌جی ، سیدی ، بلوک دخی اونجی ، اون برنجی قرن هجری اعیانندن معدوددر .

چلی سلطان محمد خان حضرتلربنک اماسیه‌ده اجرای حکومت بیوردینی زمانلرده بوقصبه‌ینی تشریف و سرای عالی انشا بیورمش اولدینی مناسبتله تاریخ عثمانی‌ده بر موقع مهم قزاقمش و ۸۱۸ ده سلطان مشارایله حضرتلری بر مدرسه

عالیه وبر حمام بنا و اوقافی تنظیم بیورمشدر . بو مدرسه ؛
 غایت معظم ، کارگیر بر دارالعلم عالی اولدیفندن مرزیفونک
 شرفی تزیدد وعلماسنی تکثیر ایتشدرد . بوزمانک رجالدن
 (خواجه الحاج حسن چلبی) بر جامع شریف وساطان
 مشارایهک والدهسی (دولت خاتون) ۸۲۲ ده برجامع شریف
 ویاننده بر زاویه عالیه وبر عمارتخانه انشا ایتشلردرد .

۸۳۰ ده (سلطان مراد خان ثانی) حضر تلری ده برجامع
 شریف وحمام و (قاضی محبوب چلبی) برجامع شریف ومکتب
 و ۸۷۸ ده (سلطان محمد خان ثانی) حضر تلری ده برحمام لطیف انشا
 و ۸۶۸ ده خراسانی (پیری بابا) بر زاویه ومرزیفونی (الشیخ
 علی چلبی) دخی زینیلره مخصوص دیگر بر تکیه بنا وهربری
 اوقافی تنظیم وقصبه یی احیا ایتشلردرد .

۹۰۰ ده بوزه جی (علی چلبی) محله سنده برجامع ومکتب
 و ۹۶۲ ده مرزیفونی رمضان زاده (محمد بک) بر مدرسه
 و ۹۸۷ ده امرادن (سهیل بک) دیگر برمدرسه بنا ایتشلردرد .
 بونلر رمضانیه ، سهیلیه مدرسه لری نامیله مشهوردر . مدرسه
 سهیلیه مؤخرأ (زینلیه) دخی دیمشدر . عادل محله سنده
 (سری بابا تکیه سی) دیمکله مشهوراولان زاویه یی مشایخ نقشبندیه دن
 (الشیخ سری علی افندی) ۱۰۳۵ ده بنا و ۱۰۱۸ ده امرادن (عثمان
 بک) بر مکتب وچشمه ومسجد و ۱۰۷۲ ده میراخورمرزیفونی
 (علی اغا) بر مکتب انشا و اوقافی تنظیم ایتشلردرد .

۱۰۸۷ ده صدر اعظم مرزيفونى (قره مصطفى پاشا) ابتدا مسقط رأسى اولان مارنجه قريه سنده والده سى عابده خاتونك بنا ايتديكى مسجدى توسبع ايدرك بر جامع شريف ومكتب و ۱۰۹۰ ده مرزيفون قصبه سنك اورته سنده متين ، كار كير بر جامع شريف و او كنده بر موقتخانه ، كتبخانه ، درس خانه ، وشادروان بنا وطاشان طاغندن ايكي كيلومتره لك قدر بر مسافه ده لغملر انشا ايدرك قصبه يه صوكتيرمش و اوتوز قدر كار كير چشمه بناسيله جدا قصبه يي احيا و جامع شريفه درسيه وضع ايتشدرد . اوقافى مبذول در .

۱۱۴۵ ده شيخ الاسلام اسبق مرزيفونى (درى محمد افندى) بر مدرسه و ۱۱۷۸ ده (الحاج على اغا) ديكر بر مدرسه و ۱۲۱۲ ده (الحاج حسن اغا) ديكر بر مدرسه دها انشا ايدرك حاجى حسن اعانك مدرسه سى (شفائيه) ديمككه مشهور اولشدرد . حاجى بالى محله سنده (حسن اغا) بر جامع شريف و ۱۱۷۸ ده (حامد افندى) ديكر بر جامع شريف و خرمنلو محله سنده قاضى (امين محمد افندى) ديكر بر جامع شريف ومكتب و قره متسلم (حسين اغا) و ديكر متسلم (الحاج سليمان اغا) برر چشمه ومكتب ومصاح الدين چلبى كى اصحاب خيرات دخی مسجدلر ، مكتبلىر بنا ايدرك قصبه نك اعمارينه و مباني عاليه و دينيه احيا سنده همت ايتشدرد .

مرزيفون قصبه سى ؛ اما سيه سنجاغى قضاالرينك عمومته

مرجع اوله جق بر موقعی، جسماتی حائر اولدیغنه بناءً ۱۳۰۰ سالنده آمریقالیلر (قولله ژ) دیمکله مشهور مکتبلرینی شهرک غایت مکمل، عالی بر یرنده تأسیس وکشاد و مکاتب رشديه، اعدادیه درجه سنده بر پروغرام تطبیق و دروننده ارباب صنایعه مخصوص بر دارالصناعه و عمومه مخصوص بر خسته خانه انشا ایده رک نشر معارفه خدمت، منافع مادیه تأمین ایتکه اقدام ایتشلدرد.

فقط شو مکتبک حرکاتی؛ نشر معارفه همتدن زیاده مداوملری بولونان ارمنی کنجلیزینک افکارینی توسیعه، حیاتی تهییجه خدمت ایتدیکی اکلاشلماقله برابر ملت معظمه عثمانیه نک کوزینی آچمه پک بویوک مداری اولدیغندن مرزیفونده مدارس اسلامیه نک اصلاحنه ابتدار وایکی مکتب ابتدائی و ۱۳۱۰ ده بر (مکتب رشیدی) تأسیس و ۱۳۳۰ ده بومکتب رشیدی کوریلن لزومه بناءً (مکتب اعدادی) یه تحویل و مکاتب ابتدائیه تکثیر ایدلمشدر.

۱۳۱۱ اغتشاشنده حکومت قوناغی و قصبه نک اورته سی یانمش اولدیغندن اشراف و افراد قضا عموماً ااعاناته بذل غیرت ایده رک حکومت قوناغی، بلدییه دائره سی، عالی بر قیشله مکمل صورتده بنا و معارفه ایراد اولق اوزره بر حمام لطیف، اوتل، قرائتخانه، تجارت مغازه لری انشا و غایت غیور، فایع تاتار مهاجرلری مواقع مناسبه یه اسکان ایدلمش اولماقله قصبه نک، جسماتی، زبانی،

تجارتی ؛ تروتی و بناءً عليه اهميتی فوق العاده تر ايد ايله مشدر .
 صدراعظم قره مصطفى پاشا ؛ حاجی علی پاشا و کبار و زرادن
 احمد پاشا ، حسين پاشا ، خليل پاشا ، محمد پاشا ، مصطفى پاشا
 و بکتر بکيلردن ابراهيم پاشا ، احمد پاشا ، عبده پاشا کي پک
 چوق امرا و شيخ الاسلام دري محمد افندی ، قاضی عسکر حافظ
 عبدالرحمن افندی ، ناشی محمد بک کي پک چوق موالی ،
 علما ، رجال دولت مرزيفون قصبه سندن ظهور ايت مشدر .
 علامه زمان جمال الدين صفر شاه ، شرف الدين حمزه ، الشيخ
 نظام الدين عبدالرحيم زيني بوقصبه نك يتشدر ديکی اوليا و فحول
 علمادندر .

چلي سلطان محمد خان حضر تلرينك مدرسه سي (سلطانيه
 مرزيفون) ديمکله مشهور اولوب فریدالدين محمد دواني ، سیدی
 شمس الدين احمد قريمی ، رکن الدين عبدالکریم اماسی ، نظام الدين
 عبدالرحمن آقابی کي فضلا ۱۲۶۰ تاريخلرينه قدر بومدرسه
 مدرسه لکنده اشتهار ايلدکاري حالده مؤخرأ اصول وراثت بو
 مدرسه يي دوچار تعطيل ايتديکندن بر مدت اسلحه عسکريه دبوي
 اولمش ويا قين زمانلرده اعمارينه همت بيورلمشدر .

مدرسه دريه ديمکله معروف اولان دري افدينك مدرسه سي
 اوقفي مخدومی شيخ الاسلام مصطفى افندی تنظيم ايتديکی
 مناسبته دري زاده مدرسه سي ديشم ايسه ده مدرسه يي پديرينك
 يادرديني قيدآ ثبت در . بومدرسه عاليه ديکر مدارس کي بررساله

علمیه اداره - نده بولونقلرندن هر برینک مدرسلرینی تعداده بوراده حاجت کورلمه مش و باب ثانی ده سلاله ریسنک ترجمه سی ذیلنده ذکر ایدیه جکدر .

مرزیفون قضاسی ؛ مرزیفون ، مرزیفون آباد ، کلکراس ناملریله قدیمآ اوج قضادن متشکل اولوب ۱۲۹۶ تشکیلاتنده مرزیفون آباد قضاسی الغا اولنه رق حاوی اولدینی قرادن اکثریسی حاجیکویی قضاسنه وبرقیمی دخی مرزیفون قضاسنه ویرلمشدر . قدیمآ مرکزی بولاق قصبه سی اولوب الیوم حاجیکویی قضاسنده برکوی در . بعده کلکراس قضاسی ده الغا وقراسی مرزیفون قضاسنه الحاق ایدیلوب مرزیفون قضاسی توسیع اولنه رق درت ناحیه اعتبار ایدلمشدر .

۱ (الیجاق ناحیه سی) درکه قضانک غرب جنوبیسی احاطه ایدر . اناطولی ناظری اولان تانار قوماندانی مشهور (الیجاق نویین) ک بونا حیه عمومآ چفتلیکی اولدینی مناسبنله ۶۷۰ تاریخندی بری تسمیه ایدلمشدر . ناحیه ده بوقوماندانک آندن باشقه بر اثری یوقدر . مؤخرآ اولادی قبول اسلام ایدوب احفادنن بعضری بوراده اقامت ایتشلردر . مشهور چایرکویلی (احمد پاشا) بونا حیه دندر .

۱ (زوغو ناحیه سی) درکه : قضانک شرق شمالی طرفلرینی احاطه ایدر . ناظر مومی الیه الیجاق نویینک کتخداسی ، وکیل اموری ظلم مشهور (زوغای) نام برتاتار یکنک بونا حیه چفتلیکی

اولدینی مناسبتله ۷۰۰ تاریخلرندن بری تسمیه ایدلمش و غلط اوله رق زوغو دینمشد. بونک اولادی ، احفادی بوناچیله اقامتله بنام اولمشلر ایدی. وزرادن (تیمور سلیمان پاشا) و برادری بکلبیکی (جوهر پاشا) زوغو نامیله مشهور کویلدنر .

۳ (کلکراس ناحیه سی) درکه : قضانک جنوب طرفلری .
 تامیله احاطه ایدر . قدیم (کلینکیراس) نامیله محرر اولوب (کیراس خاتون) الیچاق نوینک کریمه سی و عزالدین محمد پروانه بکک زوجی اولدیغنه بئک کلین اولدینی زمان بوچفتلک مالک اولدیغندن تسمیه ایدلمش و بعدده تحفیف اوله رق کلکراس دینمشد . بوخاتونک مرکز ناحیه اولان کلینکیراس قریه سنده برحمای واردر . بورادن ظهور و سلطان محمدخان ثانی حضر تله ینک دورنده تمایز ایدن (خیرالدین خضر پاشا) بوراده بر جامع شریف و مخدومی (حسن پاشا) بر مدرسه و مکتب بنا ایتمشلر در . قدیم بوراسی مرکز قضا اولدینی حالد مؤخرأ تدنی ایتمشد . الیوم آثار مدنیه خرابه لری کورلمکده در .

۴ (کومشتکین ناحیه سی) اولوب قضانک غرب طرفلری . احاطه ایدر . بوناچیله ؛ حکومت دانشمندیه ریسی بولونان (ملک احمد دانشمند غازی) اوغلی (کومشتکین غازی) یه نسبت ایدلمکده در . بولاق قضاسی نامیله معروف اولان قضایه مربوط ایکن مؤخرأ قراسیله برابر مرزیفونه الحاق ایدلمشدر . مرزیفون قضاسنده رجال عثمانیه دن درت سلاله همه نشئت

ایتمشدر. بری دولت خاتون کتخداسی یوسف پاشا سلالهسی اولوب مشـارالیهانک اواقفه درتیوز سنه قدر متولی اوله رق شهسوار پاشا، احمد پاشا کبی رجال دولت یتشدیرمشدر. دیگر کلکراسلی سلالهسی اولوب خیرالدین پاشا، حسن پاشا بوزلردندر. او بری رمضان سلالهسی اولوب رئیس الکتاب محمد بك، ایکی قاضی عسکر اون قدر موالی کبی رجال قلمیه و علمیه یتشدیرمشدر. دردنجیسی صدر اسبق قره مصطفی سلالهسی اولوب صوك ایکی سلاله استانبولده اقامت واشـتهار ایتـمشـلردر. طریقت سنبلیه پیری (سنبل سنان الدین یوسف افندی) حضر تلی مرزیفونک یتشدیردیکی کبار اولیادر.

مریفون قضا سنک شمال طرفی احاطه ایدن (طاشان طاغی) اماسیه سنجاغی داخلنده بولونان طاغلرک آق طاغدن صوکره اک بویوکیدر. ترس آقان چایندن اعتباراً شرقدن غربه طوغر واوزانوب عثمانجق قضا سنده قزیل ایرماغه قدر امتداد ایدر طولی قرق بش کیلومتره قدر اولوب مبدائنک عرضی یکرمی بش کیلومتره قدر اولدینی حالده منتها سنک عرضی انجق سـکـز کیلومتره قدر درز. بناء علیه: بر تابوت شکله مشابه و ذروه سی سطح زمیندن بیك ایکویز وهیئت عمومیه سی اوچیوزدن سـکـز یوز متره قدر یوکسک و هر طرفی غایت مثبت تارلا، شرق طرفلری اورمان و یا یلادر.

بو طاغک جنوب اتکلرنده مرزیفون، حاجیکویی و شمال

اتکرنده حوضه ، کوپری قصبه‌لری موجود اولوب اوزرنده
 یانلرنده ، اتکرنده پک چوق کویلر ، چفتلکلر بولمقددر .
 بوطاغک مجموعی وقیله کده غمرده اقامت ایدن خسرو شاه
 سلجوقی اولادندن (طاشان بک) ایچون خصوصی بر چفتلک
 اولوب مؤخرآ کسب نفوذ و اقتدار ایدرک روم والیسی (تیمور
 طاش) بکک ۷۲۷ ده غیوبتیه برابر ولایتده دوام ایدن
 کشمکشدن بالاستفاده بر سلجوق اوجاغی یاقغه اقدام ایتش
 وبعده سلطان آرتنا بکه انقیاد ایدرک اوفاق بر امارت تشکیلنه
 موفق اولمشیدی . مشارالیهک ارتحالنده کیمسه‌یی طانیوب
 امارت و طاشان طاغنی مقر اتخاذا ایلدیکندن طاشان طاغی
 دینمسنه باعث اولمشدر . الیوم طاوشان طاغی دینمکده در . بو
 تسمیه‌یی بانی ، احمد ، علی ، حسن ، شاهین بکلرکی اولاد
 واحفادی بوطاغده اقامتله ادامه و بر قسمنی وقف ایدوب مؤبدآ
 ناملری قالمشدر . بوعائله اکثریتله مرزیفون قصبه‌سنده اقامت
 و اقرانیدن اول حمایه جلیله عثمانیه‌یی قبول ایدرک محاربات
 واقعه‌ده اثبات صداقت ، مقدماته ایفای خدمت ایتشلردر .
 بناء علیه : بر مدت مرزیفون قصبه‌سی بوطاشان زاده‌لره نسبتله
 ولایت خاص عنوانی آلدینی (بزم وزرم) کبی بعض تواریح
 واوراق مخصوصده کورلمکده در .

شومقدمه‌نک مطالعه‌سندن مستبان اولدینی اوزره اماسیه
 سنجاغنده (سمره) نامیه مسمی پک چوق موقعلر کورلمش

و آثار سلجوقیه دن اولدینی مناسبتله قیمت تاریخیه یی حازر بولنمش اولدیغندن قیود عتیقه ده ، تواریخ عدیده ده ، پک چوق اوراق مخصوصه ده مسطور اولان (سمره) کلمه سی خلاصه شوصورتله ایضاح اولته بیلیر .

بهجة التواریخ ده (سیموره) سین مهمله نك کسری ، میمک سکونی وراء مهمله نك فتیجی ایله ضبط ایدلدیکی حالدہ العیلم الزاخرده سینک کسری و میمک ؛ رانک فتیجی ایله قید ایدلمش وسین ایله میم اراسنده بولونان یا ، حذف اولنمشدر . تاریخ ابن خلکانک ذیلنده صیموره نامیله قید اولندیغندن تعریب ایدلدیکی اکلایشیلمقده در . معجم البلدان ده صیموره حیدره وزننده اولدینی کوسترلمش و میمک ضمی ایله ده مذکور بولنمشدر .

شو اسمای مختلفه تدقیق اولونورسه (سیموره) صورتنده یازلمسی لازم کلن شو کلمه نك املاسی ؛ مختلف صورتده یازلدیغندن ضبط وقید وتلفظنده اختلاف حاصل اولدینی اکلایشیلیر . بوسیموره دن یا ایله و اوحذف اولندقه (سمره) قاله جنی شبهه سزدر . بعضلری بوکلمه یی سینک و رانک فتیجی ، میمک سکونی ایله تمره وزننده ، دیگر بعضلری ده سینک ، میمک و رانک فتحه لریله سحره وزننده اوقومش اولدقلری کورلمکده ایسه ده شو قیود تاریخیه یه مخالف اولدینی آشکاردر .

ظاهر حاله کوره (سیموره) لفظی عموم او یغور و سلجوق تورکلرینک لغتلرنده موجود اولان (سیمور ماک) مصدرندن

مشتق و بزم (عثمانلی تورکارینک) لغتمزده (سمورمک ، سه میرمک) نامیله موجود اولدینی ا کلاشیلیمقده در . بناء علیه : سیموره اسم مکان اولوب (سیمورک) لفظندن مخفف و سه میزنله جک ، تصحیح وجود ایدیله جک یر دیمکدر . او یغور لغاتنده ادات مکان اولق اوزره ماده اصلیه نک آخرینه ماقبلی مفتوح بر کاف سا کنه علاوه قیلده رق اسم مکان یاییلیر . (سورک) کبی بمضاً فتحه ایله ا کتفا اوله رق کاف سا کنه حذف اولنور مقبره معناسنه اولان و (سیکنه مک) مصدرندن مشتق بولونان (سکنه ک - سیکنه - سینته) کبی

بوسیموره اما سیه قربنده اولدینی محقق اولقله برابر قیود عتیقه ده سمره اما سیه ، سمره الب ارسلان (ایل اسلان) ، سمره قوجه قیاسی ، سمره کده غره ، سمره لادق نامیله الی موقعده (سمره) بولندی و بونلرک جمله سی ده قربک دلالت ایلدیکی محله اولدینی مناسبتله (سلطان مسعود سلجوقی) نک بنا ایتدیکی سمره ، بونلرک هانکیسی اولدینی ارباب تاریخ اراسنده مختلف فییه کبی تلقی اولتمقده در . بوالی سمره دن انحق بریسنی سلطان مسعودک یایدیردینی محقق اولدینی کبی دیکر لری ده صوکره دن حادث اوله رق تسمیه ایدلمش اولدینی شبهه سزدر . شو حالد بری اصل ، دیکر لری بونک فروعی اولور .

قیود تاریخیه تدقیق اولونور سه بوتلقیاته محل قالمز . چونکه :

اصل سمره نك تعين مكانه دائر (بهجة التواريخ) ده شكر الله
چلي ديوركه : « سلطان مسعود سلجوقي اماسيه ده توطن
وسيمره ناميله بر شهر جديد بنا وبوراده جامع ومدرسه انشا
ايدهر ك اوراده ياپديرديني تربه عاليه ده دفن ايدلمشدر »

(العيلم الزاخر) ده مصطفى جنابي افندي ديوركه :
« سلطان مشاراليه اماسيه ده اقامت وبر شهر جديد انشا وسمره
ناميله تسميه وبوراده جامع ومدرسه وتربه بنا ايدوب اوراده
مدفون اولمشدر . اليوم خرابدر بونك جوارنده كدغره ناميله
برقصبه دها بنا ايتمشدر »

(جامع الدول) ده درويش احمد افندي ديوركه :
« سلطان مسعود اماسه قربنده برقصبه بنا واده اقامت و خان
وعمارت ودها نيجه آثار خيرا حيا و اوقاف عظيمه احداث ايدوب
اسمى سمره قويدى و ۵۵۸ ده فوت اولوب سمره ده واقع
تربه سنده دفن اولئدى »

شو اوچ نقول تاريخيه دن مستبان اولديني اوزره برنجي
سلطان مسعود سلجوقي اماسيه ي دارالسلطنه اتخا و بر شهر
جديد بنا و آثار خيره انشا ايتديكي محققدر . انجق سلطان
مشاراليه بنا ايتديكي شهر جديد ؛ آثار خيره ايله تزيين و نامنى
تحويل ايتمك صورتيله عين اماسيه اوليوب بلكه اماسيه نك قربنده
واقع در . آماسيه ؛ يشيل ايرماغك شمالنده كاڻن ايچ قلعه دن
عبارت اولوب (سمره) دخی يشيل ايرماغك جنوبنده بوايچ

قاعه‌نك طبيعى قربنده واقع محلاتك مجموعى در. ديكر سمره لر
بوندن صوكره حادث اولمشدر. شومدى ؛ آلتى وجهله اثبات
اولنه بياير .

۱ قديماً اماسيه محيطى : مقدمه‌نك اوائلنده عرض اولندينى
اوزره (زمندو) موقعندن (چالاك) موقعنه قدر امتداد ايدن
وقبالرله محاط اولان طول وعرضك مجموعى اولوب ايرماغك جنوب
وشمال طرفلرى عموماً بو محيط ايچنده داخل اولدينى حاله ۴۹۱
سائندن اعتباراً اهل صلييك اماسيه هجوم وصواتى واماسيه اميرى
(ملك اسماعيل دانشمندی) نك دليرانه مدافعاته همتى اراسنده
يشيل ايرماغك جنوب طرفلرى وزمندو ، هيئت مجموعه سيله
محو و خراب وبقيه سى ده محترق اولدينى عقدالجهان ، العيلم
الزاخرده مسطور وسائر مأخذلرده مذكوردر .

يشيل ايرماغك شمال طرفلرينك خرشنه قلعه سى اتكلرينه
تصادف ايدن قسمى قلعه ديواريله مستور اولديغندن تخريباتدن
مصون قالمش ايسه ده جنوب طرفلرى عموماً خرابه زاره دونمش
وعرصه خاليه شكلى آلمش و (آماسيه) نامى دخى يشيل ايرماغك
شمال طرفنده كائن ايچ قلعه قسمنه منحصر اولمش ايدى .

۵۳۸ حدودنده اماسيه امارتى سلطنت سلاجوقيه منقاد
واماسيه دارالسلطنه اولدينى زمان ، سلطان مسعود سلاجوقى يشيل
ايرماغك خراب اولان طرفلرنده برشهر جديد انشاوزمندوبى
تجديد وكوپرى قصبه سنك شرقنده اولان موقعده كذلك بر .

خارجنده اولان يرلره عموماً (ظاهر اماسيه) دينديكي صريح در. باغ هلكيس، اخي سابق الدين، اخي قرالدين محله لري، ايلتكين باغلري ظاهر اماسيه دن معدود اولديني كي يشيل ايرماغك جنوب طرفلري عموماً ظاهر اماسيه اولق اوزره مسطور در. ظاهر اماسيه دينلن يرلره عموماً (سيمره) نامي و يرلديكي وسيمره نك اماسيه محيطي ايچنده بولنديني و بعده ظاهر اماسيه ناميله قيد ايدلديكي اوقود رسميه دن ا كلاشيلمقده در. تاريخاً اماسيه قربنده بنا ايدلديكي مضبوط اولان بوسيمره نك اماسيه يه اك زياده قريب اولديني بر موقعده بولنمسي ديكر سيمره لرك صوكره دن احداث و بنا و يا خود تسميه ايدلديكني اشعار ايدر.

۴ بتون تواريخ و قيود رسميه نك شهاداتي اوزره برنجي سلطان مسعود سلجوقي، بنا ايتديكي سيمره ايچنده مدفون و تربه سيده بوسيمره ايچنده موجود در. بويله بر شاهد ذي حيات اولان تربه، اماسيه لواسي داچلنده تحري اولنديني صورتده ظاهر اماسيه دن معدود اولان اماسيه محيطي ايچنده اوچلر محله سنك منتهاي غرييسنده نارلي باغچه ناميله مشهور اولان مزارلغك جنوب طوقنده كوريله جيكي ميدانده در. بوتربه؛ شكلاً مربع، طرز سلجوقي اوزره جبهه سي نقوش و تزئينات بديعه ايله مصنع، سنكين اولديني قدر بوبوك پر مزار محتشم در. بوتربه نك برنجي سلطان مسعود سلجوقي به عائد اولديني و دروننده مدفون بولنديني بتون قيود رسميه شهاداتيله

ثابت و نامی ، تاریخ وفاتی جبهه‌سند غرب طرفنده واقع ستون
اوزرنده چيچك شكند خط كوفي ايله محكوكدر . تاريخلرده
مسطور اولان آثار خيريه‌سندن خانقاهي بوسيمره داخلنده
اولديني قيداً مثبت واليوم خرابه‌سي موجود ايسهده جامع
ومدرسه‌سي موقعلري اكلاشيله مدی .

۵ اماميه محيطي داخلنده سيمره نك موجود اولديني ۸۵۷
تاريخنه قدر يازيلان دفاتر عتيقه سلطانیهده محرر اولوب يالكنز
بونامك اوچلر ، حاجي الياس ، رجب ، شاميجه ، كوبچكز ،
كوك مدرسه محله‌لرينه مقصور اولديني كورملكدهدر . ايام
ساجوقيهده سيمره نامي ظاهر اماميه ياد ايديلن يرلره عموماً
علم مخصوص اولديني حالده نفوذ ساجوقى اماميه‌دن زائل اولدقه
شو انى محله‌يه قصر و ظاهر اماميه‌دخى عموماً اماميه ناميله ياد
ايدلديكى اكلاشلمقه‌در .

۶ (۸۵۷ — ۹۱۷) تاريخنه قدر موجود اولان ايلتكين
قصبه‌سي ، كلدكلان ناحيه‌سي مركزي اولديني بتون وقفه‌لردن
اكلاشلمقه‌در . قزلجه ، بوغا ، كرنه ، ايلتكين قراسي ؛ اماميه
اعمالندن سيمره ناحيه‌سي داخلنده اولديني بونلره عائدوقفه‌لرده
مسطور بولنديغدن ايام متقدمه عثمانیهده سيمره ناحيه‌سي اولوب
يونك مركزي دخى اماميه محيطي ايچنده ايلتكين قصبه‌سي
ايكن ۹۱۷ وقعه‌سند خراب اوله‌رق ايلتكين قريه‌سي اولان
واليوم ايلتكين ناميله مشهور بولونان موقع اولديني آشكاردر .

بناءً عليه : التي سمرة دن بری اولان (سیمرة اماسیه)
تاریخ بناسندن اعتباراً یشیل ایرماغک جنوب وایچ قلعه نك
شرق و غرب طرفلرینه علم مخصوص اولوب ایام سلجوقیه ده
اشتهار ایده رک اماسیه ولایتنه ، اماسیه امارتنه ، اماسیه حکومتنه
عنوان مخصوص دخی اولمش و سلجوقیلردن صوکره التي محله یه
منحصر اولوب اوائل دور عثمانی ده کلدکلان ناحیه سنه مقصور
اوله رق بر ناحیه نك اسمی اولمق شکلنی آلمش و بونک مرکزی
ایلتکین قصبه سی بولمیشدر . ۹۱۷ ده شاهقولی وقعه سنده سمرة
ناحیه سی مرکزی سمرة قصبه سی اعتبارایدیلن ایلتکین قصبه سی
خراب اولدیغندن ۱۰۱۸ سالنه قدر برقریه شکلنده قالمش و بعده
اماسیه محلاتندن معدود اولوب ۱۲۴۱ حربنده محله دخی
قلمه مشدر . ایشته عیلم تاریخنک «الیوم خرابدر» دیدیکی سمرة
بو ایلتکین قصبه سی اوله جقدر .

۲ (سمرة ایل ارسلان) اماسیه نك شمالنده صولی اووايه
ناظر اولان قرقلر طاغنک انکنده کائن برکوی در . ایکنجی
سلطان مسعودک شهزاده سی سلطان شاه اولادندن (الب ارسلان
بك) بن کیخسرو یکک چفتلیکی ایدی . ۷۸۳ قاریشیق لغندن
استفاده املیه ادعای امارت و بوراده اقامت ایتمش و عمرزاده لرینه
اتباعاً او طور دینی ره (سمرة) نامنی ویرمیشدر . انجق اوراسی
الب ارسلان کویی ، غلط اوله رق ایل ارسلان کویی نامیه
مشهور اولوب سمرة آدی قیود و دفاتر عتیقه یه منحصر قالمیشدر .

انسابندن جانیک امارتنده بولونان (حسین بك) ایله
(عبداللطیف بك) مشهوردر .

۳ (سمره حوضه) قصبه نك غرب طرفنده كان بر
ناحیه نك آدی در . بونا حیه نك مرکزی ابتدا تانار قلعه سی ،
بعده اومور قریه سی اولمش و سلطان مسعودك وفاتندن صوكره
شهزاده سی (سلطان تاج الدین آلتون باش غازی) بونامی
ابتدانا تانار قلعه سنه ، بعده اومور بك قریه سنه ویرمشد . ۷۵۶ سالندن
صوكره اومور بك کوی (شیخ ساوجی - شیخ صافی) نامیله
مشهور اولوب سمره نامی ناحیه علم مخصوص اولمشد .

سلطاج تاج الدین زاده (قلیچ ارسلان بك) مشهوردر .
۴ (سمره قوجه قیاسی) کوپری قصبه سنك غرب جنوبی
طرفنده یو كـكـ بك برقیانك اوزرنده جسیم ، طاش دیوار ایله
محاط برقلعه نك آدی در . قصبه یه سـكـز کیلومتره قدر یاقیندر
۶۷۰ سالندن اعتباراً طاشان بكك جدی اولان (محمود شاه) ،
بن خسرو شاه سلجوقی بورایه تحصن و اجرای امارت ایتمش
و (سمره) نامی ویرمشد . اولادینك برشعبه سی بوراده امارت
ایدوب بونلردن (حیدر بك) ۸۳۳ ده یوركچ پاشایه مطیع
اولدقدہ عمزاده لرندن طاشان زاده (حسن بك) بوقلعه ده جامع
شریف ، مدرسه ، زاویه ، تره بنا و اوقافی تنظیم و مخدومی
(شاهین بك) توسیع ایتمشد . ملك احمد چلبی ، امیر چلبی
بوسمره ده مدفون اولوب تره لری واردر . اوروج کوی ایله

کوپری قریه سی یزی دخی بوسمره مضافانندن اولدینی یورکیچ
پاشا وحسن بك وقفیه لرنده مسطوردر .

۵ (سمره لادیک) قصبه نك جهت شرقیه سنده کائن
کولک کنارنده اوافق برقصیه اولدینی قیود رسمیه دن اکلای
شیلمقده در . ۷۱۸ سالندن سوکره سلطان مسعودك شهراده سی
(سلطان شاه) بوراده اقامت ایتمکله سمره نامنی قزانمشدر .
مخدومی (قباد بك) ادعای امارتله اشتهار ایتدیکنندن اوغللاری
بر درجه حائر نفوذ اولمشدر . بونلردن (جنید بك) جانیك
امارتنده بولوب عمزاده لرندن بولونان طاشان اوغللرندن
علی بك ، احمد بك ایله منازعانی مشهوردر جنید بك زاده عادل
بكك مرزیفونده محله سی ، بوسمره ده زاویه سی ، ارسلان چایرنده
وقفی واردر . بونك احفادی الیوم اواقفدن مسنفید اوله رق
کوپری ده اقامت ایتمکده درلر .

۶ (سمره کده غره) کوپری قصبه نك جهت شرقیه سنده
کائن بیرام کوینندن عبارت اولوب یشبکی قریه سی دخی سمره دن
معدود اولدیعی اکلایشیلیمقده در مشهور طاشان بك بوسمره ده
اشتهار ایتمش ، مؤخرأ سلطان کمال دانشمندیه وطن اولمش
وطاشان اوغللارینه معارضه ایتدیکنندن قالدیرلمشدر .

شوالتی سیمره نك تاریخ بناسی ، زمان حدوثی و بونلرده
اقامت ایدن ذواتك سلاله سی تدقیق اولونورسه ابتدا برنجی
سلطان مسعود ؛ ظاهر اما سیه ده برشهر جدید انشا و (سیموره -

سمره) نامیله توسیم ایتمش ، بعده اولادی شو مدینه سلجوقیه ده
 اوطور مش و ۶۵۸ تاریخدن اعتباراً تاتارلرک نفوذی قائم اولدقه
 قوجه آسیایه حکم ایدن آل سلجوقک بدبخت اولادی ، نفاق
 وجهالت یوزندن پریشان اوله رق پراکنده صورتده اماسیه
 لواسنک برر کوشه سنده اقامت ایتدکلری ، وبویوک دده لرینه
 تقلیداً اوطوردقلری یرلره سمره نامنی ویردکلری اکلاشیلیر .
 بناء علیه : سمره اماسیه ؛ اصل اولوب دیگر بشی بو اصلک
 فروعی در . شمدیکی حالده اماسیه ده حزین بر صورتده هرکسه
 عرض ملال ایدن (تربه مسعودیه) دن ماعدا هیچ برندن
 بر اثر قالمه مشدر . فسیحان الله الحی القيوم ولا حول ولا قوه
 الا بالله العلی العظیم .

سکنز جلد اوزره ترتیب ایدلمش اولان اماسیه تاریخنک
 مقدمه سی ، یعنی برنجی جلدی بوراده ختام بولدی . دیگر
 جلدلری ده مصارف طبیعته ک حصولته موقوفاً دردست طبع در .



خطا و صواب جدولی

صواب	خطا	سطر	صفحه
نصایح	نصایح	۱۳	۳
انظار	الظار	۱۷	۴
تقویم	قویم	۶	۱۰
رباعها	رابعها	۱۳	۱۲
هجرتك	هجرتدلر	۹	۱۶
اماسیسه	اماسیسه	۱۷	۱۹
بوصفته	صفتله	۱۶	۲۳
جنوبنده	جنوبده	۱۶	۲۴
یکپاره	بکپاره	۱۳	۲۶
قایریلوس	هرقلوس	۱۲	۴۴
نوح	توح	۴	۶۷
قاج	فاج	۱۹	۷۰
ممی	محمی	۳	۸۰
کتبخداسی	کتبمذاری	۴	۸۰
ذخیره	ذخیره	۱۴	۹۹
علمیه	علیه	۲۱	۱۰۳
ایکی اولوب بری فضله در	اولمق	۱۰	۱۰۴
تیین	تیین	۱۷	۱۰۴

صواب	خطا	سطر	صحیفه
عبادالله	عبادالله	۶	۱۱۳
ایتمکده	ایتمکده	۹	۱۲۷
دبویی	دبویی	۸	۱۲۸
ایچ	ایچ	۱۶	۱۳۰
۸۹۹	۸۷۹	۱۷	۱۳۹
شریفک	شرینک	۵	۱۴۷
مناسبتله	مناسبتله	۱۶	۱۴۸
سوادیه	سودیه	۹	۱۵۱
بوسطر تمامیلہ فضلہ در	۴۷ کول مدرسه	۱۸	۱۶۱
فضلہ در	۸۱۳ ده	۸	۱۶۶
فضلہ در	{ حفیدی شمس الدین احمد جلی	۹	۱۶۶
تجدیداً	تجدد	۴	۱۶۶
وعظیہ	وعیظہ	۶	۱۶۷
واوکندہ بر چشمہ بنا	واوکندہ بنا	۷	۱۶۷
محدود	محدرد	۱۸	۱۶۹
غرب	شرق	۱۷	۱۷۵
شرق	غرب	۲۰	۱۷۵
لطیفنہ	لطیفہ	۱۹	۱۷۶
حزۃ نکاری افندی	حجرۃ نکاری دل	۵	۱۹۴
سلجوقیہ	سلجوقہ	۱	۱۹۸

صواب	خطا	سطر	صفحه
سنان	ال	۳	۲۰۱
عیسی	عیس	۲۱	۲۰۸
انجق	اتجق	۱۴	۲۲۳
اسحاق	الیاس	۱۳	۳۳۵
ناتارلری	تار تارلری	۲۱	۲۵۶
فاطمه	فاطمه	۱۰	۲۶۸
مکرر	صحیح بخاری	۵	۲۷۰
بك	بك	۱	۲۷۵
وفاتيله	وفاتيله	۹	۲۸۷
كادكلان	حقاله	۱۹	۲۸۸
اشتهار	اتهار	۲۱	۳۲۴
{ مؤید	مؤید	۱۵	۳۷۷
	مؤید	۲۱	۳۲۷
كادكلان	كلاكلان	۱۸	۳۴۹
۱۲۱۸	۱۱۱۸	۱۷	۳۵۲
الوجره	انقره	۱۲	۳۶۷
مدرسه	مدسه	۱۲	۳۶۸
ناریخی	ناربخی	۱۴	۳۷۳
دواتدار	داواتدار	۵	۳۹۷
مهردادلر	مهردارلر	۱۲	۳۹۸
قره مصطفی پاشا	قره مصطفی	۷	۴۰۸

برنجی جلدك فهرستی

۸	اماسیه بلده سی	
۱۰	اماسیه به دأر اقوال مورخین	
۱۲	اماسیه نك مدایحی	
۱۴	اماسیه نك باینسنه دأر معلومات	×
۱۷	آماس لفظنه دأر تدقیقات	
۲۱	اماسیه نك اوصاف تاریخیه سی	×
۲۴	اماسیه نك چقالار جهتی	—
۲۶	قره قبا جهتی	—
۲۷	قیا پاشا وعجم علی صولری	—
۳۲	چقالارك وجه تسمیه سی	—
۳۴	فرهاد طاعی و حکایه سی	۲
۴۱	ونکه دأر ایضاحات	×
۴۶	زنجیرلی قبا و تسمیه سی	×
۴۸	بالوس قیاسی و لقمان	
۵۰	بکسر سراینه دأر معلومات	×
۵۶	اماسیه نك ایچ قاعه سی	×
۶۱	خرشنه قاعه سی	×
۷۱	جیلانبولی	×

- ۷۵ اما سیه ده مغارملر
۸۲ شېخ جوعی و نام قدیمی
۸۵ ایلتنکین محله سی
۸۹ یشیل ایرماق و کوپرلر
۹۵ چکه رک و ترس اقان ایرماق لری
۱۰۰ اما سیه نک اسکی زمینی و آناری
۱۰۵ حروف هجا اوزره اما سیه محلاتی
۱۱۰ بایزید پاشا جامی
۱۱۵ بورمه مناره جامی
۱۱۸ کولوس موقعی
۱۲۱ جامع اندرون
۱۲۳ چریباشی جامی
۱۲۴ شېخ قریق
۱۲۶ سلطان بایزید جامی
۱۳۵ حضر پاشا محله سی و آناری
۱۴۰ زیاره محله سی
۱۵۴ فتحیه جامی و محله سی
۱۶۳ طورمطای جامی
۱۶۴ یورکچ پاشا جامی
۱۶۸ محمد پاشا جامی
۱۷۱ تیمارخانه و یاقوتیه

- ۱۷۹ اما سیه ده تربلر
۱۸۱ انبارلی اولیا تربه سی
۱۸۶ اینکگر تربه سی
۱۸۸ پیر الیاس تربه سی
۱۹۲ بورمه مناره ده جمودار تربه سی
۱۹۵ حلقه لی دده تربه سی
۱۹۶ خلفت غازی تربه سی
۱۹۹ سلطان مسعود تربه سی X
۲۰۱ شاد کلدی بادشاه تربه سی
۲۰۲ شهزادگان تربه سی
۲۰۳ کولک مدرسه ده شهیدلر تربه سی
۲۰۵ طورمطای تربه سی و بعض شهزدا کان
۲۱۷ اما سیه ننت بعض ادبایی و خطاطلری
۲۲۳ اما سیه ده مشایخ طریقت
۲۲۶ اما سیه ده تکیه لر
۲۲۷ چله خانه و جو یکجه و مشایخی
۲۳۰ خواجه سلطان تکیه سی و مشایخی
۲۳۵ شیخ قریق تکیه سی
۲۴۰ کوشلی تکیه سی و مشایخی
۲۴۳ محمود چلبی تکیه سی و مشایخی
۲۴۶ مولویخانه و مشایخی

- ٢٥٣ یاقوتیه ویاودود تکیملری و مشایخی
٢٥٥ امامیه علمای و مدارس و ترقیات علوم
٢٦٢ امامیه مکاتب و دارالقرا
٢٦٩ وظائف و درجات علمیه
٢٧٣ امامیه مدارس
٢٧٤ آتا بک و بکر پاشا مدرسه لری و مدرسه لری
٢٧٦ بندرلی و بورمه مناره مدرسه لری و مدرسه لری
٢٨١ حسامیه مدرسه سی
٢٨٢ خضر پاشا مدرسه سی و مدرسه لری
٢٨٧ خلفت و خیریه مدرسه لری و مدرسه لری
٢٨٨ دارالحديث و دراقه مدرسه لری و مدرسه لری
٢٩٢ سلطان بایزید مدرسه سی و مدرسه لری
٢٩٤ سونقورلی و صوفیلر مدرسه لری و مدرسه لری
٢٩٥ طورمضای مدرسه سی و مدرسه لری
٢٩٨ طیار پاشا مدرسه سی و مدرسه لری
٢٩٩ عبدالله پاشا مدرسه سی و مدرسه لری
٣٠٠ عثمانیه و فاطمیه مدرسه لری و مدرسه لری
٣٠٢ فیضیه و قاضی و قیانی مدرسه لری و مدرسه لری
٣٠٦ کوجک اغا مدرسه سی و مدرسه لری
٣٠٧ محمد پاشا مدرسه سی و مدرسه لری
٣٠٩ مسعودیه و نارلی باغچه مدرسه لری

- ۳۱۰ یعقوب پاشا مدرسه‌سی و مدرسلری
۳۱۲ یورکچ پاشا مدرسه‌سی و مدرسلری
۳۱۳ اماسیه ده عمارتلی و مسافر خانه‌لی
۳۱۷ اماسیه دز ظهور ایدن رجال حکومت و مشهور سلاله‌لی
۳۳۰ اماسیه دایر یازیلان آثار
۳۳۴ محرزك ترجمه‌ حالی
۳۴۰ اقطاع و اوز ناحیه‌لی
۳۴۳ حقاله ناحیه‌سی
۳۴۵ قاسم بك و محي الدين مدرسه‌لی و مدرسلری
۳۴۸ کلدکلان ناحیه‌سی
۳۵۰ حاجیکوینی قضاسی
۳۵۶ کومش قصبه‌سی
۳۵۹ خلیل پاشا مدرسه‌سی و مدرسلری
۳۶۱ حوضه قضاسی
۳۶۸ فیروز اغا مدرسه‌سی و مدرسلری
۳۷۲ کویری قضاسی
۳۸۰ زیتون ناحیه‌سی
۳۸۴ لادیک قضاسی
۳۹۰ مجید اوزی قضاسی

- ۳۹۴ علوان چلبی ناحیه‌سی
۳۹۶ واری ناحیه‌سی
۳۹۷ مرزیفون قضاسی
۴۰۶ زوغو وکلکراس ناحیه‌لری
۴۰۸ طاشان طاغنه دائر معلومات
۴۰۹ سمره واولاد ساجوق حقنده ایضاحات





فیثائی ۶ غرو شدو



حکمت

مطبعة اسلامیه سی

نفاست خصوصنده هیچ بر مطبعه دن کری قللاز ، لکن قیاعت
خصوصنده رقیب ایو قدر . طبع قیس و رنگی ایشلر ایچون
زنکین ادواته مالکدر .